


This is a reproduction of a library book that was digitized by Google as part of an ongoing effort to preserve the information in books and make it universally accessible.

GoogleTM books

<http://books.google.com>





Ex libris Bibliothecæ quam Illustrissimus
Archiepiscopus & Prorex Lugdunensis
Camillus de Neufville Collegio S S.
Trinitatis Patrum Societatis J E S U
Testamenti tabulis attribuit anno 1693.

14957
10.8.2 bis p. 1643

Franchières
(Year de)

LA

841595

FAVCONNERIE

DE IEAN DE FRANCHIERES,
GRAND PRIEUR D'AQVITAINE, AVEC TOVS
les autres auteurs qui se font peu trouuer traictans de
ce subiect.

*De nouveau reueüe, corrigee & augmentee, outre
les precedentes impressions.*



A PARIS,

Pour Felix le MANGNIER, rue neufue nostre Dame
à l'image S. Iean Baptiste: & au Palais en la gallerie
allant à la Chancellerie.

M. D. LXXXV.

AVEC PRIVILEGE DV ROY.



EXTRAIT DV PRIVILEGE DV ROY.

PAr grace & priuilege du Roy, il est permis à Abel l'Angelier & Felix le Mangnier Libraires iurez en l'Vniuersité de Paris, d'imprimer ou faire imprimer les liures intitulez, *la Venerie de Iaques du Fouilloux, & la Fauconnerie de Iean des Franchiers &c.* les susdicts liures reueuz, corrigez & de beaucoup augmentez. Et sont faictes tres-expresses defenses à tous Imprimeurs & Libraires d'imprimer ou faire imprimer ny exposer en vente les susdicts liures, ny parties d'iceux augmentez ou abrezgez, sur peine de confiscation de tous les liures qui se trouueront estre imprimez, d'amende arbitraire, & de tous despens, dommages & intereſts enuers les susdicts l'Angelier & Mangnier, & ouure voulôs qu'en mer-tant ce present extrait du priuilege, il soit tenu pour deüment signifié comme plus amplement est declare és lettres donnees à Paris le pre-mier iour de Mars 1585.

Par le Conseil.

LE COINTE.



A TOVS AMATEVRS

DV PASSETEMPS ET VERTVEVX

exercice de la Fauconnerie Salur.

A PRES auoir imprimé vn traicté de la Venerie, il nous a semblé cōuenable de mettre aussi en lumiere ces presens liures concernans la Fauconnerie : d'autant qu'outre ce que ces deux exercices ont quelque similitude, & s'accompagnent l'un l'autre, ils sont aussi inuentez à mesme fin, qui est d'accoustumer les hommes au labeur, & les rendre plus adroicts aux armes: deliurer le peuple des bestes & oiseaux qui luy portent dommage: & quasi par maniere de guerre chasser ses ennemis, & seruir à la Republique. Et sont aussi moyens honnestes pour euitier oisiveté, mere de tous vices, alleguer les ennuis qui suruiennent quelquefois, & donner plaisir honneste à l'homme, pour lequel Dieu a faict toutes choses.

En la Venerie on pratique plusieurs inuentions pour surprendre les bestes, quelques rusees qu'elles soient. Et n'y en a point de si furieuses, qui ne puissent estre prinſes ou aux rets, ou à force, ou par autre industrie du bon Veneur: & avec ce il n'y a musique plus harmonieuse, que les abbois d'une meute de chiens, avec la trompe du Veneur, dedans vne forest.

La Fauconnerie aussi n'est pas moins louable & recreatiue: car les Fauconniers ne prennent peu de plaisir à traicter & dresser les oiseaux, & les rendre prests à voler. A quoy ils sont si affectionnez, qu'ils delaissent toutes voluptez deshonestes pour y vacquer: tellemēt qu'on dit en commun prouerbe, que iamais bon Fauconnier ne fut mal conditionné.

Mais quand ils les voyent au partir de leurs poings passer les nūes, fendre le ciel, se perdre de veüe & donner poincte, se fondre en bas sur

* ij

leur gibbier, ou faire les autres deuoirs, qu'ils rendent & donnent cōme par les mains à leurs maistres la proye qu'ils desirent, se rendans de rechef à leur seruice & subiection : c'est vn passetemps & plaisir si grād, qu'il ne cede en rien à celuy de la Venerie. Et voilà comment ceste ancienne contention tant debatüe entre les Veneurs & Fauconiers, à sçauoir laquelle est à preferer à l'autre, a esté iusques icy indecise. Tant y a que l'une & l'autre est si recommandable, que les Rois, Princes grands Seigneurs, & autres esprits nobles & bien nez, ne trouuent passetemps plus vertueux, ne plus digne de leur grandeur, que cestuy-cy.

Or nous esperons que ces liures seront d'autant plus recommandables que les anciens nous en ont donné moins de cognoissance : car il en ont si peu escrit, qu'on doute s'ils l'ont pratiquée. Je laisse le iugement aux plus doctes, qui ont amplement leu & feuilleté les aucteurs.

Le premier a esté composé, ou plustost rassemblé & extrait de plusieurs pieces çà & là esparles sans aucun ordre, par Iean de Frāchieres, Cheualier de l'ordre de l'Hospital de S. Iean de Hierusalem, Commandeur de Choisy en France; retirees non sans grand labeur, des memoires & brouillars de trois Maistres fort sçauans & renommez en cest art: sçauoir est Molopin, Fauconnier du prince d'Antioche, frere du Roy de Chipre: Michelin, Fauconnier du Roy de Chipre: & Aimé Cassian, Grec de nation, Fauconnier des Grands Maistres de l'isle de Rhodes.

Le second est vne Fauconnerie de Guillaume Tardif, du Puy en Vellay, Lecteur du Roy Charles huitiesme, & dedice à sa Maiesté.

Le tiers est la Volerie de messire Arthelouche de Alagona, Seigneur de Marauecques, Conseiller & Chambellan du Roy de Sicile.

Le quatriesme & dernier est vn recueil de tous les oiseaux de proye qui seruent à la Volerie & Fauconnerie, par G. B.

Icy donc sont recueillis & mis par ordre tous les secrets de cest art, observez par long vsage & bien experimentez: afin que le temps glouton deuorateur de toutes choses, n'en esgare la souuenance : & que d'autāt plus soient aduancez les nobles esprits adonnez au plaisir du Vol du Faucon, & à la chasse oiseliere.

TABLE DE LA FAVCONNERIE DE

F. IEAN DE PRANCHIERES, GRAND

Prieur d'Aquitaine.

Le premier liure.

DE la différence & diuerse nature des Faucons. *fueil. 1. a*
Du Faucon dict Gentil, & de sa nature. *mesf. fueil.*

Du Faucon dict Pelerin, & de sa nature. *2. a*

Du Faucon dit Tartaret, & de sa nature. *la mesf.*

Du Faucon dit Gersault, & de sa nature. *3. a*

Du Faucon dit Sacre, & de sa nature. *mesf. fueil. b*

Du Faucon dit Lanier, & de son naturel. *la mesf.*

Du Faucon. Thanisian, & de sa nature. *4. a*

De quelques autres oyseaux de leurre & de poing, & de leur nature. *mesf. fueil. b*

Quels moiens faut garder pour faire bien voler les oyseaux, tant pour ruiere, que pour champs. *5. a*

Comme il faut diuire le Faucon à bien voler pour les champs. *mesf. fueil. b*

De la volerie des champs pour la gros. *la mesf.*

Les moiens qu'on doit obseruer pour bien instruire & gouverner Faucons & autres oyseaux, soient niais ou bagars & les apprendre à voler & oyseler. *6. b.*

De la difference des Faucons, & de leur

naturelles conditions. *7. b*

D'aucuns Faucons Gentils, differens des autres. *la mesf.*

De la difference qu'il y a entre le Faucon Pelerin, & le Faucon Gentil & comme on les pourra remarquer & discerner l'un de l'autre tant à la composition du corps qu'à la maniere de voler. *8. b*

Le second liure.

Enseignemens pour conseruer tous oyseaux de proie en santé. *10. b*

Autre remede pour oster rheumes & eaux de la teste en lieu de tirer. *12. b*

Autre recepte pour garder les oyseaux en santé. *13. a*

Les causes & signes du mal de la teste, qui auient pour auoir donné aux oyseaux trop grosses gorges, & de males chairs: & les remedes propres pour les guerir. *mesf. fueil. b*

Remedes pour guerir l'oiseau qui a mal aux yeux, à cause du rhume, ou distillation de cerueau. *14. b*

Moien aise & propre pour conseruer l'oiseau en santé, & en bonne ataine. *la mesf.*

Remedes pour le mal de rhume enraciné de long temps, & qui procede de froidure. *15. a*

Autre remede pour la maladie de suffocite. *16. a*

- Autre remede pour descharger l'oiseau du rheume de la teste.* là mesm.
- Remede pour le mal des oreilles qui vient aux oiseaux de rheume ou froidure.* mes. fueil. b
- Remede pour mal de paupiere, qui aduient par froidure de rheume.* 17. a
- Du mal de l'ongle, qui viêt en l'œil des Faucons, de ses causes & signes, & des remedes propres pour le guerir.* mesm. fueil. b
- Remedes pour guerir l'oiseau, qui a eu coup en l'œil.* là mes.
- Remedes pour le mal de la taye en l'œil des oiseaux, qu'aucuns appellent, verole.* 18. a
- Du mal de la couronne du bec, de ses causes & signes, & des remedes propres pour le guerir.* 19. a
- Remedes pour le mal des narilles & du bec.* là mes.
- D'un autre feu, qui se donne aux narilles des oiseaux pour les embellir.* mes. fueil. b
- Du mal de barbillons, qui vient dedans le bec des oiseaux, de ses causes & signes, & des remedes propres pour le guerir promptement.* là mesme
- Du mal de chancre, de ses causes & signes, & des remedes propres pour le guerir.* 20. a
- Du mal de la pepie qui vient aux Faucons, sur la langue à cause du rheume, de ses causes & signes, & des remedes propres pour le guerir.* mes. fueil. b
- Du mal de palai, qui enfle aux oiseaux par froidure & rheume de teste, de ses causes & signes, & des remedes propres pour les guerir.* 21. a
- Du mal des sangsues, de ses causes & signes, & des remedes propres pour le guerir.* mes. fueil. b
- Du mal des maschoires, qui vient dedans le bec, de ses causes & signes & des remedes propres pour le guerir.* 22. a
- Du mal de bec, de ses causes & signes, & des remedes propres pour le guerir.* là mesme
- Du haut mal ou epilepsie, dont les oiseaux tombent par fois, de ses causes & remedes propres pour les guerir.* mes. fueil. b
- Le tiers liure.
- Du mal de la pierre ou de la croye, qui aduient aux boyaux ou bas fondemêt des oiseaux: de ses especes, causes & signes, & des remedes propres pour le guerir.* 23. b
- Du mal des filandres, qui aduient aux Faucons en plusieurs parties interieures de leurs corps, & des remedes pour le guerir: & de ses especes, causes & signes, & premierement des filandres de la gorge.* 26. a
- D'une autre seconde espede de filâdres, qui viennent aux estreines & aux reins des oiseaux: & des remedes propres à les guerir.* 27. a
- D'une autre espede de filâdres, qui viennent aux cuisses des Faucons: & les remedes pour les guerir.* mes. fueil. b
- D'une autre espede de filâdres, que l'on nomme vulgairement aiguilles, & sont pires que toutes les autres: & des remedes pour les guerir.* là mes.

Des apostumes qui s'engendrent aucu-
nefois dedans le corps des oiseaux: de
leurs causes & signes, & des reme-
des pour les guerir. 28.b

Du mal de foye aduenant aux oiseaux,
de ses causes & signes, & des reme-
des propres pour le guerir. 29.a

Du mal de chancre qui vient de cha-
leur de foye, & des remedes pour le
guerir. mes. fueil. b

Du mal de pantaüs, des trois especes d'i-
celuy, des causes & signes, & des
remedes pour le guerir nommément
le pantaüs de la gorge. 30.a

De la seconde especes de pantaüs, qui vient
de froidure, des causes & signes, &
des remedes qui y sont propres.
mes. fueil. b

De la tierce especes de pantaüs, qui tiens
es reins & rongnons, de ses causes si-
gnes & accidens: & des remedes
propres pour la guerir. 31.b

Du mal de morfondure, qui aduient à
l'oiseau par quelque accident: des si-
gnes & causes dudit mal, & des
remedes propres pour le guerir. 32.b

Du mal vulgairement appelé le mal
subtil, de ses causes & signes, & des
remedes propres pour le guerir.
la mesme.

Autres remedes propres pour l'oiseau
qui n'enduit, & ne peut passer sa gor-
ge. 33.b

Autres remedes pour guerir l'oiseau qui
remet sa chair, & ne la peut enduire.
34.b

Autres remedes propres pour remettre
l'oiseau degousté, & luy faire reuenir

l'appetit de manger. 35.a

Autres remedes pour remettre sus un
oiseau, quand il est trop maigre. mes.
fueil. b

Autres remedes pour un oiseau qui est
alenty & paresseux, & n'a volonré
de voler. la mes.

Le quart liure.

Du mal appelé la taigne, qui vient aux
aïstes & queues des oiseaux, & de ses
especes. 36.b

De la premiere especes de la taigne, & de
ses causes, signes & remedes. 37.a

De la seconde especes de taigne, de se
causes & signes, & des remedes pro-
pres pour la guerir. mes. fueil. b

De la tierce especes de taigne de ses cau-
ses & signes, & des remedes propres
pour la guerir. 38.a

Si un oiseau à l'aïste rompue par quel-
que accident, quels moïens il faut te-
nir pour la luy remettre, & le guerir.
mes. fueil. b

Si l'oiseau ne soustient biès ses aïstes, quelle
en est la cause, & quels sont les moïens
d'y remedier. 39.a

Si l'oiseau a l'aïste disloquée & demise
hors de son lieu, quels moïens faut te-
nir pour la remettre & le guerir. mes.
fueil. b

Si l'oiseau a de mal-auenture l'aïsteron
rompu, quels remedes sont propres
pour le luy racoustrer. la mes.

Si l'oiseau a la iambe ou cuisse rompue,
quels moïens il faut tenir pour la re-
mettre & guerir. 40.a

Si l'oiseau est blessé de coup, quels moïens
& remedes sont propres pour le bien

- traiter & guerir. là mesf.
 Quand l'oiseau a les pieds enflés, quel-
 les en sont les causes, & les moiens
 propres pour y remedier. 41.b
 Quand les oiseaux ont les cuisses ou ia-
 bes enflées, quelles en sont les causes, &
 les moiens esprouuez pour les guerir.
 42.a
 Si les oiseaux ont clous ou galles aux
 pieds, que lon appelle podagres, quelles
 en sont les causes, & les moiens d'y
 donner remede. mesf. fueil.b
 Si un oiseau se gratte ou mäge les pieds,
 quelle en est la cause, & quels moiens
 faut tenir pour y obuier. 43.b
 Quels moiens sont à garder quand on
 veut serrer ou estoupper les veines des
 iambes de l'oiseau, pour le garentir des
 enfleures, clouds, galles, podagres & de
 mangeaisons dessus-dictes. 44.b
 Quels moiens on doit tenir, quand on
 veut rompre la iambe à l'oiseau, pour
 le garètir des podagres & autres ma-
 ladies de pieds. 45.a
 La façon de mettre les oiseaux en mue:
 & les moiens qu'on y doit tenir pour
 les conseruer en santé & alegresse.
 mesf. fueil.b
 Quels moies sont propres pour auancer
 un oiseau de muer. 46.a
 Quels moiens sont bons à garder, pour
 faire que tous oiseaux se portent bien
 en la mue, & qu'ils en puissent sortir
 sains & drus. mesf. fueil.b
 Comment on doit traiter Faucons apres
 qu'ils les a leuez hors de la mue. là mesf.
 Si, quand, & comment on doit donner
 l'aloès aux oiseaux volans. 47.b
 Si l'oiseau s'est rompu les ongles, quels
 moiens & remedes sont propres pour
 les faire reuenir, & les guerir. 48.a
 Quand les Faucons font des œufs en la
 muë ou dehors, & puis en deuiennent
 malades & en danger de mourir, par
 quels moiens on y doit remedier. 48.a
 Quels moiens doit tenir le Fauconnier
 voulant prendre Faucons en l'aire on
 au nid. mesf. fueil.b
 Par quels moies on peut voir si les Fau-
 cons ont poulx ou mousches: & s'ils en
 ont, comment on les peut oster, ou fai-
 re mourir. 49.a
 Quand l'oiseau pend & traîne l'aisle,
 par quel moien on la luy peut faire le-
 uer & soustenir. mesf. fueil.b
 Si les oiseaux se sont cassé, froissé ou rō-
 pu quelques pennes des aisles, ou de la
 queue, par quels moiens on les doit ra-
 construer, & enter s'il en est besoin. là
 mesme.
 Quand une penne est arrachée par for-
 ce, ou tirée en sang, quel moien il y a
 de la faire reuenir sans offense de l'oi-
 seau. 50.b
 Si l'oiseau a l'alcime puante quelle est
 la cause, & quels moiens sont bons
 pour y donner remede. 51.a
 Conclusion de l'auteur. mesf. fueil.b

FIN.



DE L'ART DE FAU- connerie liure premier.

De la difference & diuerſe nature des Faucons.


C H A P . I.



ELON ce que i'ay peu apprendre des trois maiſtres Fauconniers deſſusdits, il y a ſept eſpeces de Faucons de leurre: leſquels ils ont tous compris ſoubs ce nom general de Faucon, pource que tous bons Fauconiers (leſquels auſſi ont pris leur nom du Faucon) ont de tout temps appellé Faucon tout oiseau de leurre & de proye. Et neantmoins ont-ils donné à chacune deſdites eſpeces vn nom propre & particulier: comme auſſi les ayans ainſi particulierement veuz, cogneuz & nommez, ils les ont puis apres affaittez & introduitz chacun ſelon ſa complexion & nature. Et pource mettrons nous orendroict premierement leurs noms pour fin de ce premier chapitre : puis aux chapitres enſuiuans declarerons de chacun à part & par ordre la complexion & la nature. Ces ſept eſpeces donques ſont.

Le Faucon, dit Gentil.
Le Faucon, dit Pelerin.
Le Faucon, dit Tartaret.
Le Faucon, dit Gerfault.
Le Faucon, dit Sacre.
Le Faucon, dit Lanier.
Le Faucon, dit Thuniſſan.

A

*Du Faucon dit Gentil & de sa nature.*

CHAP. 2.

LE Faucon dit Gentil, de sa nature est bon Haironnier dessus & dessous: est bon pareillement aux Rousseaux ressemblans aux Hairons, aux Espluquebaux, aux Poches, aux Garfotes, & à plusieurs autres especes d'oiseaux: & principalement est bon pour la ruiere. Cestuy Gentil soit prins niais pour mettre à la Guë, car s'il n'estoit niais il ne seroit pas si hardy: pource que venant du nid il n'a iamais rien cogneu. A ceste cause si vous l'oiselez premiere-ment sur la Gruë, il en sera plus vaillant, & en fin deviendra fort bon Gruyer, pource qu'auparauant il n'auoit point vëu d'autre oiseau.



LE Faucon dit Pelerin est naturellement vaillant, hardy, & de bon affaire : & est moult courtois à son maistre. Cestuy Faucon est dit, Pelerin, pour ce qu'il est oiseau de passage : & va de region en autre comme qui fait vn pelerinage. Et encores dit on de luy, que iamais ne se rencōtra homme, fust Chrestien ou infidele, qui ait peu dire auoir ven ou trouué. ou sceu, où le Faucon fait ses petits, ny son aire : ains se prent tous les ans enuiron le mois de Septembre en la saison qu'il fait son passage. Quand vous en aurez recouuré aucun, aduisez premiere-ment à l'affaictier, leurrer, & assseurer comme il appartient : puis le pourrez faire à la Gruë, à l'oiseau de Paradis (qui est vn peu moindre que la Gruë) au Hairon, aux Rouffeaux, aux Espluquebaux, à Poches, à Garfotes, & à toutes autres sortes d'oiseaux de riuere. Aussi le pourrez vous oiseler & aduire pour les champs à l'Oye sauuage, aux Oustardes, aux Olins, aux Fausses-perdris, & à toutes manieres d'oiseaux de menu gibier. Car de sa nature il est prompt & propre à tout faire, docile & aisé à apprendre.

Du Faucon dit Tartaret, & de sa nature.

CHAP. IIII.



LE Faucon dit Tartaret, est vn oiseau qui n'est pas commun par tout pays, ains est de passage aussi bien que le Pelerin. Cestuy Faucon est plus grand & plus gros que le Pelerin, roux dessus les aïssles, au surplus bien empieté & ayant longs doigts. Aucuns dient que ce sont Pelerins d'autre espeece : & de fait les Tartarets sont bien peu differens de ceux que vulgairement on appelle Pelerins : Tant est que Tartarets sont oiseaux bien volans & hardis à toutes manieres d'oiseaux, & se peuvent oiseler & aduire à tout ce qui a esté dit du Pelerin. Or faictes cestuy Tartaret & pareillement le Pelerin, leurrer & voler pour tout le mois de May & de Iuin : car ils sont tardifs en leurs mues : mais aussi

LIVRE PREMIER.

quand ils commencent à muer, ils se despoillent promptement. Cestuy Faucon se dit Tartaret de Barbarie, pource que communément il fait son passage par le pays de Barbarie, où il s'en prend plus grand nombre qu'en aucune autre contrée. Comme l'ont aussi pris les Faucons Pelerins és Isles de Chypre, Candie, Rhodes, & autres Isles del' Archipel. Neantmoins en ladicte Isle de Candie sont en plus grand & frequent usage les Pelerins & Tartarets qu'en tous les autres pays: Pource que les nobles Candiots les font & aduifent plus à la Gruë, qu'à aucuns autres oiseaux. De fait là plus qu'en autre lieu se treuuent Tartarets & Pelerins singulierement bons & adroits.

Du Faucon dit Gerfaulx & de sa nature.

CHAP. V.



DE LA FAVCONNERIE.

3



LE Faucon dit Gerfault est vn Faucon de grande force & de rare puissance: singulierement bon oyseau, speciale-ment apres qu'il a mué. Le Gerfault est bien empieté, & a longs doigts, & les serres fortes. Il est fin & hardy de sa nature:& d'autant en est-il plus fort à faire. Car il veut auoir la main douce,& le maistre debonnaire. Cestuy Faucon fait ses petis & son aire és parties de Prusse & de Damnemarc deuers Lubec. Mais communement il se prend és confins de l'Alemaigne en faisant son passage. Le Gerfault de sa nature est propre à tout vol: & le pouuez oiseler& mettre à toutes menieres d'oiseaux de riuieres & de champs, comme dit a esté du Pelerin & Tartarer.

Du Faucon dit Sacre, &c de sa nature. CHAP. VI.



A ij

LIVRE PREMIER

LE Faucon dit Sacre, est vn Faucon assez grād, & plus grād que le Faucon Pelerin: toutesfois laid de pēnage, & court empieté. Mais si est il de grande force, & hardy à toutes manieres de voleries, autant ou plus que le Pelerin & le Tartaret: Toutesfois n'est-il point si franc pour faire grans efforts sur la Grnē, ou faire vn semblable fort vol, comme est le Pelerin. Maistre Molopin dit que cestuy Sacre est oiseau de passage: & qu'il ne s'est rencontré homme, quel qu'il fust, qui ait peu dire auoir veu, iceu, ny trouué le lieu ou vn Sacre feist son aire & ses petis. Combien qu'ès cōtrees où il se prend, l'on die qu'il vient de Rouffie & de Tartarie, & de delà la mer Maieur. Pource qu'ès voyages que lon fait tous les ans vers les Indes & Isles Orientales, on le prend vers la Natolie & les cōtrees de leuant tant en Chipre, Rhodes, & Candie, comme és autres Isles de l'Archipel. Le Sacre encores est plus enclin & plus propre de sa nature pour la volerie des champs, comme pour l'Oye sauuage, Butors, Gelines de bois, Phaisans, Perdris, Lieures, & toute autre sorte de gibier: et est moins dāgereux en son viure: mais aussi est meilleur pour la riuere le Sarret, que le Sacre forme.

Du Faucon dit Lanier, & de son naturel.

CHAP. VII.

LE Faucon, dit Lanier, est assez commū en tout pays, spécialement en France & és pays circōuoisins. Car il fait volontiers son aire & ses petis aux bois sur les hauts arbres, ou és hautes roches, selon l'aissance des pays où il se retrouve. Cestuy Lanier est plus petit de corsage que le Faucon gentil: & est fort beau de pennage, principalement apres la muē: & est plus court empieté que aucun des autres Faucons. et dit maistre Michelin que le Lanier qui a plus grosse teste, & dont la couleur des pieds tire plus sur le bleu, soit niais ou sot, est meilleur que les autres. De cestuy Faucō pouuez vous voler en riuere, & en plusieurs autres manieres de volerie. Specialement est bon par les prez pour battre les Lieures, voler Perdris, Phaisans, Chahuans, & toute autre sorte de menu gibier. Il n'est point dāgereux en son past ny en son viure: car il supporte mieux son past gras, qu'aucun des autres Faucons de gente penne.



Du Faucon, Thunisien & de sa nature. CHAP. VIII.

LE Faucon dit Thunisien, approche assez pres de la nature du Faucon Lanier: car il a semblable pennage & semblable pied; toutesfois a-il le corps plus delié, plus long deuant, & mieux croisé, & la teste plus grosse & plus ronde. Il est appellé Thunisien, pource qu'il fait son aire & ses petis au pays de Barbarie, enuiron la ville de Thunis, qui est l'une des principales villes de Barbarie, en laquelle le Roy du pays reside avecques ses Gentils-hommes, qui font grand compte de tels oiseaux: qui naissent là, & y font bien recueillis, comme les Laniers en France. Le Faucon Thunisien est bon à ruiere, & à tous oiseaux hantans

LIVRE PREMIER

sur icelle. Encores est il bon aux champs (ne plus ne moins que le Lannier:) bat volontiers les Lieures, & vole tout autre gibier. Cestuy Faucon n'est pas commun ne congnu par tout pays, ainsi que sont autres oiseaux: & ne s'en trouue gueres ailleurs que audit pays de Barbarie & de Thunis.

De quelques autres oiseaux de leurre & de poing, & de leur nature. CHAP. IX.

MAISTRE Aimé Cassian dit, qu'il se trouue encores quelques autres oiseaux de leurre & de poing, propres au deduit de la volerie, comme, le Hobier, l'Espreuier, l'Autour, & l'Esmerillon: combien que l'Esmerillon pour sa petitesse & delicatesse ne vole guieres que aux Alouettes & semblables oisillons, & que rarement il prenne le Cailleteau & le Perdriau. Les trois autres comme ils sont plus grands & plus forts, aussi sont ils les vols plus beaux, & plus hautes entreprises. Quelques-vns ont voulu dire qu'on pouuoit dresser & leurrer le Corbeau & le Milan: pource que tous deux sont oiseaux de proye: lesquels lon voit iournellemēt chasser de nature, & pour suiure leur gibier. Mais ce ne sont bestes si nobles comme Faucons & Espreuiers: lesquels semblent plus s'efforcer à faire vol grand & hautain pour quelque sentiment de gloire & honneur de la victoire, que pour appetit de la proye. Où au contraire Milans & Corbeaux ne volent & suiuent gibier que pour la cuisine, & pour contenter leur appetit affamé. Aussi ne se mettent ils iamais à suiure ne Gruë, ne Hairen, ny semblables oiseaux de combat: ains seulement Poulets & Pigeonneaux & semblables, qui n'ont ne vol ny autres defences pour se sauuer de leur bec & griffes. Et ceste est la cause pour laquelle les Gentils-hommes & nobles esprits ne s'amusent à leurrer & affairer tels oiseaux, villains, poltrons, & tripiers de nature: & si quelqu'un s'est trouué qui en ait voulu prendre la peine, ce a plus esté par curiosité, que pour plaisir qui en peust reuenir.

Quels moyens faut garder, pour faire bien voler les oiseaux, tant pour riuierè que pour champs.

CHAP. X.

MAISTRE



Maistre Molopin estoit d'aduis, que l'oiseau volant pour riuere, par celuy qui desiroit luy voir faire bon vol, deuoit estre lasché contre le vent, & au dessus de son gibier, pour luy donner autant d'auantage de sa montee. Aussi qu'il faut conduire les Faucons à l'endroit des oiseaux de riuere: & quand on les verra bien à leur point, escrire lesdits oiseaux de riuere, & les chasser en sus, en les faisant sortir hors de l'eau. Et s'il auient qu'ils faillent à se bien dresser vers la proye, il les faudra lancer à quelque poulet ou autre oiseau vis, pour les arrester, & donner bon enseignement à ces oiseaux, que de nouuel on met à voler, tant qu'ils congnoissent bien le vis, & entendent mieux ce qu'ils doiuent faire. Quant à la volerie du Heron, maistre Michelin dit, que c'est la plus noble de toutes: Aussi que le Faucon qu'on y affecte, doit estre bien instruit à congnoistre le vis, & à sçauoir monter. Que le Faucon Heronnier ne doit point estre employé à autre volerie que celle du Heron: pour ce qu'en autre volerie quelconque ne se fait telle montee, ny effort si grand, qu'au vol du Heron: partant est bien raison, que Faucons Heronniers ne soient mis plus bas, ny à moindre effort de volerie: attendu aussi qu'il doit bien suffire au Gentilhomme, ou au Fauconnier, de voir son Faucon bon Heronnier. Car si on le veut puis apres appliquer à autre legere volerie de commun gibier: il prendra incontinent vn desdain, & vne paresse telle, qu'au lieu qu'au parauant il estoit bon Heronnier, il ne le sera plus: & s'appoltronnira de sorte, qu'il n'aura plus d'enuie de voler le Heron: & se voudra arrester au commun gibier, qu'il aura trouué le plus aisé, quittant & abandonnant toute violence & courageuse hardiesse: qui reuient à grand dommage & regret à celuy, qui auoit au parauant vn si bon Faucon Heronnier. Bien est vray, que le Sacre vole à tous oiseaux, plus aisément que tous les autres Faucons, pour-ce qu'il est prompt & franc, & commun à tout: mais il est grossier d'entendement, & mal-aisé à façonner, combien qu'en fin il se rende bon, à qui voudra prendre le trauail, qui y est necessaire.

Comme il faut d'aire le Faucon, à bien voler pour les champs.

CHAP. XI.

B

MAISTRE Aimé Cassian a dit : pource que quelques seigneurs & Fauconniers prennent plus grâd plaisir aux Faucons faits pour la volerie des champs, qu'à ceux qu'on fait voler pour riuere: que pour bien instruire les Faucons au vol des champs, ils faut commencer à les faire cognoistre les chiens, & à les aymer, soit pour le poil, soit pour la plume. Car il n'est pas possible se tirer de la volerie des champs, le plaisir qu'on en desire, si les chiens ne cognoissent & ayment les oiseaux, & les oiseaux les chiens. Et cōbien que l'oiseau de sa nature soit mal-aisé à appriuoiser, & entrer en cognoissance & amitié avecques le chien, ne s'en faut point estonner. Car avec le temps, & la journaliere communication que faire on pourra de l'oiseau avecques le chien, pour l'en asseurer, auendra qu'en fin ils s'entrecognoistront & s'entraimeront. Aussi les faut-il souuent mener aux champs à la volerie: car ceste hantise fera qu'ils s'entrecognoistront, & s'accoustumeront encores d'auantage de l'un à l'autre. Et pourra-on faire bons Faucons pour les champs, si on les tient bien curez & accommodez, en leur baillant du premier, du second, & du tiers oiseau qu'on prendra, vn assez bone gorgee: & apres celà le faudra retirer petit à petit, pour le mettre en plus grand erre: car cestuy est vn bon moyen pour mieux luy faire congnoistre le vif, & en luy faisant becqueter la teste de l'oiseau prins, & en manger de la ceruelle, & de chacun autre qu'on prēdra, iusques à ce qu'on le vueille paistre à l'heure accoustumee, & lors luy faudra donner gorgee raisonnable.

De la volerie des champs pour le gros.

CHAP. XII.

IL y a vne autre volerie pour les champs, qu'on appelle, vol pour le gros: comme quand on fait voler le Faucon aux Gruës, aux Oyes, aux Butors, à l'oyseau de Paradis (qui est quasi aussi grand que la Gruë) aux Rousseaux, (qui ressemblent aux Herons) aux Espluquebos, aux Valerans, aux Poches, aux Garfotes, & à plusieurs autres sortes d'oyseaux de grossiere nature, & de cuisine. En ceste volerie les Faucons peuuent faire bon vol partans du poing, que l'on dit, à la source: toutesfois ne se peu-

uent-ils bonnement faire, & bien duire à ce vol pour le gros, pour prendre Gruës, Oyes, & autres oyseaux de fort, sans Epaigneul, ou leurette, ou autre chien appris & façonné avecques le Faucon : duquel le vol pour le gros requiert prompt & present secours, avecques toute diligence. Si pour ce vol de gros, & pour toute autre volerie que voudrez faire faire à vostre oyseau, vous le voulez rendre prompt, hardy, courageux & vaillant : il le vous faut souuent & quasi tout le iour tenir sur le poing, & le paistre de poulets (tant que vous en pourrez recouurer) enuiron l'heure de tierce : & apres qu'il sera peu, le mettre au soleil, en lieu où il ait l'eau deuant luy, à fin qu'il s'y puisse baigner, quand il luy plaira. Mesmes qu'il y puisse boire, comme bien souuent il le desire : car le boire luy fait grand bien, & par fois le prend tant à propos, qu'il le preserue de maladie. Toutesfois, quelques-fois auient, que l'oyseau beuant apres vne longue maladie, par le boire se donne la mort : d'autre-fois que par le boire il se guerit. Apres cela, soit baigné ou non, il le faut encores tenir sur le poing, iusqu'à ce qu'on s'aille coucher : & quand on se va coucher, mettre deuant luy vne chandelle ou lumiere, qui dure toute la nuit. Si d'auenture il se-
 stoit baigné : le lendemain le faudroit mettre vn' heure au soleil : & iusqu'à ce qu'il fust rechauffé : Mais s'il nes'estoit point baigné, faudroit prendre du vin & de l'eau meslez ensemble, puis l'arrouser avecques la bouche enuiron l'heure de tierce, & apres le remettre au soleil, & à faute de soleil, deuant le feu, tant qu'il soit bien sec : & si on le congnoist bien essuyé, net, & assuré, trente ou quarante iours apres on le pourra seurement mener aux champs, pour le faire voler au gibier. Lors si on void qu'il soit en bonne disposition & volonté de voler, le fraudra laisser voler à son aise : & s'il préd, luy donner à manger de l'oyseau qu'il aura prins vne assez bonne gorgée : mais si ce iour-là il ne prend rien, le faudra paistre d'vne cuisse ou aile de poule lauce en eau fresche : en le tenât tousiours sur le poing, ainsi que dit est. Le lendemain le faudra encores porter à la volerie : & si luy préd quelque chose, le traicter comme dessus, & le tenir & conduire en ceste façon, tant qu'il soit bien enoïsellé : ce pendant le gouverner & conduire tousiours, avecques prudence & sage discretion : pour ce que par fois il se pourroit mettre bas, & ne pourroit satisfaire à la force & continuation de son vol. Autres disent, que si l'oyseau se monstre rebelle au Fauconnier, qui prend peine de l'enseigner à bien voler, sera bon l'arrouser de rechef

d'eau chaudette ou tiede, puis le mettre la nuit au serain, & la matinee ensuyuant le remettre au soleil ou au feu : & quand il sera bien es-
suyé, & aura bien tiré, on pourra le porter au deduit de la volerie. Et
lors sil oiselle & prend bien, luy faudra continuer celle trempe: au-
trement pourroit-il se rendre enclin à quelque mauuais vice. Et si
voulez que les oiseaux ayment mieux le gibier, prenez de la canelle,
& du sucre candy, autant d'un que d'autre, & en faites de la pouldre:
& quand vous luy baillerez sa gorgee de l'oiseau qu'il aura prins, sau-
poudez-en ce que luy en donneretz, & vous le verrez puis apres bien
aymer son gibier.

*Les moyens qu'on doit observer, pour bien instruire & gouverner
Faucons & autres oiseaux, soient niais, ou hagarz,
& les apprendre à voler & oiseler.*

CHAP. XIII.



Aistre Aymé Calsian a enseigné, que pour bien ap-
priuoiser vn oiseau tout neuf, & le rendre à droit &
prompt au vol: est besoin en premier lieu le mettre sur
le poing, puis le chapperonner: & le veiller trois iours
& trois nuits, sans le deschapperonner ou descourir,
mesmes en luy donnant à manger. Apres ces trois
iours & trois nuits passez, il n'y aura point de danger de luy oster le
chapperon, ne de le faire manger descouvert: mais apres qu'il sera
repeu, le faudre recourir, & ne le descourir point, si ce n'est pour
le paistre, iusques à ce qu'il congnoisse bien la chair. Quand il com-
mencera de s'asseurer, il sera bon de souuent le descourir, & souuent
le recourir: car c'est le moyen de le rédre bon chapperonnier, pour-
ueu qu'il ait main douce, & gouverneur patient. Pour mieux assen-
rer vostre oiseau, & plustost aussi, sera-il bon de le porter tousiours, ou
le plus souuent que faire se pourra, aux lieux ausquels il y aura grande
compagnie, & plusieurs esbastemens. Lors qu'il sera bien assuré, pe-
tit à petit faudra le faire venir sur le poing: & en luy montrant la bar-
re, & le liant sur icelle, mettre avecques luy sur ladite barre quelque
poulailler viue, ou autre oiseau vif, le plus souuent qu'on pourra, &
luy faire plumer & manger à son aise & plaisir, iusques à ce qu'il en
ait prins gorge raisonnable. Apres que vous l'aurez ainsi aduit & fa-
çonné, par quelque espace de tēps, deux fois le iour, mesmes avec le
leurre, lequel il cognoistra & le vif aussi, vous le pourrez lors lascher

à tout la filiere (qu'on surnomme, vn Tien le bien) en le leurrât de plus loing en plus loing deux fois le iour. Et apres qu'il sera bien reclamé & bien leurré, luy faudra apprendre à roder haut en l'air, tant qu'il sache bien monter & roder. Puis apres luy faudra lascher quelque oiseau vif: & quand il sera descendu, luy laisser tenir & plumer tout à son plaisir, luy en donnant gorge competente, comme a esté dit cy dessus. Faudra aussi continuer à luy donner plaisir sur le leurre: de maniere que iamais il ne le voie, qu'il n'y ait tousiours quelque morcelet de chair lié, ou autrement attaché dessus iceluy: de fait celà luy fera tousiours aimer son leurre & son maistre, & l'engardera de iamais se perdre: & continuant d'ainsi le traicter, par l'espace de quarante iours ou environ, vous le pourrez puis apres faire seurement voler. Mais sera besoing au parauant qu'il soit baigné, & nettoié dedans le corps, & peu de chair bien luee & bien nette: & que chaque nuit on luy ait baillé les cures, qu'on a de coustume donner aux oiseaux volans. Au surplus quand vous aurez quelque oiseau niais, vous le faudra souuent paistre de poulaille, de chair de bœuf, ou de cheure: car les paissant de telle viande, elle les empeschera d'encliner à quelque fascheux & mauuais vice. Et quand ils seront bien arrestez & allongez, les faudra tenir sur le poing enchaperonner: & les penser & gouverner en la maniere dessusdite au commencement de ce chapitre. Et apres les trente ou quarante iours, mis là où il faudra voler: & au premier, second, & tiers vol, bien doucement traitez, en les retirant peu à peu, tant qu'ils demeurent en temperature de vol, en leur arroufant souuent la bouche de vin & d'eau. Car les maistres dessusdits tiennent, que les aucuns d'entre eux se veulent baigner. Toutesfois il y doit bien auoir de la discretion, pour le regard du rocher: pource qu'en fin l'oiseau pourroit estre maigre & bas, qui plus auroit besoing d'une bonne gorge, que du bain, du rocher, & de la bouche. Ce qu'il faut entendre des Faucons ou autres oiseaux, fiers de leur nature, lesquels ne veulent estre baignez.

De la difference des Faucons, & de leurs naturelles conditions.

CHAP. XIII.

B. ij



Ifferent est le naturel des Faucons & oiseaux de proie. Car les vns veulent oiseler & voler haut & gras, & les autres plus bas & plus maigres. A ceste cause doit le Fauconnier sur ce auoir bonne congnoissance du naturel de son oiseau, & bonne discretion pour le bien gouverner. Car tous Faucons sont pour voler & prendre grans & petis oiseaux, pourueu qu'ils soient selon leur nature bien gouvernez & conduis. Car les Faucons noirs sont d'une nature, les blancs d'une autre, & ceux de roux pennage d'une autre. Neantmoins ie trouue & est vray, que les Faucons blancs sont sur tous les plus hauts, & de meilleur affaire: aussi pour bien voler desirer-ils estre tenus plus hauts & plus gras, qu'aucuns autres. Aussi se trouuera le blanc Faucon, past pour past, plus gras & plus haut, que tous autres complexions d'oiseaux: & l'occasion de cela est, que le Faucon blanc est plus doux & gracieux, & plus courtois enuers son maistre en toutes ses actions: & pource s'entretient mieux en bon estat, & plus haut en sa nature & condition, qu'aucun des autres faucons.

D'aucuns Faucons Gentils differens des autres.

CHAP. XV.



N T R E les Faucons Gentils s'en trouue vne espece, qui est ordinairement de grand courage, mais au surplus d'assez peruerse nature. Aucuns les appellent Faucons Gentils d'estrange pays, & dit Molopin que telle espece de Faucons est malaisée à garder saine, comme les autres: ains se veut tenir maigre, & estre bien soignée. Car elle desire estre tenue sur le poing, & la faut faire souuent voler: pource qu'elle en vaudra, & s'en portera mieux: & s'il auenoit, que tels Faucons fussent trauallez des maladies, desquelles les autres oiseaux sont coustumieremēt vexez, ne leur faut appliquer ne donner aucune medecine: Seulement est besoing les paistre de quelque pigeon, & leur en faire boire le sang, puis emplissez vn pot neuf plein d'eau, & la faites bouillir au feu, où il n'y ait point de fumee: & l'ayant versée en vn bassin, ou autre vaisseau bien net, apres que elle sera refroidie, & comme tiede, la faudra presenter à l'oiseau: & s'il en boit, on le pourra curer & medeciner, comme on a accoustumé de faire les autres oiseaux: combien que aucunes fois, quand l'oiseau malade se met à boire, ce soit vn vray signe de sa mort: nōmeement quād



il est griuemēt malade, & la bouche luy deuient blanche & palle. Tāt est, que si vn tel Faucon se peut garder sain : il se trouuera à la fin des meilleurs qu'on puisse souhaiter : pourueu que la nuit il ne soit point tenu dehors : & quand on le voudra faire voler, qu'au-parauant il soit peu de quelque poulaille, & qu'il ait eu cure de plume avec vne iointe : s'il se trouue de bonne volonté, & en humeur de voler, lors le faudra-il laisser oïseier tout à son aise, & à son plaisir, & roder çà & là avec les autres oiseaux ainsi qu'il voudra. Et s'il ne fait tant de son deuoir, que son maistre le desireroit, mesmes qu'il ne prenne rien, ne s'en donner autre peine : car en luy continuant le dessusdict traictement, il ne peut manquer à deuenir tres - bon :

Et pour bien congnoistre, si le Faucon gentil sera pour deuenir bon, selon l'aduis de Michelin, faut auiser s'il a la teste ronde, le bec court & gros, le col long, les espaules larges, les pennes des ailes subtiles, les cuisses longues, les iambes courtes, & les pieds longs, larges, & grans. L'oiseau qui aura toutes ces conditions, bien le pourra-ton tenir pour Gentil, & à celà se pourra bien congnoistre. Le Faucon Pelerin, a la verité, auance & surmonte de beaucoup, du pied, le Faucon Gentil, car il a plus grande prise, & plus longs doigts.

*De la difference qu'il y a entre le Faucon Pelerin & le Faucon Gentil:
& comme on les pourra remarquer, & discerner l'un de l'autre, tant à la composition du corps, qu'à la maniere de voler.* CHAP. XVI.

DE ces deux manieres de Faucons, j'ay maintesfois discouru & disputé avec plusieurs excellens Fauconniers, de diuerfes nations, & comme on les peut bien congnoistre, & discerner les vns d'avecques les autres: à quoy faut bien de pres auiser: car la congnoissance en est bien subtile, & malaisée à ceux qui n'en ont veu, & souuent tenu des vns & des autres. Et certainement les Fauconniers de Leuant sont fort experts en ceste congnoissance: comme ceux du Royaume de Chypre, de Rhodes, de Syrie, & de plusieurs autres Isles de l'Archipel, où s'en prend grande quantité en la saison du passage: & par ce moyen les Leuantins les sçauent congnoistre & discerner naturellement. Toutesfois pource que ie sçay, que noz François desirent auoir l'adresse de les bien discerner & recongnoistre: ie vous en voeilycy declarer quelques enseignes & marques. En premier lieu, le Faucon Pelerin est plus grand, & plus gros que le Faucon Gentil, a les iambes plus longues, les pieds plus grands, les doigts plus longs, le col plus long, la teste plus longue & plus subtile, le bec plus long. Quant aux pennes des ailes, il ne les a pas si longues, comme aussi n'a-il pas le vol si long, que le Gentil: mais il a la queue vn peu plus grande qu'iceluy. Le pennage du Pelerin grand & petit est tout bordé, & plus que du gentil sor ou mué: & se tiét en sor plus qu'en mué. Encores a le Pelerin la cuisse plus plate, & le Gentil l'a plus ronde. Et si on regarde tout au long du plat de la cuisse du Pelerin, & on y trouue tout le duuet entierement blanc, sans aucune macule ou difference: on se



se peut bien assurer qu'il est Pelerin. Et ce peu que i'en ay dit doit suffire , pour la seure congnoissance & remarque du Faucon Pelerin. Toutesfois encores sont les Faucons Pelerin & Gentil , bien differens l'un de l'autre , quant au vol. Car le Pelerin se tient mieux & plus longuement sur aile & en son vol bat plus à loisir , & à son aise , que ne fait le Gentil : car le Gentil volant sur aile , bat plus fort & plus viste que le Pelerin. De fait plusieurs Fauconniers experts , discernent l'un de l'autre au seul battement de l'aile : neantmoins dient , que de printemps le Gentil passe le Pelerin : mais qu'au long vol , le Pelerin passe tous autres oiseaux , pour bonne aile qu'ils puissent auoir . Et se peut dire Pelerin , mesmement pour le passage qu'il fait , comme cy dessus a esté dit. Encores se peut louer le Pelerin d'une grande douceur & courtoi-

C


LIVRE PREMIER

sic qui est en luy : car quand il aura eu cure au matin , venuë l'heure
 qu'on le deura mettre sur le poing , & le paistre , si on le met sur aile,
 il regardera çà & là à l'entour de luy , où il deura prendre sa contree &
 sa proye : & si il void autres oiseaux de proye le suiuaus derriere , ou à
 costé , abbatra ce qu'il pourra de proye , pour les paistre : puis la lais-
 sera passant outre , pour trouuer autre gibier , duquel il puisse estre peu.
 Et dient lesdits maistres Fauconniers , que plusieurs fois ils ont veu
 maints Faucons Pelerins de la proye par eux prise , faire telle largesse
 & courtoisie aux autres oiseaux de proye , tant ils sont de bonne &
 douce nature . I'ay pareillement ouy dire à plusieurs estrangers Fau-
 conniers , singulierement à ceux de pays , par lesquels ils passent &
 repairent , comme d'Egypte , de Surie , de Chipre , de Rhodes , & au-
 tres lieux circonuoisins , qu'en ces contrees de Leuant , és lieux par les-
 quels ils passent , en la saison du passage , se prend si grande quan-
 tité de ces Faucons dits Pelerins , que les villains qui les prennent ,
 les vendent à d'autres villains du pays , qui les achètent pour man-
 ger . Et sont en ces quartiers à si bon marché qu'ils les ont &
 donnent par fois pour trois ou quatre medins la piece . Le medin
 est vne piece d'argent monnoyé , qui peut reuenir à la valeur de deux
 soulds , de monnoye de France . Mais pource que les Mores , Sarrazins
 & autres gens des pays où on les prend , sçauent que les Chrestiens en
 font cas , ils leur en enuoyent tant qu'ils peuuent , & leur vendent tren-
 te ou quarante medins la piece . Les Pelerins Faucons , enuiron le mois
 de Septembre & Octobre , passent au pays d'Inde la Maieur , où ils se
 tiennent de trois à quatre mois : puis s'en reuiennent és parties Septen-
 trionnales , subiettes à la Tramontane , pour faire leur aire , & leurs
 petis : mais on ne peut sçauoir où ils les peuuent faire . De fait ne s'est
 oncques trouué , ne More , ne Chrestien , comme dit est deuant , où
 i'ay parlé du naturel des Faucons , qui ait peu dire auoir iamais veu
 aire ne petis de quelque Faucon Pelerin . Et le metme se dit du Sa-
 cre . Dient aussi les maistres & experts Fauconniers , qui ont longue-
 ment tenu & nourry ces deux especes de Faucons : que le Faucon
 Gentil de sa nature en toutes ses actions est plus prompt , plus ardent ,
 & plus remuant , que le Pelerin : & l'estiment folastre & outrageux , à
 comparaison de l'autre . De fait quand ils viennent à voler ense-
 mble , le Gentil est plus tost sur aile , & plus hastif à monter & à descen-
 dre que le Pelerin . Et quand de malheur il vient à faire vne faute
 par desadventure , il commence à se despitier & à se mettre au chan-

ge sur autre gibier , ou oiseau puissant : de maniere que souuent
tesfois il est bien malaisé de le faire reuenir : Mais aucuns di-
sent que du Pelerin tout le contraire , & qu'il est d'autre
complexion : car il est posé & attrempé en
tous ses faits , & sçait bien prendre
son auantage tout ainsi qu'on
veut.

FIN DE CE PREMIER LIVRE.

C ij



Liure second.

CHAPITRE I.




O v s vous auons cy dessus declaré la diuersité des Faucons & autres oiseaux de leurre & de poing, & leur nature, brieuement & sommairement. Pource que les Gentilshommes qui prennent plaisir à la Fauconnerie pourront d'eux mesmes assez pratiquer & apprendre la nature & complexion de chacun oiseau, sans ce qu'il soit besoin vous amuser à plus long discours de cette matiere. Je ne me suis point aussi voulu arrester à plus longs enseignemens de siller, affaier & leurrer oiseaux: pource qu'en telles petites pratiques ne consistent les secrets de l'art de Fauconnerie: & qu'il est aisé à chacun de congnoistre en peu de temps tout ce qui en est. Mais les plus grâds secrets que i'y voie, & que i'aye appris des trois maistres dessusdits, sont pour conseruer les oiseaux en santé, & les guerir des maladies & autres petis accidens qui leur peuuent suruenir par fortune, ou par la negligence & paresse de ceux qui en ont la charge. Tous lesquels secrets ie vous vueil enseigner cy apres. Nômément en ce second liure les moyens de conseruer les oiseaux en santé & de les guerir des maladies & accidens qui leur peuuent suruenir en la teste & parties d'icelles.

Enseignemens pour conseruer tous oiseaux de proie en santé.

CHAP. II.



Maistre Molopin dit, que pour conseruer Faucons & toutes autres manieres d'oiseaux de proie en santé, il se faut sur tout garder de leur donner grosse gorge. Specialement de grosse chair, comme de bœuf, porc, & semblables chairs de dure digestion & fascheuse concoction. Encores vous faut-il bien plus songneusement donner garde de paistre vostre oiseau de chair, dôt la beste soit en rut: car vous le verriez tost apres mourir, sans luy en auoir dōné autre occasion. Or tiennent tous les trois maistres dessusdits, que pour auoir dōné aux oiseaux grosses gorges, nômément de telles grosses chairs, & autres chairs froides, ils les ont souuēt veuz se perdre, ou enchoir en maladies plus dāgereuses, que toutes autres maladies qui leur puissent suruenir. Et partant vueil ie bien auiser tous Fauconniers de se don-



ner garde de bailler grosses gorges à leurs oiseaux. Et que si en défaut de meilleure chair ils sont contraints les paistre de grosse chair, qu'ils la trempent premierement en eau nette, fresche en esté, chaude en hyuer: puis l'espreignét: toutesfois ne leur donnét trop espreinte: car l'eau, qui est laxative, sera moyen de la faire plustost passer & couler, & leur enduire la gorge: aussi leur tiendra-elle les boyaux plus larges: lesquels se purgeront encores mieux par bas desphlegmes & grosses humeurs que les oiseaux pourront avoir dedans le corps. Et ce cōviét-il entēdre des grosses chairs, dōt on est par fois cōtraint paistre l'oyseau à faute d'autres: mais nōn des autres passez vifs & de bonne digestion. Car faut avoir ceste discretion de recompenser & refaire quelques fois son oyseau de quelque bon pas vif & chaud: au-

C iij

trement on le pourroit bien mettre trop bas. Combien que donner chair lauee à l'oyseau, non trop espreinte toutesfois, en esté fresche, en hyuer chaude, est bon & certain moyen de le tenir en santé. Disent aussi leſdits maistres, que pour entretenir tous oyseaux en bõne santé, & les garatir de maux, leur faut dõner de 15. en 15. ou de 20. en 20. iours de l'aloës cicotrin, le gros d'une petite febue, & leur mettre au bec enveloppé de quelque petit de chair, ou d'un boyau de geline pour leur oster le goust & sentiment de l'amertume. Et quand l'oyseau l'aura mis bas, le faudra tenir sur le poing, apres toutesfois qu'il l'aura tenu le plus lōg temps que possible sera. Apres ce, le faudra laisser ietter les phlegmes & coles qu'il aura dans le corps tout à son plaisir: en reprenant le reste de l'aloës qui ne sera point fondu, car il sera bon pour vne autre fois. Puis soit mis l'oyseau au soleil ou au feu enchapperonné: & ne soit pu de deux heures apres, qu'il luy sera donné de quelque bon past vif, gorge raisonnable. Vous pourrez encores à vostre discretion au lieu dudit aloës faire vser à vostre oyseau de ceste maniere de pillules communes que les hommes prennent communément pour lascher le vêtre: & est maistre Michelin d'opiniõ qu'elles sont beaucoup meilleures que ledit aloës, pour ce qu'elles chassent par bas, & font plus grande purgation. Toutesfois de l'un ou des autres pouuez vser à vostre plaisir: mais choisissant les pillules, vous en baillerez à l'oyseau vne, ou deux à discretion, selon ce qu'elles seront grosses: puis apres le mettrez au feu ou au soleil, & ne le paistrez q̃ deux heures apres, & lors luy donnerez quelque bon pas vif, car il aura tout le corps destrempé.

Item par autre moyen parviendrez-vous à ce mesme effect: Prenant d'aloës cicotin & de la graine de filandres, autant de l'un cõme de l'autre le gros d'une febue, & le mettant dedans un boyau de geline du long d'un ponce en trauers lié des deux bouts, puis le faisant aualler à l'oyseau, de maniere qu'il le mette à bas. Puis soit mis au soleil ou au feu, & soit pu de poulaille ou autre pas vif deux heures apres. Ainsi vostre oyseau se tiendra sain. Mais notez qu'à un autour, il ne luy en faut pas tant donner: pour ce qu'il n'est de si forte complexion cõme les autres oyseaux de proye. Moins encores à l'Espreuier, pour ce qu'il n'est assez fort pour supporter si forte medecine. Ainsi pareillement faut-il entendre toutes les choses dessusdites, afin d'en donner à chacun oyseau selon sa complexion avec la bonne discretion des personnes qui à ce s'appliquent.

Autre aduis a encores donné M. Molopin pour la santé des oyseaux

qui est, quād aucuns oyseaux tiēēt trop leur cure, ou l'on est en doute s'ils ont cure ou non: en ce cas vous leur pouuez donner vn petit d'aloës & en defaut d'aloës, de la racine d'vne herbe, nommee Chelidoine ou Esclere, le gros d'vne febue en deux ou trois lopins: & vostre oyseau puis apres viendra à ementir, & à ietter phlegmes & colles: ce qui fera grand bien à la teste & au corps. Autre aduertissement a d'auātage donné M. Calsian: qui est, que pour tenir oiseaux en santé, & les faire biē voler, on les doit souuēt baigner: & leur mettre de l'eau au deuant, encores qu'ils ne se vueillēt baigner: pour ce q̄ par ce moyē les oyseaux aucunes fois prennent appetit de boire, & faire boiau, qui leur sert de remede & allegement aux accidens qu'ils peuuent auoir à caulē de l'echauffemēt du foye, ou autre intēperie du corps. Et à lors l'eau qu'on leur presente, est suffisante pour les remettre en meilleur estat. Ce que l'on pourra aisēment recognoistre au semblant que fera l'oyseau, se montrāt puis apres plus gaillard & allegre. Soient aussi aduisez tous Fauconniers, que quand ils viendrōt de voler, ou de gibier, ou d'ailleurs, & leurs oyseaux seront baignez par pluye ou autre incōuenient, ils les facent essuyer diligemmēt au soleil ou au feu: car autrement ils se pourroient morfondre & refroidir, ou prendre rheumes en la teste ou au corps: & de là se pourroiet aussi engendrer le mal de pantois, & autres maladies qui de iour à autre suruiēēt aux oyseaux par la negligence des Fauconniers. Et apres qu'ils auront seichē leurs oyseaux, qu'ils se gardent bien de les mettre en lieu remugle ou rheumatique: ains en lieu chaud & sec, en leur mettant dessouz les pieds quelques draps à la perche ou dessus le bloc. Car bien souuēt il aduiēt que les oyseaux, qui auront battu ou feru le gibier, ou à la riuere, ou aux champs, auront les pieds foullez, froissez ou eschauffez: & à ceste occasion s'engēdrerōt les galles & clouds aux pieds, à cause des humeurs qui y descendent & arrestēt: laquelle maladie (qu'aucuns appellēt Podagre) aduiēt par la paresse des Fauconniers qui à ce que dessus ne prennent garde. Par ce defaut aussi viennent souuēt aux oyseaux les pieds & iābes enflēz, qui sont maux perilleux & forts à guerir. Admōnestre aussi M. Michelin, que pour tenir vostre oyseau bien sain, vous le deuez tous les iours faire tirer vers le vespre auāt qu'il se mette à dormir. Et apres qu'il aura enduit & passé sa gorge, luy donner cure à vostre discretion. Et pourrez, si bon vous semble, mettre vn petit d'aloës en ladite cure: ou bien luy bailler vne pilule qui luy pourra descharger la teste: & ce de huit en huit, ou de dix en dix iours.

Avec vns toutesfois leur en donnent bien plus souuen

quand ils ne veulent point faire tirer leurs oyseaux. Neantmoins faut-il bien entendre que le tirer du matin est moult bon, apres que les oyseaux ont cure. Mais si le tirer est de plume, gardez le bien de prendre plume: à fin que ne mettiez rien en cure iusques au vespre. Car deuers le vespre n'y a nul danger. Soient aussi aduertis les Fauconniers de faire tirer leurs oyseaux contre le soleil, en les abecquant vn petit, à discretion, selon ce qu'ils sont las & affamez, & en attendant qu'ils voyent aller au desdruit.

Maistre Aymé Cassian dit, qu'il a veu & congnu assez de Fauconniers qui iamais ne faisoient tirer leurs oyseaux: disans, que ce n'est pas bonne accoustumance, & que le tirer n'est point necessaire, ains que les oyseaux en tirant se greuent le corps & les reims. Toutesfois il est d'opinion contraire, & soustient que en tant que l'oyseau prend exercice à tirer raisonnablement, il en est plus sain de corps, & plus léger de teste: cōme on peut apprendre de tous exercices qui se font avec moderation. Dict encores que ceux qui tiennent ces opinions de ne point faire tirer leurs oyseaux, sōt apoltroinis de paresse: qui leur procede du peu d'amour qu'ils portent à leurs oyseaux, auxquels semble par ce moyen qu'ils craignent faire trop de bien.

Le tirer doncques soit deuers le soleil, comme cy dessus a esté dit: car l'oyseau s'en descharge mieux des rhumes & eaux qui luy descendent de la teste: & le mettez puis apres au preau ou à la perche au soleil, à fin qu'il s'y esgaye & desduise mieux à son plaisir, puis le remettrez au lieu accoustumé.

Autre remede pour oster rheumes & eaux de la teste en lieu de tirer.

C H A P. III.



O I T pris agarie & mis en poudre, & Hiera-piera: De ces deux simples soit faicte vne pillule grosse cōme vne moyenne febue. (Toutesfois sera bō y mettre la terce partie moins d'Hiera-piera que d'Agarie pour mieux lier ensemble l'vn & l'autre.) Ceste pillule soit baillee à l'oiseau sur le Vesprenueveloppee d'vn peu de cotton, apres qu'il aura passé la gorge. Et en default d'Hiera-piera, luy pourrez donner cure du seul Agarie du gros d'vne febue, ainsi que dit est. Laquelle luy
sera

fera cōtinuee en ceste forme par trois iours cōsecutifs. Apres lesquels vous pourrez voir vostre oiseau deschargé des eaux & rhumes de la teste, & encores des grosses humeurs dont il auoit le corps plein. Et de ceste maniere de cure pourrez vser de mois en mois, ou plus ou moins à vostre discretion, & selon la complexion de vostre oiseau. Laquelle a esté experimentee moult profitable, mesmes contre toutes sortes d'aguiilles & filandres qui peuuent aduenir aux oiseaux. Et encores sont d'opinion les trois maistres dessusdits, & plusieurs autres experts Fauconniers, qu'à faute d'autre remede ceste pillule est bonne pour toutes maladies d'oiseaux. L'Agaric & l'Hiera-piera se trouuent aux boutiques des apothicaires.

Autre recepte pour garder oiseaux en santé.

CHAP. IIII.



SOIT pris Chamelon surmontain (dit en Latin, Siler montanus) basilicon, mil, fleurs de genest, demie once de chacun: ysope, faulge, pouliot, calamite, quart d'once de chacun: noix muscades, quart d'once: iuiubes, sidrac, borac, mommie, armoise, macis, rue, tiers d'once de chacune: myrabolans indes, myrabolans belleris, myrabolans emblis, demie once de chacun: aloes cicotrin, vn quart d'once. De toutes ces choses soit faite poudre, de laquelle vous donnerez de huit en huit, ou de douze en douze iours à vostre oiseau (à vostre discretion:) & luy en pulueriserez sa chair iusques à la cōcurrēce de la grosseur d'vne moyēne febue. Et si l'oiseau faisoit difficulté ou refus d'ainsi la prendre esparse sur la chair, mettez la poudre dedans vn boyau de geline, comme cy dessus vous a esté dit, & ainsi la prendra aisemēt. Mais faut bien auiser que le tout soit fait nettement, & qu'en quelque sorte que ce soit luy soit couuerte ou desguisee l'amertume de la poudre, de façon que l'oiseau la prenne, & la mette en bas. Et si vostre oiseau venoit à rendre sa chair, au moyen de l'amertume ou force de la poudre, ne luy en faudra puis-apres plus bailler sur sa chair, mais dedans le boyau de geline, en la forme cy dessus declaree. Et se faudra garder de le paistre d'vne heure ou demie heure apres. Ainsi pourrez-vous donner de ceste poudre à vostre oiseau à vostre discretion, & selon sa complexion & bonne disposition. Car quelquesfois les oiseaux sont ords par dedans le corps à l'occasion des mauuaises chairs dont on les a puz, &

D

L I V R E S E C O N D

qui leur ont fait engendrement & mouuement d'aiguilles & de filandres. A cause dequoy se perdent & meurent plusieurs oiseaux. Partant sera bon d'vser de la poudre dessusdite pour les conseruer en santé.

*Les causes & signes du mal de teste , qui aduient pour auoir donné
aux oiseaux trop grosses gorges, & de males chairs: &
les remedes propres pour les guerir.*

C H A P . V .

LE s trois maistres Fauconiers dessusdits s'accordent sur ce point, & diēt que le mal de la teste vient & procede d'auoir donné aux oiseaux trop grosse gorge, spécialement de trop grossiere & mauuaise chair. Pource que quand l'oiseau a trop grosse gorge, il ne la peut passer ne digerer: tant qu'elle vient puis apres à se corrompre & empuantir par dedans pour la tenir & garder trop longuement. Et en ce cas prend plus-tost mal l'oiseau maigre que l'oiseau gras: puis apres il luy est force de la remettre toute puante. Et sil aduient qu'il la passe ainsi puante & corropue ceste chair, & la puanteur d'icelle luy vient à estraindre & assécher les boyaux, de façon que les fumees & vapeurs montans à la teste luy causent vn rhume ou catarrhe qui luy reserre & estoupe les aureilles, & autres conduis du col & de la teste: les constipant auecques le temps de telle sorte, que les humeurs qui ont accoustumé de descendre & purger le cerueau, y demeurent arrestez. A ceste cause s'enfle la teste, au moyen de la douleur & repletion: tant que nature cherchant à vuidier, & se descharger de ce qui l'offense, s'efforce de ietter ces humeurs pechans par les aureilles, les narilles, & la gorge; & celà met l'oiseau en grand danger de mourir, si promptement n'y est remedié. Vous pourrez congnoistre ceste maladie de teste à ce que vostre oiseau esternuera souuent, & sur le vespere fera les grands yeux, fermant par fois l'un, & puis l'autre, & faisant contenance de dormir, & plus mauuaise chere que de coustume. Il regarde aussi bien fort les personnes quand il est atteint de ce mal, & est enflé entre l'œil & le beq. Mais quand le rhume fait semblant de y ssir par les yeux, les narilles, & les aureilles, lors se faut donner garde de l'oiseau: pource qu'il est en danger de se perdre sil n'est secouru. Pour guarir ceste maladie, enseigne maistre Aimé Cassian vn bon remede. Et dit que pour purger l'oiseau, & luy allegger son mal de teste, il faut prendre lard de porc, qui ne soit rāce ne trop vieil,

& du plus gras faire deux lardons, comme pour larder de la chair, ou peu plus menus, puis les mettre tremper dedans eau fresche toute vne nuit, ou plus long temps, iusques à ce qu'ils soient suffisamment trempez: en chageant l'eau par trois ou quatre fois ce pendant qu'ils tremperont: & de la mouëlle de bœuf bien nette, & du sucere de premiere cuitte, autant de l'un comme de l'autre, & les battre tres-bien ensemble: puis en faire vne pillule du gros d'une bonne febue, ou deux plus petites, & les donner à vostre oiseau en luy ouurant le bec par force pendant qu'un autre le tiendra. Puis soit mis ledit oiseau au feu ou au soleil: & tost apres vous pourrez voir comment il se nettoiera & purgera des grossieres & mauuaises humeurs dont il auoit le corps remply. Et apres qu'il aura bien esimenty par trois ou quatre fois, soit leué du feu, ou du soleil, & remis en sa place ordinaire: & ne soit pu iusques à vne heure ou deux apres, que vous le paistrez de poulaille, ou de mouton à demy gorge. Et luy soient baillees & continuees lesdites pillules par la forme cy dessus recitee par trois iours consecutifs. Et les trois iours passez apres que l'aurez ainsi purgé, versez vn peu de vinaigre en vne escuelle, avec poudre de poiure bien subtile, & les mellez bien ensemble. Puis ouurez le beq à vostre oiseau, & luy frottez le haut du palais de ceste pouldre ainsi destrempee, le mettant puis apres au feu ou au soleil. Ce fait vous apperceurez tost apres qu'il se deschargerá fort de la teste Mais aussi gardez vous bien de donner de ceste poudre & vinaigre à oiseau qui soit trop maigre. Car à peine les pourroit-il supporter. Tant est que l'oiseau auquel vous en aurez fait prendre, deura vne heure ou deux apres estre pu d'une cuisse de ieune poulaille: Et le lendemain pu à ses heures deux autres fois de gorge raisonnable. Mais aussi vous faut-il souuenir de ne luy faire plus d'une fois vser de celle poiurade. Au lieu de laquelle aucuns donnent d'une graine qu'on appelle Staphisagria. Toutesfois est ladite graine moult forte, qui ne la sçait attemper. Mais si vous en voulez donner à vostre oiseau, prenez en seulement trois ou quatre grains, & les liez dedans vn linge, & battez en poudre. Puis versez vn peu d'eau nette en vne escuelle, & mettez vostre poudre dedans, & les mellez ensemble, comme si en vouliez faire lessiue: vous en mettrez puis apres trois ou quatre gouttes és narilles de vostre oiseau, lequel ce fait sera mis au feu ou au soleil, ainsi que i'ay dit apres la poiurade: & vne heure apres gorge de quelque bon past, comme de cuisse de ieune geline, ou autre telle viande delicate.

LIVRE SECOND.

*Remedes pour guarir l'oiseau, qui a mal aux yeux, à cause de
rhume, ou distillation de cerueau.*

CHAP. VI.

QVAND vostre oiseau aura mal d'yeux (ce dist maistre Molopin) prenez marguerite fraîche, avec deux ou trois grains de sel, & les ayant broyez dedans le creux de vostre main, faites en distiller le ius dedans les yeux de vostre oiseau, & tost apres il guarira. Autremêt, prenez de la soucie (ce dit M. Michelin) & la pillez: puis faites en distiller le ius dedans les yeux de vostre oiseau: & il s'en trouuera bien. Autremêt, prenez de la coupperose blanche (ce dit maistre Aimé Cassian) & vn œuf frais. Faites cuire vostre œuf en l'eau, tellement qu'il soit bien dur: puis le coupez par moitié coque & tout, & ostez le moyeu; & au lieu, dudit moyeu mettez en chascue moitié de l'œuf de ladite coupperose blanche aussi gros qu'une noisette, puis l'emplissez d'eau rose par dessus la coupperose, & la faites chauffer pres du feu iusques à ce que la coupperose soit fondue. En apres espreignez le tout ensemble, & le passez par vn linge net, & en mettez le ius en vne phiole: duquel vous ferez distiller le plus souuent que vous pourrez dedans les yeux de vostre oiseau, continuant par plusieurs fois. Et vous assurez que soit homme soit oiseau auquel au mal d'yeux vous appliquez tel remede, il s'en sentira bien tost guarý.

*Moyen aisé & propre pour conseruer l'oiseau en santé, & en
bonne haleine.*

CHAP. VII.

VOUS auez aussi à noter, selõ l'aduis de maistre Aimé Cassian, que pour reconforter vostre oiseau & le conseruer en vigueur & santé, vous luy pourrez donner au vespre quatre ou six clouds de girofle (selon ce qu'ils seront gros) enveloppez en la cure: car ceste chose est souverainement bonne à tous oiseaux, contre le rhume, & eaux de la teste, & leur fait auoir l'haleine bonne, & leur garde de puyr, leur reconfortant au surplus tout le corps: mais aussi il suffira d'ýser de dits clouds de girofle de six en six, ou de huit en huit iours, à la maniere deuant dite.

*Remedes pour le mal de rheume enraciné de long-temps, & qui
procède de froidure.* C H A P. V I I I.



V Ous auez ouy cy deuant les remedes propres pour allegier & guerir les oyseaux des maux & maladies qui leur aduiennent à raison des grosses gorges, c'est à dire, des mauuaises chairs : maintenant verrez & orrez parler des remedes plus conuenables pour guerir le mal du rheume qui aduient aux oyseaux par froidure de cerueau de longue-main enracinee. Or est-il qu'à cause de la douleur prouenant dudit rheume froid, le plus souuent les oyseaux ne peuuent bonnement ouuir les yeux, ne les tenir ouuerts. Et de ce mal renaissent quelques-fois plusieurs autres maladies : comme la taye en l'œil : (dont plusieurs oyseaux perdent la veüe) : l'ongle en l'œil, comme aux cheuaux : & par fois aussi leur en vient la pepie en la langue, qui s'appelle, les efforcillōs. Leur aduient pareillemēt le mal de palais enflé, & souuent le mal de chancre : qui sont maladies moult perilleuses, si tost n'y est remedié. Or dit maistre Cassian que telles maladies se concreent & auiennent aux oyseaux à cause des phlegmes & mauuaises humeurs accumulez dedans leurs corps, ainsi que cy deuant a esté dit de l'autre rheume : Aussi leur peuuent-elles auenir pour les tenir en lieux rheumatiques & froids : & encores quand quelques-fois on reuiēt des champs par tēps pluuieux : & on remer les oyseaux baignez & moillez au billot ou à la perche, sans les auoir fait secher au soleil ou au feu : Pour ces causes donc auiennent souuent aux oyseaux lescdites maladies : pour ausquelles remedier est besoin faire ce qui ensuit. En premier lieu, soit fait faire vn petit fer en forme d'espreue ou sonde, qui soit rond par le bout à la grosseur d'vn petit pois : soit ce fer mis au feu tant qu'il soit rouge, puis en soit donné le feu à l'oiseau malade tout au plus haut de la teste : car coustumierement en ce lieu luy tient la douleur : mais aussi gardez bien que ne luy en donnez trop : & luy reuersez vn peu les plumes en cest endroit : Puis à l'heure mesmes que luy aurez ainsi doné le feu sur la teste, prenez vn autre fer bien subtil, delié & aigu par l'vn des bouts comme vne aiguille, lequel mettez pareillement au feu tant qu'il soit rouge, puis en percerez les narilles à vostre oyseau de part en part : Et au bout de deux ou trois iours prenez vn autre fer qui soit plat par l'vn des bouts, & enuiron de la longueur d'vn caniuet dont on taille les plumes, le-

D iij

LIVRE SECOND

quel mettrez semblablement au feu tant qu'il soit rouge: puis en don-
nerez le feu audi& oiseau du taillant dudi& fer droic&ement entre
l'œil & le bec: mais entendez bien, quand ie dy du taillant dudi& fer,
que ce n'est pas à dire qu'il soit tranchant comme pourroit estre vn
cousteau ou trancheplume, ains suffit qu'il soit plat de ceste forme, &
rabbatu & mouffe par l'endroi& que s'appelle tranchant, ou taillant.
Mais ce faisant donnez-vous bien garde que le feu ne touche au tour-
nant des aureilles, ny aux narilles: aussi vous faudra-il couvrir l'œil de
vostre oiseau d'un petit drapeau mouillé, afin qu'il ne puisse estre of-
fensé de la fumee: Et toutes ces manieres de feu se doyent donner
deuers le Vespere: Et puis apres donner à l'oiseau demie gorge (ou
moins) de bon past vis. Or ce iour mesmes que le feu aura esté donné
à l'oiseau, le fauconnier debura auoir fait prouision de limaçons qui
se trouuent aux vignes, ou aux iardins sur les arbres & herbes: toutes-
fois ceux quel'on pourra trouuer sur le fenoil, & qui auront les co-
quilles rayees, seront les meilleurs: & d'iceux en mettra cinq ou six tré-
per dedans lait d'asnesse ou de cheure, & en defaut de lait d'asnesse ou
de cheure, dedans lait de femme: qui sera mis en vn verre couuert, à fin
que les limaçons n'en puissent sortir. Et le lendemain matin apres a-
uoir rompu les coquilles, & auoir laué lesdits limaçons en autre lait
fraichement tiré, en pourrez donner à vostre oiseau quatre ou cinq
selon ce qu'ils seront gros: & incontinent apres le mettre au feu ou au
soleil, d'où il ne le faudra leuer iusques à ce qu'il ait esmenty quatre ou
cinq fois: Toutesfois s'il endureoit bien la chaleur, l'y faudroit laisser
plus longuement: pour ce qu'elle luy feroit grand bien: Et apres midy
le paistre d'une cuisse de geline, ou de petis oiseaux, rats, ou souris, qui
valent encores mieux: puis le mettre en lieu chaud & non rheumati-
que avec bien petite gorge, & venu le vespere, qu'il aura conduit & passé
sa gorge, prenez cinq ou six clouds de girofle qui soyent rompus
en deux, & les enuelopant en vn petit morceau de chair, faictez tant
qu'il les mette bas, par force, ou autrement en luy ouurant dextre-
ment le bec: Continuez ceste medecine par cinq ou six iours, & vo-
stre oiseau guarira.

Autre remede pour la maladie dessusdictte.

CHAP. IX.

MAISTRE Molopin a enseigné, que pour guarir l'oiseau du rheume susdit, est bon & bien experimenté luy faire vser de la medecine qui ensuit. Prenez du saffran & de la camomille battus en pouldre de chacū le gros d'un petit poix, & les meslez ensemble. Puis soit pris du lard qui ne soit ne rance ne trop fort, & soit faict tremper vne nuit & vn iour, en luy changeant d'eau trois ou quatre fois: si lauerez puis apres ledit lard ainsi trempé en eau fresche & nette: & meslant ledict lard avecques sucre de premiere cuite & mouëlle de bœuf, autant d'un comme d'autre ensemble avecques lesdites poudres, en ferez cinq ou six pillules de la grosseur d'une febue, & chaque matin en donnez vne à vostre oiseau iusques à ce qu'il les ait toutes vsees. Puis le mettez au soleil ou au feu: & ne le passez que vne heure ou deux apres la pillule prise, que vous luy donnerez d'une cuisse de geline, ou petis oiseaux, rats, ou souris à demie gorge. Et au soir apres qu'il aura bien enduit, luy donnerez quatre ou cinq clouds de girofle enuelopez en quelque petit lopin de chair ou de peau de geline, ainsi que dessus a esté dict: Aussi auant ceste medecine pouuez-vous donner le feu à vostre oiseau par la forme cy deuant deduite, & semblablement luy faire puis apres vser de la medecine des limaçons dessusdits.

Autre remede pour descharger l'oiseau du rheume de la teste.

CHAP. X.

DIT maistre Michelin, que vn iour ou deux apres que l'oiseau aura vsé les pillules dessusdites, estans par le moyen d'icelles les humeurs ia esmeus, il sera bon prendre pouldre de poiure avec vn peu de bon vinaigre, & les battre ensemble, puis luy en frotter le haut du palais, & encores luy en faire entrer ou distiller deux ou trois gouttes dedans les narilles: puis apres le mettre efforer au feu ou au soleil, & lors luy pourrez vous voir les phlegmes & mauuaises humeurs issir & couler hors de la teste. Ce fait, & vne heure ou deux apres; sera pu de quelque bon past vis. Au lieu de poiure, vous pourrez vser de trois ou

L I V R E S E C O N D

quatre grains de staphisagria en la forme deuant dite: mais ne luy en faudra bailler qu'une fois. Et si vous voyez que l'oiseau ait trop grande peine à vider les humeurs peccantes: ietter luy de l'eau fresche par la teste, & es narilles, & elles passeront plus legerement.

Remede pour le mal des aureilles qui vient aux oiseaux de rheume ou froidure.

C H A P. 11.



Veunesfois aduient aux oiseaux vn mal d'aureilles à cause de froidure & rheume de teste: Et se cognoist ceste maladie quand l'oiseau met l'œil de trauers, & nefait point si bonne chere que de coustume à cause des humeurs qui luy fluēt par les aureilles: cōme, vous pourrez apperceuoir en y regardāt. Pour remede à ceste maladie enseigne maistre Cassian, de prendre le fer cy dessus mentionné, qui a l'un des bouts rond comme vn petit pois, & de l'huile d'amendes douces, & s'il ne s'en trouue, de l'huile rosat: & apres que le fer sera vn peu chauffé, soit ce bout rond trempé dedans l'huile, lequel huile sera fait degoutter dedans les aureilles de l'oiseau: & pour empêcher qu'elles ne se constipent & estouppent, sera bon faire entrer tout doucement ce bout de fer rond & ainsi trempé que dit est dedans les aureilles de l'oiseau: ce qui profitera aussi pour faire entrer l'huile plus auant. Mais aussi gardez-vous bien de mettre le fer trop auant, ou trop chaud: car l'un & l'autre pourront grandement offenser l'oiseau. Continuez ceste medecine par quatre ou cinq iours consecutifs, en luy ostant & leuant tousiours bien doucement les humeurs fluans aux aureilles, & luy visitant par fois la gorge pour voir si elle sera nette: & vous en cognoistrez vostre oiseau bien tost & bien fort allegé: & sera besoin d'y pouruoir d'heure: car de tel mal aduient aucunesfois le chancre au cerueau de l'oiseau: qui est vn mal incurable, & est force que l'oiseau en meure. Vous en pourrez semblablement en ceste maladie faire vser à vostre oiseau des pillules de lard, sucre, & mouëlle de bœuf, dont cy-dessus au 9. chapitre a esté faite mention: car ie vous veux bien donner aduis des vnes & des autres, à fin d'en vser à vostre choix.

Remede

Remede pour mal de paupiere qui aduient par froidure de rheume.

CHAP. XII.



N autre maladie aduient aux oiseaux que lon appelle, mal de paupieres : pource que les humeurs tombent sur la paupiere , & la font enfler au dessus de l'œil. Et si prompt remede n'y est mis, l'enflure gaigne tout l'entour de l'œil, & par fois croist tant que l'œil mesmes en est offensé, & bien souuent se perd ou creue, si l'oiseau porte longuement ce mal: Et de fait en a-l'on veu mourir plusieurs oiseaux, à faute d'estre à temps secourus. Or enseigne le bon maistre Cassian pour remede à ceste fascheuse maladie: de prendre ce fer rond par le bout, ainsi qu'a esté diuisé cy dessus au huitiesme chapitre: le faire chauffer, & luy en donner le feu sur la teste, ainsi qu'a esté dit audit chapitre: & semblablement de l'autre petit fer pointu & agu par le bout luy percer les narilles par la forme deuant dite: puis luy donner la medecine des limaçons trempez en lait d'asnesse ou de cheure, ainsi qu'a esté enseigné au mesme endroit. Ou au lieu de ceste medecine, luy pourrez faire vsér des pillules faites de pouldre de saffran & camomille, lard, sucre, & mouëlle de boeuf, comme cy dessus a esté monstré. Et si d'auenture il ne pouuoit guerir pour toutes ces choses, vséz de la medecine que maistre Molopin dit auoir extraicte du liure du Prince, d'ot la recepte ensuit. Soit prise casse fistule, & la faites battre avecques l'escorce: puis la passez par vne estamine avecques le blanc d'un œuf meslé ensemble. De tout celà faites vn emplastre estendu sur vn linge delié, & l'appliquez sur l'œil de l'oiseau par trois ou quatre iours consecutifs. Et là où vous congnostrez qu'il y aura plus grand amas de phlegmes, dōnez luy en cest endroit là vne touche du cautere ou fer dessusdit. mais aussi si vous cōgnossiez qu'il n'y ait autre plus apparente enflure, abstenez vous de luy bailler le feu: ains continuez luy seulement ledit emplastre. Et si feu luy voulés donner, faites mesches de papier: dont chacune soit de la grosseur d'un fer d'aiguillette, & les ayant allumees au feu, touchés l'en tout doucement sur l'enflure: (Mais sur tout donnés-vous garde de luy donner le feu trop aspre:) & par ce moyen il guerira.

E

LIVRE SECOND

Du mal de l'ongle, qui vient en l'œil des Faucons, de ses causes, & signes, & des remedes propres pour le guerir.

CHAP. XIII.

AVecquesfois aduient en l'œil des oiseaux, vn mal qu'on appelle l'ongle, qui vient ainsi comme aux cheuaux, quelque fois de coup, quelque fois de froidure & mal deteste : autrefois au moyen du chapperon, qui trop longuement & rudement aura pressé & foulé l'œil de l'oiseau, & autresfois par autres accidens que l'on ne peut euitier. Ce mal d'ongle se congnoist & aperçoit, quand l'on void comme vne petite taye en l'œil de l'oiseau, qui luy vient comme vne bande couvrir peu à peu le coin de l'œil du costé du beq, estant vn peu noire pardeuant : & c'est pourquoy on l'appelle, l'ongle. Et aduient souuent lors qu'elle surmonte la prunelle de l'œil, qu'elle le creue ou perd tout à fait. Pour y donner prompt & seur remede enseigne maistre Cassian, de prendre vne petite aiguille bien subtile enfilée de fil de soie, & en enfiler & enleuer l'ongle bien doucement & dextrement : puis avec vn petit cizeau couper mignōnement ledit ongle, en la forme & maniere que les bons mareschaux ont accoustumé de le couper aux yeux des cheuaux : mais aussi donnez-vous bien garde d'en trop couper, car l'œil en demoureroit trop laid & difforme. Ce fait soit l'œil arroulé de bonne eau rose par trois ou quatre iours consecutifs : & par ce moyen l'oiseau guarira.

Remedes pour guarir l'oiseau, qui a eu coup en l'œil.

CHAP. XIII.

Aduient par fois que l'oiseau a mal en l'œil à raison de quelque coup qu'il y a receu. Et dit maistre Cassian, que si le mal est encores petit & recent, en luy lauuant l'œil d'eau rose & d'eau de fenoil mestées ensemble en egale quantité, il en resentera prompt allegement. Maistre Molopin enseigne, que si l'oiseau a coup en l'œil, il faut prendre de l'herbe aux harondelles, vulgairement appelée Chelidoine ou Eclere, la broyer, en tirer le ius, & le mettre en l'œil de l'oiseau : lequel par ce moyen

guarira. Et si ne pouuez finer de ceste herbe verte, trouuez en de seiche & en faites pouldre, laquelle avec vn bout de plume vous soufflez dedans l'œil de l'oiseau malade. Et si n'en pouuez recouurer ny verte ny seiche, prenez la semence de Iusquiane & la broyez, & du ius mettez luy dedans l'œil, & il guarira.

Remedes pour le mal de la taye en l'œil des oiseaux, qu'aucuns appellent, verole.

CHAP. XV.



NE maladie aduient aux ieux des oiseaux, appellee plus communement, la taye en l'œil, & par aucuns dicté verole: qui procede du mal de teste & de rhume, cheant sur les yeux par froidure. Et encores ce mal peut venir de ce que le chapperō touche trop longuement ou serre trop fort le dessus de l'œil de l'oiseau. Pour remede à ce mal, maistre Cassian ordonne qu'on face & donne à l'oiseau la medecine deuant ditte au chapitre cinquiesme de ce second liure, composee de lard, de sucre, & mouëlle de bœuf, cy dessus deuisee pour purger & nettoier le corps de l'oiseau. Et faut qu'elle luy soit continuee par trois ou quatre fois à diuers iours: puis le mettre au feu ou au soleil, & puis apres le paistre d'un bon past vif, vt supra: & le bien garder du vent & de humidité. Apres que vostre oiseau aura esté ainsi purgé, si la taye se monstre & descouure fort, lors luy faudra donner le feu au haut de la teste: & pareillement l'autre petit feu entre l'œil & le beq, en la maniere ditte cy dessus au chapitre huictiesme de ce liure, où nous auons enseigné les remedes pour guarir le rhume. Puis apres vous luy lauerez l'œil de bonne eau rose: & si voyez que besoing soit, luy pourrez aussi appliquer, comme dessus a esté dit, du ius ou de la pouldre de l'herbe d'Arondelle, appellee Esclore. Maistre Molopin a laissé par escrit, que pour remede prompt & seur à ce mal de la taye en l'œil, que luy-mesmes appelloit, verolle, faut prendre de l'escaille d'une Tortue, & la mettre bouillir dedans vn pot neuf, puis la bien battre, & mettre en pouldre, qui soit puis apres passée à trauers d'un linge bien delié, ou d'une estamine. Prendre aussi vne de ces coquilles de mer, qui sont longues en maniere d'un cor, & la faire bien cuire au

E ij

feu, tant qu'on la puisse battre & en faire pouldre bien subtile: qui soit puis apres passée par vn linge bien delié ou estamine, comme a esté dit de l'autre pouldre d'escaille de Tortuë. Prendre encores sucre candy en pouldre, & de toutes ces trois pouldres faire vne composition, y mettant autant de l'une que de l'autre, & les meslant fort bien ensemble. De ceste composition & mistion mettrés puis apres dedás l'œil de l'oiseau malade, luy continuant ceste medecine iusques à ce que le voyez bien guery.

Le bon maistre Michelin a enseigné encores vn autre remede: qui est de prendre vn œuf frais, & y faire vn petit pertuis par lequel on en puisse tirer tout le blanc dehors. Le blanc ainsi tiré faut prendre de bonne eau rose & de la pouldre de sang de dragon, & les mettre dedans ledit œuf avec le moyeu qui y sera demouré, & le tout bien battre & mesler là dedans ensemble avecques vn petit baston. Puis prendre de la paste, & en boucher & couvrir tellement ledit œuf que rien n'en puisse sortir: puis le mettre au feu & le faire cuire tant que la paste devienne noire ou rouge quand le tirerez hors dudit feu. Prenés puis apres tout ce qui sera dedans l'œuf, & en faites pouldre bien subtile, que vous passerez par vn linge bien delié ou estamine, & de ceste pouldre mettrez dedans l'œil de vostre oiseau malade, continuant iusques à ce qu'il soit bien guery: l'arroufant toutesfois par interualles d'eaux de fenoil & de roses meslees, comme cy dessus a esté dit. Maistre Molopin à encores laissé recepte d'une autre pouldre, qu'il dit estre souveraine pour remedier à ce mal: Prenés, dit-il, fianté de Lezart, dit Provençal, & en faites pouldre: prenés aussi pouldre de sucre candy, & de ceste plus que de l'autre, & les meslez bien toutes deux ensemble, puis en mettez dedans l'œil malade de vostre oiseau, & le lavez & arrousez par fois des eaux de roses & de fenoil, comme cy dessus a esté dit. Et est ceste pouldre de singulier effait sur toutes autres, ce dit ledit maistre Molopin.

*Du mal de la couronne du bec, de ses causes & signes,
& des remedes propres pour le
guérir.*

CHAP. XVI.



Vnefois aduient vne maladie sur la couronne du bec de l'oiseau, qui descharne ledict bec d'auecques la teste. Et dict maistre Aymé que c'est comme vne fourmiere qui leur mange par dedans ladicte couronne: dont l'oiseau est souuent en bien grand danger. Ce mal pourrez-vous apperceuoir lors que verrez ladicte couronne du bec deuenir rousse, & peu à peu se descharner, & separer d'auecques le bec & la teste. Or enseigne le bon maistre Cassian que pour remedier à ceste maladie: Faut prédre le fiel d'un Bœuf, ou d'un Taureau (qui vault mieux) & le rompre & espandre dedans vne escuelle: puis mesler & deslaier parmy ledict fiel de l'Aloes cicotrin à discretion, & tant que de raison: De ceste mixtion oignez la couronne du bec & fourmiere de vostre oiseau deux fois le iour, iusques à ce qu'il soit guery: Mais l'en oignât gardez-vous bien de toucher à l'œil ny aux narilles: pource que celà luy pourroit beaucoup nuire.

Remedes pour le mal des narilles & du bec.

CHAP. XVII.



Duient aussi par fois aux oiseaux vn mal, qui leur faict enfler les narilles tout à l'entour: & leur monte aucunes fois iusques à la couronne du bec, & puis se faict vne crouste laquelle se venant puis apres à leuer, le bec se trouue tout descharné par dessous: Encores par le moyen de ce mal eschet bien souuent que l'oiseau accueilt plusieurs petits poulx en la teste, qui luy couurent & descendent iusques sur le bec, & entrent dedans ses narilles: Et adoncques l'oiseau se donne des pieds esdites narilles, dont luy procede ceste maladie. Pour prompt & seur remede à cestuy mal, dit maistre Cassian qu'il faut prendre du papier, & en faire des petites mesches grosses comme vn fer d'esguillette. Puis prendre & tenir l'oiseau dextrement, & apres auoir allumé lesdites mesches à vne bougie, luy en donner le feu sur l'enfleure: mais qu'il ne luy soit donné trop aspre: Apres soit oingt l'endroit auquel on luy aura donné le feu d'un peu de gresse de geline, & par ce moyen il guerira. Aucuns ont esté d'aduis de luy donner le feu d'un fer rond: mais il est plus dangereux que le feu des mesches ou alumettes sulfides.

E ij.



Le serrencontre des oiseaux qui de leur naturel ont les narilles fort petites : & aucuns Fauconniers qui pour les cuider embellir, leurs y donnent le feu: mais le plus souuent au lieu de les amender, ils les gastent. Toutesfois si pour cest effaiet vous prend phantasie de donner le feu à vostre oiseau, faire le pourrez en ceste maniere. Prenez vn caniuët de moyëne taille, & le faictes chauffer bien chaut, puis appuyez-le doucement & dextrement sur le bord de la narille de l'oiseau, en esleuant la main à fin de toucher plus sur le dehors : mais mieux vaudra que ce soit du taillant dudiët caniuët, pour luy donner le feu moins paroissant : puis oignez l'endroit eschaudé d'un peu de gresse de geline: & ce vous sera leur moyen de rendre à vostre oiseau plus belles narilles.

Du mal de barbillons, qui vient dedäs le bec des oiseaux, de ses causes & signes, & des remedes propres pour le guarir promptement. CHAP. XIX.



Duient aux oiseaux aucunesfois à l'occasion de rheume ou froidure descendant de la teste sur le bec & machoires, vn mal appelé, les barbillons, ou fourchillons: lequel s'engendre dedans le bec de l'oiseau, & le luy fait enfler, & puis se rend & s'estend iusques à la langue, de sorte qu'il luy fait perdre l'appetit. Et en fin croist de façon que les oiseaux ne pouuans plus serrer le bec, sont forcez de mourir. Qui est vne maladie partant moult dangereuse. Pour laquelle bien cognoistre dès le commencement d'icelle, prenez l'oiseau, & luy ouurez le bec, & luy contemplez bien la langue & les barbillons s'ils sont plus enfléz que de coustume. Et pour vous en esclercir d'auantage, vous pourrez prendre vn autre oiseau, & luy ouurir semblablement le bec, pour voir s'il aura la langue & les barbillons en mesme point, que celui que pensez malade: & par ceste conference discerner le point & la grandeur du mal. Pour remede, maistre Molopin au liure du Prince enseigne, qu'il faut prendre amendes douces ou huille d'oliues lauce en quatre ou cinq eaux: puis avec vne plume de ceste huille arrouser la

gorge & la langue de l'oiseau trois ou quatre fois le iour, cinq ou six iours durans. Ce pendant si vous voyez que l'oiseau ne puisse paistre, taillez luy sa chair en petis morceaux, & luy ouurant le bec dextrement & doucemēt faictes-la luy aualler avec vn petit baston: Mais ne luy dōnez que demie gorge de moutō ou de poulaille. Ces cinq ou six iours passez, luy soit ouuert le bec dextrement, & avec vn petit cizeau ou caniuert taillé le bout des barbillōs, tāt que le sang en sorte: mais aussi gardez-vous bien d'en tailler trop: Apres ce soit l'oiseau oingt & arrošé de sirop de meures par dedans la gorge, & quelque temps apres de huille d'amēdes douces ou d'oliues: & cōtinuez tāt qu'il soit guarý.

Du mal de chancre, de ses causes & signes, & des remedes propres pour le guarir.
CHAP. XX.

LE mal de chancre aduient souuent aux oiseaux puz de mauuaises chairs, & de grosses gorges, qui baillées leur ont esté sans precallablement les lauer ou tremper, ou sans les monder en hyuer d'eau chaude, en esté d'eau froide. Ce qui est bien souuent cause que grosses flegmes & autres mauuaises humeurs s'engendrent dedans le corps & les entrailles des oiseaux: lesquelles venans puis apres à s'esmouuoir, montent ou font monter des fumees en la teste, qui causent vne eschauffaison de foye, & font puis apres naistre & croistre le chancre en la gorge & en la lāgue de l'oiseau. De cestuy mal vous pourrez apperceuoir, lors que le paissant vous le verrez laisser choir ce qu'il prend avecques le bec, ou l'aualler à bien grande peine. Et alors luy ouurant le bec, vous luy apperceuerez le chancre en la gorge & en la langue. Pour guarir ce tāt fascheux mal, maistre Cassian enseigne, qu'il faut prendre huille d'amēdes douces, ou huille d'oliues, lauee ainsi qu'il a esté dict au chapitre precedēt, & luy en oindre la gorge & la lāgue trois ou quatre fois le iour: Puis apres faire vser à l'oiseau des pillules de lard, de sucre, & mouëlle de Bœuf, ainsi que cy dessus elles ont esté deuiscées, & ce par trois ou quatre iours consecutifs: Et ce fait luy donner le past de poulaille ou chair de Mouton gressée de l'huile dessusdictē: Et si c'est huille d'amēdes, ne sera point besoin qu'elle soit lauee. Mais vous faudra voir & visiter le chancre: Et si vous le trouuez blanc, ayez vn petit fer fait par l'vn bout en forme de racloire ou ratissoire, & par l'autre bout taillant. Si la langue est trop chargée de chancre,

& tant qu'il ne se puisse tirer avecques la racloire, fendez luy bien dextrement & doucement avecques le taillant du long du costé de la langue, puis dudiect raclet rasclez toute celle blancheur de chancre que vous y verrez & trouuerez, & gardez bien que rien ny demeure: Puis prenez vn peu de cotton pour essuier le sang de la langue. Et si tant estoit que l'autre costé de la langue fust pareillement echargé de chancre, fendez le tout ainsi que l'autre: puis prenez l'herbe dicté, Capilli Veneris, & en tirez le ius, & l'en arrosez: Et si ne trouuez de ladite herbe, prenez vn peu de vinaigre: Mais encores mieux vaudra le ius de limon: duquel lauerez sa langue & sa chair, iusques à ce qu'il soit du tout bien guery. Encores enseigne maistre Michelin vn autre remede tel qu'il ensuit. Prenez, dit-il, du sirop de meures, & en oignez bien la langue & la gorge à l'oiseau qui aura le chancre par deux ou trois iours consecutifs. Ayez puis apres du camphre en pouldre, du succe candy, ou autre succe blanc, autant de l'vn comme de l'autre, & meslezen bien tout ensemble: & de ceste pouldre mettez en vn petit dessus le chancre: car si vous en mettiez par trop, il le pourroit manger trop asprement: mais y en mettant mediocrement, encores donnera elle atteinte au fort chancre iusque à la racine: puis apres soit l'oiseau pu de chair bonne & fresche de Volaille ou de Mouton: laquelle ait esté preallablement lauee en bonne huyle d'oliues ou d'amendes douces.

Du mal de la pepie qui vient aux Faucons sur la langue à cause de rheume, de ses causes & signes, & des remedes propres pour la guerir.

C H A P. X X I.



U E mal de la pepie vient le plus souuent en la langue des Faucons, à cause qu'ils ont esté puz de mauuais chairs & puantes, qu'on leur a baillees sans lauer ou nettoyer: & à ceste occasion s'engendrent phlegmes & grosses humeurs dedans leurs corps & entrailles, dont les fumees & vapeurs leur montēt puis en la teste: lesquelles puis apres condensees en pituite leur descendent sur la langue, & de leur corruption s'y engendre la pepie au bout d'icelle, tout ainsi que lon voit aduenir aux poullailles. Vous apperceuez cestuy mal, lors que verrez vostre oiseau souuēt esternuer, & apres auoir esternué faire vn cry par deux ou trois fois. Ce que luy voyant faire, le prendrez, & luy visitant la langue trouuerez la pepie au dessous

soubs d'icelle. Pour y donner remede, dit maistre Molopin au liure du Prince, qu'il faut prendre bonne eau rose, & d'un morceau de cotton attaché au bout d'un petit baston & trempé en icelle eau rose frotter & lauer tres-bien la langue à l'oiseau: puis apres d'huile d'amendes douces, ou d'oliues, ainsi lauee comme cy dessus a esté enseigné, luy oindre la langue deux ou trois fois le iour par trois ou quatre iours consecutifs. Ce fait vous verrez la pepie toute blanche & mollifiée: & alors prendrez vn canniuet, & de la poincte d'iceluy soubleuez la pepie en la tirant tout doucement dehors: ainsi quelon a accoustumé de la tirer aux poulailles. Mais donnez vous garde de ne la tirer, tant qu'elle soit bien mollifiée: car autrement vous pourrez faire à l'oiseau grand mal & grand dommage. Et n'oubliez, apres que luy aurez osté la pepie, de luy oindre & arrouser (trois ou quatre fois le iour) la langue de l'une des huilles dessusdictes iusques à ce qu'il soit guarry.

*Du mal de palais, qui enfle aux oiseaux par froidure & rheume
de teste, de ses causes & signes, & des remedes propres
pour les guarir.*

CHAP. XXII.

ADuient aux oiseaux par fois vne autre maladie, qui est, que le palais leur enfle, pource qu'ils sont morfondus, & chargez de rheume en la teste. Ce mal pourrez vous congnoistre & apperceuoir, lors que verrez vostre oiseau ne pouvant & n'osant bonnement serrer le beq, & au surplus faire chere triste & mauuaise plus que de coustume, & mettre avecques bien grande peine sa chair en bas. Voyant celà si vous luy ouurez le beq, vous luy trouuerez le palais blanc & enflé. Mais aussi ayant trouué quelque commencement de ce mal, il vous faudra bien diligemment visiter le beq de l'oiseau, & regarder s'il y a aucune chose qui l'empesche de le serrer ainsi que de coustume: Car aucunes fois le beq croist & surmonte d'une bande plus que de l'autre, & fait ceste excrescence que l'oiseau ne peut pas reserrer le beq à son droit point.

Pour remede à ce mal enseigne maistre Cassian, qu'il faut faire des pillules de lard, sucre, & moille de bœuf, composees par la forme cy dessus enseignee, & en donner à l'oiseau malade chaque matin vne ou deux par l'espace de quatre ou cinq iours. Et ne le paistre iusques à

F

L I V R E S E C O N D

vne heure ou deux apres la prinse desdites pillules : mais à son past luy donner chair de mouton ou poulaille arrousee des huilles dessusdictes. Ces cinq ou six iours passez, luy faudra ouurir le beq, & avecques la racloire mentionnee cy dessus au chapitre du chancre, luy racle tout doucement ceste blancheur apparoissant en son palais. Toutesfois si vous apperceuez que l'enfleure soit diminuee, ne sera besoing d'y faire autre chose: ains seulement luy continuer l'arrosement des huilles susdites. Mais si l'enfleure se trouuoit haute outre mesure, vous la luy pourriez fendre au long, ou vn peu geriser sans entrer trop auât, pource qu'on le pourroit legerement faire mourir. Puis apres ayant espreint du ius de l'herbe de Capilli Veneris, l'en pourriez lauer par dessus le mal: & tousiours luy arrouser son past des huilles dessusdites iusques à ce qu'il fust bien guarý.

Du mal des sangsues, de ses causes & signes, & des remedes propres pour le guarir.

C H A P. X X I I I.



Aucunesfois il aduient, que les oiseaux se baignans en eaux coies & croupies, ou en fontaines limonneuses, samusent à y boire, & lors leurs entrent petites sangsues dedans la gorge, ou dedans les narilles: lesquelles viennent puis apres à l'enfer du sang qu'elles boient dedans le corps de l'oiseau: qui bien souuent en chet en peril de mort à faute d'y donner prompt & bon remede. De ce mal vous pourrez appercevoir, voyant la sangsue se remuer dedans la gorge de l'oiseau, lors que il prend son past, & aucunesfois se monstrier par les trous des narilles. Pour remede à ce mal, dit maistre Aimé Cassian, qu'il faut prendre quatre ou cinq punaises toutes viues, & les mettre sur vn charbon de feu ardent: puis faire ouurir la gorge à l'oiseau, & luy faire pancher la teste sur ledit charbon, de façon que la fumee de ces punaises brulantes luy puisse entrer en la gorge & es narilles: car lesdites sangsues y seront incontinent qu'elles auront senty ladite fumee, & cherront dehors. Autre remede extraict du liure du Prince enseigne maistre Molopin: Prenez, dit-il, deux ou trois gouttes de ius de limon, & les faites degoutter dedans les narilles de l'oiseau, & verrez qu'incontinent apres il mettra les sangsues dehors. Encores a dit maistre Mi-

chelin, qu'en mettant de la moustarde sur les narilles del'oiseau, il a par plusieurs fois experimenté que les sangsues en sont yssues.

Du mal des maschoires, qui vient dedans le beq, de ses causes & signes, & des remedes propres pour le guarir.

CHAP. XXIII.

Aucunesfois aduient dedans le beq des oiseaux vn mal, que les Fauconniers appellent vulgairement, le mal des maschoires: & procede le plus souuent de trop leur serrer le chapperon, ou de ce que le chapperon est trop petit. Aduient aussi par fois du rheume de la teste, qui leur descend sur l'os du beq. Vous apperceurez ce mal de ce que l'oiseau ne pourra bonnement ouurir ne fermer le beq. Pour remede à ceste maladie enseigne maistre Aimé Cassian, prendre de l'huile d'amendes doulces, & en arrouser tres-bien la gorge & l'os du beq de l'oiseau par trois ou quatre iours consecutifs. Et au defaut de ceste huile d'amendes, prendre de bonne huile d'oliues, & la lauer en l'eau deux ou trois fois, & luy en faire semblable arrousement: mesmes luy en oindre & lauer sa chair, comme a esté dit cy dessus. Aussi dit ledit maistre Cassian que pour oster la premiere & principale cause du mal, il sera bon luy faire prendre des pillules de lard, sucre, & mouëlle de bœuf, par la forme cy deuant plus au long deduite.

Du mal de beq, de ses causes & signes, & des remedes propres pour le guarir.

CHAP. XXV.

Vn autre mal & fascheux inconuenient aduient par fois aux oiseaux par la faute des Fauconniers qui les gardent & pensent. Qui est vn certain mal de beq, qui le fait rompre & esclatter. Et procede de ce qu'en paissant les oiseaux, aucunesfois il leur demeure quelque petit de chair au dessus du palais pres le bout du beq: laquelle chair se vient puis-apres à pourrir, & pourrissant corrompt & gaste le beq de l'oiseau, tellement qu'on le void se rompre & choir par esclats. Autresfois aduient aussi ce mal à faute d'affiner & appointer le beq à l'oiseau

F ij

ainsi qu'il est requis : car il croist tant de part & d'autre , qu'en fin est force qu'il se rompe : & puis s'y engendre vne formiere , qui le fait esclatter & dechoir. Pour remede à ceste maladie , dit maistre Aimé Cassian , qu'il faut prendre l'oysseau , & diligemment luy visiter le beq , en le luy taillant & bien nettoiant . Et si on y trouue formiere , la luer & nettoier aussi tres-bien , tant qu'on la mette dehors.

*Du haut mal ou Epilepsie , dont les oyseaux tombent
par fois , de ses causes & remedes propres
pour les guarir.*

CHAP. X.



L aduient quelques-fois que les Faucons tombent de l'Epilepsie ou haut mal : & leur procede ce mal , comme dient les maistres Fauconniers , de certaine chaleur de foie qui leur fait monter les fumees au cerueau , & puis apres tomber du haut mal. Pour remedier à ce fascheux inconuenient , maistre Molopin au liure du Prince , dit qu'il faut chercher derriere la teste de l'oiseau , & là on luy trouuera deux fossettes , lesquelles il luy faut chauffer d'une verge d'airain ou fil de richard , & il guarira. Et si celle recepte ne proufite , faites celle qui cy apres ensuit. Prenez le petit fer rond , duquel a esté cy dessus parlé , & le faites fort chauffer : puis luy en baillez le feu sur la teste par la maniere deuant dicté : mais que ce soit doucement & dextrement : car autrement le pourriez tuer. Ce fait prenez lentilles rouffes , & les mettez secher au four , & en faites pouldre subtile : & encores de la limure de fer la plus delicee que pourrez trouver , autant de l'un cōme de l'autre , & les mellez & battez fort ensemble avecques du miel de mousche recent. Puis en ayant fait des pillules de la grosseur d'un moyen pois , prenez vostre oiseau , & luy en faites aualler deux ou trois : le tenant puis apres tousiours sur le poing , tant qu'il ait esmeuti vne fois ou deux : puis soit mis au feu ou soleil , & ne soit pu iusques à deux ou trois heures apres , que vous luy donnerez d'une aile de pigeon : luy continuant ceste façon de medecine & regime iusques à sept ou huit iours consecutifs. Et ce pendant soit ledit oiseau tenu de nuit à la frescheur , & de iour en lieu obscur . Autre recepte pour guarir de ce mal à enseigné maistre Aimé Cassian , disant qu'il faut fendre à l'oi-

seur la peau dessus la teste à l'endroit des fossettes dessusdites, & là sont petites veines ou arteres qu'il faudra serrer & lier avec vn petit fil de soye : puis apres oindre & engresser cest endroiët de sang ou gresse de poulaille: & consequemment luy donner des pillules de lentilles & limure de fer par la forme cy dessus escrite, par l'espace de sept ou huit iours. Et de nuit soit tenu au serain & au vent, & de iour en lieu obscur, comme cy dessus a esté dit, & deux ou trois heures apres soit pu d'une aille de pigeon ou de volaille de moyenne gorge: Mais donnez-vous garde de tenir autre oiseau pres de luy, ou le paistre sur mesme gand: Car ceste maladie est dangereuse & cõtagieuse, & pourroit prendre à autres oiseaux qui en seroient approchez, ou puz sur le mesme gand.

FIN DE CE SECOND LIVRE.

F iij



Liure troisieme.


CHAP. I.

AV liure precedent nous vous auons declaré & enseigné, au plus pres de bien qu'il nous a esté possible, tous les moyens laissez par escript & monstrez par cestrois bons & excellens maistres Fauconniers cy dessus nommez, tant pour conseruer Faulcons en santé, que pour les guerir des maladies & accidens qui leur peuuent aduenir en la teste & parties d'icelle: Or reste il maintenant à vous declarer par ordre les maladies qui suruiennent en & dedans le corps des oiseaux, & les remedes propres & requis pour icelles guarir & saner, & remettre les oiseaux au premier & bon estat de leur santé: Ce que j'ay entrepris vous enseigner en ce troisieme liure: & ne vous rien celer des notables secrets & bons enseignemens que j'ay peu par experience apprendre & sçauoir des trois maistres dessusdits: nommeement du bon maistre Aimé Cassian, qui sur tous a esté expert & bien experimenté en ce noble art de Fauconnerie.

Du mal de la pierre, ou de la croye, qui aduient aux boyaux ou bas fondement des oiseaux: de ses especes, causes & signes, & des remedes propres pour le guarir.

CHAP. II.

R pour y commencer, vous serez aduertis qu'il aduient souuent aux Faucons vn mal de pierre (que aucuns maistres Fauconniers ont voulu appeller, mal de croye) qui les tourmente & vexe merueilleusement. De ce mal de pierre y a deux especes: l'vne se prend & demeure aux boyaux & intestins de l'oiseau: L'autre se tient au bas du ventre pres



du fondement : Et se peuuent bien guarir & tirer toutes deux ensemble. Si diôit maistre Cassian , que le mal de la pierre, dicté Croye , vient à l'oïseau de manger mauuaises viandes & grosses chairs , lesquelles leur oppilêt & aboutissent tous les boyaux & le vêtre ainsi que cy dessus a esté dict en parlant du mal de rheume qui prend aux oïseaux par la teste. Et de telles ordures & boutteſſes leur aduient vn eschauffemêt de foye : Lequel estant ainsi excessiuement eschauffé, leur desseiche les boyaux de telle façon qu'ils ne peuuent esmeutir , & faut que la mort s'en ensuiue , si on ne leur donne prompt & seur remede. La pierre du bas intestin pres le fondement procede de l'ordure que fait l'oïseau à l'esmeutir : & se concree ladicte pierre au bout du boyau cullier , ou fondement : & deuient tant grosse , que l'oïseau ne

la pouuant jetter dehors , deuiant tout mesgre , & alangoury , & en fin demeure constipé de telle sorte qu'il luy conuient mourir : Toutesfois quand le Faulcon est de sa nature chauld & gras, il la jette bien dehors. Vous pourrez apperceuoir ce mal de pierre ou croye, lors que vous verrez vostre oiseau esmeutir piece à piece: Car lors se commenceant la croye à engendrer & concreer , le passage des intestins deuiant estroit, d'autant qu'en emporte & estoupe la pierre, qui commence à se former: Et quand vous le verrez esmeutir à deux fois coup sur coup , & à vne autre fois vn peu plus retardee, lors vous pourrez estre assuré que la pierre sera formee dedans le corps. Encores veux-je bien vous aduertir, que luy voyant le fondement eschauffé & sortant vn peu dehors, les plumes de son brayer ordres de son esmeutissement , & le voyant pareillement souuent mettre son bec dedans son fondement , lors pourrez-vous bien seurement apperceuoir qu'il aura la pierre ou croye au fondemēt. Encores quād il esmeutit , & fait semblant de se coucher sur le poing du Fauconnier qui le tient, & a les yeux troubles plus que de coustume, sachez qu'il a la pierre pres du fondement : & pour ce qu'il ne la peut vider , est en danger apparent de mourir. Pour remede à ce mal, dit maistre Aimé Cassian qu'il faut faire vn petit lardon de lard frais & non rance, de la grosseur d'vne plume d'Oie , & de la longueur d'vn poulce en trauers: puis prendre Aloes cicotrin en poudre, & en poudrer entierement ledit lardon: & apres auoir pris l'oiseau, & luy auoir dextrement ouuert le fondement , luy mettre là dedans ledit lardon , en la forme qu'on baille aux hommes vn suppositoire : Et si le lardon est trop tendre & mol pour entrer dedans le fondement de l'oiseau, soit embroché d'vne plume de geline , laquelle neantmoins ne debura passer tout outre ledit lardon: car passant outre, elle pourroit faire grand mal à l'oiseau. Par le moyen dōcques de ladicte plume pourrez-vous plus aisement paruenir à l'effait dudit lardon, mais aussi vous la faudra-il tout doucement retirer apres que verrez le lardon entré dedans le fondement de l'oiseau. Ce fait prendrez des limaçons, & les ayant preparez & accoustrez en la forme dicte cy-dessus au 8. chapitre du second liure, en baillerez à vostre oiseau ainsi que audict chapitre a esté plus à plein deuist : Et luy sera baillée ladicte medecine de limaçons incontinent apres luy auoir mis le lardon dedans le corps. En defaut de limaçons, vous luy pourrez bailler aussi les pillules cōposees de lard, mouëlle de boeuf , & sucre, par la forme cy dessus deduicte aux cinquiesme & neufies-

neufiesme chapistres dudit secōd liure. Puis sera mis l'oiseau au feu ou au soleil, & ne se sera pu iusques à vne heure apres midy. Et si voyez qu'il endure bien le feu ou le soleil, laissez le y plus longuement, car la chaleur luy est fort proufitable : Puis soit pu d'vne cuisse de geline à demie gorge ou peu plus. Et si pouuez recouurer rats ou souris, ne faillez à l'en faire paistre. Car trop mieux valent que pigeons ou gelines. Et ne soit tenu au vent, sinon quand il fera grand chaud. Puis apres au vespre quand il aura enduit, luy soyent donnez cinq ou six clouds de girofle enuolopez en vn petit de cotton ou peau de geline, & rompus vn peu auecques les dents : Soit ceste forme de medecine continuee par trois ou quatre iours, (excepté le lardō suppositoire qui ne se doit donner qu'vne fois) & par ce moyen sera fort bien purgé vostre oiseau. Mais aussi donnez-vous bien garde, qu'il ne remette hors les clouds de girofle. Car meilleure drogue ne plus propre ne pouuez-vous donner à l'oiseau malade, specialement de rheume de la teste: combien qu'en toutes manieres de filandres, & autres maladies, ce luy soit fort idoine secours. Maistre Molopin au liure du Prince a enseigné encores vn autre bon remede à ce mal de pierre: Soit prins, dit-il, le fiel d'vn petit cochon de laid, aagé de quinze iours ou trois semaines, & mis au bec de l'oiseau de telle adresse & dextérité qu'il le puisse aualler sans le rompre, & sans rien en remettre ou reietter: puis luy soit donné vn petit lopin du cœur d'iceluy cochō de la grosseur d'vne febue moyennement grosse: Et l'ayāt puis apres mis au feu ou au soleil, laissez le ainsi iculiner iusques au vespre. Ceste medecine est moult propre & bien approuuee pour tous oiseaux de proie qui ont mal de pierre ou de croie. Mais si c'estoit vn autour ou vn espreuier qui eust ceste maladie de la croie, ne luy en faudroit dōner qu'vne fois: & aux autres oiseaux estans de plus forte nature & cōplexion, n'y aura dāger de leur en faire prendre par trois diuers iours. Or l'heure du vespre venue, vous paistrez vostre oiseau de poulaille, ou mouton, ou bié de quelques petis oiseaux. Et le lendemain aiez lait de cheure, si en pouuez recouurer, sinon prenez lait de femme, & y trempez la chair dōt voudrez paistre vostre oiseau: Si ainsi le paissiez trois iours à petite gorge, sans doubte il se guerira. Autre remede enseigne encores maistre Michelin, pour cestuy mal de croie ou pierre, disant. Soit faicte la medecine dessusdict de lard, mouëlle de bœuf, & sucre en pouldre de moyenne cuitte, & safran en pouldre, moins la moitié

que de sucre, & des trois autres autant de l'un que de l'autre: Mais que le lard ait trempé, ainsi que cy dessus a esté dit, par l'espace de vingt & quatre heures, luy changeant l'eau trois ou quatre fois, & soit mis de nuit au serain: Puis soient faites vos pillules de la grosseur d'une moienne febue, & vne ou deux d'icelles (à vostre discretion) donnees à l'oiseau qui soit mis au feu ou au soleil, & puis apres à son heure peu de mouton ou de poulaille par raison: continuez ceste medecine par trois ou quatre iours, luy donnant, si bon vous semble, des cloux de girofle, par la forme cy deuant enseignee, & vous l'en verrez bien fort allegé. Luy-mesmes a laissé par escrit & enseigné encores autre bon remede. Prenez, ce dit-il, le cœur d'un mouton, & l'ayant coupé en pitis morceaux, mettez-le tremper en lait d'anesse ou de cheure, ou de femme, tout vne nuit: Et le lendemain matin poudrez vostre lait d'un petit de sucre de premiere cuitte, puis de ce cœur de mouton ainsi trempé dedans ce lait soit pu vostre oiseau raisonnablement. Si luy continuez par trois iours ceste medecine, vous le trouvez grandement soulagé de son mal de croye, & en pourrez faire vsr indifferemment à tous oiseaux sans nul danger. Autre recepte pour guarir ce mal a enseigné maistre Molopin. Prenez, dit-il, d'une herbe appelée, Nasitort, & la pillez dedans un mortier: puis en prenez le ius, & le mettez dedans un boiau de geline long d'un poulce en trauers, qui soit lié par les deux bouts: presentez puis apres ce boiau au bec de vostre oiseau, & faites tant qu'il l'auale & mette en bas. Et si ne trouuez du nasitort, recourez s'il est possible, d'une autre herbe nommée, Theodoin, de laquelle vous ferez comme de la precedente: Puis bouchez vostre oiseau au feu ou au soleil, & ne soit pu iusques, à quelque my-iour de quelque bon past vis: pour ce que telle medecine luy aura destrempé tout le corps: laquelle neantmoins vous continuerez par deux ou trois iours: ou moins, selon ce que verrez que la premiere prinse aura fait bonne ou moindre purgation. Et par ce moyen vostre oiseau guarira. Autre recepte pour guerir ce mal, met encores maistre Molopin au liure du Prince: Prenez, dit-il, semence de Lambrusque pesant un tournois, semence d'Espargoutte pesant un tournois, semence de persil pesant un tournois, semence d'Ache pesant un tournois, sucre de premiere cuitte vne dragme, graine de Staphizagria pesant un tournois, la moitié de la coquille d'un œuf, un demy septier ou peu plus d'eau de riuere bien nette, & mettez le tout ensemble en un

petit pot neuf, & le faites bouillir tant qu'il vienne à la moitié moins. Apres soit coulé & passé par vn linge delié. Puis soit prins casse fistule le pesant d'un tournois, Turbithile, le pesât d'un tournois, Hermo-
daçyles le pesant de deux tournois, Aloes dit cicotrin pesant trois tournois: Et de tout ce soit faite pouldre subtile, qui soit mise dedans ladite eau boullie avec les autres mixtions. Puis mettez ladite eau ainsi mixtionnée dedans la vésie d'un pourcelet, au col de laquelle vous attacherez bien proprement le tuyau d'une plume d'oie ou de quelque autre oiseau pour seruir de conduit au clystere que voulez bailler à vostre oiseau, & le lierez si bien que rien n'en puisse sortir ou eschapper: Puis-apres appliquerez tout doucement ledit tuyau au fondement de vostre oiseau, & luy ferez peu à peu entrer toute ladite eau dedans le corps, par la mesme forme & maniere que vous voiez bailler les clysteres aux hommes. Puis soit mis au soleil ou au feu: & ne soit pu iusques apres midy, que vous luy donnerez de la cuisse d'une ieune volaille: & par ce moien il guarira. Or deuez-vous sçauoir & noter diligemment, que de toutes les receptes cy dessus declarees vous pouvez choisir celles qui vous sembleront mieux à propos: & d'icelles vser à vostre bonne discretion, pour donner guarison à vostre oiseau malade de la pierre ou croye dessusdite.

Du mal des filandres, qui aduient aux Faucons en plusieurs parties interieures de leurs corps, & des remedes pour le guarir: Et de ses especes, causes & signes, & premierement des filandres de la gorge.

CHAP. III.

LEs maistres Fauconniers dient & tiennent pour chose as-
seuree, que tous oiseaux ont des filandres: Dont ils font
trois sortes ou manieres communes & ordinaires: & en a-
ioustent vne 4. espece, pire que les autres (qu'ils nomment
aiguilles): dont sera cy apres parlé en son lieu & ordre. De toutes ces
quatre manieres de filandres aucuns oiseaux en sont plus, & aucuns
moins affligez. et leur aduient ces maladies pour auoir esté puz
& nourris de grosses & mauuaises chairs, & aucunes fois puantes
ou autrement mal nettes: à cause dequoy s'engendrent & multi-
plient en leurs corps les humeurs grosses & vicieuses qui sont les-
dites filandres. Par fois aussi leur aduient ce mal du vol qu'ils peu-
uent auoir fait, soit aux champs soit en riuere: C'est à sçauoir,
quand l'oiseau volant a battu sa prinse, & s'efforçant à l'abatre s'est
rôpu quelques petites venes dedans le corps: & à ceste occasion s'es-

G ij

pand le sang dedans ses entrailles, & là se seche & caille, dont viennent & s'engendrent ces filandres en grand nombre. Et puis pour la puanteur du sang ainsi caillé & figé, qui est tout corrompu dedans le corps, comme estant le sang hors de ses vases, les filandres viennent à chercher le plus net du corps pour fuir celle puanteur, & montent ou au cœur de l'oiseau ou iusques à la gorge, tellement qu'il en meurt. Lors quelques-vns disent que l'oiseau est mort du mal de la teste, ou de croye: mais ils s'abusent, car il est mort de filandres, ou d'aiguilles, qui pis est. Or nous dirons premier des filandres, l'abondance desquelles est aucunesfois si grande, qu'elles viennent à monter iusques à la gorge des oiseaux & iusques au pertuis pres du palais, par où l'oiseau prent & remet son halaine, & par iceluy montent au cerueau, dont aduiét qu'ils en peuuent mourir. Et pourrez cognoistre, que l'oiseau aura cest inconuenient à la gorge, si quand vous l'aurez pu, les filandres sentans la frescheur de la chair se remuent en telle maniere que verrez vostre oiseau qui se prend à bailler souuentesfois, pensant secourir & ietter ces filandres dehors, dont par fois viennent à ietter leur gorge. Encores pourrez cognoistre que l'oiseau a des filandres en la gorge, quand il s'y grattera du pied: adonc soit pris gentiment, & luy soit regardé dedans la gorge, & vous les verrez remuer dedans icelle. Pour faire mourir lescdites filandres, dit maistre Aimé Cassian, Prenez vne grosse raue, & faites vn trou dedans, en maniere d'une fossette, & l'emplissez d'eau, & puis mettez ladite raue dedans la braise bien chaude, & en luy changeant la braise tant qu'elle soit bien cuyte, par l'espace de demie heure ou plus. Et si vostre eau se diminue, remplissez tousiours vostre dite fossette: combien que de sa nature la raue rende assez d'eau. Apres soit mise la raue en vne escuelle, & pressez tout le ius tant qu'il ne demeure rien. Puis prenez safran en poudre du gros d'un petit pois, & le mettez en ladite eau, & luy en lauez sa chair quand le paistrez, & ne luy donnez que demie gorge. Et si d'auenture il ne se veut paistre, gardez-la luy iusques à ce qu'il ait plus grand appetit de manger. Si vous luy continuez ceste medecine par trois ou quatre iours continus, sans doubte mourront lescdites filandres, & guarira vostre oiseau.

De

*D'une autre seconde espece de filandres, qui viennent aux estraines
& aux reins des oiseaux : & des remedes propres à
les guarir.*

CHAP. IIII.



Ly a vne autre espece de filandres, qui s'engēdrent & concreent pareillement dedans le corps des oiseaux: lors qu'ils se retrouuēt chargez de grosses humeurs, ordures, & putrefaction: dont naissent lesdites filandres: puis chercās quelque endroit plus net, montent aux reins & aux estraines des oiseaux, qu'ils persent & gastent, tellement que tost apres on les voit mourir. De ceste espece de filandres vous pourrez apperecuoir, lors qu'orrez vostre oiseau crier & se plaindre la nuit, avec vne voix lamentable cōme, crac, crac. Encore autrement les pourrez-vous descouurir, quand portant au matin vostre oiseau sur le poing, vous sentirez qu'il vous estreindra plus fort qu'il n'auoit accoustumé: & il fera semblant de se coucher sur la main, ou se plumera sur le dos à l'endroit des reins ou estraines. Et lors tenez-vous tout asseuré que les filandres ou aiguilles des reins le tourmentent: & qu'il est en grand danger de mort, si vous n'y donnez quelque bon & prompt remede. Lequel, si vous en voulez croire le bon maistre Aimé Cassian, sera tel. Vous prendrez des lentilles, des plus rouges que vous pourrez recouurer: & les ferez biē essuier & secher au soleil, ou deuant le feu: & prēdrez aussi de la graine à vers, la moitié moins toutes fois que lesdites lentilles: puis de tous ces deux simples mellés ensemble ferez pouldre bien delicee & subtile, laquelle vous delaierēs en huile d'olif: puis en ferez vne emplastre, que vous estendrez sur toile ou cuir, & puis l'appliquerez sur les estraines ou reins de l'oiseau: & la chāgerez apres qu'elle y aura demouré quatre ou cinq heures. Et par ce moyen, ce dit maistre Cassian, mourront lesdites filandres. Vne autre recepte enseigne maistre Michelin pour faire mourir lesdites filandres. Prenez, dit-il, fueilles de perscher, herbe de rue, & herbe de mente: & apres les auoir bien pillees en vn mortier, tirez & exprimez-en le iust: puis dedans ledit iust delaiez de la pouldre à vers: & en faites emplastre sur toile ou cuir, qui puis apres soit appliquee sur les reins de l'oiseau, deux fois le iour: c'est à dire, vne fois au matin, & autrefois au vespre, & ainsi continuee par quatre ou cinq iours. Et cestuy vous sera vn bon moyen pour faire mourir lesdites filandres.

G iiij.

LIVRE TROISIÈME

D'une autre espece de filandres qui viennent aux cuisses des Faucons : & les remedes pour les guarir.

CHAP. V.



AUTRE maniere de filandres (lesquelles aucuns ont appellees, vers) viennent aux cuisses des oiseaux. Et s'engendrent à l'occasion de ce que par fois les negligens ou mal aduisez Fauconniers mettent leurs oiseaux sur la perche sans chapperon: qui est cause de les faire debattre à grande force: tellement qu'ils se rompent par fois les venes des cuisses, spécialement les oiseaux Hagars plustost que les Sors. Par ce moyen le sang escoulant des venes rompues s'espand au long des cuisses, & encores au long du bas ventre entre cuir & chair: & de ce sang ainsi caillé & corrompu se concreent & engendrent puis-apres tant de vers ou filandres, qu'il est force à l'oiseau de mourir. Encores aduient par fois cest inconuenient à l'oiseau de ce, que se battant sur le poing du Fauconnier, il se donne aucunes fois forte escouffe, & le Fauconnier qui le porte par colere ou autrement luy en redonne aussi par fois vne autre: qui est cause de luy faire rompre les venes, & engendrer (ainsi que cy dessus est recité) lesdites filandres. Desquelles vous pourrez appercevoir, voiant vostre oiseau se plumer souuent les cuisses & le ventre, & en faire cheoir des plumes. Pour remede à ces vers ou filandres, maistre Molopin enseigne & commande de faire à l'oiseau malade, la medecine ou emplastre du ius de feuilles de pescher, rue, & mente & pouldre à vers, dont a esté mise la recepte au chapitre precedent cestuy. Ou bien du ius desdites fucilles & herbes, lauez les cuisses & le ventre de l'oiseau malade deux fois le iour par quatre ou cinq iours: & sans doute mourront lesdits vers & filandres, & vostre oiseau guarira.

D'une autre espece de vers ou filandres, que lon nomme vulgairement aiguilles, & sont pires que toutes les autres: & des remedes pour les guarir. CHAP. VI.



ENcores y a-il vne autre quatriesme espece de vers ou filandres, plus dangereuses & pernicieuses que toutes les autres, qui sont nommees aiguilles, à cause qu'elles sont plus courtes & subtiles que les autres filandres, qui montent à la gorge & aux estraines. Les aiguilles s'engendrent & concreent es corps des oiseaux,

à cause des mauuaises humeurs qui y abondent , comme nous auons dit des autres . Mais elles sont beaucoup pires, pource que fuians la puanteur desdites humeurs corrompues, & cherchâs lieu plus net, passent au trauers des boyaux, & montent iusques au cœur. Et si plus-tost n'y est remedié, l'oiseau ne peut fuir qu'il ne meure. Vous vous pourrez appercevoir de ce mal d'aiguilles , lors que voirrez vostre oiseau se courre dessus le leurre. Ou quant le tenât sur le poing, vous le sentirez vous estreindre & serrer beaucoup plus fort que de coustume . Pour remede à ce mal des aiguilles, enseigne maistre Molopin ceste medecine. Prenez dit-il, Staphizagria, & de l'herbe de Barbarie ou rhu-barbe autât de l'un comme de l'autre: & de l'aloës cicotrin autant que des deux autres ensemble, & ayant tout mis en pouldre, meslez le bien l'un parmy l'autre: puis enuolopez ladite pouldre en peau de geline, ou en cotton de la grosseur d'une noisette, & la faites aualler à vostre oiseau. Apres ce, donnez luy de la chair aussi gros qu'une febue: puis le mettez au feu, ou au soleil: & ne le passez iusques apres midy, que vous luy donnerez demie gorge. Si vous luy continuez ceste medecine par trois iours consecutifs: vous y congnoistrez grand amendemêt. Mais aussi soiez aduertis de ne faire vsr de ceste pouldre à vn oiseau qui soit megre: car il ne la pourroit endurer: Soiez aussi aduisez de luy mettre sur la chair du poil de porc taillé bien menu: car il luy pourra grandement proufiter. Vn autre bon & seur remede pour le mal des aiguilles, a enseigné maistre Michelin au liure du Prince: duquel vous pourrez aider & accommoder au defaut du precedent. Prenez, dit-il, de la corne de Cerf, & la mettez au feu, tant qu'elle soit tres-bien cuite, & cōme reduitte en charbon. Puis apres qu'elle sera bien refroidie, mettez-la en pouldre bien subtile. Prenez aussi d'une grosse graine, que lon appelle en Latin Intybus, autant comme de ladite corne, & la mettez pareillement en pouldre: Prenez encores de la pouldre à vers , autant comme des deux autres: & de l'aloës cicotrin la moitié moins que de la pouldre de corne de Cerf: & de la theriaque (qu'on appelle vulgairement triacle) la moitié moins que duditaloës . Et toutes ces choses bien meslees ensemble, soient destrempees dedans du miel, & lesdites pouldres y mixtionnees peu à peu , tant qu'elles soient reduites en masse pour faire pillules: lesquelles vous pourrez former puis-apres de la grosseur d'une noisette, & en donner tous les matins à vostre oiseau par l'espace de cinq ou six iours: & tost apres soit pu à demie gorge. Et si la premiere fois que luy en aurez donné vous

apperceuez qu'il ait vouloir de remettre dehors : les iours ensuiuans vous pourrez enuelopper ladite pillule de peau de geline ou de cottō, comme auons cy dessus remonstré . Et tiennent lesdits maistres Fauconniers, que ceste forme de medecine est vn prompt & seur moyen pour faire mourir le(dites) aiguilles. Maistre Aimé Cassian dit, que pour remede à ce mal d'aiguilles est propre la medecine cy dessus recitee, & par luy enseignee pour les filandres. Prenez, dit-il, de l'herbe de ruë, & de l'herbe d'absinthe, (ou encens puant) autant de l'une que de l'autre, fucilles de pescher autant que des deux autres: pilez tout ensemble, & en espreignez le ius: dedans lequel mettez puis-apres vn peu de la pouldre à vers : puis mettez la medecine ainsi cōposée en vn boyau de geline, & en faites vser en la maniere dessusdite à l'oiseau malade des aiguilles. Aussi soiez aduisez que de tous les remedes cy dessus recitez vous pouuez faire vser à vostre oiseau, selon vostre bonne discretion, tant pour les filandres que pour les aiguilles . Mais donnez vous bien garde de dōner à vostre oiseau fortes medecines, s'il n'est haut & gras: autrement il ne les pourroit supporter.

Des apostumes qui s'engendrent aucunes fois dedans le corps des oiseaux : de leurs causes & signes, & des remedes pour les guarir. CHAP. VII.



Ouuent aduient que dedans le corps des Faucons, s'engendrent & forment grosses & dangereuses apostumes: & leur vient ce mal, pour prendre trop les hayes & les buissons: ou pour trop se debattre, soit sur le poing, soit à la perche: ou de frapper sur leur proie, en quoy faisant ils se froissent, & s'eschauffent, puis se refroidissent, & de ce leur vient l'apostume. De ce mal vous pourrez prendre indice & demonstration, quand vous verrez les narines de vostre oiseau souuent s'estoupper, & le cœur luy battre bien fort dedans le corps. Pour remedier à ce mal, enseigne maistre Molopin au liure du Prince ceste medecine. Prenez, dit-il, le blanc d'un œuf, & le battez bien fort, & des fucilles de chou, que ferez piler, & en espreindre le ius, puis le meslerez avecques le blâc de l'œuf battu, & en cōposerez vne medecine: laquelle vous mettrez dedans vn boyau de geline, & la ferez le matin prendre à vostre oiseau, que vous ferez puis-apres tenir au feu ou au soleil, & ne le paistrez iusques apres midy, que luy dōnerez d'un cœur de moutō, ou d'une ieune poulaille. Le lendemain prēdrez du rōmarin, que ferez brusler & reduire en cēdre ou pouldre: de laquelle vous luy poudrez sa chair, quand le voudrez

voudrez paistre, à discretion. Puis par trois iours luy donnerez du sucre: & le quatriesme iour ensuiuant retournerez à luy donner de telle pouldre ou cendre de Rommarin, changeant ainsi le sucre & la pouldre de trois en trois iours, par l'espace de quinze iours: pendant lesquels aduisez, songneusement à le tenir chaudement iour & nuict, & ne le paistre que de bon past à moyenne gorge.

Du mal de foye aduenant aux oyseaux, de ses causes & signes, & des remedes propres pour le guarir.

CHAP. VIII.

MA l'ou eschauffement de foye aduient aux oiseaux, par la faulte des Fauconniers qui les gouvernent: c'est à sçauoir, pour les paistre de grosses, & mauuaises chairs, le plus souuent vieilles & puantes à faulte de les lauer & nettoyer: ou au de faut de ce qu'ils ne sont baignez, & qu'on ne leur donne l'eau commode & necessaire quand il en est mestier: ou par trop & longuement les faire voler & à iun: Qui sont tous moyens de faire eschauffer le foie de l'oiseau. De ce mal vous pourrez apperceuoir, voyant vostre oiseau auoir les pieds fort eschauffez, & la gorge changee de couleur, & comme blanchie à cause des fumecs montans du foye eschauffé: Mais si vous trouuez que la langue luy deuienne noire, lors le pourrez-vous croire en grand danger de mort. Pour remede à ce mal, maistre Aimé Cassian enseigne pour prompt & propre remede, la medecine cy dessus enseignee pour le mal de teste, & le mal de pierre: C'est à sçauoir, de limas destrempez en lait d'anelise ou de cheure, par la forme cy dessus descrite au second liure chapitre huietiesme: & luy en donnez au matin par trois ou quatre iours consecutifs: Et si ne pouuez recouurer des simples requis pour ladicte medecine: vous pourrez vser de l'autre medecine, de lard, de mouëlle de bœuf, & de sucre, descrite au cinquiesme chapitre dudiect second liure, & en donner par chascun matin à vostre oiseau l'espace de quatre ou cinq iours. Car la purgation des humeurs vicieux qu'il aura dedas le corps, luy fera diminuer la chaleur du foye: Puis apres vous le pourrez paistre de mouton ou poulaille baignee en lait: & luy cōtinuer ce past huiet ou dix iours: Car le lait est vn simple fort propre pour temperer la chaleur du foie: Mais aussi gardez vous bien de luy donner à manger pigeons, ny autre gros past. Apres que vostre oiseau aura esté

H

purgé par le moyē des medecines dessusdictes, & la langue luy sera amēdee: Prenez huile d'amendes doulces, & si n'en trouuez, prenez huile d'olives lauee deux ou trois fois, & luy en arrosez la langue avec vne plume, & la gorge trois ou quatre fois par iour: puis d'une petite racloire d'argent ou d'autre metal, raclez luy la langue & la gorge iusques à ce qu'il soit bien guarý: mais sur tout souuienne-vous de luy lauer tousiours son past dedans du lait. Cependant si tant estoit malade qu'il ne peust manger, gardez-vous bien de l'abandonner: mais avec vne petite fourchette ou vergette mettez luy sa chair à petis morceaux tout doucement dedans la gorge, & tant auant qu'il la puisse aualler & mettre bas. Car ce n'est que le mal de la langue enflée, qui le garde de manger: & partant ne doit estre abandonné. Maistre Michelin enseigne encores la medecine qui ensuit pour refreschir le foie de l'oiseau. Prenez, dit-il, de la Reubarbe, & la mettez en lieu frais tremper toute vne nuit en belle eau claire: & de ceste eau luez le lendemain la chair dont voudrez paistre vostre oiseau, luy continuant ceste medecine par quatre ou cinq iours, vous verrez que le foie luy retournera en bon estat, & guarira. Mais aussi devez-vous entendre que ceste eau de Reubarbe pourra profiter à l'oiseau qui ne sera tant ord dedans, comme cy dessus a esté déclaré. Car si ainsi estoit qu'il eust boutesse dedans le corps: mieux luy voudroyent les autres medecines dessusdictes.

Du mal de chancre qui vient de chaleur de foie, & des remedes pour le guarir. C H A P. I X.



Aucunefois aduient qu'à l'occasion de l'excessive chaleur eschauffant le foie de l'oiseau, le chancre le prent en la langue ou en la gorge: Pour à quoy obuier & remedier, dit maistre Aimé Cassia qu'il luy faut faire vser de la medecine dessusdite faite de limaçons: ou de l'autre composee de lard, mouëlle de bœuf, & sucre, le tout par la forme & maniere cy deuant recitee ausdits cinquiesme & huictiesme chapitres du second liure. Et luy soit lauee sa chair de lait ou d'huile d'amendes doulces, ou d'huile d'olives, au defaut de l'autre: & en soit le chancre arrosé deux ou trois fois le iour tant qu'il soit bien blanc & meur: puis racle avecques la racloire tant qu'il n'y demeure rien. Et si

chair morte s'y prenoit, mettez y vn peu d'Alum en pouldre : & continuez le lait ou huile dessusdicte tant que vostre oiseau soit bien guarý.

Du mal de Pantais, des trois especes d'iceluy, des causes & signes, & des remedes pour le guarir, nommeement le pantais de la gorge.

CHAP. X.



L y a de trois sortes de Pantais : qui est vn mal dont les oiseaux sont bien souuent affliges : C'est à sçauoir, le pantais de la gorge : l'autre pantais qui vient de froidure : & le tiers qui aduient aux rains & rongnons des oiseaux : comme de chacune d'icelles sera cy apres parlé en son lieu & ordre. Or ce mal de Pantais de la gorge aduient aucunesfois de ce que l'oiseau estant fort, se debat sur la perche ou sur le poing : & se debattant se rond aucunes petites venes du cerueau, puis s'espand sur le goffier le sang escoulant des venes rompues, & se desseche, & estant sec se defait par petites escailles : Puis de rechef l'oiseau se debat, & se debatant esmeut quelqu'une desdites escailles, qui luy viennent à couvrir quelques conduis approchans de la gorge, & lors il commence à pantaiser. Puis de rechef vient à se debattre, & se debattant faict approcher lesdictes escailles plus pres de la gorge : lesquelles par fois se mettent de trauers, & luy empeschent tellement la respiration & le cours de l'halene, qu'en fin il est forcé de mourir. Et à la verité c'est ceste espeece de pantais qui fait principalement & ordinairement mourir les oiseaux. De faict qui en voudra faire preuue plus certaine, face ouurir & fendre la gorge à l'oiseau que l'on croit mort de ce mal du pantais : & on y trouuera l'escaille ou esclat qui en aura donné l'occasion. Maistre Aimé Cassian dict que bonnement on ne peut donner remede à ce mal : pource qu'il tient à vn pertuis appellé la quenouille de la gorge, par lequel l'oiseau prend & remet son haleine : Toutesfois dict ledict Cassian qu'il a veu resentir quelque allegement aux Faucons malades du pantais de la gorge, les mettant en vne châtre claire & nette, de laquelle toutes les fenestres soyent ouuertes, treillees neantmoins de façon q' l'oiseau ne puisse y sir dehors. Faut aussi qu'en ladite châtre soyent mises deux ou trois perches, afin qu'il puisse saillir de l'une à l'autre : & que la châtre, s'il est possible, soit exposee au soleil

H ij

L I V R E T R O I S I E S M E

de leuant. Faut aussi que l'oiseau ait tousiours de l'eau deuant ses yeux: Et quand on le veut paistre, que sa chair soit taillee en petis moreceaux à fin qu'il ne s'efforce point à tirer : mais qu'il ne soit pu qu'à demie gorge, & seulement vne fois le iour: Et sur tout se faut bien donner garde de luy donner bœuf, ou autre grosse gorge. Ainsi le pourrez-vous tenir trois sepmaines ou vn mois, puis aduiserez s'il sera point amendé. Et si le trouuez amendé, soit remis tant qu'il soit bien guarý. Cependant n'oubliez à luy lauer & baigner tousiours sa chair dedans du lait, ou en huile d'amêdes douces: & ce luy pourra estre cause d'un grand bien: Car bié peu d'autres remedes se trouue pour amêder ou guarir ce mal de pantais de gorge, depuis que l'oiseau en est surpris.

*De la seconde espee de Pantais qui vient de froidure, des causes & signes,
& des remedes qui y sont propres.*

C H A P. X I.



NE autre maniere de Pantais aduient aux oiseaux par froidure & morfondure: C'est à sçauoir, quand ils se baignent aux champs en volant, & puis apres ne sont sechés ne essuyés à propos, ne mis en lieu sec & chaut, où l'humidité par eux accueillie se puisse esparer & assecher. Aduient aussi aucunesfois le Pantais à l'oiseau pour auoir esté mis en lieu remugle & humide, ou auquel y ait fumee ou pouldre remuée: qui sont tous moyès de le faire pantaiser: c'est à dire, de luy faire remettre son haleine à peine, qui est le propre accident du Pantais. Maistre Molopin au liure du Prince contre cest espee de Pantais, enseigne le remede qui ensuit. Prenez, dit-il, limures de fer bien menues, & farine de lentilles, autât de l'un que de l'autre: & meslez tout ensemble avecques miel, de maniere qu'en puissiez faire pillules: lesquelles ferez du gros d'un pois, & en baillerez deux ou trois le matin à vostre oiseau par trois ou quatre iours cōsecutifs: puis le paistrez apres le midy de quelque bon past vif & delicat. Et si au bout desdits quatre iours vous y trouuez quelque amendement, mettez luy puis apres par deux ou trois iours de la pouldre d'orpiment sur sa chair lors que viêdrez à le paistre, & ce luy pourra estre moyen de guarir. Toutesfois où toutes les choses dessusdites ne luy proufiteroient, vous pourriez essayer de la medecine qui ensuit, laquelle maistre aimé Cassia enseigne pour bien fort remediabie à ce mal. Prenez, dit-il, d'une herbe qui se nôme

en Latin Pulmonaria: & apres l'auoir fait biẽ dessecher au soleil, faites en poudre bien subtile: puis prenez beurre frais trois fois autant que de ladite pouldre, & trois fois autãt de miel que de beurre: puis mettez tout ensemble en vn pot neuf, & le faites bouillir, & n'oubliez de l'escumer en bouillant, & apres qu'il sera bien refroidy, faites en pillules qui soient de la grosseur d'un pois: & luy en donnez deux ou trois tous les matins de quatre ou cinq iours, ainsi que dit a esté en la recepte precedente: & le païssez & gouuernez au surplus en la forme y mentionnee.

Autre medecine enseigne maistre Michelin pour le mal du pantaïs. Quand l'oiseau pantise, ce dit-il, prenez de l'herbe de Capilli Veneris qui croist aux prez, racine de persil, & racine d'ache, & pommes de saint Iean vieilles qui soient parees (ces pommes viennent coustumierement plus-tost que les autres:) toutes ces choses soient mises ensemble en vn pot neuf de moyenne grandeur, & faites bouillir au lóg du feu: puis en soit l'eau du bouillon coulee par vn linge net, & en icelle mis du sucre fin, avec vn peu de mouëlle de beuf taillee bien menu, & le tout bien battu & meslé ensemble. De ceste composition vous baillerez à vostre oiseau vne fois au matin & vne fois au vespere, vne cuilleree, que luy ferez prendre avecques vne cuillier ou avec vn petit entonnoir, comme verrez qu'il vous sera & à l'oiseau plus aisé & commode, & continuez d'ainsi le faire par l'espace de quatre ou cinq iours: pendant lesquels vous ne païssez vostre oyseau iusques apres midy de pouillaille avecques le sang: & tousiours luy arroserez son past d'huyle d'amendes douces, ou d'huile d'olif au defaut de l'autre: Apres toutesfois que vous aurez laué ladite huyle dedãs deux ou trois eaux. Et encores apres que sa chair sera, ainsi que dit est, arrousee, il la faudra poudrer d'un peu de sucre fin, & d'un peu de safran, moins la moitié que de sucre. Apres lesdits quatre ou cinq iours, si voiez que mestier en soit, vous luy pourrez d'abondant par quatre ou cinq autres iours poudrer son past d'orpigment sans gresse: & puis-apres reprendre l'huile dessusdicte iusques à ce qu'il soit bien guarý.

*De la tierce espece de pantaïs, qui tient és reins & rongnons,
de ses causes, signes, & accidens: & des remedes
propres pour la guarir.*

CHAP. XII.

H iij



Ly a vne tierce autre espee de pantais, qui afflige les Faucons de la part des reins & rongnons. Et leur aduiēt souuent ce mal, apres qu'ils ont esté vexez de quelque autre grieue maladie: de laquelle neantmoins ils sont reschappez par le bon soin & diligente cure que le Fauconnier en a peu auoir. Et par le moyen du reliqua des mauuais humeurs qui auoient causé ladite maladie, l'oiseau apres qu'il semble en estre guarý vient à pantaiser. Or gist la cause de ceste maladie és reins de l'oiseau, esquels se concree & engendre ie ne sçay quel mal ressemblant à chancre, qui est de la grosseur d'une febue: qui fait que l'oiseau vient tousiours de plus en plus à s'enfler: & se trouue en fin auoir l'estomac pantais, & empesché de telle façon, qu'il est contraint rendre & reietter son past. Ceste espee de pantais est moult differente des autres: car vous verrez souuent aduenir que le pantais laissera l'oiseau par l'espace de six ou sept iours, & puis le reprendra plus fort que deuant: aucunes fois le lasche & intermet de mois en mois, ou de trois en trois mois: de maniere qu'il le portera quelque fois tout vn an. Vous pourrez apperceuoir de ce mal, lors que verrez l'oiseau pantaisant mouuoir les reins plus-tost & plus fort que les espauls: ou au contraire aux autres especes de pãtais, l'oiseau remuë plus-tost & plus fort les espauls que les reins. Encores en aurez-vous plus certain indice, quand vous verrez le pantais lascher par intermission huit ou dix iours vostre oiseau, & puis apres le reprendre. Et sil aduenoit qu'il en mourust, faites le ouurir: & vous trouuerez comme vne glande au dessus de ses roignons ou estrenes. Pour remede à ce mal, enseigne maistre Aimé Calisian ceste recepte. Prenez dit-il, racines d'asparges, racines de capres, racines de fenoi, racines de persil, & racines d'ache, & les faites toutes bouillir ensemble dedans vn pot neuf, tant que l'eau en laquelle elles auront bouilly vienne des trois parts aux deux. Prenez aussi vne tuile qui soit vieille (car plus sera vieille, mieux vaudra) & en faites pouldre bien subtile. Puis quand voudrez paistre vostre oiseau, aiez tousiours fresche & boune chair, & non de bœuf: & la faites tremper en l'eau, en laquelle auront cuit lesdites racines, dedans vne escuelle; enuiron vn quart d'heure deuant que le paistre: mais dõnez vous garde que vostre eau où vous tremperez vostre chair, soit tousiours nettement gardee. Et quand vous aurez le matin donné à vostre oiseau malade sa chair trempée en ladite eau: donnez luy au soir sa chair poudree de ladite pouldre, changeant ainsi de fois à autre: mais le paissant

ne luy donnez que demie gorge par fois, & autresfois quād le verrez en appetit, donnez luy tant de chair, qu'il en voudra manger & prendre. Continuant ceste medecine par huit ou neuf iours, ou plus si voyez que besoin soit, vous en resentyrez quelque amendement. Toutesfois si ceste maladie estoit trop enracinee, & l'oiseau l'auoit portee longuement: à bien grande peine en pourroit-il guerir: tāt est qu'y obuiant & pouruoiant diligemment du commencement, plusieurs Fauconniers & Gentils-hōmes ont trouué & experimenté grād soulagement de la medecine dessusdite. Maistre Cassian a enseigné encores vn autre moien de guarir l'oiseau de ce mal: lequel est souverain & bien approuué, combien qu'il semble dangereux & difficile. Si vostre oiseau, dit-il, a porté cestuy mal de pantais six ou neuf mois, ou vn an, & vous le voulez guarir, tenez-le haut & en assez bon point, & s'il est possible qu'il soit tousiours bien net dedans le corps. Si le prendrez tout doucement, & le mettrez en maillolet, puis sera ouuert, ainsi que lon ouure vn coq, quand on le veut chapponner. Et quand aurez fait ceste ouuerture, vous tournerez tout doucement les boyaux de l'oiseau, tant que luy puissiez voir l'eschine à l'endroit des reins. Lors regardāt en haut, vous voirrez comme vne petite vessie qui commencera à durcir, & sera aussi grosse qu'une febue. Aucunesfois vous y en trouuerez deux, pendans à vn petit filet: esquelles entre aussi par fois quelque chancre, & ont la forme d'une glande. Et quand vous les aurez choisies de l'œil, prenez quelques petites pinsettes, & les tirez dehors, en sorte qu'il n'y demeure rien: puis soit recousue l'ouuerture de fil de soie rouge ou blāche, ou au defaut de ces deux, de quelque autre couleur. Mais la recousant donnez vous bien garde d'atteindre ou prendre les boyaux de l'oiseau: lequel vous mettrez puis-apres sur vn coussin en quelque lieu obscur & haut, qui ne soit point rheumatique: puis le paistrez de bon past vif taillé bien menu: qui luy fera encores plus grand bien, si le voulez arrouser de la bonne huile d'amendes douces. Toutesfois si vous congnoissiez qu'il fist quelque difficulté d'en manger à cause de l'huile, il se faudroit abstenir de l'arrouser pour ceste fois. Et dit ledit maistre Aimé Cassiā qu'il en a ouuert plusieurs en son tēps de la façon cy dessus recitee, qui ont recouuré leur santé. Mais doit estre aduisé le Fauconnier, qu'il vaudra mieux faire telle ouuerture au decours de la Lune qu'en son croissant combien que de ce maistre Michelin au liure du Prince n'ait fait aucune mention.

LIVRE TROISIÈME

De mal de morfondure, qui aduient à l'oiseau par quelque accident : des signes & causes dudit mal & des remèdes propres pour le guarir.

CHAP. XIII.



Les Faucons par fois se morfondent à l'occasion des trop grosses gorges qu'on leur donne: spécialement quand ils sont mouillez: car ils ne peuuent passer ny enduire leur gorge, à cause du froid qui les restraint: & ne la pouuans bien cuire & digerer, force est que elle se conuertisse en flegmes & autres grosses humeurs, qui font perdre à l'oiseau l'appetit du past, & puis apres vient à mourir, comme dit le liure du Prince. Or vous pourrez vous apperceuoir de ceste morfondure, lors qu'apres auoir sur le vespre baillé à vostre oiseau grosse gorge, vous verrez le landemain matin qu'il aura perdu l'appetit du past, à cause qu'il sera refroidy & lent plus que de custume. Pour remede à ceste maladie, dit maistre Molopin au liure du Prince, qu'estant l'oiseau ainsi morfondu & degousté il ne doit estre pu de tout le iour que commencerez à vous en aduiser: ains doit-on seulement mettre de l'eau deuant luy: & s'il en veut boire ou s'y baigner, le laisser faire à son desir: puis luy ietter vn pigeon vif deuant luy: & s'il le prend & tuë, luy en laisser boire le sang tant qu'il voudra, puis apres ne luy en donner à manger sinon vne cuisse pour le plus: apres cela le mettre reposer en lieu chaud & sec, pourueu qu'il y ait tousiours de l'eau deuant luy, & se bien garder de luy donner grosse gorge. Mais sera bon de luy bailler par l'espace de quatre ou cinq iours cinq ou six clouds de girofle enuoloppez en peu de cotton.

Du mal vulgairement appellé le mal subtil, de ses causes & signes, & des remèdes propres pour le guarir.

CHAP. XIII.



Aucunes fois sont les oiseaux verez d'une maladie, que les Fauconniers ont nommee, le mal subtil: ou pource qu'elle rend l'oiseau maigre, delié & subtil, ou pource que promptement & subtilement il passe & cmeutist tout ce qu'on luy baille. Et de ce mal se perdent plusieurs oiseaux, à faute de s'en donner

ner garde de bonne heure. Or le pourrez-vous descouvrir & appercevoir à ce que verrez, que quand vous luy aurez le matin donné quelque grosse gorge, il l'aura incontinent passée: Et si vous luy en donnez puis apres vne autre pareille à midy, il la passera encores plus legement: Et encores si luy en donnez vne tierce au vespre, elle sera aussi tost passée. Qui pis est, plus mangera, plus deviendra megre: Ce mal aduient coustumieremēt de ce, que quand vous voyez vostre oiseau fort megre, vous efforcez de bien tost le remettre sus, & pour y cuider paruenir, vous luy donnez de trop grosses gorges de pigeons, ou autres bonnes chairs, pensans par ce moyen le remettre & rēdre gras en peu de iours. Mais il en aduient tout au contraire: par ce qu'ayant l'estomach greué & offensé de si grosses gorges, il ne les peut naturellement digerer: pource qu'il a le foye alteré, duquel la chaleur tēperée est cause de toute bonne digestion naturelle. Doncques pourrez-vous iuger l'oiseau affligé de ce mal, quand le verrez tel que cy dessus a esté recité: & au surplus fort affamé, & esmeutissant beaucoup plus souuent, & en plus grande quantité que de coustume: Maistre Molopin au liure du Prince, dit que pour prōptement & seurement remedier à ce mal, fault prendre le cœur d'un mouton, & le laisser toute vne nuit tremper dedās du lait d'asnesse, ou de chieure, apres toutesfois qu'on l'aura mis en morceaux assez peris: car il en trempera mieux: Et le lendemain matin en donner à manger le quart à vostre oiseau: un peu apres midy autant, & au vespre le demourant: & luy faire ce pendant prendre & aualler le plus que vous pourrez dudit lait: Luy continuant ceste forme de viure par l'espace de cinq ou six iours, & iusques à ce que verrez qu'il commencera à faire ses esmeutes plus naturelles. Et apres ce que l'aurez veu plus naturellement esmeutir, vous le paistrez peu à peu & assez raisonnablement de quelque bon past, dont la chair sera arrosée de quelque bonne huile d'amendes douces, & ce par trois ou quatre iours, pendant lesquels il ne sera pu que deux fois le iour. Mais fait à fait que le verrez amender, croissez luy son past peu à peu, afin qu'il puisse engresser & reuenir en son premier estat. Et luy continuez tousiours le lait, ainsi que nagueres vous a esté enseigné. Car le lait d'asnesse & de cheure est fort propre à ceste maladie: & comme dient aucuns, à routes autres maladies d'oiseaux. Maistre Aimé Cassian enseig: • encores vne autre recepte pour guarir cestuy mal subtil. Prenez, dit-il, vne tortue de garrigues: c'est à dire, de celles qui iuiēt en terre en lieux secs, & qui n'entrent point en l'eau: & apres que vous en aurez séparé

la chair d'auec les escailles, mettez-la tremper en lait d'asneſſe, ou de cheure, ou de femme au defaut des autres : & en paifſez voſtre oiſeau, peu au premier paſt, plus au ſecond, encores plus au tiers, en augmentant ainſi de peu à peu iuſques à ſix ou ſept iours : Puis apres paifſez le de cœur de mouton trempé dedans le lait ſuſdit, cōme cy deſſus a eſté monſtré, luy en augmentât ainſi le paſt de peu à peu, iuſques à ce qu'il ſoit biē guarý : Et ne le tenez en lieu rheumatique, mais en hiuer en lieu chauld, & en eſté en lieu frais, & touſiours en chapperonné. Continuât de le traiter de ceſte façon, tenez vous ſeur qu'il guarira.

Autres remedes propres pour l'oiſeau qui ne endure, & ne peut paſſer ſa gorge.

CHAP. XV.



Lors que verrez voſtre oiſeau degouſté, & ne pouuant enduire ou paſſer ſa gorge, donnez luy petit paſt : mais qu'il ſoit de rats, ou de ſouris, meſmes de grāds rats : car ils ſont bien plus ſubſtancieux que les petis : & ne luy en donnez que demie gorge, car il la digererá mieux, & plus naturellement. Autrefois ſoit peu de chair de poulaille, ou de bon mouton, trempee en lait d'asneſſe, ou de cheure, ou de femme, ainſi que cy deſſus a eſté dit, & ne luy en donnez que le quart de ſa gorge. Mais quand le voudrez paifſtre de viſ, baignez-luy ſa chair en ſang, & celà luy fera fort grand bien. Continuant ce traitement par quelques iours, vous remettrez ſus voſtre oiſeau. Maifſtre Michelin dit, que quand on void vn oiſeau qui ne peut enduire ne paſſer ſa gorge, c'eſt ſigne qu'il eſt refroidy dedans le corps, & luy manque la chaleur naturelle. Et que pour y dōner remede, fault prendre vin blanc bien ſubtil qui ſoit chauffé tiede, & dedans iceluy tremper la chair dont on veult paifſtre l'oiſeau, toutes-fois luy donner peu à manger, deux fois le iour ſeulement, & augmenter petit à petit à meſure que lon y cōgnoiſtra amēdement. Mais auffi ſera bon luy changer ſouuent ſon paſt, & de chairs de bon ſuc, & de legere digeſtion. Ce traitement debura eſtre continué iuſques à ce que on le voye remis ſus : en luy donnant d'abōdant tous les ſoirs cinq ou ſix clouds de girofle enuoloppez en peu de cotton : pource qu'ils luy aſchaufferōt la teſte & tout le corps, & par ce moyen luy ferōt moult grand bien, & plus encores ſi le cotton ſera trempé en vn peu de bon vin blanc vieil. Aucunefois aduient que l'oiſeau ne peut enduire ne reietter ſa chair, pource qu'on luy aura donné trop groſſe gorge, laquelle

le il n'aura peu digerer : Ou pource que s'estant esgaré avecques sa proie, il se fera (estant affamé) pu si gloutemēt, qu'il n'aura puis apres peu enduire ne reietter sa gorge. A ceste cause tout Fauconnier doit estre discret, & bien se garder de donner à son oiseau trop grosse gorge. Pour y remedię, dit maistre Aimé Cassian, qu'il faut mettre eau fresche dedans vn vaisseau net, & la poser deuant l'oiseau, & s'il luy prend enuie d'en boire, l'en laisser boire à son plaisir. Puis prendre lard de porc du plus gras & qui ne soit point rance, le gros d'une febue, de la poudre de poiure les deux parts moins que de lard, cendre la tierce partie moins avecques vn petit de sel, & le tout bien battre & mesler ensemble, & en faire vne pillule de la grosseur d'une moyenne febue, la luy mettre au bec, & tant faire qu'il la mette bas : puis soit posé au soleil ou au feu, & tost apres y cognoistrez amendement & qu'il enduira sa gorge. Mais aussi gardez que l'oiseau auquel vous baillerez ceste pillule ne soit trop maigre : car à peine la pourroit-il supporter. Maistre Molopin enseigne encore vn autre remede faisant mesme effaićt. Prenez, dit il, l'oiseau doucement & dextrement, & luy fendez la gorge, puis luy en tirez gracieusement la chair dehors : Et apres que l'aurez esuyee d'un peu de cotton mouillé en vin, reconsez-la de fil de foye vermeille, puis l'oignez de gresce de geline : & tantost apres païssez-le de quelque cuisse de geline trempee dedans le sang, & la luy taillez en petis morceaux : Par ce moyen vous pourrez sauuer vostre oiseau. Encores ont enseigné ces bons maistres vn autre remede : Qui est, que quand voudrez faire reietter & rendre la gorge à vostre oiseau, vous faudra prendre poudre de poiure, & la mettre en peu de vinaigre : puis en frotter le palais de vostre oiseau par le haut avecques le bout du doigt, & tost apres la mettra hors. Si vous voulez vous luy en pourrez bien mettre aussi deux ou trois gouttes aux pertuis des narilles, car encores plus tost il la mettra hors. mais si vo^{us} voyez qu'il l'ait mis hors, & neantmoins que le poiure luy face trop de mal : lavez luy d'eau fresche la bouche, le palais, & les narilles, afin de les luy nettoyer. Si ne luy voulez faire vser de celle poiurade, vous luy pourrez mettre du poil de la queue de cheval dedans les narilles : & s'il remet par ce moyen, ne sera besoin luy faire autre chose.

*Autres remedes pour guarir l'oiseau qui remet sa chair,
& ne la peut enduire.*

CHAP. XVI.

I ij



Duient par fois, que l'oiseau, quand il a esté pu, ne peut tenir sa gorge, ains incontinent la rejette, & en procede l'occasion de ce qu'on le paist de quelque grosse chair nō lauee, ou ia toute infecte. Aucunefois aussi l'oiseau se desgousté pour ce qu'il est plein dedans le corps, & pour ce ne peut tenir sa gorge. A ceste cause tout Faulconnier se doit bien garder de coupper la chair de son oiseau de quelque cousteau sale ou mal net, & dont on ait au parauāt taillé aulx, porreaux, ou oignons, ou autre chose puante : mais sur toutes choses se fault bien garder de luy dōner trop grosse gorge. Pour obuier à ce mal, lors que verrez vostre oiseau remettre sa gorge, ne le paisez de tout ce iour, ains le mettez au soleil, avec vn vaisseau net plein d'eau nette deuant luy, & s'il en veut boire soit laissé boire à son plaisir, car cela luy fera grand bien. Et quād puis apres viendrez à le paistre, ne luy donnez que vn quart de gorge. Aussi par fois le pourrez-vous bien paistre de vif, & en le paissant ainsi petit à petit, il se pourra remettre sus. Toutesfois si vous voyez qu'il ne puisse encores retenir sa chair, donnez luy à manger petis rats, ou petites souris, ou petis oiselets, si rats & souris vous defaillent, & luy continuez ce traitement iusques à ce qu'il soit bien guarý. Et si ce remede ne vous vient à effaict ou à gré, vser pourrez du conseil de maistre Molopin, qui dit au liure du Prince, que quand l'oiseau remet sa gorge, & ne la peut retenir, faut prédre coriandre, & la mettre en poudre bien subtile, puis la detremper en eau tiede, & ceste eau faire puis apres passer par vn linge delié, & en lauer la chair de vostre oiseau auāt que de l'en paistre par l'espace de quatre ou cinq iours : Et si pour cela ne guerissoit, vous pourrez experimenter ceste autre recepte qu'enseigne maistre Michelin. Prenez, dit-il, fueilles de laurier, & apres que les aurez bien lauees mettez les en vn pot neuf avec du vin blanc, & les y laissez tant bouillir que le vin reuienne à sa iuste moitié, & puis apres refroidir avecques les fueilles : Et quand ce vin sera froid, faiçtes en tant boire à quelque ieune pigeon, qu'il s'en enyure, & en meure : Apres soit pu l'oiseau de la cuisse de ce pigeon, ou d'autant que monte la cuisse. Et s'il ne retiét iceluy past, ains le remet, faiçtes ce qui ensuit, suyuant le cōseil de maistre Aimé Cassian. Prenez, dit-il, des cigales : (cigales sont cōme sauterelles ou grandes mouches, qui à la grand chaleur de l'esté se posent, & chantent sur les arbres) & les faiçtes bien secher au four ou au soleil, puis en faiçtes poudre bien subtile, de laquelle vous poudrez la chair de vostre oiseau auant que l'en paistre, & par ce moyen il guarira.

*Autres remedes propres pour remettre l'oiseau desgousté, & luy faire
reuenir l'appetit de manger. CHAP. XVII.*



Veunesfois l'oiseau se trouue auoir perdu l'appetit de manger, à l'occasion de ce qu'on luy aura, peut estre, donné trop grosse gorge vers le vespre : laquelle il ne peut enduire ne passer la nuit ensuiuant, pource qu'il est plein & ord par dedàs le corps : & par ce moyen perd l'appetit de manger. Or dit maistre Molopin, que quand vostre oiseau sera desgousté, & aura perdu l'appetit de manger. Il vous faut prendre de l'aloës cicotrin, sucre d'une cuite, & mouëlle de bœuf, autant de l'un comme de l'autre, fors qu'il y ait un peu moins d'aloës : & apres auoir bien tout melle ensemble, en faire une pillule de la grosseur d'une febue, & la donner le matin à l'oiseau : puis le tenir au feu ou au soleil, tant qu'il ait vomy & reiecté toutes les colles & superfluitez qu'il a dedans le corps : & ne soit pu iusques à midy : luy continuant ceste medecine & traitement par trois ou quatre iours, vous luy verrez tost apres recouurer entierement son bon appetit. Encores un autre bon remede enseigne maistre Michelin pour dōner guarison à cestuy mal. Prenez, dit-il, pillules communes : (c'est à dire, de celles que lon ordōne & donne communement aux personnes malades pour purger le corps) & en donnez le matin deux à vostre oiseau : puis l'ayant mis au feu ou au soleil avecques le chapperon en teste, laissez le vomir tant qu'il voudra. Si dit le liure du Prince que les pillules susdites sont bonnes à donner à tous Faucons au commencement du mois de Septembre. Pource que s'ils ont filandres, ou autre mal dedans le corps, ils en sont parçe moyen bien purgés & nettoyés. Mais pour reuenir à nostre propos, apres que par trois ou quatre iours vous aures fait à vostre oiseau desgousté vser desdites pillules, si pour ce l'appetit ne luy estoit reuenu, poudrés luy aux trois ou quatre iours ensuiuans sa chair de limeures de fer, & l'appetit luy reuiēdra. Dit outre maistre Aimé Cassian, si le Faucon de fortune a perdu son bon appetit, luy soit baillé un pigeon, lequel on luy laissera tuer, & boire le sang à son plaisir : mais apres ce on ne luy en donnera à manger qu'une cuisse, ou la valeur d'une cuisse. Et si il ne vouloit tirer, luy faudra tailler en petis morceaux, & l'arrouser de quelque bonne huile d'amēdes douces ou d'olives, ou la poudrer de sucre : & luy continuer ainsi peu à peu tant qu'il ait recouuré son bon appetit.

LIVRE TROISIÈME

Autres remedes pour remettre sus un oiseau, quand il est trop maigre. CHAP. XVIII.

ENseigne le bon maistre Aimé Cassian, quand vostre oiseau est par trop descharné, si le voulez remettre engresse, païssez-le de bonnes viandes, spécialement de rats & de souris, si en pouuez recouurer. Car ils sont bons & de léger past, comme aussi sont les petis oisillons: mais ne luy en donnez que demie ou moindre gorge. La poulaille est bonne de sa nature, toutesfois elle n'engresse pas tant, comme la chair de mouton. Le traitant de telles viâdes petit à petit, vous le verrez reprêdre chair, & se remettre en gresse. Le mesme maistre Cassian enseigne encores vn autre bon remede pour mesme effait. Prenez, dit-il, vn pot neuf, & mettez de l'eau dedans que vous ferez bouillir au feu. Dedans ceste eau bouillant mettez deux cuillerees d'huile d'oliues & quatre cuillerees de beurre frais, & faites le tout bien bouillir ensemble. Puis prenez chair de porc frais, de laquelle bié lauce & trempee en l'eau dessusdite, vous ferez paistre vostre oiseau. Et si pouuez recouurer des limas qui se trouuent en l'eau courant, luy en soit donné au matin. Car ils le purgeront des grosses humeurs qu'il aura dedans le corps, & luy donneront substance.

Autres remedes pour un oiseau qui est alenty & paresseux, & n'a volonté de voler. CHAP. XIX.

SI vn Faucon ou autre oiseau est remis & paresseux, & ne vole point de bon hait, dit maistre Aimé Cassian, qu'il doit estre recongnu & reuisité par les maistres Fauconniers, & puis par eux traité & medeciné comme il appartient. C'est à sçauoir, en le baignant, & luy mettant l'eau deuant luy: & si il est haut & ord, luy soit la chair bien lauce: & faite la medecine deuant dite, de lard, moëlle de bœuf, & sucré: & si l'oiseau estoit deshaïté de voler à cause de quelque accident de maladie, il y faudra pouruoir par les remedes propres à chacune desdites maladies, selon ce qui en a esté cy dessus particulièrement enseigné.


FIN DE CE TROISIÈME LIVRE.



Liure quatriesme.

CHAPITRE I.

VOus auez cy deuant peu entédre les remedes propres pour les maladies qui viennent dedás les corps des oiseaux : & cy apres vous pourrez apprendre les causes, signes & remedes des maladies qui aduiennent aux Faucons par dehors les corps : & partant se descouurent & voient à l'œil se touchent & manient de la main, & consequemment sont plus aisees à congnoistre, & à guarir : comme celles qu'on voit naistre, croistre, moindrir, empirer, ou amander à veüe d'œil : & desquelles au surplus les signes & causes sont plus certains, & moins secrets, comme aussi sont les remedes. Et neantmoins telles maladies font autant ou plus de nuisance à l'oiseau, & autant ou plus luy empeschent ses actions & allegresses, comme celles qui luy occupent & vexent les principales interieures parties du corps, & de la teste, & dont a esté parlé bien au long aux trois liures precedens. A cestes doncques doit le Fauconnier prendre garde d'aussi pres, comme à toutes les precedentes : & estre diligent à y pourvoir & remedier promptement : d'autant que ces maux exterieurs, desquels nous entendons discourir en ce quatriesme liure, outre ce qu'ils donnent peine & grand trauail à l'oiseau, encores luy rendent-ils le corps plus laid & difforme, & d'autant plus mal agreable aux yeux de tous ceux qui le voient, soient Fauconniers ou autres personnes.



*Du mal appelé la taigne , qui vient aux ailes & queuës des
oiseaux & de ses especes.*

CHAP. II.

LE plus commun & dâgereux de tous ces maux extérieurs qui viennent hors du corps des oiseaux, est celuy que vulgairement tous Fauconniers appellent, la taigne. Or pour en auoir plus entiere & certaine congnoissance , est besoing d'entēdre, qu'il y a trois especes de taigne: de chacune desquelles especes nous ferons particulier traicté. La premiere especes de taigne, est quand les grosses & grandes penes des ailes & queuës des oiseaux leur cheent & tombent. La seconde especes est quand la taigne
mangé

mâge & ronge lescdites grandes pennes tout au long du tuyau, de telle façon que par laps de temps rien n'y demeure. La tierce espee est, quand lescdites grandes pennes se fendent tout au long de la verge, & par ce moyen se corrompent, & empeschent l'oïseau de bien voler. De toutes ces trois especes combien que le nom soit vn, neantmoins les causes, & les signes, & semblablement les remedes sont diuers & differens.

De la premiere espee de la taigne, & de ses causes, signes, & remedes. CHAP. III.

N Ous vous auons dit au chapitre precedēt, que la premiere espee de la taigne est, quand les plus grosses & grandes pennes des ailes & queües des oïseaux leur tombent & cheent. Si dit le bon maistre Aimé Cassian, que plusieurs bons oïseaux il a veuz se perdre de ce mal au default d'y donner prōpt remede. Et qu'il leur procede à l'occasion de la chaleur du foye, & autrefois à cause de quelque excessiue ardeur & distemperature de tout le corps. Et de ce font signe les vessies que l'on apperçoit dessus les ailes & queües denuees de plumes. Cestuy mal est contagieux, & se doit bien garder le Fauconier d'approcher autre oïseau, ou le percher pres de celuy qui en sera entaché. Mesmes dit iceluy maistre Cassian, qu'il se faut aussi biē garder de dōner à manger à autre oïseau dessus le gād du Faucon qui aura la taigne. Lon se peut bien apperceuoir de ce mal, quād on void l'oïseau souuēt toucher du bec dessus les tuyaux des grosses pennes de ses ailes & de sa queuē, comme s'efforceant de les faire choir. De fait quand vous luy verrez faire ceste contenance, soit visité: & vous le trouerez vexé de la taigne. Pour obuier à ce mal, faut (ce dit maistre Cassian) prendre l'oïseau, & aduiser aux endroits dont luy seront tombees les plumes: & là vous trouerez vne ou plusieurs vessies, qui vous feront certain indice qu'il est malade de la taigne. Lors faites vne petite brochette d'un bois appellé Sapin, qui est de substance grasse, & visqueuse: & n'est point besoing de la faire aguē par vn bout plus que par l'autre, pource qu'il ne faut pas aussi qu'elle entre ou isse en malaise & cōme à force, ains doucemēt & legeremēt. Et si vous ne pouuez recouurer dudit bois, prenez vn grain d'orge, & luy coupez la pointe, puis l'oignez d'un peu de theriaque, ou d'huile d'olives: & le mettez dedans le pertuis d'oū sera tombee la penne, de

K

LIVRE QVATRIESME

telle maniere qu'il en sorte vn petit bout au dehors, à fin que ledit pertuis ne s'estoupe ou ferme: puis-apres soit prinse vne lancete, ou vn trancheplume, & luy en persez ladite vessie ou vessies, tât qu'en faciez saillir vne eau rousse qui sera dedans. Apres prenez aloes cicotrin mis en pouldre, & du fiel de bœuf, & mettez l'vn & l'autre dedans vne escuelle, & les battez & meslez tres-bien ensemble, & de cest onguent oignez ceste vessie persee tout à l'entour: mais donnez vous bien garde qu'il n'en entre rien dedans ledit pertuis de la penne: car il en pourroit aduenir grand mal à l'oiseau. Apres celà fait, prenez lentilles des plus rousses que pourrez recouurer, & limeures de fer moins la moitié que de lentilles, & apres que les aurez bien meslees & battues ensemble avecques du miel, faittes en pillules de la grosseur d'un poix, & en donnez à vostre oiseau tous les matins deux ou trois, puis le mettez au feu ou au soleil: & le païssez apres midy de poulaille ou de mouton de assez bonne gorge. Et si vers le soir vous voulez donner desdites pillules à vostre oiseau, faire le pourrez. Mais vous souuienne de tremper sa chair dedans lait d'asnesse, ou de cheure, ou de femme, comme dessus a esté dit: car celà luy fera grand bien: & aussi de souuent visiter les iarsures desdites vessies perrees, pour les oindre de rechef dudit onguent, si besoin sera. Luy continuant tout ce traitement par cinq ou six iours, vous verrez qu'il se guarira de ladite taigne.

De la seconde espee de taigne, de ses causes & signes, & des remedes propres pour la guarir.

CHAP. IIII.

LA secõde espee de la taigne, comme a esté cy dessus enseigné, prend aussi és grandes penes des ailes & queuës des oiseaux, & les ronge & mange tout du long, de maniere que si on n'y pouruoit de bõne heure, à la fin il n'y demeure rié. Et ont laissé par escrit les mesmes Fauconniers dessusdits, que ce mal aduient aux Faucons par la negligence de ceux qui en ont la charge & la garde: c'est à sçauoir, à faute de les baigner, & curer en temps & lieu, mesmement de les tenir en lieu net, ains pour les auoir tenus en lieu ord, plein de pouldre, ou de fumee. Et telles ordures leur engendrent vn humeur ou excrement aigre & agu, qui les ronge & mange ainsi tout le long des grosses plumes des ailes & de la queuë. A ceste cause admonnestent expressement & diligemment lesdits maistres,

tous Gentils-hommes & Fauconniers de iamais ne tenir leurs oisieux en lieu ord, mais au plus net & honnesté que possible leur sera. Ce mal encores peut aduenir aux Faucons pour estre nourris de mauuaises chairs, ordes & puantes: qui sont cause de les charger de poux & taïgues, qui leur mangent & gastent le pennage. Pour remede à ce mal enseignent les maistres susnommez la medecine qui ensuit. Prenez, ce dient-ils, cendre de serment de vigne, & en faites laissie la plus forte que vous pourrez, de laquelle vous laueriez vostre oiseau vne fois le iour, & le laisserez tres-bien ressuier: apres ce prendrez bon miel de mousches, & en oindrez toutes les pennes entachees de ce mal. Encores apres vous faudra prendre sang de dragon, & alun de glas, & de ces deux battus ensemble faire pouldre bien subtile, dõt vous pouldrerez puis-apres tous les tuyaux, & pennes dessuidtes: & par ce moyen vostre oiseau guarira.

Maistre Aimé Cassian dit que pour obuier à ce mal, il s'est souuent bien trouué de la recepte qui ensuit. Prenez, dit-il, vne taulpe, de celles qui fouillent aux prez, & la mettez dedäs vn pot de terre tout meuf, qui soit bien estouppé & bien lutté, & puis mis au feu tout vn iour: & en ayant retiré la taulpe, en ferez pouldre bien subtile, de laquelle vous pouldrerez les grosses pennes & leurs tuyaux entachez & gastez de taïgne, apres les auoir tres-bien lauez de la laissie de serment par la forme cy deuant ditte: & par ainsi vostre oiseau se guarira.

De la tierce espee de taïgne, de ses causes & signes, & des remedes propres pour la guarir.

CHAP. V.

LA tierce espee de taïgne, dont nous auons cy dessus parlé, est quand l'humeur peccant ne ronge pas la penna de l'oiseau: mais la fait fendre de long en long de la verge. Ce mal aduiet, ce dient lesdits maistres, de ce que les oisieux ne sont pas tenus nettement, ne cürez, baignez, pus, & gouuernez comme ilz doibuent: Dont se concree ceste humeur vicieux qui leur fait ainsi fendre & rompre les pennes. Pour remede à cestuy mal, enseigne maistre Molopin au liure du Prince, la medecine qui ensuit. Prenez, dit-il, vne canne verde, & la fendez tout du long; puis la raclez par dedans, & il en sortira ius ou suc;

K ij.

LIVRE QUATRIESME

duquel ius ou suc vous baignerez & mouillerez les pennes fendues de vostre oiseau tout le long des fentes: & par ce moyen elles se reprëndront & reserrerront tout ainsi qu'elles estoient au parauant l'adite taigne. Et sil tomboit d'auanture puis-apres quelqu'une desdites pennes, soit mise dedans le pertuis du tuyau, la tante de bois de Sapin, ou le grain d'orge, ainsi que cy dessus a esté enseigné: & ce faisant vous verrez que vostre oiseau mettra la plume plus droite.

*Si un oiseau a l'aile rompue par quelque accident, quels moïens
il faut tenir pour la luy remettre, & le guarir.*

CHAP. VI.

S'Il aduient par quelque accident que vostre oiseau ait l'aile rompue, vous yferez de ce remede, qu'enseigne maistre Molopin au liure du Prince. Premièrement faut que l'aile rompue soit bié remise & reioincte à son droit point: & puis que l'onguent, dont la composition sera cy apres enseignee, luy soit mis en cataplasme sus l'endroit de la rupture. Et apres luy auoir bien dextrement appliqué ledit cataplasme dessus la rupture, luy remettre & disposer bien doucemēt les deux ailes croisees dessus le dos, en la mesme forme qu'il a de coustume de les tenir en pleine santé. Puis l'emmailloter d'une bonne bande, de façon qu'il ne puisse remuer les ailes en maniere que ce soit. La recepte ou composition dudit onguent est telle qu'il ensuit. Soit pris sang de dragon, terre d'Armenie appelée vulgairement boliarmeni, gomme Arabique, encens blanc, momie, mastic, aloes cicotrin, autant de l'un comme de l'autre, farine bien deliée autant que besoin sera: soient toutes ces choses destrempees en blanc d'œufs, & fait onguent: lequel sera puis apres appliqué en cataplasme en la maniere dessusdite. Lequel premier cataplasme ne sera remué ne changé de cinq ou six iours apres ledit premier appareil, & quand on y remettra autre cataplasme, se faudra bien songneusement donner garde que l'aile rompue ne soit desmeute ny esbranlee en maniere que ce soit. Car pour petit qu'on la desmeue ou desloche tout ce qu'au parauant on y pourroit auoir fait, seroit perdu & gaste: & l'oiseau en grand danger de demeurer pareillement perdu & affolé à iamais sans esperance de salut. Or le faudra il traicter & medicamenter en la maniere dessusdite par l'espace de douze ou quinze iours: & pendant iceux le tenir & faire repo-

reposer sur vn coussin bien mol, afin qu'il y demeure plus à l'aise & à son repos. Au past luy faudra aussi tailler sa chair à petis morceaux, & luy en donner assez bonne gorge: car il n'aura point mestier d'estre tenu ny bas ny maigre pour plustost recouurer sa guarison.

Si l'oiseau ne soustient bien ses ailes, quelle en est la cause, & quels sont les moyens d'y remedier.

CHAP. VII.



Vand l'oiseau ne soustient bien ses ailes: c'est pource qu'estant mis sur le poing ou sur la perche, il s'est trop asprement debattu, se debattant s'est eschauffé & puis refroidy: & ce refroidissement luy a faict alentir & pendre les ailes: Pour remedier à ce mal, enseigne maistre Aimé Cassian, qu'il faut prendre vn pot de terre tout neuf, & l'emplir de fort bon vin: puis mettre dedans ledit vin, saulge, mente, & pouliot, autant de l'un que de l'autre, & apres auoir mis ledit pot pres du feu, faire le tout bien bouillir ensemble. Et quand ils auront bien bouilly, tirez le pot hors du feu, & le mettez sur charbons & cendre chauds, bien couuert & estouppé de drap ou linge, afin qu'il n'en puisse rien sortir. Apres eelà faites vn pertuis assez grandet au milieu du drap ou linge dont aurez couuert vostre pot, par lequel pertuis en puisse sortir la fumee. Puis mettez vostre oiseau sur le poing, & apres luy auoir releué les ailes, le tenant droit sur ledit pertuis, laissez-le parfumer de celle fumee & chaleur isant dudit pot: & l'y tenez si longuement, qu'estant bien reschauffé & parfumé d'icelle fumee, il en soit comme baigné & en sucour. Apres ce tenez-le pres du feu ou en autre lieu chaud: car s'il venoit à se refroidir, ce seroit mal pire que le premier. Tant est que luy continuant ce traitement trois fois le iour par l'espace de quatre ou cinq iours, vous y aperceurez grand amendement, & le verrez tost apres bien guarir.

Si l'oiseau a l'aile distoquée & demise hors de son lieu, quels moiens faut tenir pour la remettre, & le guarir.

K iij



Vand vostre oiseau en volant trop rudement, ou donnant atteinte à la proie qu'il poursuit, se sera demis l'aile hors de son lieu & siege naturel, vous luy donnerez prompt & seur remede, le traittant de la façon qui ensuit, & qui enseignee a esté par maistré Aimé Cassian: Soit, dit-il, prins l'oiseau doucement, & luy soit l'aile disloquee, dextrement remise en son lieu. Puis sur l'endroit de la dislocature soit mis vn cataplasme de l'onguent de sang de dragon, boliarmeni, nommé, &c. ainsi composé comme a esté monstré cy dessus au chapitre 6. de ce quatriesme liure, auquel est parlé de l'aile rompue, puis soit emmaillotté, & laissé en ceste maniere trois ou quatre iours. Au past luy soit sa chair taillée en petis morceaux, afin qu'en mangeant il ne se contourne ny efforce.

Si l'oiseau a de mal-aventure l'aileron rompu, quels remedes sont propres pour luy racoustrer.

CHAP. IX.



I vostre oiseau de fortune auoit l'aileron rompu: maistré Molopin au liure du Prince conseille vser des mesmes receptes, remedes & traitemens, qui n'agueres ont esté monstrez pour remettre & racoustrer son aile rompue. Et si besoin est, en l'une & en l'autre rupture; apres auoir reioint & reüni dextrement le membre rompu, le faudra lier avec petites lattes, à fin de l'affermir d'auantage: Aussi faudra-il au past luy bailler sa chair en petis morceaux, comme aux chapitres precedens a esté remonstré: afin que tirant il ne se contourne, & desmeue les pieces iointes: & au surplus le tenir & faire reposer emmaillotté sur vn coussin pour les mesmes causes cy dessus deduites.

Si l'oiseau a la iambe ou cuisse rompue, quels moiens il faut tenir pour la remettre & guarir.

CHAP. X.



Il aduenoit par quelque accident que vostre oiseau eust iambe ou cuisse rompue, maistre Aimé Cassian donne aduis de le traiter & medecamenter en ceste sorte. Premièrement, si c'est la cuisse qu'il ait rompue, luy faudra plumer ladite cuisse: & puis apres auoir doucement & dextrement reioint la rupture, y appliquer vn cataplasme del'onguent qui ensuit: Soit prinse escorce de chesne, sechee, bartue, & mise en pouldre, & avec vn peu de sang de dragō, icelle pouldre meslee & delaicee en blanc d'œufs: & de cest onguent couurez le dessusdit emplastre: lequel emplastre aiant appliqué sur la rupture, bandez ladite cuisse ou iambe d'une bande de linge bié propre: mais gardez-vous bien de la trop serrer ou estreindre: car celà pourroit estre cause de faire secher le pied à vostre oiseau: Or bien pourrez-vous laisser ledit emplastre de premier appareil cinq ou six iours sans le renouveler: mais puis apres le pourrez changer de deux en deux, ou de trois en trois iours, iusques à ce que vostre oiseau soit bien guarý. Au past luy faudra tailler sa chair en petis morceaux, & tousiours le tenir sur la pereche avecques le chapperon en la teste.

Si l'oiseau est blessé de coup, quels moïens & remedes sont propres pour le bien traiter & guarir. CHAP. XI.



Vand vostre oiseau sera blessé de coup, comme de ferrement, baston, bec de Hairon, ou autre chose semblable, maistre Aimé Cassian a laïssé par escrit le remede qui ensuit. Prenez, dit-il, de l'herbe vulgairement appellee pied de colomb, autrement herbe Robert, & l'aiant pilee en vn mortier, exprimez-en le ius. Puis soit prins l'oiseau, & sa plaie visitee: & si le coup est grand & noir à l'entour, & neantmoins il n'y ait pas grand pertuis, en faudra faire l'ouuerture plus grande, ainsi que lon verra en estre besoin, & dedans ladite plaie mettre du ius de l'herbe susdite, & dessus icelle puis apres en appliquer le marc en forme de cataplasme, & le bander bien mignonement, & puis n'y toucher de 24. heures. Aussi doit estre le Faulconnier aduerty d'arracher les plumes del'entour de la plaie, en tant qu'il les verra faire nuisance & empeschement à l'application du medecament. Or a ladicte herbe Robert telle vertu que la plaie, a laquelle elle est appliquee en la maniere des-

LIVRE QUATRIÈME

susdite n'apostume point: qui est vn mirable soulagement pour les
 oiseaux. Toutesfois au defaut de pouuoir recouurer de ceste herbe
 de pied de coulomb en sa verueur & vigueur, & consequemment du
 ius d'icelle, prendra peine le Faulconnier d'en auoir de la seche & la
 mettre en pouldre: & d'icelle pouldre se pourra aider ne plus ne moins
 que du ius: Appliquant l'vn ou l'autre (à son aïssance & commodité)
 à la plaie par la forme cy dessus desseignée, apres auoir neantmoins
 bien nettoïé & laudite plaie de vin blanc: car l'vn des grands secrets
 & moiens de bien tost guarir l'oiseau blessé, est de luy tenir tousiours
 sa plaie nette. encores a enseigné maistre Molopin au liure du Prince,
 vn autre bon & seur moien pour guarir promptement le coup ou
 plaie du Faucon blessé. Prenez, dit-il, huile rosat, & gresse de geline
 autant de l'vne comme de l'autre, vn peu moins d'huile violat, & la
 moitié moins de terebenthine, si les meslez & fondez toutes ense-
 mble. Puis prenez encores, de l'encens blanc & du mastic autant de
 l'vn comme de l'autre, & en faites poudre: Et si vous pouuez d'auan-
 tage finer de celle poudre de ladite herbe Robert, mettez toutes ces
 trois pouldres ensemble parmy lesdites huiles & gresse, & les remuez
 & battez fort ensemble avecques vn baston, iusques à ce que les voiez
 bien viues & incorporees, & reduites en forme d'onguent. Et si la
 plaie de l'oiseau sera grande & fort ouuerte, aduisez premierement de
 la recouldre bien doucement & dextrement, laissant toutesfois au
 plus bas vn pertuis, auquel puiffiez appliquer & faire entrer vne tente
 de cherpie oincte de l'onguent desusdit. Duquel aussi ferez cataplas-
 me, qu'appliquerez puis apres sur ladite plaie. Par iceluy pertuis (le-
 quel demourera ouuert par le moien de la tente que souuent vous y
 renouuclerez) se purgera peu à peu ladite plaie: & par la vertueuse
 efficace de cest onguent, l'oiseau recouurera bien tost sa santé. Autre
 recepte a enseignée maistre Michelin pour guarir coup ou plaie de
 Faucon: Si vostre oiseau, dit-il, a plaie par Grue, ou HIRON, ou au-
 tre oiseau semblable, oustez luy la plume tout à l'enuiron de la plaie.
 Laquelle estant si profonde qu'elle ne puisse bonnement estre recou-
 sue, mettez dedans icelle promptement de la pouldre dont la com-
 position ensuit. Soit prins sang de dragon, encens blanc, aloes
 cicorin, & mastic, autant de l'vn que de l'autre, & le tout bien battu
 ensemble soit reduit en poudre bien subtile: & de ceste pouldre
 medicamentez ladite plaie ainsi que a esté predit: Puis soit ladite plaie
 aux enuiron & par dessus oincte d'huile rosat ou d'huile d'oliftiede
 pour

pour l'adoucir . Mais si la place n'est tant profonde, qu'elle ne se puisse bien couldre, soit recousue: en y laissant toutesfois au plus bas endroit d'icelle vn petit pertuis pour la purger, ainsi qu'a esté cy deuant remonstré. Puis soit pris le blanc d'vn œuf, & appliqué dessus la plaie par forme d'emplastre, apres toutesfois qu'elle aura esté arroulée d'huile de roses ou d'oliues, comme nagueres a esté dit: & que pareillement sur la cousture auez mis de la pouldre susdite: & encores mis audit pertuis la petite tente pour tousiours le tenir ouuert, & par ce moien mondifier la plaie, à quoy profitera moult l'onguent dessusdit, duquel ladite tente sera ointe. Continuant ceste façon de traitement à vostre oiseau, vous le verrez tost guarý . Encores autre médicament à ce mesme effait a conseillé le bon maistre Aimé Cassian. Si vostre oiseau, dit-il, a eu coup de beq de Gruë, Hairon, ou autre oiseau, prenez demie-once de mastic, quart d'once de boli armeni, demie-once gresse de geline, vne once d'huile rosat, vne once d'huile violat, vn quart d'once de terebenthine, vne once d'herbe de pied de coulomb, & vn quart d'once de cire vierge: Soient toutes les choses liquides susdites mixtionnees, fondues, & battues ensemble: & les pouldres de mastic, boli armeni, & herbe Robert (que vous aurez ia au parauant faites) meslees parmy lesdites huiles, gresses, & cire mises sur le feu, & remuees avec vn batton peu à peu, tant que le tout soit bien incorporé ensemble, & reduit en forme d'onguent. Mais gardez-vous en mixtionnant de luy donner le feu trop aspre: Puis mettez dudit onguent (qu'aurez ainsi fait chauffer en vn pot net & neuf) sur linge ou cuir, & en appliquez le cataplasme sur la plaie de vostre oiseau: apres qu'aurez mis la tente ointe de cedit onguent en la maniere cy dessus deduite. Et s'il aduenoit que l'oiseau eust coup orbe avec contusion sans plaie ouuerte: Prenez, dit le dit maistre Cassian, mômie en pouldre, & la delaiez en sang de coulomb, ou de poulaille, & luy mettez dedans la gorge: & ne le païssez de deux heures apres, que luy donnerez gorge raisonnable: Toutesfois si la contusion ou froissure paroist & se monstre à l'œil, n'oubliez de l'arroser d'huile rosat ou violat à vostre aissance & commodité. Vous souuienne aussi en toutes les blessures cy dessus declarées de bander & emmailletter vostre oiseau, si vous cognoissez qu'il en soit besoin.

L

*Quand l'oiseau a les pieds enflez, quelles en sont les causes, & les
moiens propres pour y remedier.* CHAP. XII.



Vnefois les pieds enflent aux oiseaux par quelque froidure: à l'occasion de ce que s'estans eschauffez à battre le gibier, ils se font puis apres morfondus, à faute de leur mettre quelque drap sous les pieds quand ils sont retournez de l'oulerie. Autrefois ce mal de podagre leur aduient à cause qu'ils se trouuent pleins de grosses & mauuaises humeurs, lesquelles au travail s'esmeuent, & deualans sur les pieds y font l'enflure. Ceste maladie vexe plus souuent les Faucons surnommez, Sacres, que toutes autres especes d'oiseaux: pource qu'ils sont pesans, & ont les pieds gras de leur nature. Or enseigne le bon maistre Aimé Cassian, quand l'oiseau a les pieds enflez, de commencer son traitement par purgation, en luy faisant vsr de la medecine de lard, sucre, & moëlle de beuf, dont la recepte a esté descrite au cinquiesme chapitre du second liure, & si souuent mentionnee par tout ce discours. De ceste composition donques seront faites trois pillules de la grosseur d'une moienne febue, & puis donnees à vostre oiseau par trois diuerfes matinees: lequel sera puis apres mis au feu ou au soleil, & deux heures apres pu de quelque bon past. Puis aiez vne once de boliarmeni, & demie once de sang de dragon, & les faites battre & mettre en pouldre, laquelle vous destremperez & meslerez fort dedans le blanc d'un œuf, & de cest onguent oindrez les piez enflez de vostre oiseau deux fois le iour par l'espace de trois ou quatre iours: pendant lesquels vous n'oublierez aussi de luy mettre quelque drap dessous les pieds pour le tenir plus chaudement. Maistre Molopin au liure du Prince donne aduis d'un autre remede qu'il dit estre souverain & bien aisé. Si vostre oiseau, dit-il, a le pied ou les pieds enflez seulement, sans ce qu'auecques l'enflure il y ait des clouds: prenez cizeaux ou pincettes, & luy taillez les ongles des pieds ou du pied qui sera enflé de si pres que le sang en sorte, de façon qu'il saigne tresbien: Puis prenez gresse de geline, huile rosat & huile violat, autant de l'un que de l'autre, & un peu de cire vierge, & fondez tout cela ensemble: Apres ce aiez pouldre d'encens blanc, & de mastice, autant de l'une que de l'autre, & de pouldre de boliarmeni deux

fois autant: & battant & meslant bien fort le tout ensemble, faites en onguent: duquel vous luy oindrez les pieds enslez deux fois le iour iulques à ce qu'il soit bien guarý: Et sont ces deux dernieres receptes bien experimentees & esprouees.

Quand les oiseaux ont les cuisses ou iambes enflées, quelles en sont les causes, & les moïens esprouez pour les guarir. CHAP. XIII.



Duient par fois que les iambes des oiseaux enflét, comme aussi font les cuisses: aucune fois toutes les deux ensemble, autre fois les vnes sans les autres. Cestuy mal surprenent les Faucons à cause du travail qu'ils ont pris au vol, ou au battre de la proie ou gibier qu'ils ont poursuivy, où ils se sont eschauffez, & puis refroidis & morfondus: ou bien à cause que se trouuans pleins d'humeurs dedans le corps, ils les ont esmuz au travail du vol & de la chasse, & descendás sur les iambes ou cuisses, y font l'enflure susdite. Pour y remedier, maistre Cassian conseille de purger & curer premierement l'oiseau malade, en luy baillant les pillules composees de lard, moëlle de bœuf, & succe, par la forme diuisee au chapitre precedent cestuy. Et apres ladite cure bien & deuëment faite, prendre huit ou dix œufs, & les faire cuire avecques la coque tant qu'ils soient bien durs: puis les laisser refroidir, & leur oster les coques, & les rompant en retenir les moyeux seulement: lesquels faudra qu'ils soient bien fort durs, autrement ne seroiet pas propres à faire la medecine qui ensuit: Puis prendre vne petite poille de fer, qui soit bien nette & bien claire, la mettre sur vn bon feu cler, & dedans icelle rompre & esmenuiser avec la main ledits huit ou dix moieux, & avec vne cuiller de fer les mouuoir sans cesse. Et quand verrez qu'ils deuiendront fort noirs, & lors que les cuideriez tous gastez, les ramasserez tous ensemble: & apres les auoir fait bouillir en vin blanc, les exprimerez, & en tirerez de l'huile que vous receurez en vn verre net, puis de rechef les chaufferez & mettrez en presse, & en tirerez tout ce que vous pourrez. Et quand voudrez vser dudit huile pour les enflures dessusdites, prenez dix gouttes de cest huile de moyeux d'œufs, & les meslez parmy trois gouttes de vinaigre, & trois autres gouttes d'eau rose: puis en frottez doucement l'enflure des iambes & cuisses de l'oiseau. Dit ledit M. Cassian, que ceste medecine a esté par luy maintes fois esprouee, & qu'il s'en est fort bien trouué en la cure des oiseaux des grands Maistres de Rhodes: & quelle

L I V R E Q V A T R I E S M E

est singuliere pour conforter & assouplir les nerfs des iambes & des pieds des Faucons. De fait continuant à l'oiseau malade des enflures dessusdites la friction dudit huile avecques le traitement susdit par l'espace de sept ou huit iours, vous y verrez prompt amendement & entiere guarison.

Si les oiseaux ont clouds ou galles aux pieds, que lon appelle Podagres, quelles en sont les causes, & les moiens d'y donner remede.

C H A P . X I I I I .



Si clouds ou galles viennent aux pieds de vostre oiseau (aucuns appellent ce mal, Podagre) cest chose fascheuse & dangereuse, & à laquelle sera bien besoin de promptement remedier. Ce mal suit volontiers les enflures des iambes & cuisses, dont n'agueres a esté parlé: & procede communeemēt des mesmes causes. Aussi dit maistre Aimé Caslian qu'il est besoin de proceder à la cure de ceste podagre par la mesme forme cy dessus deduite: c'est à sçauoir, de commencer par la purgation de l'oiseau malade, en luy faisant prēdre par trois diuerses matinees consecutiuues les trois pillules composees de lard, moëlle de bœuf, & sucre, dōt nagueres a esté parlé. Apres ladite purgatiō, Prenez, dit-il, du papier, & en faites des mesches de la grosseur d'un fer d'aiguillette, desquelles allumees vous donnerez le feu aux clouds ou galles de l'oiseau. Et si lesdits clouds estoient fort apparens & eminés dessus le pied, seroit bō de les fendre tout du long avec quelque trancheplume ou autre fer taillāt venant du feu & fort chaud: Et apres les auoir fendus biē doucement & dextremēt, mettre dedans la fente & ouuerture de chacun d'iceux vn petit morceau de lard gras, pour empescher qu'il ne se referre & recloe: puis mettez l'oiseau sur vn morceau de sel menu: & s'il y aduenoit aucune chair morte, mettez-y dessus de la pouldre dont le tiers soit de verd de gris, & les deux parts d'hermodactyles: Puis quand l'ulcere sera mōdifīe, oignez-le de seing de porc & de miel meslez ensemble: Et le mettez tousiours sur ledit mōceau de sel menu iusques à ce qu'il soit bien guarý. Vne autre belle & bonne recepte a enseignee M. Molopin pour guarir ceste maladie: Prenez, dit-il, trois onces des fueilles de la Rhubarbe, des moines, trois onces de fueilles de chou rouge, vne once de terebenthine, trois onces d'huile violat, trois onces de miel, cinq onces de

grosse de mouton , vne once & demie de grosse de ieune geline , vne once de mastic , vne once d'encens blanc , vne once de poiure long , deux onces d'Alum , & vne once de cire vierge. Et premierement des herbes faudra tirer & exprimer le ius , puis les huiles , grosses , & autres liquides meslez ensemble & fondue au feu en vn pot neuf , les remuant tousiours avecques vn batton : & apres qu'aurez fait pouldre du mastic , encens , poiure , & alum , & meslé toutes icelles pouldrees ensemble , vous le coulerez peu à peu dedans le pot avecques le ius desdites herbes , remuant tousiours avec le batton , iusques à ce que le tout bien meslé & incorporé ensemble soit reduit en forme d'onguent. Lequel vous estendrez puis apres sur cuir ou linge , & en appliquerez le cataplasme sur les pieds podagres par l'espace de quinze iours , le changeant toutesfois de deux en deux iours. Et si les clouds par le moyen dudit onguent ne se fendoient & ouvroient d'eux-mesmes , les faudra fendre d'un fer tranchant & chaud par la forme dite au precedent chapitre. Et en ceste mesme forme luy faudra pareillement oster toute l'ordure & chair morte que lon pourra voir dedans lesdits clouds & galles , tant qu'il n'y demeure rien , & iusques à ce qu'il soit bien guery. Cest onguent , ce dit maistre Molopin , a souuent esté esprouvé , & experimenté bon par luy : & peut durer en sa bonté deux ans . Encore vne autre bonne recepte a enseignée maistre Cassian pour remedier à cestuy mal. Prenez , dit-il , deux onces de terebenthine , & vne once de saumon blanc mis en pouldre , & demie once de cendre de serment de vigne : mettez tout ensemble en vn pot neuf dessus le feu , & le mouyez avec vn batton peu à peu tant qu'il soit bien meslé & incorporé l'un avecques l'autre , & reduit en forme d'onguent : duquel estendu sur cuir ou linge vous ferez emplastre , que vous appliquerez dessus les galles ou clouds que l'oiseau aura dessus les pieds : & lierez ledit emplastre par entre les doigts de l'oiseau , de façon qu'il ne le puisse arracher ne tirer dehors : Ce que vous luy continuerez par l'espace de quinze iours , changeant ledit cataplasme de deux en deux iours , iusques à ce que les clouds soient bien mollifiez. Et si ce pendant lesdits clouds s'ouvroient d'eux-mesmes , tant mieux vaudra : sinon , il les faudra fendre avec le fer tranchant & chaud , en la maniere dessusdite. Et puis apres qu'ils seront ouverts , y pourrez appliquer de l'onguent , dit Diaculum , lequel assouplira le pied de l'oiseau , & en tirera les humeurs si aucuns y

en a. Et où il se trouuera de la chair morte , mettez y vn peu de verd de gris puluerisé en la maniere susdite. Pour remede à ce mal enseigne maistre Cassian encore vne autre bonne recepte. Prenez, dit-il, limure de fer le gros de deux febues , & limure d'acier le gros d'vne febue: escorce de chesne, dont vous leuerez le dehors , & du dedans bien asseché ferez pouldre bien subtile, & pour la faire plus subtile la passerez par vn sas ou par l'estamine, & en mellerez le gros de deux febues parmi les limures susdites: puis tout ensemble mettez bouillir dedans vn pot neuf avec vne chopine d'eau & autant ou enuiron de vinaigre blanc, tant qu'ils diminuent du tiers ou de moitié: apres-ce tirerez du pot tout ce que vous pourrez escouler de cler de ladite eau & vinaigre, & le fonds ou marc qui restera le ferez encores espurer le plus qu'il vous sera possible: puis le mettez en vn sachet de linge de telle longueur & largeur que l'oiseau puisse reposer ses deux pieds dessus ledit sachet. De ce sachet donques plein dudit marc vous ferez comme vn couffin, sur lequel ferez tenir vostre oiseau cinq ou six iours: pendant lesquels vous luy pourrez arroser les pieds du cler ou bouillon de ladite composition (que vous aurez à cest effect gardé dedans vn verre ou autre vaisseau) trois ou quatre fois par chacun iour: & en rafraichir pareillement & remouiller le sachet dessusdit, afin qu'il s'en tienne plus frais, & qu'il en face meilleure operation: laquelle sil ne peut auoir acheuee au bout des six iours, luy faudra laisser plus longuement & iusques à ce qu'il soit du tout guery: Et est ceste recepte fort bonne pour toutes eschauffures ou galles de pieds & de iambes.

*Si vn oiseau se gratte ou mange les pieds, quelle en est la cause
& quels moïens faut tenir pour
y obuier.*

CHAP. XV.



Vād vous verrez que vostre oiseau se grattera ou mangera les pieds, sachez que c'est vne maniere de fourmiere qui les luy gaste. Et aduient ce mal aux Esmerillons plus souuent que aux autres oiseaux. Conseille maistre Cassian pour y remedier, de prendre vne demi feuille de papier, & en faire vn collier à l'oiseau, afin qu'il ne se puisse

toucher les pieds. Puis ayez vn fiel de boeuf, & le rompez en vne escuelle, & puis meslez parmy iceluy, pouldre d'aloës cicotrin autant que iugerez estre besoin, & les battez tres-bien ensemble avec vn baston, tant qu'il soient bien incorporez, & reduits en forme de onguent: duquel onguent vous oindrez puis-apres les pieds de vostre oiseau par l'espace de cinq ou six iours deux ou trois fois par chacun iour, & iusques à ce qu'il soit bien guarý. Autre medecine a enseignee maistre Molopin pour cestuy mal. Prenés, dit-il, la fiente d'vne truye ou d'vn pourceau, & la mettés dessus vne tuile au feu ou au four tant qu'elle soit bien assechee, & que l'on en puisse faire pouldre. Puis aiez fort bon vinaigre blanc, & en laués tres-bien les pieds de vostre oiseau, & apres qu'ils en seront bien laués, mettés dessus de ladite pouldre, tant qu'ils en soient tous couuerts, continuant ce traictement deux fois le iour par l'espace de douze ou quinze iours, ou iusques à ce que le verrez du tout bien guarý, & ayant perdu l'enuie de se gratter ou manger les pieds.

*Quels moiens sont à garder quant on veut serrer ou
estoupper les venes des iambes de l'oiseau, pour
le garentir des enflures, clouds, galles,
podagres, & demangeaisons
dessusdites.*

CHAP. XVI.



Les maistres Fauconniers dessusdits experts & bien entendus en l'art de Fauconnerie, ont curieusement recherché tous moiens & secrets pour guarir & garentir les oiseaux Faucons de tout genre & espece de maladie. Entre autres ont descouvert deux beaux secrets pour garentir les oiseaux de tous les maux de cuisses, iambes, & pieds, dont nagueres a esté déuissé: lesquels sont fondez sur apparente raison de medecine: pour ce que par ces deux moyens on retranche l'occasion & la cause desdits maux,

qui est le deuallement & cheute des humeurs abondans & superflus au corps de l'oiseau, és cuisses & autres parties inferieures. Et combien que de prime face ils puissent sembler tous deux cruels & dangereux pour l'oiseau: toutesfois doit-on croire que lesdits maistres ne les ont enseignez & laissez par escrit sans les auoir bien esprouuez du temps qu'ils seruoient leurs maistres (grands seigneurs) en l'art & exercice de Fauconnerie. Le premier est de serrer ou couper les venes des iambes de l'oiscan, qui portent les humeurs aux pieds, & sont causes desdites enfures & podagres, duquel sera parlé en ce chapitre. Le second est, de rompre tout à fait la iambe à l'oiseau, duquel sera parlé au suivant chapitre. Quand doncques vous voudrez à vostre oiseau podagre ou enflé par les pieds serrer & couper les venes qui abreuuēt & imbuent lesdits pieds de mauuaises humeurs, dit maistre Aimé Cassian: soit pris l'oiseau, & tenu bien dextrement, & luy soit plumé le dedans de la cuisse au plus pres du genoil: puis luy soit cherchée & trouuee la vene, qui est grosse assez, vn peu au deffoubs dudit genoil, où estreignant vn peu avecques les doigts, congnoistrez & trouuerez incontinent ladite vene. L'ayant trouuee prenez vne aiguille, & en soubleuez vn petit la peau, laquelle vous coupperez autant que verrez bon estre à vostre discretion pour faire ouuerture, vous gardant bien neantmoins en couppant ladite peau, de toucher ou offenser en rien la vene. Estant l'ouuerture ainsi faite, aiez vn ongle de Butor ou de quelque autre oiseau, duquel vous faudra dextrement soubleuer ladite vene: puis passer par deffoubs icelle vn fil de soie, & l'en serrer & lier bien estroitement: puis apres couper la vene au dessus de l'ongle, & du costé deuers la iambe: (car si vous la couppiez du costé de la cuisse, vostre oiseau seroit en grand danger de mort) Et n'y soit fait autre chose, ains la laissez saigner tant qu'elle voudra. Toutesfois le landemain vous pourrez oindre ladite ouuerture de quelque peu d'huile rosat, ou de gresse de geline pour l'adoucir & conforter. Ceste façon de serrer ou couper venes, est fort bonne & proufitable: car iamais depuis ne deualent les humeurs és iambes & pieds de l'oiseau: & consequemment deslors en auant ne peut plus estre trauaillé d'enfures, elouds, galles, podagres, & de mengeailons dont a esté cy dessus parlé.

Quels

Quels moiens on doit tenir, quand on veult rompre la iambe à l'oiseau, pour le garentir des podagres & autres maladies de pieds.

C H A P. XVII.



MAISTRE Aimé dit, si pour garder que les humeurs ne deualent és iambes & pieds de l'oiseau, vous luy voulez rompre ou l'une ou toutes les deux iambes. Prenez vn tronçon de canne, ou vn baston de sureau, que les Latins appellent Sambucus: & en faites deux petites lattes ou estayes du long d'un trauers de poulce, & au surplus de telle largeur que la iambe de l'oiseau puisse estre enclose entre les deux bien à son aise: puis d'un linge faites vne bande qui puisse faire quatre ou cinq tours enuiron ladite iambe. Aiez aussi boliarmeni mis en pouldre, & bien meslé & battu avecques glaire d'œufs. Voz preparatifs estans ainsi bien dressez, prenez l'oiseau doucement & dextrement, & luy rompez la iambe par le milieu entre voz deux mains avec vos deux poulces le plus promptement que faire se pourra, & la ploiez de part & d'autre tant que soyiez bien assuré que le gros os sera rompu tout à fait: mais en ce faisant donnez vous bien garde de ne blesser ou offenser l'oiseau en quelconque autre partie de son corps. Ce fait appliquez luy sur la rupture, bien dextrement reünie & remise, vn emplastre enduit dudit onguent préparé de boliarmeni & glaire d'œuf, & par dessus aiustez gentiment voz deux lattes ou estaies dessusdictes, que vous lierez de ladite bande en luy faisant faire quatre ou cinq tours: de telle façon neantmoins qu'il n'y ait rien trop estroitement serré, ains que la iambe y demeure à son aise. Car si autrement estoit, le feu pourroit prendre en la iambe ou au pied de l'oiseau. Et partant à fin de plus surement y proceder, & garder que l'oiseau ne se puisse tourmenter & debattre, sera bon qu'il soit emmailloté auant que la iambe luy soit rompue, & iusques à ce qu'elle soit bien reprise: & puis mis reposer sur vn coussin mollement. Ce pendant luy faudra au past tailler sa chair en petis morceaux, afin qu'il ne face aucun effort qui le puisse offenser. Puis-apres ayez moëlle de bœuf, avec huile rosat ou violat, & les ayât bien meslez & battus ensemble, oignez-en la iambe & le pied de l'oiseau deux fois le iour par l'espace de quinze iours: car cest onguent empeschera que le feu ne s'y mette. Les quinze iours passez soit l'oiseau

M

demailloté, delié, & tenu sur le poing tousiours enchapperonné. Et quand il sera guarý de celle iambe, autant en pourrez-vous faire de l'autre. Mais aussi y faut il bien penser auant que le faire: pour-ce que c'est chose bien dangereuse de rompre la iambe aux oiseaux, à raison du feu qui s'y peut mettre par mesgarde & mauuaíse conduitte.

La façon de mettre les oiseaux en muë: & les moyens qu'on y doit tenir pour les conseruer en santé & alegresse.

CHAP. XVIII.



QUAND le temps est venu de mettre vostre oiseau en muë, faites le premierement purger & curer de toutes les mauuaíses humeurs & ordures, qu'il peut auoir dedás son corps de longue main amassees, à cause des salles & mauuaíses chairs dont il aura par fois esté pu, & qui luy pourroient engendrer filandres, aiguilles, & autres semblables maladies, voire la mort, à si temps n'y estoit pourueu. Et partant a donné conseil maistre Michelin, que auant que mettre son oiseau en mue, il est bon de le purger, par le moien de la recepte dessusdite: c'est à sçauoir, de la composition faite de lard trempé, mouëlle de bœuf, sucre d'vne cuitte, ou sucre fin, (car autant vault à dire) & safran battu & mis en pouldre, autant de l'vn comme de l'autre: de laquelle faudra faire trois pillules de la grosseur d'vne moienne febue, & les faire prendre à l'oiseau prest de muer par trois diuerses matinees consecutiuës: puis le mettre au feu ou au soleil, & ne le paistre que deux heures apres, qu'on luy donnera quelque bon past. Les autres trois iours ensoiuans, luy faudra (apres la cure) donner de l'aloës cicotrin du gros d'vne febue: puis le tenir au feu ou au soleil, & on luy verra rejeter ledit aloës avecques des phlegmes. Et ce fait le pourrez mettre en muë. Autre moyen de bien nettoier & purger l'oiseau auât la muë a baillé maistre Aimé Cassian. Prenez, dit-il, Hierepiere le gros d'vne petite noix muscade, & la mettez en la gorge du Faucon de façon qu'il la mette bas: & à fin qu'il ne face difficulté de l'aualler, vous la pourrez enuelopper en vn boyau de gelinelié des deux bouts. Apres qu'il l'aura prinse, vous le pourrez tenir sur le poing, ou au feu, ou au soleil, tant qu'il soit bien purgé. Puis ne le paistrez iusques apres midy, que luy donnerez gorge raisonna-

ble de quelque bon past vif. Et le lendemain le paistrez deux fois: puis apres le pourrez mettre en muë.

Quels moiens sont propres pour auancer vn oiseau de muër.

CHAP. XIX.

QUAND vous aurez mis vostre oiseau en muë, & verrez qu'il sera long & lent à muer. Si voulez auancer la muë, allez au lieu où lon tue les moutons au mois de May ou de Iuin, & prenez de ces glâdes que les moutons ont deffoubs l'aureille, à l'endroit du bout de la maschoire, grosses enuiron comme vne amende, prenez-en, dy-ie, iusques au nombre de dix ou douze, & les luy donnez hachees menu avec la chair. Et sil faisoit difficulté de les mager, pource qu'elles sont vn peu ameres, trouuez façon de les luy faire prendre, & mettre en bas. Et donnez-vous bien garde quand il commencera à muer & jetter ses plumes: car lors ne luy en faudra plus donner. Pour-ce qu'il pourroit aussi bien jetter les nouuelles comme les vieilles.

Autre recepte enseigne maistre Michelin pour ce mesme effait. Prenez, dit-il, vne couleure, & en faites tronçons: puis la mettez bouillir en vn pot neuf plein d'eau: & apres qu'aurez tiré ceste eau du feu, & qu'elle sera refroidie: mettez y tremper du grain de fourment. De ce fourment ainsi trempé nourrissez puis-apres quelques Pigeons, Tourterelles, & autres semblables oiseaux, desquels vous paistrez vostre oiseau tardif à muer: & incontinent apres il muera. Maistre Aimé Cassian dit à ce propos. Si vostre Faucon est lent à muer, prenez fouris-chauues, & les mettez secher au four, tant qu'en puissiez faire pouldre. De ceste pouldre poiurez la chair de vostre oiseau lors que le voudrez paistre, & tost apres il muera. Autre recepte encores enseigne maistre Molopin pour faire tost muer l'oiseau. Prenez, dit-il, petits Chiens de lait, & les ouurez, & au lait que vous trouuerez dedans leurs mulettes ou estomachs trempez la chair, dont voudrez paistre vostre oiseau. Apres prenez ladiete mulette, taillez-la en petis morceaux, & là luy

M ij

LIVRE QVATRIESME

faites manger: & vous le verrez tost apres bien mue r. Aussi donnant past bon & vif à tous oiseaux, vous les redrez prompts à la mue: pour ce que tel past est naturel & bien à propos.

Quels moyens sont bons à garder pour faire que tous oiseaux se portent bien en la mue, & qu'ils en puissent sortir sains & drus.

CHAP. XX.



I vous voulez auoir bonne entree & bonne issuë de la mue de vostre oiseau: aduisez premierement à ce que entrant en la mue il soit haut, gras, & en bon point, & au surplus tres-bien purgé & curé auant qu'y entrer, par la forme qui n'agueres vous a esté enseignée. Aussi estât en la mue il le vous faudra paistre de bonnes chairs, comme de petits poulets, & autre semblable bon past vif, qui soit laxatif. Ne faillez semblablement de luy bailler l'eau deux ou trois fois la sepmaine: pour ce qu'il en pourra boire aucunes fois, & par ce moyen se descharger des humeurs du corps, & des rhumes de la teste: & fil s'y baigne, le penage en sera meilleur & plus beau. Vous luy pourrez aussi à la fois faire past de rats & souris grands & petis, qui sont laxatifs: & sur tout les faudra tenir en lieu propre, honnesté, & net.

Comment on doit traiter Faucons apres qu'on les a leuez hors de la mue.

CHAP. XXI.



Aistre Molopin dit, que quand on leue Faucons hors de la mue, ils sont hauts & gras, iamaïs ne les deuez porter sans chapperon: car quand ils sentent l'air, le soleil & le vent, ils se barrant volontiers, & se chauffent: & puis apres se refroidissans ils tombent en grand danger de mort. Aussi veulent-ils estre gouuernez doucement & paisiblement: & au past manger chair lauee peu à peu & à gorge raisonnable. Et fil aduenoit qu'apres la mue l'oiseau se trouuaît desgousté, & perdist l'appetit de manger: lors faudroit prendre de l'aldes cicotrin en pouldre & le

mesler avecques ius de Rheubarbe : & apres luy en auoir fait prendre vne cure ou pillule, le tenir sur le poing iusques à ce qu'il se fust bien purgé: Puis ne le paistre iusques apres midy, & lors luy donner de quelque bon past vis: Et le landemain luy bailler à manger d'une geline: & puis luy bailler l'eau & le baing. Or deuez-vous croire que ces medecines & traitement susdits sont bons & proufitables à l'oiseau, tant pour le remettre en appetit, que pour luy faire vider filandres & aiguilles, & autres choses mauuaises qu'il peut auoir dedans le corps. Maistre Michelin de sa part a donné aduis à ce mesme effait: disant que quand on a mis l'oiseau hors de la mue, on luy doit lauer sa chair, & luy en bailler petit à petit plus ou moins selon ce qu'on le verra en goust: Toutesfois est bon de luy bailler au commencement quelques chairs laxatiues, afin de luy adoucir & élargir les boiaux: & aussi à fin que plus aisement il les puisse passer & mettre bas. Cela seruira pareillement pour luy oster la fierté & l'orgueil dont il est plein lors qu'il sort de la mue: Disant d'auantage qu'il les faut tousiours porter sur le poing avecques le chapperon: & quinze ou dixhuit iours apres qu'ils sont sortis de la mue, les purger & curer auant que les faire voler: Ce qui se pourra commodément faire en leur faisant prendre par trois matinees consecutiues les trois pillules, dont cy dessus a esté parlé, composées de lard, moëlle de bœuf, & sucre: Et ne fera que bon d'y mesler quelque peu d'aloes: car si en mettiez en quâtité, il les pourroit faire remettre par dessus, qui viendrait mal à propos: & par chaque iour qu'il aura pris desdites pillules, le faudra puis-apres mettre au feu ou au soleil: & ne le paistre iusques à deux ou trois heures apës, que luy donnerez poulaillie ou mouton. Maistre Aimé Cassian souloit, apres auoir tiré ses Faulcons de la mue, & deux ou trois iours au parauant que de les faire voler, leur faire prendre vne pillule, dont la composition ensuit. Prenez, dit-il, vn petit de lard, du poiure en pouldre, & de la cendre passée par sas ou estamine, autant de l'vn comme de l'autre, vn petit de sel menu, & vn peu d'aloes cicorin: & apres auoir tout bien meslé & battu ensemble, faites en vne pillule, que mettrez au bec de vostre oiseau, & ferez en sorte qu'il la puisse aualler & mettre bas: puis le couronnerez du chapperon, & le tiendrez au feu ou au soleil, luy laissant garder ladite pillule le plus longuement qu'il sera possible. Et s'il vient puis-apres à vomir, vous le laisserez rejeter tant qu'il voudra: Si luy verrez vider flegmes & grosses humeurs, se purgeant

LIVRE QUATRIÈME

par ce moien tout le corps pour puis-apres se trouuer sain & alegre, & bien faire son deuoir au voler. Apres qu'il sera ainsi purgé, enuiron vne heure ou deux, vous le pourrez paistre de poulaille, ou autre past chaud & vif: pource qu'estant ia esmeu dedans le corps, il ne pourroit pas faire son proufir d'autre viande. Mais soit aduisé le Fauconnier de ne donner ceste pillule aux oiseaux bas & maigres, ains aux gras & haults, qui sont pleins de chair & de gresse.

*Si, quand, & comment on doit donner l'Aloes
aux oiseaux volans.*

CHAP. XXII.



Vcuns Fauconniers sont d'opinion, & dient, que lon doit donner de l'Aloes cicotrin aux oiseaux volās de mois en mois, & de la grosseur d'une petite febue: & qu'il leur doit estre mis au beq enuolopé en vn petit morceau de chair ou de peau de geline, à fin qu'il n'en gouste l'amertume, & leur faire tenir le plus longuemēt que faire se pourra puis-apres le tenir au feu ou au soleil, tant qu'il ait remis ledit Aloes, avec les flegmes & colles qu'il luy fera vuidier. Aussi que pour guarétir l'oiseau de filandres & aiguilles, il est bon de luy en donner de huit en huit iours dedans sa cure le gros d'un pois: & que ce luy sera moien d'estre sauué & net desdites filandres & aiguilles, & autres telles maladies qui tous les iours luy peuuent suruenir. Ils conseillent encores donner au Faulcon refroidy cinq ou six clouds de girofle rompus avec les dens: & dient que par ce moien il sera deschargé des rheumes de la teste: & mesmes qu'ils valent contre les filandres, estans donnez deuers le vespre enuoloppez en peu de cotton. Entre autres le bon M. Aimé Cassian est de ceste opinion: & dit souuent auoir experimenté telles cures au grand proufit & auantage de ses oiseaux. Autant en dit M. Michelin au liure du Prince: & n'est Maistre Molopin de contraire aduis.

*Si l'oiseau s'est rompu les ongles, quels moiens & remedes sont propres pour les
faire reuenir, & le guarir.*

CHAP. XXIII.



Il aduient que vostre Faulcon se soit rompu l'ongle du pied, ou qu'il l'ait du tout perdu, il y a remede à l'un & à l'autre. Car sil la du tout perdu, & n'y soit demouré que le petit tendron ou cartilage de dedans, Maistre Molopin dit, que deuez prédre du plus delié & subtil cuir que pourrez recouurer, & en faire vn doigtier à l'oiseau, lequel emplirez de gresse de geline, puis mettez dedans iceluy l'orteil au doigt dôt l'ongle sera perdu, & l'attacherez dextrement à la iambe de l'oiseau avecques deux petites courroies de mesme cuir, & le remuerez de deux en deux iours iusques à ce qu'il soit rendurcy & bien reuenue. Mais si l'oiseau s'estoit seulement rompu & emporté quelque bout de l'ongle, tellemēt qu'il en fust demouré ou peu ou assez, lors luy faudra oindre de gresse de serpent: & ledit ongle luy croistra & reuiendra doucemēt, si bien qu'au bout de quelques iours, il s'en pourra aider & seruir tout ainsi cōme des autres. Aussi quand l'oiseau s'est par quelque force ou vehemence grande offensé l'ongle, de façon qu'il soit separé d'avec la chair, & qu'à ce moien il saigne: vous pourrez lors prendre sang de dragon en pouldre, & en mettre dessus la plaie saignante, & soudain le sang estâchera. Mais si puis apres il y venoit quelque enflure, la faudroit oindre de gresse de geline, & tost apres se desenfieroit. Toutesfoi si à l'occasion des humeurs dont l'oiseau pourroit estre plein, ou par quelque autre accident, la iambe à cause de l'ongle rompu ou perdu ou le pied luy venoit en tumeur & inflammation notable, lors y faudroit appliquer & cataplasmer l'onguent duquel cy deuant a esté parlé, qui est cōposé de gresse de geline, huile rosat, huile violat, terebenthine, & des pouldres d'encens blanc, & de mastic, & laisser reposer l'oiseau iusques à ce qu'il fust bien guarý.

Quand les Faulcons font des œufs en la mue ou dehors, & puis en deuiennent malades. & en danger de mourir: par quels moiens on y doit remedier.

CHAP. XXIIII.



Vcunefois aduient qu'aux oiseaux estans en la mue, ou en estans ia leuez, se concreent & engendrent des œufs dedans le corps: qui les font tost apres deuenir si fort malades, qu'ils en tombent souuent en danger de mort, s'il n'y est pourueu de prompt remede. Lequel a enseigné maistre Aimé Cassian, disant, que la chair que luy donnerez au past, doit estre trépee ou lauce en l'vrine de quelque ieune enfant mal-

le aagé de six ou sept ans: & luy cōtinuāt ce traitemēt l'espace de huit ou dix iours, il ne fera puis-apres aucuns œufs. Autre remede encor a monsté maistre Molopin: si vous voulez, dit-il, rompre ou diminuer les œufs estans au ventre de l'oiseau lors qu'il est en la muë: prenez de l'eau qui degoutte de la vignè quand au mois de Mars elle a esté taillée, & soit receuë de la veigne pleurante en vn verre ou phiole: & de celle eau lavez la chair que donnerez à l'oiseau par l'espace de huit ou dix iours: & par ce moien se rompront & diminueront les œufs quelques gros qu'il les puisse auoir au ventre.

Quels moyens doit tenir le Faulconnier voulant prendre Faulcons en l'aire ou au nid.

CHAP. XXV.



L'Expert Faulconnier qui voudra prendre les Faulcons en l'aire ou au nid, se sçaura bié donner garde de les enleuer trop petis. Car s'ils estoient ainsi ieunes & petis leuez du nid, ils ne pourroient puis-apres sentir si peu de froid, qu'ils ne prinsissent vn mal de reins tel, qu'ils ne se pourroient soustenir sur les pieds, & tōberoient en grād peril de mort. Et pour ce ne doit-il les leuer de l'aire, sinon tant grāds & tant fors, qu'ils puissent bien resister au froid, & se soustenir sur les pieds. Et les doit-on soudain mettre sur perche ou billot de bois, afin qu'ils puissent mieux tenir & mener leur pennage, sur le degalter & froisser contre la terre. Nommement doiuent estre puz de chairs bonnes, fraïches & viues, tant qu'on en pourra recouurer: car c'est le seur & certain moien de leur faire auoir beau pennage. Si dit maistre Michelin, que pour bien gouverner vn Faulcon niais, & le garder de ce mal de reins, il faut mettre sous luy en la forme d'vne herbe qui ressemble à du Seuz, aiant graine noire, qui vulgairement est nommee Hieble: pour ce qu'elle est chaude de sa nature: & au surplus est fort souveraine contre le mal de goutte & de reins, qui pourroit par delicatessè ou froidure aduenir à ces oiseaux qui sont pris ieunes en l'aire ou nid.

Par

Par quels moiens on peut voir si les Faulcons ont pouls ou mousches : & s'ils en ont, comment on les peut oster, ou faire mourir.

CHAP. XXVI.



I vous voulez esprouuer quand vostre oiseau aura pouls ou mousches: pour bien tost vous en apercevoir, le vous faut seulement mettre & exposer au soleil de midy lors qu'il est en sa grande ardeur, & au dessus du vent: & s'il a pouls, incontinent sentans la chaleur ils ne faudront à sortir & se monstrent par dessus les plumes: Or dit maître Cassian, que pour oster ou faire mourir lesdits pouls, faut auoir orpiment, & en faire pouldre bien subtile, & ceste pouldre meslerauecques pouldre de poiure bastu, en moindre quantité toutesfois que l'orpiment: Puis prendre dextrement vostre oiseau, & le tenir de maniere qu'il ne se puisse en rien offenser ne rompre le pennage: & de ces pouldres, ainsi que dit est, mixtionnees, luy pouldrer l'vne des ailes, & puis l'autre, & puis le demourant du corps doucement & gracieusement: Ce fait le mettre sur le poing, & l'arroser, en forme d'aspergement, avecques la bouche d'un peu d'eau nette & fresche: puis le tenir au feu ou au soleil iusques à ce qu'il soit bien sec. Puis apres quand le voudrez paistre, arrosez luy un peu le beq avec eau fresche, afin de luy leuer & faire perdre la saueur de l'orpiment. Mais soit aduisé le Faulconnier, que son oiseau ne soit trop maigre & affamé, lors qu'il le voudra orpimenter: car l'orpiment luy pourroit nuire, s'il le trouuoit bas. Aussi dit M. Molopin que pour ce mesme effait, vous pouuez pareillement vser de l'orpiment tout à part soy, & du poiure aussi sans orpiment: mais que vsant du poiure seul, sera bon d'y mesler un tiers de cendre, pour rompre la pointe & force dudit poiure pourueu qu'icelle cendre soit bien passée & meslee avecques le poiure. Ce faisant vous pourrez tenir vostre oiseau garenty des pouls & mousches pour toute l'annee.

Quand l'oiseau pend & traine l'aile, par quel moien on la luy peut faire leuer & soutenir.

CHAP. XXVII.

N



Duient souuent qu'oïseaux nouuellement prins, & mis sur le poing, ou sur la perche, ou en mains de personnes qui ne les sçauent pas bien gouuerner, ils se debattent, & eschauffent: & puis se refroidissent, entreprenent, & roidissent: de maniere que puis-apres ils ne peuuent plus redresser ne soustenir leurs ailes. Pour remede à ce mal enseignem. Molopin la medecine qui ensuit: Prenez, dit-il, de fort bõ vinaigre, & en arrosez vostre oiseau avecques la bouche dessus & dessous: mais gardez qu'il ne luy en entre aux narilles: puis le mettez au feu ou au soleil, & luy continuez ce traitement deux ou trois iours. Au bout desquels, si voiez qu'il luy soit amendé, ne luy faites autre chose: Mais si pour tout cela il ne sera en rien amendé, mettez-le dedans vn eau: & par force de se debattre releuera & redressera ses ailes. Sortant de l'eau le faldra mettre au soleil, & le tenir chaudement: car si vous le laissez refroidir, il seroit pis que deuant.

Si les oïseaux de fortune, se sont cassé, froissé, ou rompu quelques pennes des ailes, ou de la queue par quels moyens on les doit racomstrer, & entre s'il en est besoin. ●

CHAP. XXVIII.



Souuent eschet que les oïseaux se froissent, cassent, ou rompent les grosses pennes des ailes ou de la queue, par la faute des Faulconniers, ou autres qui les gouuernent: Lesquels les aians mis sur la perche, les attachent long, & laissent le grand pendre au bout des longes: & par ce moien s'empesche & empesche l'oïseau en se debattant, tellement qu'il ne se peut redresser, & à force de se debattre se froisse, casse, ou rompt quelque penne. Autrefois leur aduient ce mesme inconuenient, quand s'estans iettez sur la proie par eux pouruiue, furuiennent les chiens, qui chauds & gourmands se iettent de violence sur la proie & sur l'oïseau, & luy rompent ou arrachent quelque penne. En plusieurs autres manieres se peut aussi l'oïseau gaster lesdites pennes, qui seroient longues & superflues à reciter: Mais le principal est, quand le mal est aduenu, d'y sçauoir donner bon & prompt remede. Or diemaitre Cassian, que si vne penne estoit seulement ploice & froissée par quelque for-

ce, sans qu'il y eust autre cassure ou rupture: Faut prendre eau chaude, & en lancer la penne froissée, de façon qu'elle devienne bien tendre à l'endroit de la froissure: puis l'estreindre avecques les dents à fin de la redresser & remettre en son premier estat. Puis soit prise vne coste de chou, & mise sur les charbons tant qu'elle soit bien chaude, puis fondue & mise sur la froissure, en l'estreignant de façon que la penne se puisse voir toute redressée & revenue en sa premiere forme. Mais si la penne estoit tellement rompue qu'il fust besoin de l'enter, toutesfois fust la coste de dessus seulement froissée, & autrement entiere sans rupture, ou cassure, & tout le surplus du dedans de la penne rompu, & couppeé iusques à ladite corte ou coste de dehors: en ce cas vous la pourrez enter de la façon qui ensuit. Vous ferez avec vne aiguille vn pertuis de chaque costé de la rupture, rapportant droittement & iustement l'un à l'autre: puis prendrez vne autre aiguille enfilée, laquelle mettrez & ferez passer par lesdits trous ou pertuis le cul deuant avecques son fil: & la pousserez tant auant, que vous faciez venir aboutir la pointe de l'autre part: puis l'ostez, & tirez tout bellement le fil, de façon que tout vienne à ioindre & serrer ensemble. Lors pourrez coupper le fil au plus pres: & par ce moïe demourera la penne entee à son droit fil, & se portera beaucoup mieux que si elle estoit couppee tout oultre: Car la coste ou corte demeurant par dessus entiere, sera cause que la penne sera mieux soutenue. Autre moien a enseigné M. Michelin pour enter penes rompues tout à fait, & lors qu'il les faut reioindre & enter de deux pieces: Prenez, dit-il, des aiguilles que tous Faulconniers cognoissent, & ont expres pour enter penes: Et si le bout de la penne rompue, qui est demeuré vers l'oiseau, est d'adventure fendu, soit relié avecques du fil: & soient voz aiguilles mouillees dedans eau salée, ou fichees dedans vn oignon, afin qu'elles prennent mieux, & afin que la penne entee se maintienne. Encores a monsté M. Cassian vne autre belle maniere d'enter penes en tuyaux: Si vne penne, dit-il, est rompue en tuyau, & vous y voulez faire rentrer & racommoder la penne mesme qui en a esté rompue (pource qu'elle reprendra & s'accommodera mieux qu'une autre penne estrangere): prenez vn autre tuyau plus menu, & qui puisse entrer dedans le tuyau qui tient à l'oiseau: & l'entrez & faites enter de l'autre part pareillement dedans le tuyau du bout de la penne rompue, & séparé du corps de l'oiseau de telle façon que les deux extrémités se viennent bien iustement à serrer & ioindre ensemble: Puis apres

LIVRE QUATRIESME

d'une grosse aiguille ou d'un aletne bien menuë faites deux pertuis de part & d'autre de la jointure: & d'une petite plume d'aile de perdrix ou de coulomb (que vous aurez escorchée par dessus, tant qu'il n'y sera demouré que le tuiau net & simple) & du plus menu bout d'icelle vous emplirez les pertuis susdits, de la mesme façon que l'on ferre vne aiguillette: ce que ferez en sorte que ladite petite plume ainsi passée au traucers desdits pertuis soit bien tirée & apparente de part & d'autre: & apres l'auoir dextrement couppee & bien riuee, afin qu'elle ne puisse eschapper, vous pourrez lors asseurer que vostre penne sera bien entee.

Quand une penne est arrachée par force, ou tirée en sang, quel moien il y a de la faire reuenir sans offense de l'oiseau.

CHAP. XXIX.



Vand à l'oiseau aura esté arrachée penne par force, M. Aimé Cassian a enseigné d'y remedier par le moien qui ensuit. Prenez, dit-il, vn grain d'orge ou d'auoine, & le coupez vn peu par le bout, puis l'engressiez ou oignez d'un peu de Theriaque, & le mettez dedans le pertuis de la penne arrachée, à fin qu'il ne vienne à se clorre, & que la pêne nouvelle puisse sortir plus à son aise: neantmoins deuez-vous croire que relles pennes ne reuiennent iamais ne si belles ne si fortes que les autres. Or si vne penne a esté tirée en sang, ledit M. Aimé Cassian cōseille, prendre promptement le grain d'orge ou d'auoine dessusdit engressé de Theriaque, & coupé par le bout cōme dessus, & le mettre dedans le pertuis de la penne tirée, de façon que le bout en faille & se voie par dehors: afin que au bouter que fera la nouvelle penne il soit plus prompt & prest à yssir. Combien que ce soit bien grande auenture d'en voir iamais sortir penne qui vaille: de fait, tirer pêne en sang est beaucoup plus dangereux que les tirer en toute autre maniere.

Si l'oiseau a l'aleine puante, quelle en est la cause, & quels moiens sont bons pour y donner remede.

CHAP. XXX.



L aduient aucunesfois que les oiseaux ont l'haleine puante: & ce leur prouient de deux causes. L'une pource qu'ils ont esté pus de chairs, sales, puantes, & non lauees: & lesquelles au parauant les paistre, n'ont pas esté trempées, en hyuer en eau chaude, en esté en eau fresche & nette. Et à ceste occasion & de la corruption desdites chairs, qui se corrompent en leur estomach, leur montent fumées puantes en la gorge & au cerueau, qui leur rendent l'haleine ainsi mauuaise & puante. L'autre, est à cause de quelques grosses & mauuaises humeurs concreées & assemblées de l'organe main au corps & en la teste de l'oiseau, à faute de le corer & purger en temps & saison conuenable. A ceste cause seroit besoin que iamais chairs grasses ne se donnassent aux Faucons, sans trépet vne heure ou deux auant que les paistre: car celà leur seroit grand moyen de se maintenir en santé.

Si dit M. Aimé Cassian que pour remedier à telle puanteur d'haleine, faut en premier lieu faire la composition de la medecine dessusdite, qui se fait de lard, moüelle de bœuf & sucre, & en former trois pillules qui seront de la grosseur d'une febue baillées par trois diuerses matinees à l'oiseau: lequel sera puis apres tenu au feu ou au soleil, iusques à ce qu'il ait esmeuty par trois ou quatre fois, & par ce moien se soit bien purgé: puis deux ou trois bones heures apres, sera pu de quelque bon past vis. Ces trois iours passez, & apres ladite purge, soit pris Romarin, & séché au feu ou au four, puis mis en pouldre, prenez aussi deux ou trois clouds de girofle, & les rompez & froissez vn peu avecques les dens: & de ces deux simples bien meslez ensemble faites vne pillule, laquelle vous ferez sur le vespre prendre à vostre oiseau enuoloppee en peu de cotton: & la luy mettant en la gorge ferez tant qu'il l'aualle & mette bas: luy cōtinuant ainsi par quatre ou cinq iours: mais soit mis puis apres l'oiseau en lieu où la cure se puisse retrouver & voir la matinee ensuiuante. Ces quatre ou cinq iours passez, vous luy en pourrez puis apres faire prendre autant de cinq en six iours, iusques à ce qu'il soit bien remis en sa bone haleine. Encores luy vaudra ce traitement pour le descharger des rheumes de la teste, & le garétir de toutes manieres d'aiguilles & filâdres qu'il pourroit auoir dedas le corps. Mais sur tout en tout temps, & en toute disposition que puisse estre vostre oiseau gardez-vous de luy donner chair froide qui ne soit trempée & bien lauee.

N. iij.

LIVRE III. DE LA FAUCONNERIE.

Conclusion de l'Auteur.

CHAP. XXXI.

Usques icy, mes bons seigneurs, vous ay-je redigé par es-
crit en ce petit traité, les principaux secrets de ce noble
art de Fauconnerie, selon ce que i'en ay peu apprendre
& recueillir de ces trois excellens & experts Fauconniers
cy dessus nommez. Lesquels i'ay veus & congnus si bons
maistres, & tant renommez en cest art, que i'ay tousiours creu & pen-
sé faire port à vous autres mes bons seigneurs, & à toute la posterité des
Gentils-hommes soy delectans à la Fauconnerie, si ie n'en laissoie quel-
ques memoires par escrit pour les adresser & redresser en toutes cho-
ses qui peuvent concerner la santé & le bon traitement des oiseaux.
Vray est que ie ne me suis pas beaucoup amuse à faire particuliere &
entiere enumeration de tous oiseaux qui chassent & prennent le gibier
& la proie : ny pareillement à enseigner les moyens de les affaier &
rendre adrois & prompts au vol & à la chasse du gibier : pour ce que ce
ne sont pas des plus exquis points de la maistrise : & que plusieurs gens
de bien en ont ia deuissé, & en pourront d'oresnauant faire entendre
par leurs escrits, ce qu'ils en ont en la phantasie. Ains me suis singu-
lierement arresté à monstrier les moiens & subtilitez de conseruer les
Faucons en leur santé, lors qu'ils sont sains : & de les guarir & remettre
en bon estat lors, qu'ils sont malades. Quoy faisant, si vous trouuez li-
sant ce traité ; que ie vous aie donné quelque bone adresse, sachez-en
gré aux trois maistres dessusdits. Mais aussi prenez en bonne part le
labeur que i'y ay tres-volontiers employé à la faueur & soulagement
de vous tous, nobles & gentils esprits, qui aimez le deduit du vol de
l'oiseau, & l'adresse qui par l'art s'y peut setrouuer pour la perfection &
auancement du plaisir que chacun de vous en doit recevoir. A Dieu.

F I N D E C E Q V A T R I E S M E L I V R E .

La Fauconnerie de Guillaume Tar-
dif, du Puy en Vellay, Lecteur
du feu Roy Charles huities-
me du nom, & à luy de-
dice.

AV ROY TRES-CHRESTIEN
CHARLES HVICTIESME GVILLAVME
Tardif du Puy en Vellay, son Liseur, tres-
humble recommandation supplie
& requiert.



ESLORS que Dieu vous doia du nom de tres-Chrestien Roy de France, Sire, mon naturel, souverain & unique Seigneur, ie vostre tres-humble & tres-obeissant seruiteur, vous dedia mon mediocre engin & science. Car apres plusieurs œuures qu'à vostre nom ay composees par vostre commandement, & pour recreer vostre Royale maiesté entre ses grans affaires, vous ay, en vn petit liure, redigé tout ce que i ay peu trouuer servir à l'art de Fauconnerie. Lequel liure ay translacé en François des liures en Latin du Roy Daucus, qui premier trouua & escriuit l'art de Fauconnerie, & des liures en Latin de Moamus, de Guillime, & de Guicemas, & colligé des autres bien scauans audict art, brièvement & clèrement en ordre par rubriques & chapitres, laissant les medecines difficiles à trouuer, ou à faire, ou dangereuses pour l'oiseau, ou non approuuees par les experts, & par l'art de medecine. Les noms des medecines, qu'on nomme drogues, qui ne sont en l'usage François, sont escriptes en la langue de laquelle vsent les Apothicaires. Cest œuvre a deux parties, la premiere enseigne à congnoistre les oiseaux de proie desquels on use, les enseigner & gouverner, & les medecines pour les entretenir en santé. La seconde enseigne les maladies desdicts oiseaux & les medecines d'icelles.

LA

TABLE DE LA FAVCONNERIE DE

GVILLAVME TARDIF

53

PREMIERE PARTIE.

- E**SPÈCES des oiseaux, & du mâle & de la femelle. 54.a
 Espèces de l'Aigle, & de sa nature. mes. fucil.b
 Du Faucon, & de ses espèces, & de sa condition & forme. 55.b
 De l'Emerillon. 57.a
 Du Lanier. mes. fucil.b
 Du Sacre. 58.a
 Du Gerfaut. 59.a
 Del'Autour grand & petit. mes. fucil.b
 Del'Esperuier. 60.b
 Comme on cognoist sa bonté. 61.a
 Comme il le faut chiller. mes. fucil. b
 Comme il le faut affaier. 62.a
 Maniere de le faire voler. 93.a
 En quel temps on prend les oiseaux de Fauconnerie au nid & en l'aire. mes. fucil.b
 Que c'est niais, brâcher, ramage, & for. là mes.
 Pour desgluer oiseau. 64.a
 Pour froissure & enteeure des pennes. mes. fucil.
 Du past, & de la chair bonne ou mauuaise, du laument des chairs, & de leurs natures. mes. fucil.b
 Remede à l'oiseau qui mange trop tost. 65.a
 Remede au bec rompu ou deshoiñt. mes. fucil.b
 La cause de la soif de l'oiseau. là mesme.
 Si l'oiseau ne peut esmutir. mes. fucil.
 La maniere de l'entretenir en santé & le garder de maladie. 66.a
 De la cure qu'on donne à l'oiseau. mes. fucil.
 Pour le purger, & faire bon ventre. 67.a
 Pour luy eslargir le ventre & le boyau. mes. fucil.b
 Maniere de baigner l'oiseau. là mesme.
 S'il est enuenimé pour se baigner. mes. fuciller.
 Comme on cognoist la santé ds l'oiseau. 68.a
 Comme on cognoist s'il digere mal. mes. fucil.
 Quand il n'enduit bié sa gorge. là mes. b
 Pourquoi il la rend. mes. fucil.
 S'il a l'appetit perdu. 69.a
 Recepte pour mettre l'oiseau sus, & les signes de meigreux ou maladie. mes. fucil.
 Maniere de porter l'oiseau & l'accoustumer avec les Chiens. là mes. b
 Pour luy faire soubstenir les ailes. 70.a
 Pour faire l'oiseau au leurre, & au gibbier. mes. fucil.
 Renoueller ongle rompu. là mes. b
 A bien faire reuenir l'oiseau. mes. fucil.
 Pour luy faire auoir faim. 71.a
 Afin qu'il ne perche en arbre. mesme fucil.
 Quand il n'a volonté de voler. mesme fucil.
 A oiseau egaré qu'il est de faire. là mes. b
 Pour rendre l'oiseau hardy à sa proie. mes. fucil.
 A faire le Lanier Gruyer. mes. fucil.
 A faire hayr à l'oiseau vne proie. 72.a
 De la muë de l'oiseau de proye. mesme fuciller.
 S'il engendre œufs en la muë, ou ailleurs. 73.a
 S'il fort gras de la muë & orgueilleux. mes. fucil.

O

Quand il pert le manger apres la muë.
 mes. fucil. b
 Muer le pennage de l'oiseau en blanc.

là mes.
 Empeschement de se battre à laperche.
 mes. fucil.

SECONDE PARTIE.

Communs signes des maladies des
 oiseaux. 74. b
 Contre rheume. mes. fucil.
 Si le rheume est sec au cerueu. 75. a
 Remede au rheume engendré par fu-
 mee, ou par pouldres. mes. fucil.
 Contre l'epilepsie & haut mal. là mes. b
 Pour reueiller l'oiseau. mes. fucil.
 Contre opilation & surdité. 76. a
 A l'enfleur & viscosité des paupieres.
 mes. fucil.
 A l'enfleur des yeux. là mes.
 Au mal des yeux. mes. fucil. b
 Du mal de chancre. mes. fucil.
 Remede à la pepie. mes. fucil.
 Contre le flegme du gosier. mes. fucil.
 Des sangsues. 77. a
 Des filâdres, & leurs especes. mes. fucil.
 Si l'oiseau a raycité seche. là mes. b
 S'il a l'haleine puante. mes. fucil.
 Remede aux poulx. 78. a
 Remede à la taigne. mes. fucil.
 Si l'oiseau herissonne, le remede. 79. a
 Quand il tremble, & ne se peut souste-
 nir. mesme fucil.
 S'il s'est hurré. mes. fucil.
 Quand il s'est blessé en hurrant & y a
 playe. là mesme, b

Pour estancher la veine. mes. fucil.
 Remede à os rompu, ou hors de son
 lieu. 80. a
 De l'oiseau qui a le foye eschauffé. mes.
 fucil.
 Maladie du poulmon. 80. b
 Contre asma & pantais. mes. fucil.
 du sang figé. 81. a
 des filandres. mes. fucil. b
 des aiguilles. 82. a
 Apostumes dedans le corps. mes. fucil.
 Contre le mal subtil. mes. fucil. b
 Pour refroidir grande chaleur de l'o-
 iseau. 83. a
 Contre les fieures. là mes.
 Contre les ventositez. mes. fucil.
 Contre la pierre. là mes. b
 A l'enfleur de cuisse ou de iambe. mes.
 fucil.
 Aux filandres des cuisses, le remede.
 84. a
 Aux enfleurs des pieds. mes. fucil.
 Contre cloux des pieds. là mesme. b
 A la podagre & galle, remede. mes. fuci.
 Quand les ongles se descharnent. 85. a
 Si l'oiseau se ronge les pieds. mes. fucil. b
 S'il a vessie en la plante des pieds. mes.
 fueiller.

Fin de la Table.



La premiere partie de Faucon-
NERIE PAR GVILLAVME TAR-
DIF DV PVY EN VELLAY.

*En laquelle est traicté comme on cognoist les oiseaux de
 proye, comme on les enseigne, & gouverne, &
 comme on les entretient en bon point &
 bonne santé.*

*Des especes des oiseaux de proye, desquels on vse en l'art de Fau-
 connerie : & de la nature du masle & de la femelle.*

CHAPITRE I.



LE S oiseaux de proye, desquels on vse en l'art de Fauconnerie, sont de trois especes : qui sont l'Aigle, le Faucon, & l'Autour. Desquels oiseaux nous parlerons cy apres separément, & par chapitres.

La femelle des oiseaux viuans de rapine est plus grande que son masle, plus forte, hardie, fine & caute. Le masle des oiseaux qui ne viuent point de rapine, est plus grand & plus beau que sa femelle.

O ij



*De l'Aigle, de ses especes, de sa couleur & forme, des noms diuers d'elle,
selon diuerses langues: quand elle doit estre prise, quand elle doit
fuir ou non, & le remede à ce: de la proie d'elle. Le remede
aux Aigles gastant le gibbier.*

CHAP. II.

AIGLE a deux especes: l'une est appellee Aigle absoluemēt,
l'autre est nommee Zimicch. Rouge couleur en l'Aigle, &
les yeux parsons, principalement si elle est nee es montai-
gues Occidentales, est signe de bonté. Rouffe Aigle est bonne, sans
doute. Blancher sur la teste, ou sur le dos de l'Aigle, est signe de meil-
leure Aigle, laquelle est appellee en langue Arabique Zummach, en

Syriaque Meapan, en Greque Phidalelphie, en Latine Milion. L'Aigle doit estre prinse petite, car la condition d'elle, est d'accroistre en audace & astuce. Quand l'Aigle part du poing, & volle au tour d'iceluy, ou en terre, c'est signe qu'elle est fugitiue. Au temps que les oiseaux sont en amour & s'apparient pour faire generation, l'Aigle communément fuit avec les autres: pourtant mettez au past d'elle vn peu d'arsenic rouge, autrement nommé orpiment, lequel luy mortifiera ce desir. Quand l'Aigle voulant espanouir la queue, tournoie autour d'icelle, & monte vers aucune partie, est signe qu'elle est disposee de fuir. Le remede est, lors luy ietter son past, & la fort rappeler, & s'elle ne descend à sondict past, c'est pour auoir trop mangé, ou pour estre trop grasse Remede à ce. Cousez les plumes de sa queue, tant qu'elle ne les puisse espanouir, ne d'icelles voler, ou plumez le tour du fondement tout autour: lors par la froideur qui est en la summité de l'air, ne tachera plus de voller si hault: mais adonc on doit doubter les autres Aigles, lesquelles elle ne pourroit pas bien euitier ne fuir, pour ce qu'elle a ainsi la queue cousue.

Quand l'Aigle voltant, tournoye sur son Maistre, sans s'esloigner, c'est signe qu'elle ne fuira point.

L'Aigle prent l'Autour, & tout autre oiseau de rapine, par ce qu'elle les voit porter les gets, lesquels elle cuyde estre past: & pour ceste cause tache les prendre, & n'y sçait on autre cause: veu que quand elle est au desert, elle ne fait pas ainsi.

Pour euitier l'Aigle, on doit oster les gets de son oiseau, quand on le veut faire voller: autrement l'oiseau, par quelque industrie qu'il eust, ne se sçauroit deliurer de l'Aigle. L'Aigle dicte Aigle absolument, prent le Lieure, le Renard, la Gazele.

L'Aigle nommee Zimiech, prent la Grue, & oiseaux moindres. Quand il y a Aigles, gastans le gibbier, le remede est: Cousez les yeux à vne Aigle, en luy laissant peu d'ouuerture pour voir la clarté: & dedans le fondement mettez vn peu d'Asa-fetida, puis cousez ledit lieu. Et aux iambes d'elle, liez aisse, ou chair, ou drapeau rouge, lequel les Aigles cuideront estre chair, & la fâche voler, & en voltant, & soy descendant iettera les autres bas, ou s'en fuiront: laquelle chose elle ne feroit, si n'estoit la douleur que luy fera ce que dit est, mis dedans son fondement.



Du Faucon, quand il doit estre prins, de sa bonne forme & condition, de ses especes, couleurs, gouvernement & prois: & comme on le doit tenir hors du poing.

CHAP. III.

L Faucon qui est prins petit deuant la mue, est le meilleur. La bonne forme du Faucon est, teste ronde, & pleine sur le haut, le bec gros & court, le col fort long, la poitrine bien large, grosse, charnue & nerueuse, dure & forte d'ossements : & pource se

confiant à sa poitrine, frappe d'icelle, & aiant les cuisses menues & foibles, il chasse des ongles : hanches pleines, aisles longues, & sur la queue croissans, queue courte, & tost volubile, cuisses grosses, jambes courtes, plante large, molle & verte, plumes legieres, occultes, peu & parfaites. Tel Faucon prendra les Grues, & grands oiseaux. La condition du Faucon est, qu'il est plus qu'autre oiseau hardy, viste à voller, & à reuenir: fugitif toutesfois, & auaricieux aussi de proie, pour laquelle cause il vole roidement & soudainement, & frappe souuent en terre, & se tue. Le Faucon a dix especes : qui sont, Oubier, Emerillon, Lanier, Tunicien, Gentil, Pelerin, de Passage, Montaigner, Sacre, & Gerfaud. De l'Emerillon, Lanier, Sacre & Gerfaud est cy apres sepagement par chapitres escrit. Faucon Tunicien est ainsi appelle, par ce qu'il naist communement au pays de Barbarie, & que Tunis est la principale cite d'iceluy pays, en laquelle abonde la volerie dudit Faucon. Il est aussi de la nature du Lanier, vn peu plus petit, sur tels pieds de tel pennage, mieux croyant, plus long de vol, teste grosse & ronde, bien montant aile, bon à riuere & aux champs, aux lieures & autres gibbiers.

Faucon Gentil, est bon heronnier dessus & dessous, & a toutes autres manieres d'oiseaux : comme aux Rousseaux, ressemblans au Heron, Esplugneaux, Poches, Garfottes, & specialement aux oiseaux de riuere. Pour estre bon Gruyer, faut qu'il soit prins nyais, car autrement ne seroit si hardy. Pour estre plus hardy l'oiseletras premierement sur la Grue, veu qu'il n'a encore cogneu autre oiseau. Faucon Pelerin est ainsi nomme, pour ce qu'on ne sçait où il naist, & qu'il est prins en Septembre, faisant son pelerinage ou passage es Isles de Cypre, & de Rhodes. Le bien bon est de Candie, il est hardy, vaillant, & de bon affaire : il est bon à la Grue, à l'oiseau de Paradis, qui est vn peu plus petit que la Grue, au Hiron, Rousseaux, Esplugneaux, Poches, Garfottes, & autres de riuere : à l'Oye sauvage, Ostarde, Oliues, Perdrix, & autres menus. Faucon de passage, autrement dict Tartarot de Barbarie, est dit de passage comme est le Pelerin. Et est dict de Barbarie, pource qu'il fait son vol & passage par le pays de Barbarie, & qu'on en prend là plus qu'ailleurs. Le bien bon est de Candie, il est vn peu plus grand & gros que le Pelerin, roux dessous les aisles, bien empiete, longs doigts, bien volant, hardy à toute maniere de gibbier, comme dict est du Pelerin. Le Pelerin & de passage peuuent voller tout le mois de May, & de

PREMIERE PARTIE

Iuin, pource qu'ils sont tardifs en leur mue: & quand ils commencent à muer, se despouillent prestement.

Faucon montaigner est de brune couleur, & s'il est sain, il est des autres le meilleur: il est grand & hardy, prenant grans & non petis oyseaux, difficile à gouverner & garder: il le faut plus porter & faire veiller qu'autre Faucon, & doibt estre entretenu entre gras & meigre. Quand il sera malade, faictes luy bouillir bien foit au four eau nette, en pot de terre, & la mettez deuant luy, & l'induisez à en boire. Quand le voudrez purger & ameigrir, ferez trois cures de peau de geline, lesquelles trois iours luy donnerez. Pour le garder sain, oingdrez vostre gant de musc. Et quand le voudrez faire voller, iettez-le deuant que les autres: combien qu'il ne prenne rien, si reuiendra-il au vol des autres. Noir Faucon, comme dient les Alexandrins, est le meilleur, ne luy donnez point chair mouillée, sinon qu'il soit orgueilleux, portez-le sur le poing, plus qu'autre Faucon, ne l'ennuyez point outre son vouloir, & le traictiez benignement: gardez qu'il ne voye Aigle, car apres ne prendroit oiseau, & qu'on ne luy touche ses penne: quand le ietterez à sa proie, gardez de mal duire vostre main, car il perdroit lors courage. Rouge Faucon est souuent trouué es lieux plains, & en marais: il est hardy, mais difficile à gouverner, pourtant deuant qu'il volle, donnez luy trois purgations de cuir de geline lauë en eau,

puis le chauffez, & le mettez en lieu obscur par aucune espace de temps, puis apres faictes le voller.

Faucon qui a plumes blanches est har-


di, & bon, quand il est sor: ne le fais

point voller qu'il n'ait muë,

car apres la mue il

est bon.

De



*De l'Emerillon, de sa forme, de son vol, de sa proye,
& quand il doit estre oiselé.*

CHAP. IIII.

L'Emerillon est de forme de Faucon, plus petit que l'Esperuier, plus volant qu'autre oiseau: prenant toute volatille que prent l'Esperuier, principalement petis oiseaux, comme moyneaux, alouettes, & semblables, & les poursuit de merueilleux courage. Il doit estre oiséllé en huit iours, car apres ne vaut rien.

P



Du Lanier, de sa naissance, de sa forme, de son past & de sa proie. CHAP. V.

LE Lanier est assez commun en tous pays. Il est plus petit que le Faucon Gentil, beau de pennage, plus court empiété qu'autre Faucon. Celuy qui a la teste plus grosse, les pieds plus sur le bleu, soit niais ou sot, est le meilleur. Il n'est point dangereux en son viure. Il est commun pour voler sur terre & sur riuere.



Du Sacre, de ses especes & naissance, des noms d'icelles especes, quand il doit estre prins, de sa forme, condition & proie.


CHAP. VI.

IL y a trois especes de Sacres. La premiere est appellee Seph, selon les Babyloniens & Assyriens. Il est trouué en Egypte, & en la partie Occidentale, & en Babylone. Il prend Lieures & Biches. La seconde espece est nommee Semý, qui prennent petites Gazeles. La tierce, est dictée Hynair, & Pelerin, selon les Égyptiens & Assyriens: il est dit de passage, pource qu'on ne sçait où il naist, & qu'il fait son passage tous les ans vers les Indes, ou vers le midy. Il est prins és isles de Leuant, en Cy-

P ij

PREMIERE PARTIE


pre, Candie, & Rhodes, pource dit-on qu'il vient de Russie, de Tartarie, & de la mer Maior. Le Sacre prins apres la mue, est le plus viste, & le meilleur. Le Sacre est plus grand que le Pelerin, laid de pennage, court empieté, & hardy. Le meilleur est, celuy qui a couleur rouge, ou tannée, ou grise: & qui est en forme semblable au Faucon, qui a grosse langue, & pied leger, ce qu'on trouue en peu de Sacres, doigts gros, & tendans à couleur de bleu effacé. Le Sacre est des oiseaux de proye le plus laborieux, paisible, & traictable, & qui fait meilleure digestion de gros past. La proie du Sacre, sont grans oiseaux, comme Oye sauvage, Grue, Heron, Butor: & singulierement bestes à quatre pieds siluestres, comme Gazeles, & autres.



Du Gerfaud, de sa naissance, de sa forme, condition, & proye.

CHAP. VII.

DS parties froides, & en Dacie, Nouergue, & Prusse, naist le Gerfaud: mais il est prins communement en faisant son passage en Allemagne. Il est bien empicté, doigts longs, grant, puissant, beau spécialement quand il est mué, & si est fier & hardy, dont il est plus difficile à faire: car il desire main & maistre paisible. Il est bon à tout gibbier.



De l'Autour, de ses especes & generation, de sa bonne forme & condition, les signes d'audace & de force: & du bon petit Autour, de ses mauvaises formes & conditions, & de sa proye.

P iij

PREMIERE PARTIE

CHAP. VIII.



Ly a cinq especes d'Autour . La premiere & plus noble est l'Autour qui est femelle. La seconde, est nommée demy Autour, qui est meigre & peu prenant. La tierce, est le Tiercelet, qui est le mâle de l'Autour, & prend les Perdrix, & ne peut prendre les Grues . Il est nommé Tiercelet, car ils naissent trois en vne nyce, deux femelles & vn mâle. La quarte espece est l'Esperuier, qui prêt toute volatile que prêt l'Autour, excepté les grans oiseaux . La cinquiesme est nommée Sabeck, lequel les Égyptiens nomment Baidach, qui ressemble à l'Esperuier, & est moindre que luy, & a les yeux celestes comme bleuz. Autour de Armenie & de Perse est le meilleur, & apres, celui de Grece, & dernièrement celui d'Afrique. Celui d'Armenie a les yeux vers, & le meilleur d'iceux, est celui qui a les yeux & le dos noir. Celui de Perse est gros, bien emplumé, les yeux clairs, concaues, & enfoncez, sourcils pendans. Celui de Grece a grand teste, col gros, & beaucoup de plume. Celui d'Afrique a les yeux & le dos noir, quād il est ieune, & quād il muë, les yeux luy deuiennent rouges. Au temps que les oiseaux sont en amour, quand ils s'appartient pour faire generation, toutes especes d'oiseaux de proye s'assemblent avec l'Autour: cōme le Faucon, Sacre, & autres viuans de rapine: à ceste cause les cōditions des Autours sont diuerfes, en bonté, audace & force, selon leur diuerse generation. La meilleure forme d'Autour est telle: vn bon Autour doit estre pesant, comme ceux de la grande Armenie. En Syrie, on achapte les oiseaux de proie, & de Fauconnerie, au pois, & le plus pesant vaut mieux: de la couleur & condition d'iceux ne leur chaut. Blanc Autour est plus gros, beau, facile à enseigner & plus foible entre les autres, car il ne peut prendre la Grue. Et pource qu'il est nay en lieu haut, & qu'il endure mieux le froid, qui est en l'air haut, il est bon pour voler oiseaux de telle condition. Autour tendant à noir, & qui a plume superflue sur la teste, descendant sur le front, comme vne perruque, est bel, mais il n'est pas fort. La bonne forme d'Autour est, d'auoir teste petite, face longue & estroite, comme le Vautour, & qui ressemble à l'Aigle, le gosier large, par lequel passe le past, yeux grans, parsons, & en iceux petite rondeur noire, narilles, aureilles, croupe, & pieds larges & blancs, bec long & noir, le col long, la poitrine grosse, la chair dure, les cuisses longues, charnues & distantes: les os des iambes & des genouls doivent estre courts, les ongles gros & longs. La forme des le fondement

de l'Autour iusques à la poictrine, doit estre cōme en rondeur accroissant. Les plumes des cuisses vers la queuë doiuent estre larges, & celles de la queuë doiuent estre courtes, peu rouffes, & molles. La couleur qui est sous la queuë, est cōme celle qui est en la poictrine, & sur chacune plume, ou lignes noires, qui sont sur la queuë a aucune trancheure: la couleur de l'extremité des plumes qui sont en la queuë, doit estre noire en la partie des lignes. Des couleurs, la meilleure est roinge, & tendant à noir, ou à gris clair: Signe de bon Autour est, astuce de courage, desir & abondance de manger, bequer souuent son past, prinse soudaine de son past sur le poing, comme si on le iettoit, digestion longue, force d'assaillir: Le signe d'audace en l'autour est tel, lie-le en lieu clair, puis obscure la clarté, apres touche le soudainement, & s'il saut, & s'assure sur le poing, c'est signe d'audace. Le signe de force en l'autour est tel, lie les Autours en diuerses parties de la chambre, & celuy qui esmutira plus hault, est le plus fort. Le signe des bons petis Autours, est d'auoir les yeux clairs & larges, & le cercle des oreilles & du bec, teste petite, col long, doigts longs, plumes courtes & cachees, chair dure, pieds vers, ongles larges & descharnez, digestion legere, la vuydange de la digestion large, esmutir loing. Si au bout du bec, y a aucune noirté, c'est bon signe. La mauuaise forme d'Autour, tant en petits qu'en grands, est quand il a la teste grande, col court, les plumes du col meslees & inuolues, fort emplumé, charnu, & mol, cuisses courtes & gresles, iambes longues, doigts courts, couleur tannée, tendant à noir, & aspre sous les pieds. Autour qui en faillant de la maison, semble qu'il faille de la mue, & qui a plumes grosses, les yeux rouges cōme sang, qui sans repos se debat, & quand il est sur la perche, tache saillir au visage: son l'ameigrift, il ne le peut porter: son l'engraisse, il s'en fuit: pourtant tel Autour rien ne vaut. Paoureux Autour est difficile à enseigner: car la paour luy fait fuir le poing & le leurre, ou rappel. Autour qui a plumes pendans sur les yeux, & le blanc d'iceux fort blanc, couleur cōme rouge, ou tannée clair, a les signes de mauuaises conditions, & de non reuenir au rappel: si Autour de telle forme est trouué de bonne condition, il sera tres-bon. aucunes fois, mais peu souuent, est trouué Autour de mauuaise forme & condition: tout au contraire aux bons signes de Autour, qui sera leger, frais, peu souuent las, & qui prendra les grâds oiseaux. La proie de l'autour est, Faisand, Malard, Cane, Oye sauvage, Corneille, Connis, Lieures. Il fiert petit Cheureul, & l'empesche tant que les Chiens le prennent plus facilement.



De l'Esperuier, & de sa nature.

CHAP. IX.

IE m'amuseray vn peu à parler de l'Esperuier, pour autant qu'il est fort noble, & fort vñité en France: & aussi que qui sçaura bien voler, gouverner & affaier l'Esperuier, il sçaura aisement tout le traictemēt, & la volerie des autres: ioint qu'on sen peut ayder hyuer & esté, & avec grand plaisir, pour les beaux vols qu'il fait: car chacun a endroit soy de quoy voler: & aussi qu'on en peut voler à toutes manieres d'oiseaux, car il est commun à tout, plus que tous les autres Faucons & oiseaux. Car l'Esperuier d'hyuer, quand

quand il est bon, prend la Pie, le Iay, la Chouette, la Grefille, le Vanel, le Videcaille, le Merle, le Coullon, & beaucoup de sortes d'autres oiseaux.

De l'Esperuier, de sa bonne forme & bonté.

CHAP. X.

LES Esperuiers sont de plusieurs plumes. Les vns sont de menues plumes tousiours blâches : les autres sont de grosses plumes, que nous appellons mauuaises. Si vous dirons tant de leur façon, que de leurs plumes, lesquels sont les meilleurs. L'Esperuier qui est de bonne forme, est grand & court, & a la teste petite, espauls larges & grosses, iambes grosses, pieds estandus, pennes noires. Le niais est bon, & reuiet volontiers à son maistre. Le for est difficile à affaier, & sera bon fil ne fuit les gens : pource qu'il a accoustumé la proye, parquoy il est plus courageux. Le meilleur de tous les Esperuiers, est celuy qui a esté prins hors du nid, & a esté vn peu à soy, lequel nous appellons Branchier. Faut pour estre bon, qu'il ait la teste rōdette par dess^{us}, le bec assez gros, les yeux vn peu cauez, le cerne d'entour la prunelle de l'œil, de couleur entre vert & blanc, le col longuet & grosset, grosses espauls, & vn peu bossues, & ouuert vn peu endroit les reins, & affilé par deuers la queue, & que les ailes soient assises en allant au long du corps, si que le bout de ses ailes voise sous la queue, & que la queue ne soit trop longue, mais qu'elle soit de bonnes pennes larges, qui soient affilées comme le bout d'une espee : & qu'il ne soit trop haut assis, c'est à dire, qu'il n'ayt les iambes trop longues, mais soient plattes, & les pieds longs & deliez, & de couleur entre vert & blanc, & les ongles poignans, bien noirs & petits. Que ses plumes trauersaines soiēt grosses & bien coulourées de vermeil, & les menues ensuiuent les plumes de la poitrine, que les pennes soyent larges : & qu'il ait le bruel meslé de melles trauersaines, ainsi comme le corps, & que ses sourcils soient blancs, & vn peu couloure de vermeil, & qu'ils prennent le tout iusques derriere la teste. Aussi est fort bon l'Esperuier, quand il est familieux.

Comme il faut chiller l'Esperuier nouveau, & le mettre en ordonnance.

CHAP. XI.

Q

. P L E M I E R E P A R T I E

E Speruier de nouveau affaitement, doit estre chillé en ceste maniere. prenez vne aiguille enfilee de delié fil, qui ne soit retors: fais le tenir, & le prens par le bec, & luy boute l'aiguille parmy la paupiere de l'œil, nō pas droit à l'œil, mais plus pres du bec, afin qu'il voie derriere. En se donnant bien garde de prendre la toile, qui est dessonbs la paupiere. Puis mettre l'aiguille en l'autre paupiere, de l'autre part, & tirer les deux bouts du fil, & nouïer sur le bec, non au droit neu, mais couper le fil pres du neu, & le tord tellement, que les paupieres soient si hautes leuees, que l'Esperuier ne puisse rien veoir. Et quand le fil laschera, qu'il voie derriere, & parce est mis le fil pres du bec: car l'Esperuier doit veoir derriere, & le Fauçō deuant. **Qu** si l'Esperuier voyoit deuant, il plumeroit aual le poing, quād il battroit contremont, & prendroit bons esbats, & si verroit trop à plain les gēs, & lesbatroit trop souuent.

Pour bien mettre vostre Esperuier en arroy: vous luy debuez bailler gets de cuir, lesquels doiuent auoir les bouts vn peu renuersez, & mesmement decoupez, & si doiuent auoir demy pied de long, à pied main, entre la boîte du get, & le nouueau qui est au bout, à quoy on le tient. Il doit auoir deux bōnes sonnettes, à fin qu'il en soit mieux ouy, & aussi que l'Esperuier prenāt vn oiseau il se mettra en si espois buisson pour se paistre qu'il ne pourra estre veu ne ouy: & en le plumant, la plume souuēt luy couure vn œil, & pour l'oster il se gratte de l'vn des pieds & fait ouyr la sonnette: & si n'auoit qu'une sonnette, il se pourroit gratter du pied où elle ne seroit point, parquoy ne seroit pas ouy. L'Esperuier qui est affaité au chappron, & qui souffre qu'on luy mette, vaut mieux que celuy qui ne le veut endurer: car il s'en bat moins: il se porte mieux quand il est chappronné en temps de pluye & de vent, ou en mauuais tēps, car lors on le peut cacher sous le manteau: d'auantage, il en vole mieux, & plns roidement, car il est moins desbrié que celuy qui n'a point de chappron, lequel est las de se debatre: & si on luy garde mieux ses vols & son auantage, parce qu'il ne se debat pas iusques à ce qu'on veut qu'il vole, dont il a meilleur courage, & si on le porte par tout sans ce qu'il se debate ou bouge.

Comme on doit affaiter vn Esperuier, & comme il doit estre mis en arroy.

C H A P. X I I.

PArce que les Esperuiers sont de diuers plumages, & de diuerses tailles, aussi y ail diuerses manieres de les affaiter, & y a moins d'affaire aux vns qu'aux autres. Tant plus l'Esperuiet est familieux, & a bõne faim, pluſtoſt est affaité. Pour le faire manger, frottez luy les pieds de chair chaude, en pipant & touchant la chair au bec: & ſil ne veut mâger, frottez luy les pids d'un oiseau viſ, & l'oiseau criera: & ſi l'Esperuiet empreint le poing des pieds, c'est ſigne qu'il mangera: adonc deſcouure la poictrine de l'oiseau, & luy mets au bec, & il mordre en la chair, car vn oiseau qui mâge tâtoſt qu'il est prins, c'est ſigne qu'il est familieux & qu'il mangera bien: & luy en donne autant au veſpre, & aucunesfois ſur iour, mais qu'il n'ait rien en gorge. Et quand il ſera bien en chair, & il mordre quâd on pipera, ſi luy mets le chappron, qui ſoit aſſez parfond & large, qu'il ne luy ſerre endroit les yeux. Et quand il voudra endurer à mettre & oſter le chappron, ſans ſe debatre, & qu'il mangera chapproné, adõc luy faut diminuer ſa vie, en luy dõnant moins de chair à manger, & luy en dõne au matin: & quand il aura enduit (c'est qu'il ait mis à val ſa viâde, & qu'il n'ait rien en la foſſette de la gorge, le pourras abecher ſur iour, en luy oſtant & remettant le chappron pour luy faire mordre: car il eſt bon de luy dõner vne bequee ou deux de chair, toutes les fois que luy mettras le chappron en la teſte. Et quâd ce viendra au veſpre, tu le paſtras pour la nuit, & luy dõneras des ſourcils de poule, iuſques au lendemain. Puis quâd tu verras qu'il ſera cheu en bõne faim, ſi laſche le fil de quoy il eſt chillé, mais qu'il ſoit nuit quand tu le ſeras, & qu'il voye par le derriere, cõme dit eſt. Et ſil peut bien veoir les gens, ſi le veille toute la nuit qu'il ſera laſché, & qu'il ait le chappron hors la teſte, afin qu'il oye les gens, & qu'il les accouſtume. Et quand tu luy remettras le chappron, donne luy deux ou trois bechees de chair, & le lendemain au point du iour, mets luy vn oiſeler aux pieds: & ſil le prent aſprement, & qu'il morde en la chair ſi luy oſte le chappron en paix: que ſil ſe debatoit, remets luy, & le veille encores, tant qu'il ſoit mat. Que ſil mâge deuant les gés ſans le chappron, & eſt aſſeuré deuant eux, ne ſoit plus veillé, mais le faut tenir vne partie de la nuit entre les gés, en le faiſant plumer, & luy dõnant aucunesfois vne bequee ou deux de chair, en luy mettant & oſtant le chappron. Et quand tu t'en iras coucher, mets tõ oiseau pres de tõ cheuet, ſur vn treteau, afin que le puiſſes ſouuent reueiller la nuit. Puis te leue auant que il ſoit iour, & le mets ſur ton poing, & luy tiens le chappron hõts de la teſte, afin qu'il voie les gés autour de luy: & quand il les verra, mets luy au pied vn oiſelet tout viſ, comme dit eſt, & ainſi qu'il mangera,

mets luy le chappron, en luy donnant le demourant de ton oiseau, le
 chappron en la teste. Et sur le iour, regarderas s'il n'a rien engorgé, & si
 tu vois qu'il n'y ait rien, tu luy donneras vne bequee, petit & louuët, de-
 uant les gens, en luy ostant & remettant son chappron: mais sur le soir
 doit tousiours auoir le chappron hors de la teste, pour voir & accou-
 stumer les gens, en luy dōnant à manger d'une poulette. Et pour faire
 mieux sa chilleure, afin qu'il voye mieux quand tu le mettras coucher,
 si le tien en lieu obscur, & luy eclisse vn peu d'eau au visage, afin qu'il
 frotte ses yeux aux iōinctes de ses ailes: le lendemain, qu'il trouue le
 iour, & la chair chaude sur ton poing, & qu'il soit lasché, afin qu'il voie
 deuant & derriere, & fasse signe d'estre seur entre les gens, puis l'affaite
 comme dessus est dit. Et retien, que le iour que tu luy auras dōné chair
 lauee, ne luy donne point plume: & ne luy donne plume qu'il ne soit
 bien assure, car s'il n'estoit seur, il ne l'oseroit iecter. Donc si tu veux as-
 seurer ton Esperuier, & le tenir en bonne faim, mets le bien matin sur le
 poin, & va en lieu où ne suruienne personne, & abecque le d'un oiselet
 vif: puis le descharne, & le mets sur aucune chose, & luy tends le poing,
 en luy dōnant vne bequee: & s'il y vient volōtiers, si le relance au ves-
 pre, & au matin de plus loin, & deuant les gens, pour le mieux assurer,
 en luy attachant vne longue ligne au bout de sa longe, & s'il fait beau
 tēps, & q le Soleil raye, on luy doit offrir l'eau pour soy baigner pour-
 ueu qu'il soit sain, qu'il soit seur, qu'il ne soit trop meigre, & qu'il n'ait
 gorge, car c'est vne chose qui biē assure ton oiseau que le baing, & luy
 donne bon courage: mais que tousiours apres le bain, tu luy donnes à
 paistre bōs oiseaux vifs. Et toutes les fois que le paistras ou reclameras,
 tu dois piper & siffler, afin qu'il s'accoustume de venir à ton siffler. Il le
 faut paistre entre les Chiens & Cheuaux, afin qu'il s'accoustume avec
 eux. S'il a volé, & tu le vucilles mettre au Soleil, mets le à terre sur vn
 trōchet: & là l'asserra, & ne sera iamais qu'il n'ayme mieux se sooir à ter-
 re. Apres le bain, si tu treuve ton Esperuier en bon courage, tu le peux
 bien voler le lendemain au vespre: mais que par auāt tu l'aye réclamé à
 reuenir des arbres, & réclamé à cheual, ayāt fait prouision d'un pigeō,
 afin de le reprendre plus aisément: car il faut à vn Esperuier auāt qu'on
 en vole, qu'il soit biē assure par veiller, par porter, par faire tirer, & par
 plumer deuant les gens: qu'il ayme la main, le visage, les Cheuaux, & les
 Chiens: qu'il soit net dedans, tant par chair lauee, que par plumes: qu'il
 soit bien affamé, & bien réclamé de terre & d'arbres.

La maniere de faire voler son Esperuier nouveau.

CHAP. XIII.



Vient voler de son Esperuier nouveau affaité, qu'il en vole au vespre vn peu deuant Soleil couché, par ce que c'est l'heure qu'il a le plus grand faim. Secondement, la chaleur du soleil, si on voloit au matin, fait esmouuoir l'oiseau par la chaleur, & luy fait esleuer le cœur, & le rend gay, parquoy il perd sa faim, & ne luy en souuiert, & ne tache & pense qu'à se resoudre & iouer contremont, qui le feroit perdre. Qui plus est, il ne se peut tant esloigner de toy sur le vespre, s'il te fait ennuy, comme il feroit le iour contre la chaleur du Soleil, à cause de la nuit qui le contraindra de se percher. D'auantage, pour faire voler ton Esperuier nouveau, faut chercher large campagne, loin des arbres. Qu'il soit deschappronné quand les Espagneux querront: que si les Perdriaux saillent, & il sem-bar, laisse le aller s'il faut de pres: que s'il le prent, donne luy à manger contre terre de la poitrine d'un Perdriau, avec la ceruelle. Quand il aura mengé vn peu, oste luy, & le descharne, & monte sur ton cheual, loin de luy, puis siffle, & l'appelle, & s'il reuiet à toy, si le paiz. Sur tout il se faut bien donner garde, qu'il ne faille au premier vol à gros oiseaux, afin qu'il n'emporte & s'accoustume aux menus. Que s'il est bien apprins aux gros oiseaux, tu peux bien le faire voler aux Alouettes & petis oiseaux: & si tu voy qu'il y vole volontiers, si luy meine, & en soit repu, car c'est le plus beau vol & plus plaissant que la volerie de l'Esperuier aux Alouettes. Et par ce que la chair & le sang des Alouettes est chaud & ardent, il est bon, quand il y volera, de luy donner deux fois la semaine de chair lauee, & la plume bien souuant, mais ne luy donne la plume le iour qu'il aura mangé chair lauee, ny le iour qu'il se sera baigné. Quand on est en bonne compagnie, & chacun a son Esperuier, si on voit voler le sien avecques les autres, cela renforce bien le deduit, & si s'affeurent ensemble: & c'est le plaisir de prendre vne Alouette à l'escourse, & qu'un bon Esperuier a chassé vne Alouette bas, & si haut qu'on la peut regarder, & vn autre Esperuier la va requerre si roidement en volant contremont, qu'il est contraint de l'environner, ne la pouuant prendre: & lors l'Alouette plonge & vient

Q. iij

PREMIERE PARTIE

à terre, & l'Esperuier aussi, laquelle s'aime mieux mettre entre les iambes d'hommes & cheuaux, pensant se sauuer, que tomber entre les griffes de son ennemy naturel, toutesfois le plus souuent elle y est prinse. Qui veut faire apprendre à gouverner Faucons, faut bailler à affaiter Hobreaux ou Hobiers: si on veut qu'il sache gouverner Gerfaults, baillez luy Esmerillons. Qui sçait gouverner & affaiter Esperuiers, il sçait affaiter les Autours. Ainsi par les vns, on peut sçauoir les autres.

*Quand on doit prendre au nid, ou en l'aire l'Oiseau de Fauconnerie,
& comme on le doit lors traicter.*

CHAP. XIII.

E Aut que l'oiseau de Fauconnerie soit prins au nid ou en l'aire, quād il est fort pour se soustenir sur ses pieds. Mets le sur vn billot de bois, ou sur vne perche, afin qu'il puisse mieux demener son pennage, sans le gaster en terre. Mets souz luy vne herbe, qu'on nomme, hieble, laquelle, pource qu'elle est chaude, est bonne contre toute maladie de rains, & de goute, qui luy pourroit aduenir. Paiz-le de chair viue le plus souuent que pourras, car elle luy fera bon pennage. Si tu le prens petit, & le mets en lieu froit, il prendra mal aux rains, parquoy ne se pourra soustenir, & sera en danger de mort.

De ces mots niais, brancher, ramage, & sor.

CHAP. XV.

L'Oiseau niais, est celuy qui est prins au nid. Brancher, est celuy qui suit sa mere de branche en branche, qui est aussi nommé ramage. Sor est appellé (à sa couleur forette) celuy qui a volé, & prins deuant qu'il ait mué. Et pource qu'on prend souuent l'oiseau au glu, ou en le prenant on luy froisse ou rompt les penes: s'ensuyt la maniere de le desgluer, & de ses penes rabiller.

Pour desgluer oiseau.

CHAP. XVI.



Our desgluer oiseau, prens sablon menu & sec, & cendre nette, mets ensemble, & les mets sur les lieux où est le glu, & laisse ainsi l'oiseau vne nuit. Apres battras fort trois moyeux d'œufs, & avec vne penne en mettras sur lesdits lieux, & laisse ainsi l'oiseau deux nuits. Puis prens du gras de lart, aussi gros qu'une prune, & autant de beurre, tout fondu ensemble, dequoy oindras lesdits lieux, & laisse ainsi l'oiseau vne nuit. Le lendemain le laueras avec eau tiede, & nettoieras avec linge bien net, tant que rien n'y demeure.

Pour penne froissée redresser, ou rompue enter, ou desioincte reserrer, ou perdue renouveler.

CHAP. XVII.



I tu veux redresser vne penne froissée, trempe en eau chaude de le lieu qui est froissé: & quand elle sera amollie & tendre audict lieu froissé, redresse là hors de l'eau: apres prens vn gros tronc ou cotton de chou, & le chauffe fort sur la braise, puis le fend au long, & dedans celle fente mets le froissé de ladicte penne, & estrains d'un costé & d'autre le chou, iusques qu'il aura redressé ladite pene. Le tronc de l'herbe de Couleuvre, autrement nommee Tinthimale, a en ce l'effect du chou.

Pour penne rompue d'un costé, & qui tient de l'autre.

Prens vne aiguille languette, & la trempe en vinaigre, ou en eau salee, pour rouiller, afin qu'elle tienne mieux dedans la penne, puis l'enfile de fil delié, & la mets dedans les deux bouts de la froissure de la penne: apres la tire par le filet, iusques à ce qu'elle sera tant d'un costé que d'autre, & que la penne sera ioincte, & la garde de travail iusques à ce qu'elle soit ferme. Si elle est des deux costez rompue, coupe la, & près vne aiguille pointue par les deux bouts, trachâte come celle d'un pelletier, trempee come dit est, & fais come dessus. Pour pene froissée ou rompue au tuiau; prens vn tuiau plus menu, afin qu'il entre dedans le tuiau froissé ou rompu: puis coupe en ce lieu la penne, & l'ente du tuiau mis dedans les deux bouts de la penne couppee: apres, couds les deux parties avec le tuiau qui est mis dedans. et couure le lieu de la ioincture de la pene de cortó, ou de petites plumes avec colle: ou si ne veuz coudre ladite pene, colle la. Si la pene estoit perdue, mets y en vne pa-

reille en quantité & couleur. Pour plume desioin&te reserret, prins estoupes bien menu taillees, & meslees avec le rouge d'un œuf bien batu, mets les sur linge bien delié, duquel lieras dedans & dehors le lieu de la penne desioin&te: ou emplastre ledict lieu de myrrhe, & de sang de bœuf, meslez ensemble. Pour faire renouveler penne perdue par batterie, ou autrement, & principalement en la queue, prens huile de noix, & huile de laurier, autant d'une que d'autre, meslez ensemble, & les distilleras au lieu: duquel est saillie ladite penne, & cela fera renouveler ladite penne.

Du past & chair bonne & mauuaise pour paistre oiseau, du lautment de la chair, de la maniere de paistre l'oiseau, & de la nature des chairs qu'on donne aux oiseaux.

CHAP. XVIIIL

Past & chair bõne, outre l'ordinaire de l'oiseau, est luy dõner vn peu de la cuisse ou du col d'une poulle, car il engraisse l'oiseau. Les entrailles de poulle, avec les plumes, dilatent le boiau qui void la digestion de l'oiseau, & seche l'humiditè superflue, laquelle ne peut saillir par l'egestion & esmutissement de l'oiseau. Les chairs mauuaises pour paistre l'oiseau, sont, chair froide, & chair de bœuf, & autres de forte digestion, & singulierement de beste qui seroit en ruy, laquelle est pour faire mourir l'oiseau, sans sçauoir à quelle occasion. Chair de poulle est mauuaise pour l'oiseau, car pour ce qu'elle est froide, elle luy trouble le ventre: aussi pource qu'elle est douce & delectable, & qu'on trouue communément par tout poules, à ceste cause l'oiseau affriandé de telle chair de poulle, quand en volant en verroit, pourroit laisser sa proie, & voler vers la poulle. Si tu te doubts ou vois que l'oiseau soit pouillien, paists-le de petis oiseaux, de petis coulombs commençans à voler, ou de petites aironnelles. Chair de Coulon vieil, & chair de Pie, luy est amere & mauuaise. Chair de Vache loy est mauuaise, car elle est laxatiue, non pas par sa bonne nature, mais par sa ponderosité, par laquelle fait indigestion, & par ainsi est laxatiue. S'il est necessité de paistre l'oiseau de grosse chair, par faute de meilleure, soit trempée & lauée en eau tiède, & apres esprainte, sic'est en hyuer: & en froide, si c'est en esté, & que la chair

chair ne soit point trop esprainte, car la pesanteur de l'eau, qui est laxative, & luy fera plus tost passer & enduire sa gorge, & luy tiendra les boyaux larges, & l'espurgera mieux par dessous les grosses humeurs, qu'il pourroit avoir dedans le corps. Le lauement de chair, se doit entendre de grosse chair, & quand il est necessité d'en vser pour purger ou mettre bas l'oiseau, & non pas de chair de bonne digestion: car il faut entretenir l'oiseau de quelque bon past vif & chaut, autrement on le pourroit mettre trop au bas. La maniere de paistre l'oiseau est telle: au past & chair que doit manger l'oiseau, ne doit estre ne gresse, ne veine, ne nerfs: & en le paissant ne le laisse pas manger selon son desir, mais par poses, & le laisse reposer en mangeant, lors mangera suauement. Par fois luy musseras & cacheras la chair deuant qu'il soit saoul, & luy retarderas son manger, & fais qu'il ne voie la chair, afin qu'il ne se debate. Fais-le plumer petis oiseaux, comme il faisoit au bois. Les chairs dequoy on paist les oiseaux, sont de diuerses natures, car les vnes font les oiseaux gras, les autres les rendent orgueilleux, les autres les font attrempez. Le passereau, le Pinçon, la chair d'un Chat, les Sourits, & la gresse de Geline, la chair de Porc & de Bœuf, rendent les oiseaux gras. La chair de Poulllets, de Lieure, de Geline, de Vache, mouillée en l'eau, font les oiseaux meigres. La chair de Cheures & Cheureaux, les font orgueilleux. Mais si vous voulez que vostre oiseau soit bien attrempé, ne trop gras, ne trop meigre, ne trop orgueilleux, donne luy à manger vieille Geline. Et par ce, mue luy souuent sa chair, selon la commodité que tu verras.

*Le remede contre le mal qui auient à l'oiseau
par trop hastiement manger.*

CHAP. XIX.



Si l'oiseau mange par trop hastiement, quelque piécette & petit morceau de chair, & qu'elle soit tombée au lieu par lequel l'air va au poulmon, prens vn long canon de plume bien mol & doux à manier, ou vn pareil de metal, & le mets par ledict lieu, & succe par ledict tuiau en tirant bonne haleine, iusques à ce que ce qui est tombé audict lieu reuienne: car s'il y demeure, sera perilleux pour l'oiseau.

R

PREMIERE PARTIE

Pour renouuer le bec rompu, ou resserer le bec desioinct. CHAP. XX.

LE bec de l'oiseau se rompt, ou pource qu'il est mal gouuerné, car l'on n'affaite le bec ainsi qu'on doit, parquoy croist tant des deux costez, qu'il rompt: ou parce que quand l'oiseau paist, il demeure quelque chair sous la partie haute du bec, laquelle chair se pourrist, & seche tant le bec qu'il tombe par esclats: pourtant nettoie le bien, & le polis, en taillant ce qui est de tailler: puis oindras la couronne dudit bec, de sang de serpent, & de geline. & 15. ou 20. iours apres que le bec luy commencera à croistre, romps le bec dessus, afin que celuy de dessous puisse croistre à sa raison. Ce temps durant, son past soit couppé en petis morceaux, car autrement il ne se pourroit paistre. Ne cesse pourtant le faire voller. Pour bec desioinct reserrer, mets dessus la desioincture, de la paste fermentee, & de la poix-resine.

Quand l'oiseau a soif, la cause & le remede.

CHAP. XXI.

QVand l'oiseau a soif, c'est ou par aucune alteration: ou qu'il est trop gras, & à ceste cause a chaleur dedans le corps: ou c'est par indigestion. S'il a soif par alteration, donne luy eau en laquelle ait trempé sucre, safran, & spodium, ne luy en donnant que pour rafraischir la gorge. S'il a soif pour estre gras, & ainsi par chaleur qu'il a dedans le corps, mets avec les choses dessusdictes, terre seellee. S'il a soif par indigestion, cuits en eau, graine de cumin doux, & luy mets en la bouche, ou cuits zinzibre, ou grand polieu, en vin vieil, ou en eau de clou de girofle, & y trempe son past. S'il a tousiours soif, mets en son eau vne dragme de boli-armeni, & le poix de dix grains de canfre la luy baillant à boire.

Quand l'oiseau ne peut émutir, les signes, & le remede. CHAP. XXII.

QVand l'oiseau ne peut émutir, le signe est qu'il grate la queue & boit eau. Donne luy chair de porc chaude, avec vn peu d'aloës. Ou fais secher vers de terre sur tuille chaude, & en fais pouldre: & luy donne chair chaude, de legere digestion, pouldre de ladicte pouldre.

Pour entretenir l'oiseau en santé, & le preserver de maladie.

CHAP. XXIII.

Pour entretenir l'oiseau en santé, & le preserver de maladie, quatre choses son necessaires: c'est à sçauoir, le faire tirer, l'essuyer quand il est mouillé, le purger, & le baigner. Fais le tirer past nerveux au matin, & au soir, deuant qu'il mange, & quand le voudras faire voler. Le tirer en attendant le gibbier luy est bon. Si le tirouer est de plume, garde qu'il n'en aualle, afin qu'il ne mette rien en cure iusques au vespre, car au vespre il n'y a point de danger. Combien qu'il semble que le tirer luy foule les rains, toutesfois en tirant il s'exercite. Essuye l'oiseau quand il sera mouillé, ou au soleil, ou aupres du feu: car il se pourroit refroidir, morfondre, enrimer, & engendrer la maladie qu'on dit asme ou pantais. Quand il sera sec, metz le en lieu sec, & haut, & non moite & froir. Mets luy sous les pieds, au billot ou à la perche, quelque chose molle, comme drap, ou autre chose, pour luy soulager les pieds: car aucunesfois, & bien souvent, pour frapper au gibbier, pourroit auoir les pieds froissez, desrompus & eschauffez, parquoy par humeurs descendans en bas, se pourroient engendrer aux pieds dudit oiseau, cloux, galles, ou podagre, & aussi enflures aux iambes, lesquelles choses sont mauuaises, & fortes à guairir. Tu purgeras ton oiseau par cure, ou par medecine purgatiue, & le feras baigner: comme de chacun est cy apres en son chapitre escrit.

De la cure de l'oiseau, quelle elle doit estre, quand on luy doit donner, quelle est son effect, comme elle & l'esmont de l'oiseau monstrent la santé ou maladie d'iceluy, & pourquoy l'oiseau la garde trop, le signe & remede pour la luy faire rendre. CHAP. XXIIII.

Vne cure d'oiseau, doibt estre de plume, ou d'osselets d'oiseaux froissez, ou de Pic, de Connins, ou de Lieure rompu, les ongles & gros oz ostez. Cure de cotton n'est pas à bonne vser, car elle vse & ard le poumon, & faict mourir l'oiseau, & specialement quand ladicte cure de cotton est donnee audit oiseau, sans estre luee. & baignee. En necessité, & qu'on n'a point les cures dessusdictes,

R ij

PREMIERE PARTIE

on peut bien donner ladicte cure de cotton, baignee vn iour, & autre non, quand on faiet ou refaiet l'oiseau. Tous les iours au soir donne quelque cure audict oiseau, ou la dessusdicte de cotton, ou celle de plume, ou de chair luee, s'il n'y a cause au contraire. L'effect de ladicte cure est, que quand elle est trempee & baignee en eau, elle eslargist plus qu'autre chose le boiau de l'oiseau, & seche la superfluité & excessiue abondance des humeurs d'iceluy oiseau, lesquelles ne peuvent saillir avec l'esmont de l'oiseau. La cure ietee au matin par ledict oiseau, qui est nette, & non seche, & qui est sans mauuaise odeur, demonstre l'oiseau estre sain. L'esmont de l'oiseau doit estre blanc, clair, & le noir qui est parmy doit estre bien noir: quand ledict esmont en son blanc est glueux & tient au doigt quand on le touche, signifie bonne digestion, & santé en l'oiseau. La cure molle, pasteuse, & puante, denote flegme & indigestion en l'oiseau. L'oiseau garde trop sa cure, & ne la peut aisément ietter, quand il'a dedans le corps chair superflue, ou pustules, ou humeurs sur ladicte cure. Le signe que l'oiseau garde trop sa cure, & qu'il l'a encores, est quand il tremble sur le poing. Le remede pour la luy faire jeter & rendre est, ne le paistre point iusques à ce qu'il l'aura rendu: & si ce iour là il ne la iette, le lendemain fais la luy ietter & rendre, par la façon & maniere que ie te vois mettre & dire. Prends du gras de lart bien rafraischy en deux ou trois sortes d'eaux bien fraisches, & vn peu de sel menu, & de poudre de poiure, & en fais vne pillule, laquelle luy feras aualler, puis apres attens qu'il l'ait iectee: & s'il ne iecte ladicte cure, prens ce qu'il aura iecté, & le broie & mouille, & mets en vn drappeau, & le fais fleurir à l'oiseau, & lors il rendra ladicte cure. Ou autrement, donne luy le gros d'vne febue en deux ou trois tronçons de la racine de l'herbe appellee esclere, enuoloppee en bonne chair, pour celer l'amertume de ladicte racine, puis mets l'oiseau au soleil ou aupres du feu, & s'il ne rend ladite cure, paists-le au soir d'vne cuisse de geline, chaude & succree.

Pour purger l'oiseau en tout temps, & luy faire bon appetit, & bon ventre.

CHAP. XXV.

ET pour purger l'oiseau en tous temps, luy faire auoir bon appetit, & bon ventre, donne luy de huitaine en huitaine, ou de quinzaine en quinzaine vne pillule, de celles qu'on dit pillules communes : ou le gros d'une scbue d'aloës cicotrin, enucloppé en bonne chair, pour celer l'amertume dudit aloës. Puis l'enchappronne, & le mets en lieu chaut, comme au Soleil ou aupres du feu, & le laisse ainsi par l'espace de deux heures, dedans lequel temps il puisse vider ses flegmes. Et quand il aura iecté ledit aloës ou pillule (car il ne sera pas si tost fondu) reprens ledit aloës pour seruir vne autrefois : puis prens l'oiseau sur ton poing, & le paists de bon past & vif, car il aura adonc le corps destrempé. L'aloës ainsi donné, ou dedans la cure, & au soir, vaut beaucoup contre filandres & aiguilles. Lesdites pillules donnees à l'oiseau à l'entree du mois de Septembre, sont bonnes & profitables contre filandres & autres maladies estans dedans le corps. Ceste medecine toutesfois doit estre temperee & moderee selon la force & qualité des oiseaux : car si c'est pour Autour, la dite medecine doit estre moindre que pour vn autre, & par ainsi elle doit estre moindre pour l'Esperuier, qui est des autres le plus delicat. Autrement, prens du gras de lart de porc, trempé vn iour, & mué en eau fraische, sucre, safran en pouldre, aloës, moüelle de bœuf, autant de l'un que de l'autre, & en si grande quantité & largesse que tu en puisses faire trois ou quatre pillules, ou plus largement, à ta discretion, puis au plus matin donne en vne à l'oiseau, apres mets le au Soleil, ou aupres du feu. Tu ne le paistras iusques à deux heures apres, lors tu luy donneras ou geline, ou petits oiseaux, ou souris, ou rats, & petite gorge. Au soir quand il aura enduit sa gorge, donne luy quatre ou cinq cloux de girofle, froissez & enucloppez en vn peu de bonne chair : & quand il aura vsé lesdites pillules, & que ses humeurs seront par icelles esmeuës, donne luy vne fois au palais du bec, & aux narilles du vinaigre, avec vn peu de pouldre de poiure, puis s'il est de necessité, soit l'oiseau refroidy d'eau soufflee en ses narilles, & le mets au Soleil ou aupres du feu, & il mettra hors les humeurs de la teste.

Pour eslargir le ventre & boyau de l'oiseau.

CHAP. XXVI.

R iii

PREMIERE - PARTIE

SI tu veux faire eslargir le ventre & boyau de l'oiseau, donne luy leger past, trempé vne nuit en vinaigre : & sur iceluy past mets succe ou miel escumé, ou luy donne eau succee.

Pourquoy, quand, & comme on doit baigner l'oiseau, & comme apres on le doit traicter.

CHAP. XXVII.

AVcunesfois baigner l'oiseau de proye luy est sain, & le fait bien voller: car souuent a desir de boire, ou de prédre l'eau pour quelque eschauffement de corps ou de foye, & l'eau le rafraischist. Le bain fait à l'oiseau auoir faim, bon courage, & l'assure, & par la contenance de l'oiseau congnoistras combien luy profitera le baigner. Baigne-le de quatre en quatre iours, car le baigner plus souuent le fait orgueilleux & fugitif. Et quand le feras baigner, mets le sur bois sec, & l'eau soit bien nette, qu'il n'y ait quelque venin: de laquelle maladie la medecine est icy apres escrite. Apres le baing donne luy past vis, comme petits oiselets, & mets sur son past vn peu de succe ou de thiriacle, & aux narilles de l'oiseau. Quand le Faucon apres son baing se frotte & s'oingt, est dangereux le toucher, car il a l'halcine veneneuse, & les pieds: pourtât si tu le veux lors porter, garde avec fort gand qu'il ne blesse ta main. Quand l'oiseau sera baigné, ne luy dōne chair trépec: & si tu le veux faire voller tost apres le baing, arrouse le vn peu d'eau bien nette.

Quand l'oiseau est enuenimé par se baigner en eau enuenimee par Serpent ou autrement.

CHAP. XXVIII.

QUAND l'oiseau est enuenimé pour se baigner en eau enuenimee, par Serpent ou autrement, broye trois grains de geneure, & mesle avec thiriacle, & le fais aualler à l'oiseau, & le garde d'eau huit iours, & mets de la poul-dre d'aloës sur de la chair de chat, de laquelle paistras l'oiseau.

CHAP. XXIX.

LES signes cōmuns de santé en l'oiseau de proie sont, quād son esmont est digeré, continué, & non entrerompū à terre, delié & non espois, quand sa cure est telle comme est escrit au chapitre de la cure: quand il se tient paisiblement sur la perche, quand il demeine la queuē & la ventile, quand il esplume & nettoye du bec ses ailes, commençant dès la croupe iusques au haut, quand il prend quelque petite gresse sur la croupe, de laquelle soingt, quand l'oiseau ressemble gras, clair, & en couleur, comme fil avoit les plumes oingtes, quand il tient ses cuisses esgallement, quand les deux veines qui sont aux racines des ailes ont leurs poulx & mouvement moyen entre continuation & discontinuation de poulx.

Quand l'oiseau digere mal, les signes, la cause, & le remede.

CHAP. XXX.

LES signes quand l'oiseau digere mal sont, quand souvent il bee & respire en plumant son past, & ne le mange point, mais le laisse, ou vomit. Quand son esmont est alkeré de gros, noir & iaune. Quand il ne rend sa cure en temps deu. Quand en ouurāt à deux mains fermemēt son bec, & en luy secouāt la teste, sentiras puantir sa gorge. Il digere mal, par-ce qu'il est pu trop matin, devant qu'il ait fait sa digestion, ou trop tard, ou à trop grosse gorge. Le remede est, ne le paists iusques à ce que il aura bien fait sa digestion, & qu'il aura bon appetit. Puis prens du noir, qui est engendré de fumee, & de feu, au cul du pot, & le mets trespier en eau l'espace d'vne heure: apres coule l'eau, & la fais tiede, & en icelle trempe la chair du past de l'oiseau, couppée en morceaux, & la luy donne. Et ne le paists plus iusques au soir, que luy donneras trois morceaux de chair succree: ou luy donne sur son past de la semence qu'on treuve aux cloux de girofle puluerisez.

PREMIERE PARTIE

*Quand l'oiseau n'enduit bien sa gorge, la cause, & le remede pour
la luy faire enduire ou rendre.*

CHAP. XXXI.

LT quād l'oiseau n'enduit pas bien sa gorge, pource qu'on luy donne si grosse gorge qu'il ne la peut enduire ne rendre, ou pource qu'il s'engorge trop fort de sa proye, ou pource qu'il est refroidy : lors donne luy petit past, ou demy past à la fois, & de chair legere, trempee en vin blanc tiede : ou luy donne past vif, baigné en son sang, lequel le remettra sus. Au soir donne luy quatre ou cinq clouds de girofle, froïsez, & mis en cottō trempé en vin vieil, car ils luy eschaufferont la digestion & la teste. Pour luy faire redre sa gorge quand il ne peut enduire: prens vn peu de pouldre de poiure, & que elle soit trempee en bon & fort vin-aigre, & luy laisse reposer longuement, & d'iceluy vin-aigre repose, laue luy le palais de la bouche, & luy en mets trois ou quatre gouttes dedans les narilles: puis fil iette sa gorge, arrouse d'vn peu de vin lefdites parties eschauffees par le vin-aigre. Le vin-aigre ne soit point donné à oiseau trop maigre, car il ne le pourroit supporter, puis le mets au Soleil ou au feu, & il iectera sa gorge.

*Quand l'oiseau enduit sa gorge, mais apres il la rend, la cause,
& le remede.* CHAP. XXXII.

VOs devez entendre que si l'oiseau enduit sa gorge, & apres il la rend, c'est ou par quelque accident qui luy est suruenue, ou par corruption d'estomach. Si c'est par accident qui luy soit suruenue, l'haleine de l'oiseau, & ce qu'il aura ietté ne puyra point. Lors luy donneras vn peu d'aloes cicotrin, & ne le paistras de six heures apres, & luy donneras bon past, & peu. S'il iecte sa gorge par corruption d'estomach, l'haleine de l'oiseau & ce qu'il aura ietté puyront, & c'est pource qu'il est pu de chair grosse, ou mal nette, ou puante: pourtant soit sa chair nette, & taillee de cousteau net, & nettement: & puis le mettas au Soleil, & l'eau deuant luy, pour boire sil veut, & ne le paistras iusques au soir, & à petite gorge, & de past vif, & arroulé de vin, ou puluerisé de limaille d'acier, ou de pouldre d'iuoire, lesquelles font retenir le past à l'oiseau: & sil ne le retient, donne luy

luy petits oiseaux, ou souris, ou rats, iusques à ce qu'il sera guarý, ou destrempe en eau tiede pouldre de coriandre, & en icelle eau coullée laue quatre ou cinq iours le past de l'oiseau, ou fais bouillir en vin fucilles de laurier, tant que le vin reuienne à moitié, puis laisse le refroidir avec les fueilles : de ce vin, fais boire à vn coulomb tant qu'il en meure, de la chair duquel donneras vne cuisse à l'oiseau.

Quand l'oiseau n'a appetit de manger, la cause, & le remede.

CHAP. XXXIII.



Vand l'oiseau n'a appetit de manger, c'est pource qu'on luy a doné au soir grosse gorge, auquel past l'oiseau fest trop saoulé, ou qu'il est ord dedás le corps. Baille luy vn coulomb, & luy laisse tuer à son plaisir, & boire le sang, apres ne luy en donne qu'une cuisse, ou autant qu'elle monte : & si l'oiseau ne vouloit tirer ladite chair, donne luy taillee en petis morceaux succree, ou arrousee d'huile d'oliue, ou d'amandes, & ce peu à peu luy continue iusques à ce qu'il soit guarý. Ou luy donne vn passerat, trempé en vin, ou arroulé de miel, ou pouldroyé de pouldre de mattic, ou luy donne deuers le matin vne pillule de celles qu'on nomme pillules communes, & le tiens enchappronné au Soleil, ou aupres du feu, & le laisse vomir tant qu'il voudra. Quand il aura vsté trois ou quatre iours desdites pillules, & qu'il aura appetit, donne luy trois ou quatre iours limeure de fer sur la chair de son past.

Pour oiseau maigre mettre sus, & le signe de meigreur, ou de maladie.

CHAP. XXXIIII.



L'oiseau on congnoist la meigreur, ou la maladie, quand son esmont n'est ne blanc ne noir, mais est messé comme gris. Pour le mettre sus, done luy chair de mouton, souris, & rats, à petites gorges, ou fais bouillir en pot neuf vne pinte d'eau, vne cuilleree de miel, & trois de beurre frais, & en paists ton oiseau à petite gorgee deux fois le iour. Ou prens cinq ou six limaçons qu'on treuve aux vignes, ou aux herbes, ou au fenail, trempe les en lait, vne nuit, en vn pot couuert, qu'ils ne s'en faillent : le

S

PREMIERE PARTIE

lendemain au matin romps les coquilles, & laue les limaçons de lait frais, & apres les effuye, & les donne à l'oiseau, puis mets l'oiseau au Soleil, ou aupres du feu, iusques à ce qu'il ait esmeuti quatre ou cinq fois, & s'il endure bien la chaleur, elle luy est bonne. Apres midy soit pu de bon past, & à petite gorge, & le mets en lieu chaut & sec. Au soir quand aura passé sa gorge, donne luy cloux de girofle, comme il est escrit au chapitre xxvii. quand l'oiseau n'enduit bien sa gorge, pour la luy faire enduire ou rendre. Aucuns luy donnent à manger petits oiseaux de bray, hachez & mouillez en lait de Chieure, en le paissant trois ou quatre fois le iour, & ne luy en baillent à la fois qu'un peu. Ou prenez limaçons rouges, qui soient bruslez, & en faites pouldre, qui soit mise en petite quantité sur la chair.

De porter & contregarder l'oiseau, & luy accoustumer les Chiens.

CHAP. XXXV.



LE porter d'oiseau sur le poing dextre, est meilleur & plus seur pour l'oiseau, que sur le senestre, pource qu'il est plus agilement iecté pour voler partant de la main dextre, & en est plus leger & soudain, & en montant & descendant du cheual, l'oiseau est plus seurement sur la dextre que sur la senestre, & le mue souuent en diuerſes mains, afin qu'il fasseure. Quand il se debattra & volatillera sur le poing, remets le agilement & paisiblement, afin qu'il accoustume de te congnoistre & aimer. Quand tu luy osteras son chappron, ne regarde point sa face, qu'il n'en prenne mauuaise accoustumance. Contregarde l'oiseau quand passeras les portes, & approcheras des murs, afin que s'il se debatoit, qu'il ne segataſt, ou ses pennes, & le garde de fumee & de pouldre. Accoustume-le à ne fuir les Chiens, mais à les suiure, & qu'il les ait deuant & autour de luy quand il paistra, & l'accoustume à ouyr & veoir tout ce qui est de chasse.

Quand l'oiseau ne soustient bien ses ailes, la cause, & le remede.

CHAP. XXXVI.

NOte, que quād l'oiseau ne soustient bien ses ailes, c'est pour ce que quand il est nouvellement mis sur le poing, ou sur la perche, il n'est gardé de se debatre, & de s'eschauffer: parquoy se refroidist, & ne peut bōnement soustenir ses ailes. Lors lie l'oiseau sur de l'eau, & qu'il soit contraint d'entrer en ladite eau, afin que par se debatre sur ladite eau, il retire & redresse ses ailes. Apres mets-le au Soleil, ou aupres du feu, & le tiens chaudement, qu'il ne se refroidisse: ou pisse trois iours sur les ailes de l'oiseau, & il les soustendra bien.

Pour bien faire l'oiseau au leurre, & pour le bien faire voller au gibbier.

CHAP. XXXVII.

NOte, que pour bien faire l'oiseau au leurre, il ne le faut point deffler iusques à ce qu'il reuiendra bien sur le poing, & qu'il y mange bien, lors deslie-le sur le soir, afin qu'il ne s'en fuye, & luy soufflé vn peu de vin aux yeux. Et quand tu r'iras coucher, mets le pres de toy, sur vn treteau, ou autrement, seurement, avec chandelle allumee assez pres de luy, puis deuant iour soit enchapponné, & mis sur le poing. Et le traictes ainsi iusques à ce qu'il soit bien leurré, & asseuré des gens. Apprens le à descendre à terre sur la proye, & à oster paisiblement ses ongles de sa proye, afin qu'il ne les rompe: de laquelle rompure d'ongle, est cy apres escrit en son chapitre. Garde qu'il n'accoustume en reuenant, cheoir à terre, mais l'accoustume à reuenir sur le poing. En le leurrant, quand il sera remonté, iette le leurre sous les gens, afin qu'en poursuiuant le leurre, il s'accoustume de suiuer, & non pas de fuir les gens, & quand il sera descendu, referre le bien, & luy fais aimer le leurre: car s'il ne reuiet bien au leurre, combien que autrement il soit bon, si ne sera il rien prisé. Iecter l'oiseau pour voller pres des riuieres, ou pres des lieux ausquels on ne le peut suiure, fait perdre souuent l'oiseau. La premiere proye que luy feras voller, soit Caille, Perdrix: puis Lieure, apres grans oiseaux. Soule-le de manger de ce qu'il aura prins, & principalement de sa grand proye. Pour bien faire voller l'oiseau au gibbier, trois choses sont necessaires, bon maistre, bonne compaignie d'oiseaux bien volans, & bon pays de gibbier.

S ij

PREMIERE PARTIE

Pour ongle rompu renouveler.

CHAP. XXXVIII.



E Aut si l'ongle de l'oiseau est rompu en partie, qu'il soit oingt de gresse de Serpēt, & il croistra en maniere qu'il s'en pourra ayder comme des autres. Si l'ongle est tout rompu, & qu'il n'y demeure que le tādron, fais vn doigtier de cuir, & l'employ de gresse de geline, & mers le doigt de l'ongle rompu dedans, & attache seurement du mesme cuir le doigtier à la iambe de l'oiseau, en remuant & refraichissant le doigtier de deux iours en deux iours, & ainsi le gouuerne iusques à ce que ledit tandon soit endurcy. Si par violence de la rompure de l'ongle la chair du doigt saigne, mets dessus pouldre de sang de dragon, & estanchera le sang. Si le doigt est enflé, soit engraisié de gresse de geline iusques à ce qu'il soit guery: Si le pied ou la iambe luy enfle, fais oignemēt de gresse de geline, d'huile rosat, d'huile violat, de therebentine, de pouldre d'encens, & de mastic, duquel oingdras l'enflure iusques à ce qu'il soit guery. De reparer l'ongle descharné, ou qui vient droit & non crochu, est escript en la seconde partie de ce liure, au tiltre du pied.

Pour faire bien reuenir l'oiseau quand il a vollé, & le cause pourquoy ne reuient.

CHAP. XXXIX.



A V T entendre que si l'oiseau ne veut ou oublie à reuenir, qu'il luy faut ietter vn oiseau: & celuy qui luy est le plus agreable, est le Coulomb blanc. A ceste cause, doibs auoir en ta gibbeciere vn Coulomb, ou autre oiseau blanc, pour rappeler ton oiseau quand ne voudra reuenir. La chair de poulle, cōme est dit au chapitre du past de l'oiseau, ne luy est pas assez bonne. La cause pourquoy l'oiseau ne reuient est, qu'il est peu souuent tenu & porté, parquoy n'est accoustumé: ou pource qu'il hait son maistre, quād il le traite rudemēt: ou pour aucune douleur qui luy est suruenue. Le niais n'est pas si fugitif que le mué, car il n'est pas si astut & cault. Si l'oiseau ne veut reuenir, prés le gros d'vne petite febue de gresse du nōbril de cheual, de nuit en oingts le bec de l'oiseau, & il aimera son maistre & reuié-

dra à luy facilement : ou trempe en eau toute vne nuit, poudre de regalice, & en icelle eau coullee, fais tréper chair de Vache couppee en laischés, de laquelle paistras l'oiseau. La chair de Vache, comme est dict au chapitre du past de l'oiseau, n'est pas bonne pour past, mais est pour ceste medecine: ou prens herbe nommée cost, ou selon aucuns baume, seche la, & puluerise, & d'icelle pouldre, mettras sur la chair que mangera l'oiseau. Si par orgueil ton oiseau ne veut reuenir, prens du sel rouge, la quantité d'un bien gros pois, & le mets sur son past, lequel luy fera ietter toute sa superfluité, & son orgueil corriger.

Pour faire auoir faim à l'oiseau qui est trop pu, quand on le veut faire voller.

CHAP. XL.



Pour faire auoir faim à l'oiseau qui est trop pu, quand on le veut faire voller, donne luy au soir en sa cure vne pillule d'aloes, avecius de choux rouges : ou luy donne trois morceaux de chair, où il y ait dedans chacun morceau, aussi gros de sucre qu'un pois, & bien tost apres esmutira deux ou trois fois, & aura faim.

Pour desaccoustumer l'oiseau de soy percher en arbre.

CHAP. XLII.



Si tu veux desaccoustumer l'oiseau de soy percher en arbre, laisse le percher en arbre trois ou quatre fois, quand le temps sera nubileux, pluuiieux, & quand il fera rouscé, & par tel ennuy craindra de se percher.

Quand l'oiseau n'a volonté de voller, le remede pour le faire voller.

CHAP. XLIII.



Vand l'oiseau n'a volonté de voller, baille luy l'eau pour soy baigner, & luy laue son past en eau tiede, ou luy donne vne pillule de gresse de lart.

S iij

PREMIERE PARTIE

Quand l'oiseau est esgaré, ou on ne peut ouyr ses sonnettes, ce qu'il est de faire.

CHAP. XLIII.



Vand l'oiseau est esgaré, ou on ne peut ouyr ses sonnettes, c'est pour ce que les oiseaux de proye, par leur astuce, portent souuent leur proie és cauernes, ou pres des eaux, parquoy on ne peut ouyr les sonnettes: lors regarde où verras les oiseaux voller, & crier, car là doit estre le tien, qui est cause du cry des autres. Ou si tu ne le vois, ou ne le peus ouir, monte en lieu haut, & mets ton oreille contre terre, & clos l'autre dessus, & oyras lesdits oiseaux. Si c'est en lieu plein & descouuert, mets ton fronc contre terre, en clouant vne oreille, & apres l'autre, & de quelque costé entendras où doibt estre ton oiseau.

*Pour faire l'oiseau hardy à sa proye, & voller grans oiseaux,
& comme lors doibt estre porte.*

CHAP. XLIIII.



Pour faire l'oiseau hardy à sa proye, & voller grans oiseaux, trempe en vin pur son past, duquel luy donneras quand seras au gibbier. Si c'est pour Autour, fais le tremper en vinaigre, & luy en donne le gros d'une amende: & quand tu le voudras faire voller, donne luy trois morceaux de chair trempee en vin: ou prens vn petit coulomb, & luy ouure le bec, remplissant ledict coulomb de vinaigre, puis fais voller ledict coulomb iusques à ce que le vinaigre entre dedans la chair, de laquelle donneras à ton oiseau quand tu seras au gibbier. Quand il est hardy ne le porte point sur le poing qu'en lieu solitaire.

Pour faire Lanier gruier.

CHAP. XLV.



Faire vn Lanier gruier, fais vne cauerne & chambrette obscure sous terre, & y mets le Lanier, qu'il ne voie point de lumiere, sinon quand le paistras, & ne le tiens point sur le poing que de nuit. Quand voudras qu'il volle, fais feu en sadite cauerne, & quand elle sera chaude oste le feu, & baigne l'oiseau en vin pur, & le mets en icelle cauerne, puis le paists de cerueau de geli-

ne: & le meine voller deuant iour, & quand le iour apparoiſtra, ieſte le de loin aux Grues, lequel iour il ne prendra rien ſi n'eſt d'auenture, mais les autres iours enſuiuans, il ſera bon, & principalement depuis la my-Iuillet, iuſques à la my - Octobre, & ſi ſera meilleur apres la mue, que par-auant. En temps froit, comme en hyuer, ne vaut rien.

Quand l'oifeau volle autre proye qu'il ne doit, pour la luy faire hayr.

CHAP. XLVI.

Mais ſi l'oifeau volle autre proye qu'il ne doit, comme Coulomb, Corneille, & autre, pour la luy faire hair: porte en ta gibbeciere ſiel de geline, duquel oingdras la poiſtrine de l'oifeau qu'il aura prins, de laquelle luy laifferas vn peu manger, car par celle amertume, il haira les oifeaux de telle ſorte.

Pour muer l'oifeau de proye, en quel temps il mue, & pour le muer, ou ſur le poing ſans chair, ou en mue avec chair: & comme il doit eſtre purgé.

& diſpoſé quand on l'y met du bon paſt pour luy en la mue, & pour le faire toſt & bien muer, & le le remede quand il mue mal.

CHAP. XLVII.

N dit que l'Eſperuier mue en Mars ou en Aueil, & a mué en Aouſt. Le Faucon mue à la my-Feurier. Pour muer l'oifeau ſur le poing, qu'il ſoit mieux aſſeuré, & ne craigne les gens, païſts-le ſur le poing, & luy mue ſouuét ſon paſt, & luy donne de celui qu'il mangera plus volontiers: porte le matin & ſoir: en temps chault mets-le en chambre fraiſche, où il y ait vne perche ſur laquelle il puiſſe voller quand il voudra: ſ'il ſe deſbat là, ſi l'enchappronne, ou le porte en lieu frais enchappronné: ſ'il ſe deſbat ſur le poing, ſouffle luy au bec, ſoubs les ailes, & par le corps, il ne ſe debattra ſinon tant qu'il commencera à ietter. Quand il iettera bien ſes plumes, mets le en ladiſte chambre, & deſſoubs luy vne mote d'herbe verte, & ſablon, & luy offriras l'eau chacune ſemaine: & ainſi muera bien, & ſera bon. Pour muer l'oifeau ſans chair, fais bouillir vn moieu d'œuf, qu'il ſoit durt, & le refroidiras en eau froide, puis l'eſſuyeras: quand premierement le donneras à l'oifeau, pour l'accouſtumer, tu mixtionneras lediſt moyeu avec ſang de geline, ou d'autre oyſeau, & le donneras à l'oifeau. Pour le faire

bien tost muer, mets vn Lisart vert en vn pot sans eau, & en fais poudre, que mettras sur la chair. La mue de l'oiseau doit estre vne maisonnette en lieu solitaire, sans poudre, & fumee, & ou les poulles ne puissent venir, afin que les pouls ne tombent dedans la mue, qui gasteroient l'oiseau. La mue soit close deuers Midy, pour le vent chaut & pluuieux. Mets dedans la mue sablon, & de trois iours en trois iours herbe fraische, fucilles & branches : & deuant l'oiseau vne rinette pleine d'eau pour boire & se baigner. Quand on veut mettre l'oiseau en mue, il le faut premierement purger des pouls, & quand on le met hors, soit purgé comme est escrit au chapitre, pour purger l'oiseau en tout temps. Aguisse luy le bec, & luy oings, plume le sous le col, & sous la queue, paist le sept iours en la mue de petits coulombs, avec leur sang, puis trois iours de chair trempee en vrine. Il aduient souvent qu'un oiseau ne prent pas mue en temps deu, & se mue si tard que la saison de voller aux oiseaux de riuere se passe, auant qu'il soit prest de voler, parquoy est bon de le haster, qui veut charner en voler la saison d'hyuer. Que si ton Faucon ne iette nulle de ses plumes, au mois de Iuillet, tu en peux voler tout le mois d'Aoust aux Pies, & aux Perdrix: le mois d'Aoust passé, mets le en chambre assez chaulde, sus vne cloue, ou sus vn plot, à quoy il sera attaché, qui soit si obscure qu'on n'y voye goutte, & le garde ainsi, en luy baillant oiseaux vifs à manger, iusques à ce qu'il soit gras & en bon point, principalement petis oiseaux de riuere, qui ont longue queue, qu'on appelle Bergeronnettes, pour le moins deux fois la sepmaine, puis baille iour à ton Faucon de peu à peu. Pour le faire tost & bié muer, paist le de chair de Herisô sans graisse, ou prens des glandes qui sont au col de Mouton dessous l'aureille, & les mache menu, & luy donne avec son past, & trouue facon qu'il les aualle, s'il ne les vouloit manger. S'il se met à ietter plumes, ne luy en donne plus, car il pourroit aussi bien ietter les neufues que les vieilles: ou luy donne par trois iours, au lieu desdictes glandes, chair de rats, ou de tauupes, oingte de beurre. Apres donne luy vne piece de chair de Serpent, avec la peau, entre la teste & la queue, & trois petites grenoilles. Pour faire bien muer toute espee d'oiseau, paists le de chair de petits chiens de lait, trempee au lait de la mulette du chien, apres donne luy la mulette coupee en morceaux, car ce past luy est naturel. Quand les plumes dudit oiseau commenceront à faillir, oings la chair de son past d'huile nommee Sisaminum, car elle luy fera les plumes grossettes & molles: & si elles faillioient seches, se romproient

romproient ou dedans ou dehors la chair de l'oiseau. Ne le mets hors de la mue iusques à ce qu'il aura bien mué toutes les plumes. Quand les plumes saillent meigres, seches, courtes, ou vieilles, c'est pour ce qu'elles saillent trop tost, & l'oiseau n'a pas gresse suffisante pour les nourrir, lors le nourriras de chair de petits coulombs, & d'autres chairs chaudes. S'il y a aucune penne ou penne mauuaise, qui ne cheent point, ou qui saillent mauuaiselement, oings les d'huy-le de laurier, car elle les fera cheoir, & naistre bonnes. Si lesion aucune suruient à l'oiseau estant en la mue, le meilleur est differer toute medecine iusques à ce qu'il sera hors de maladie, car les medecines ordonnees pour la mue, sont contraires à sa nature.

Quand l'oiseau engendre œufs dedans le ventre, en la mue ou ailleurs, les signes & le remede pour l'en preseruer, ou les luy faire fondre,

CHAP. XLVIII.

SI l'oiseau engendre œufs dedans son ventre, en la mue ou ailleurs, il est malade & en peril de mourir. Les signes quād il engendre œufs sont que le fondement luy enfle, & deuient roux, les narilles & les yeux luy enflent. Pour l'en preseruer, donne luy depuis le mois de Mars dedans son past de l'orpigment, aussi gros qu'un pois, lequel luy refroidira ce desir. Et la chair que luy donneras huit ou dix iours, soit lauee d'eau de vigne, laquelle degoutte quand elle est nouvellement taillee,

Pour oiseau saillant de la mue, gras & orgueilleux, rendre familier, qu'il ne s'en fuye.

CHAP. XLIX.

Mais quand l'oiseau partant de la mue est gras, & il sent l'air & le vent chault, adonc il se desbat & s'eschauffe, parquoy est en danger de se refroidir, & de mourir, pourtant porte le paisiblement enchapponné, & hors du chault. Et pour ce qu'il est gras & orgueilleux, & qu'il s'en pourroit fuir, purge le par pillule de gras de lart, ordonnee cy dessus, au chapitre 21. Pour purger l'oiseau en tous temps, paists-le de chair de poulmon de Mouton, taillee en loppins, & lauee, tant qu'elle perde tout le sang, & la plus-part de sa substance, car elle ameigrira l'oiseau. Mets & lie sur la perche de l'oiseau boue grasse, ou engraisse la perche, & de nuit lie dessus l'oi-

T

PREMIERE PARTIE

seau: car pource qu'il glissera, il trauuillera, & ne pourra dormir, parquoy il s'ameigrira, & se rendra plus familier. Leurre-le bien, qu'il ne s'enfuye: car fil est trop gras, & n'est bien purgé il s'en fuyra. }

*Quand l'oiseau perd le manger apres la mue, le remede pour luy donner
appetit de manger.* CHAP. L.



T si l'oiseau perd le manger apres la mue, le remede pour luy donner appetit de manger est, prendre aloes cicotrin en poudre, & ius de choux rouges, tout melle & mis en boyaux de geline, liez au bout, & luy faire aualler: puis le tien sur le poing iusques à ce qu'il soit purgé, & ne le laisse iusques, apres midy: lors donne luy past vis & bon, & le lendemain de geline: apres baille luy l'eau pour se baigner. Ceste medecine est bonne contre les aiguilles & filandres.

Pour muer le pennage de l'oiseau en blanc.

CHAP. LI.



Ous pouuez muer le pennage de vostre oiseau en blanc, en mouillant premierement sa chair en sang de Mille, les autres disent Millet, par cinq fois. Et quand viendra au tiers iour, muez sa chair en sang de Mille ou Millet, & en donnez à manger à vostre oiseau.

Quand l'oiseau se bat trop à la perche.

CHAP. LII.



E peur que l'oiseau ne se debate par trop à la perche, mais se repose, cuisez Myrrhe en eau, & puis luy en lauez tout le corps. Et mouillez aussi sa chair en celle mesme eau, iusques à neuf fois, & luy donnez quand il voudra enduire.

Fin de la premiere partie de Fauconnerie.

La seconde partie de Fauconnerie,
PAR GVILLAVME TARDIF,
DV PVY EN VELLAY.

*Contenant les maladies des oyseaux, &
les medocines d'icelles.*



T. j.

SECONDE PARTIE

*En donnant les medecines aux oiseaux on doit considerer la disposition d'eux,
& la qualite du temps pour les bailler. Les signes communs de la
maladie en oiseau de proye.*

CHAP. I.



Signes de chaleur exterieure en l'oiseau sont, quand il tient sa bouche ouverte, la langue tremblant, respire soudainement, les yeux luy engrossissent, ioint les ailes, les plumes dessus le col descourent la chair, les penes des ailes grosses, qu'on nomme couteaux, sont lasches & penchans. Les signes de froideur exterieure en l'oiseau sont, quand il clost en partie ou du tout les yeux, & leue vn pied, & herisse les plumes. Les signes qu'il est las, ou malade sont, quand il a la bouche close, les aisles abbatus, & respire souuent par les narilles. Le signe qu'il est debile est, quand il s'appuye aucunement sur la perche. Le signe qu'il est mal gouuerné, & qu'il est meigre est, quand il espluche souuent ses plumes. Les signes de mort en l'oiseau sont, quand l'esmont est vert, & quand en faillant il ne peut remonter sur la perche.

Contre rheume au cerueau de l'oiseau, les signes, la cause, & le remede.

CHAP. II.



Les signes pour cognoistre le rheume au cerueau de l'oiseau sont, quand il iette eau des narilles, & a larmes, comme vne nue aux yeux, & au soir clost vn œil, puis l'autre, puis tous deux, & les couure tant qu'il semble à voir qu'il dorme. Ce rheume luy engendre aucunes fois la taye en l'œil, & l'ongle, la pepie en la langue, luy fait enfler le palais, luy engendre le chancre. Quand il semble que le rheume sort par les yeux, ou par les narilles, ou par la bouche, l'oiseau est en danger de mort. La cause dudit rheume est, que l'oiseau est pu de chair grosse, ou mauuaise, à grosse gorge, & plus tost luy vient quand il est meigre, que que quand il est bien gras. Et pource qu'il ne peut enduire tel past, mais le tient longuement, il deuient puant, & celle puanteur montant au cerueau de l'oiseau, luy clost les aureilles narilles & conduits, tellement que les humeurs ne peuuent vider comme elles ont accoustu-

mé. Le remede est, purger l'oiseau, ainsi qu'il est escrit au chapitre vingt vniesme. Pour purger l'oiseau en tout temps: Quand l'oiseau demeure souuent les paupieres par le rheume du cerueau, mets en ses narilles huile violat, le iour apres donne luy en son past vn peu de sel armoniac, meslé avec beurre, le tiers iour souffle en ses narilles vn peu de thiriacle meslé avec huile violat.

Contre rheume sec au cerueau de l'oiseau, les signes & le remede.

CHAP. III.

Les signes du rheume sec au cerueau de l'oiseau sont, quād l'oiseau esternue beaucoup, & rien ne luy sort des narilles. Pour lequel rheume guerir, faut souffler Obsomogarum, avec vin vieil, aux narilles de l'oiseau, & apres mets l'oiseau au Soleil, ou aupres du feu. Quand l'esternuer luy sera passé, donne luy chair nerueuse, pour le faire trauailler en tirant, afin que par tel labour ledit rheume descende du cerueau aux narilles, & sorte dehors. Quand l'oiseau a la teste enflée pour ledit rheume, mets luy sous ses pieds drap de laine mouillé en eau froide, tellement que l'oiseau sente la froideur. Quand il frotte les plumes, & se gratte à cause de ceste maladie, donne luy en son past mauues broyées. Quand il bec souuent & respire fort pour ledit rheume, prens trois gouttes d'huile de laurier, & vne once d'huile d'oliue, trois moyeux d'œufs, & du cost, autrement nommé baume, messe tout ensemble, & donne sur le past de l'oiseau.

Contre rheume engendré au cerueau de l'oiseau, par fumee, ou par pouldre, le signe, & le remede.

CHAP. IIII.

Le signe de rheume engendré au cerueau de l'oiseau par fumee ou par pouldre est, quand il iecte flegme & eau des narilles. Le remede, souffle vin vieil aux narilles & face dudit oiseau, ou bien huile violat meslée avec lait de femme, si le temps est chand: ou broye des aulx sauages avec vin vieil, & de ce mouille les narilles de l'oiseau, & qu'il entre dedans, & cela luy fera iecter le flegme.

T iij

S E C O N D E P A R T I E

*Contre le haut mal, dit epilence, les signes, la cause, le remede,
& la contagion de celle maladie.*

C H A P. V.



N'esproue le haut mal d'epilence en ceste maniere, quand l'oiseau chet soudainement, & gist par quelque temps comme mort; & celà luy vient souuent au matin, & au vespre. Il a les yeux clos, les paupieres enflées, l'haleine puante, & s'efforce d'esmutir. La cause de ceste maladie est, chaleur & fumee du foye, laquelle monte au cerueau, & le lie, & trouble. Le remede est, purger l'oiseau, cōme est escrit en la premiere partie de ce liure, au chapitre vingt vniesme. De purger l'oiseau en tous temps. Tu luy donneras dedans peu de chair le gros de deux poix d'aurea alexandrine, puis apres fais pouldre de lentilles rous- ses, & pren limeure de fer bien menue, tant d'un que d'autre, & lie tous les deux en miel, & en fais pillules du gros d'un poix, desquel- les deux ou trois feras aualler à l'oiseau. Apres tien ton oiseau sur le poing au Soleil ou aupres du feu, iusques à ce qu'il ait esmuty vne fois ou deux, & ne soit pu iusques apres midy, lors donne luy bon past, & petite gorge. Ou fais pillules de pouldre de Gerapigre, avec ius d'aluy- ne, lesquelles donneras à l'oiseau en sa cure. Ou luy donne pouldre de gomme Balsami & Castorei, avec ius de Mentaistre, autrement nom- mee herbe contre les puces: soit l'oiseau tenu de iour, en lieu obscur, & l'eau deuant luy, laquelle luy est necessaire, & de nuit soit tenu à la frai- cheur, & fais ainsi six ou huit iours. Ceste maladie est cōtagieuse, pour- ce garde qu'autre ne luy touche.


Quand l'oiseau dort souuent, pour l'esueiller.

C H A P. VI.

QUAND l'oiseau dort souuent, pour l'esueiller, paists-le de queuë de mouton, oingte d'huile d'oliue.

*Contre oppilation & surdité des oreilles de l'oiseau, le signe,
la cause, & le remede.*

C H A P. VII.



Le signe d'opilation & surdité des oreilles de l'oiseau est, quand il pose la teste de trauers, & est tout muet. La cause, est le rheume qu'il a en la teste. Le remede est, le purger ainsi qu'il est escrit au chapitre vingt vniésme. De purger l'oiseau en tout temps. Apres poudroyer la chair du past d'iceluy de poiure blanc, icelle chair mise en lésches.

Contre enfleure & viscosité des paupieres de l'oiseau, le signe, la cause, & le remede.

CHAP. VIII.



Le signe d'enfleure & viscosité des paupieres de l'oiseau est, qu'il a enfleure dessus l'œil, & que les paupieres deuiennent noires. La cause est, le rhume du cerueau, & de ce luy peut venir la maladie nommée l'ongle, & pourra tant croistre qu'elle creuera l'œil à l'oiseau. Le remede est, purger le cerueau de l'oiseau, ainsi qu'il est souuent dit. Quand les paupieres sont si visqueuses, qu'elles se ioignent ensemble, laue les de vin vieil, & paists l'oiseau de chair chaude, & puluerise fiante de vache, laquelle souffleras avec vn tuyau aux yeux & narilles de l'oiseau.

Contre enfleure des yeux de l'oiseau, les causes & le remede.

CHAP. IX.



Enfleure des yeux de l'oiseau vient pour trois causes, ou par ventosité, ou par coup, ou par playe. Si par ventosité les yeux sont enflez, destrampe moustarde en eau, de laquelle oingdras l'enfleure. Si par coup les yeux sont enflez, laue le coup d'eau rose, & d'eau de fenail, autant de l'un que de l'autre. Si par playe les yeux sont enflez, en hurtant à quelque espine, ou ailleurs, mesle arsenic rouge avec lait de femme.

Contre le mal des yeux de l'oiseau.

CHAP. X.

S E C O N D E P A R T I E

S I ton oiseau a mal aux yeux de coup ou de taye, prens vne herbe qui s'appelle Filago, elle croist pres de terre, & est chauce & crespuë de fucilles, & mets le ius d'icelle herbe en l'œil de ton oiseau.

Comme on guerist l'oiseau de chancre. C H A P. X I.

E Aut prendre miel & vin blanc, & faire le tout bouillir ensemble, & apres luy en lauer la bouche, apres l'essuyer & mettre dessus de la pouldre de cerfueil, & il guerira.

Contre la pepie en la langue de l'oiseau.

C H A P. X I I.

P Epie en la langue de l'oiseau est, quand il esternue souuent, & ce faisant erie. La cause est, la chair mauuaise & orde qu'il a pu. Le remede est, premierement lauer la langue & la pepie d'eau rose, mise en cotton lié au bout d'un petit baston, apres oingts luy par trois ou quatre iours la langue d'huile d'oliue, & d'huile d'aman-des, meslees ensemble, & la pepie se blanchira & mollifiera. Et quand elle sera bien meure, oste la comme on fait aux gelines. Apres oingts la langue de l'oiseau trois ou quatre fois le iour, desdites huiles iusques à ce qu'elle soit guerie.

Contre flegme engendré au gosier de l'oiseau, le signe, & le remede.

C H A P. X I I I.

E Le signe de flegme engendré au gosier de l'oiseau est, que tu y verras le flegme gros comme crachar, & ceste maladie engraisse l'oiseau. Le remede est tel, prens le pois de trois grains de sel armoniac, meslé avec miel, & en frotte le gosier de l'oiseau, & ce à trois heures apres midy. Puis prens reguelice & des penites, sept dragmes, tant d'un que d'autre, de paille d'orge quatorze dragmes, & dix liures d'eau: fais tout bouillir, couler, & refroidir, iusques à ce que il sera tiede, & le mets deuant l'oiseau, & ne soit puiusques à neuf heures au soir, apres le paistras d'aile de geline: & si ce ne le guerist, prens

Stafisagre.

Staflagre broyee avec bourrache, & avec vn drappeau en frotte ledit lieu malade. Et quand ledit flegme fera failly, paiftras l'oifeau de chair de Coulomb, avec fon fang, & luy mets l'eau deuant luy.

Contre la maladie des fangfues, qui font au gofier de l'oifeau, le figne, la caufe, & le remede.

CHAP. XIII.

Ligne de la maladie des fangfues, qui font au gofier de l'oifeau, eft que quand l'oifeau paift, la fangfue fe remue dedans la gorge de l'oifeau, & aucunesfois fe montre hors des narilles. La caufe eft, quand l'oifeau fe baigne en eau, paifible, non courante comme celle de fontaine, & qu'il en boit, luy entre quelque petite fangfue dedans la bouche ou narilles, & fenfle du fang de l'oifeau. Le remede eft, mets moustarde deffus les narilles de l'oifeau, & la fangfue en sortira: ou mets dedans les narilles de l'oifeau trois ou quatre gouttes de ius de limons, & l'oifeau iectera la fangfue dehors: ou mets fur charbon ardant quatre ou cinq punaises, & fais entrer celle fumee dedans la bouche & narilles de l'oifeau, & la fangfue s'en fuira dehors.

Contre filandres, les efpeces d'icelles, les fignes, la caufe, & le remede.

CHAP. XV.

FILANDRES font petits vers, dont en y a de quatre efpeces: l'une eft en la gorge de l'oifeau, l'autre au ventre, l'autre aux reins. La quatriefme eft nommee aiguilles, qui font auffi bien petits vers de la premiere efpece de filandres qui viennent en la gorge. Et apres diray des autres en leurs lieux. Les fignes de filandres en la gorge font, que l'oifeau bâille fouuent, frotte les yeux à fon aile, gratte fes narilles. Et quand il eft pu, & les filandres sentent la chair fraifche, elles fe remuent, tellement que l'oifeau les cuide ietter dehors, & en ouurant la bouche dudit oifeau, facilement les y verras. La caufe des filandres, font mauuaifes humeurs au corps de l'oifeau, par mauuais & ord past, comme fouuent eft dit: lesquelles filandres montent au gofier de l'oifeau, iufques au pertuis de l'halaine d'iceluy, & le poignent là, & au cerueau. Le remede eft, broye

V

S E C O N D E P A R T I E

herbe nommée mente, & le ius d'icelle osté, messe le marc avec vin-aigre, & en chair de pouffin, & la donne à l'oiseau. Ou prens bois de ruë bien gros, & y fais vne fossette, & la remplis d'eau, puis mets ainsi ladite ruë sur charbons ardans, l'espace de demie heure, iusques à ce qu'elle soit bien cuite. Et si l'eau sort, ou tombe, ou se diminue, remplis ladite fossette d'autre eau, puis prens icelle eau, & tout le ius d'icelle ruë bien espraint, & y messe poudre de safran, la quantité d'un gros pois, en laquelle eau tremperas la chair du past de l'oiseau, de laquelle le paistras à demie gorge: & si il ne la veut manger, garde la luy iusques à ce qu'il aura appetit, & luy continue trois ou quatre iours, ou la luy trempe en eau de soufre; & suc de Grenades.

Contre raucité seche de l'oiseau. CHAP. XVI.

POUR raucité seche de l'oiseau, près un Coulomb ieune, gras, & luy fais tant boire de vin-aigre qu'il meure: apres mets le auprès de l'oiseau qu'il l'esträge, & qu'il boiue le sang, & garde bié qu'il n'auale des plumes ne des osselets du Coulomb. Les autres iours, paists-le de chair de veau chaude, ou trempe en suc de racine de fenail, & sucre, trois morceaux de chair, & en paists l'oiseau.


Contre l'haleine puante de l'oiseau, la cause, & le remede.

CHAP. XVII.

QUELQUEFOIS l'haleine pur à l'oiseau, pour ce qu'il est pu de chair mauuaise, & qui n'a esté trempée & lauee, laquelle luy engendre humeurs, qui luy font l'haleine puante. Le remede est, purger l'oiseau de pillule de gresse, de lard, ordonnée au chapitre. Pour purger l'oiseau en tous temps. Trois iours apres feras secher au feu, ou au four du rosmarin, duquel feras pouldre, & froisseras trois cloux de girofle, desquels, & de ladite pouldre de rosmarin, prendras à la quantité d'une pillule, & mettras dedans un peu de cotton, lié d'un petit filer, & au vespre le feras aualler à l'oiseau. Et continue ainsi cinq ou six iours, apres cinq ou six iours, luy en donneras pareillement vne, iusques à ce qu'il aura bonne haleine. Aucunesfois l'oiseau a l'haleine puante, parce qu'il a le paumon trop gras. Faut prendre vne graine, qui est appelée graine d'outre-mer, qui ressemble à celle de rosmarin, fors qu'elle est plus menue, on en trouue chez les Apothicaires, si luy en donnes avec la chair, & il aura bonne haleine.

*Contre poulx es plumes de l'oiseau, les signes, & quand on les
luy doit oster, & comment.*

CHAP. XVIII.




NOTE que le signe que l'oiseau a des poulx est quand il se poulle souuent, & soigneusement, & quand il est mis au Soleil bien chaut, hors du vent, les poulx se monstreront sur les plumes. On doit oster les poulx à l'oiseau deux fois l'an, l'une quand on le met en la muë, & l'autre quand on l'en oste, comme aussi il est escrit au chapitre de la muë. Pour oster les poulx à l'oiseau, mets de l'absinche, autrement nommee aluïne, sur les lieux où sont les poulx: apres oings d'huile les iambes & les pieds de l'oiseau, & le tien en estuue iusques à ce qu'il sue, & les poulx descenderont à l'odeur de l'huile, & ainsi les pourras oster. Ou oings les lieux où sont les poulx d'argent vif, mortifié en cendre & huyle, & quand les poulx se monstrent, mets deuant l'oiseau l'eau pour se lauer, & garde que l'argent vif ne tombe en la bouche de l'oiseau. Si les poulx sont en toutes les plumes, prens pouldre de poivre, & cendre de serment meslez ensemble, pouldroye les dites plumes, & enuveloppe l'oiseau, & le mets au Soleil. Apres desuveloppe l'oiseau, & le mets sur le poing, & quand verras les poulx, abats les avec instrument à ce propre. Ou prens argent vif, mortifié en salie, & meslé avec saing de porc, auquel trempe vn gros & mollet cordon de laine, puis le lie au col de l'oiseau, & les poulx y viendront, & mourront. Ou trempe en cedit saing, vn drap mollet de laine, & y enuveloppe l'oiseau, & le tien en estuue tant qu'il suë, & les poulx se prendront audit drap. Si l'oiseau a les poulx à la plante, mets en eau chaude pouldre de Stasifagre, & d'icelle eau coulee, mets sur les lieux où sont les poulx: & s'ils ne meurent, prens Absinche & du Lupin, autant d'un que d'autre, & mets en eau, laquelle coulee, mettras en vaisseau auquel l'oiseau se puisse aisement lauer. S'il a tant de poulx qu'il arrache ses plumes, cuits bien en eau soufre citrin, puis mets icelle eau chaude en vne tinette, & sur elle vn crible, sur lequel lie l'oiseau, tant que la chaleur & vapeur d'icelle eau chaude monte iusques à l'oiseau, & qu'il sue, & les poulx tomberont. L'orpin oste bien les poulx, mais il fait changer le plumage, & si fait mal à la langue de l'oiseau.

S E C O N D E P A R T I E

Contre la teigne és pennes de l'oiseau, de ses deux especes, leurs signes, la cause, & le remede sil ronge ses pennes.

C H A P. X V I I.

 N dit que la teigne és pennes de l'oiseau est de deux especes, l'une ronge la penne au bout du tuyau, l'autre fait cheoir les pennes saignantes au bout. La cause de la premiere especie est, que l'oiseau est ord dedans le corps, & n'est pas bien baigné, & est tenu en lieu ord, poudreux, ou fumeux. Le remede est, laue vne fois le iour l'oiseau de lexieue de ferment, & le laisse essuyer : apres oings les pennes taigneuses de miel & mets sur lesdits lieux sang de dragon, & alun de glace. Quand les pennes tombent saignantes, la cause est la chaleur du foye de l'oiseau, laquelle fait vne vessie sur le lieu où tient ladite penne, apres pourrit le bout de la penne, & la fait cheoir, & le trou dont elle est partie se ferme, parce autre penne n'y peult croistre. Le remede est, fais vne brochette de bois de sapin, laquelle ne soit point fort aiguë, qu'elle ne blesse l'oiseau, & puisse aisement sans douleur entrer dedans ledit trou. Ou prens vn grain d'orge, & luy coupe la pointe du costé duquel le mettras audit lieu, & oings iceluy grain d'huile d'olive, & le mets audit lieu, tellement qu'il en demeure vn peu dehors, afin qu'il garde le trou de se clore, apres perce ladite vessie, de laquelle sortira vne eau rousse, puis prens poudre d'aloës cicotrin, & siel de boeuf battu ensemble, duquel oingdras ledit lieu, & garde qu'il n'en entre dedans. Quand l'enfleure de rougeur du lieu où est la douleur sera passée, oings le lieu malade d'huile rosat, pour oster les croustes & ordures dudit lieu, afin que la penne nouvelle puisse sortir, & mets l'oiseau en chambre où il y ait perches aupres de terre pour s'y reposer, & les pennes soulager, & soit là pu, & l'eau mise deuant luy pour se baigner. Ou bien si vn oiseau a teignes en l'aile ou ailleurs, prends vne pierre de chaux bien vnie, & la mets en vn bassin, où il y ait de l'eau, & luy laisse route la nuit, & de la gresse qui sera par dessus l'eau, laues en par quatre ou cinq iours l'aile de ton oiseau. Si y a penne ou pennes mauuaises, fais comme il est escrit au chapitre de la muë. Si l'oiseau ronge les pennes, mets sur son past pouldre de mauues, laquelle luy fera oublier de les ronger. Garde qu'autre oiseau ne soit mis pres de l'oiseau teigneux, & qu'il ne soit pu du past d'iceluy, ne mis sur le gant sur lequel il aura esté, car il

prendroit la teigne. Pour reparer penes froissées, ou rompues, ou arrachées, est escrit en la premiere partie de ce liure.

Quand l'oiseau herissonne, les signes, & le remede.

CHAP. XX.

Signes quand l'oiseau herissonne, sont qu'il leue les ailles, puis les estraint, leue vn pied, puis l'approche de l'autre, a les yeux enfoncez, & les couure en partie ou tout, & ouure & clost tost la bouche: lesquels deux derniers signes sont mauuais en ceste maladie. Le remede est, chauffer l'oiseau au feu, ou l'enuelopper en vn drapeau, & le faire suer sur chaleur & vapeur de vin iecté sur cailloux rougis par grand feu: apres seche l'oiseau au feu, & le tien bien chaudement.

Quand l'oiseau tremble, & ne se peut soubstenir, le remede,

CHAP. XXI.

Quand l'oiseau tremble, & ne se peut soubstenir, le remede est, pouldroye le past d'iceluy de poudre de reguelice, & de poudre de maules, meslees ensemble: ou distille és narilles de l'oiseau quatre gouttes de suc de grenades douces, apres frotte le palais de l'oiseau de poudre de Staslagre & sel menu ensemble. Et luy presente l'eau tiede, & au soir le paistras de chair de geline chaude.

Quand l'oiseau a prins coup en heurtant à quelque chose, ou contre sa proye, le remede.

CHAP. XXII.

Note que quand l'oiseau a prins quelque coup en hurtant contre aucune chose, ou contre sa proye, le remede est, fais bouillir en vin, sauge, mente, poulliot, & guimaulue: & de ce vin estuue avec vne esponge de lieu malade, iusques à ce que l'oiseau sue: puis emplastre ledict lieu d'encens en poudre, & de guimaulues meslees en blanc d'œuf. Apres essuyé l'oiseau au feu, & le

tiens chaudement, & continue cecy deux fois le iour, iusquès à ce que l'oiseau soit amandé. Si l'oiseau a prins si grand coup qu'il iette sang par les narilles, ou par la bouche, ou par le fondement, & les costes luy poulsent & esmutist noir, & en demenant la queuë ça & là, donne luy en son past avec sang chaud de geline, pouldre de sang de dragon, du boliarmenic, & de la momie. Paists-le de chair de Coulomb ieune, avec son sang, ou trempe chair de geline en vrine, pour son past, par aucuns iours.

*Quand l'oiseau s'est fait playe en hurtant, comme est es-
crit au chapitre du coup, le remede.*

CHAP. XXIII.



Vand l'oiseau s'est fait playe en hurtant, comme est es-
crit au chapitre du coup, le remede est, laue & es-
stue la playe de vin tiede, puis si le cuir est grande-
ment fendu, recous le avec vne aiguille neuue, &
fil delié. Apres oingts ledit lieu d'huile rosat, & mets
dessus poudre d'escorce de chesne, ou de courge. Ou
si c'est en lieu nerueux, mets dessus therebétine, ou bien le ius de l'her-
be nommee l'herbe Robert, & apres y mets le marc de ladite herbe.
Si tu ne trouues dudit ius, mets-y de la pouldre de ladite herbe, la-
quelle herbe garde d'apostumer plaies, & emplastre ledit lieu du blanc
d'un œuf: & puis si la plaie est profonde, fais poudre de sang de dra-
gon, d'encens blanc, de mastic, & d'aloes cicotrin, autant d'un que
d'autre ensemble, de laquelle mets en ladite plaie. Apres pour appai-
ser la douleur, l'oindras d'huile rosat tiede, & l'emplastreras ainsi.

Pour estancher la veine de l'oiseau, le remede.

CHAP. XXIII.



Pour estancher la veine de l'oiseau, prens sang de dragon, a-
loes cicotrin en pouldre, & du poil de Lieure ou de Chat,
ou toille d'Araigne, meslez ensemble, avec blanc d'œuf, &
mets dessus ladicte veine, & la couure d'estoupes trempées
en blanc d'œuf & huile rosat, & ce renouelleras, tellement que ce qui
est ia mis dessus par soy tombe.

Pour os rompu, ou hors de son lieu, faire reprendre.

C H A P. XXV.

ET si ton oiseau a os rompu ou hors de son lieu, comme l'aïleron, l'aïsse, cuisse, ou iambe, pour les faire reprendre, soient bien remis en leur lieu, ou adressé vn os endroit l'autre: Apres prens sang de dragon, boliarmenic, gomme arabic, encens blanc, aloes cicotrin, momie, & vn peu de farine: destrampe tout en blanc d'œuf, & emplastre le lieu malade, & s'il est besoin soit bandé avec hastelles, & l'oiseau emmaillotté, afin que l'os se reprenne plus seurement, & garde qu'il ne soit trop estreint, singulierement la iambe, si l'os est rompu, car le pied luy secheroit. Renouvelle l'emplastre de quatre en quatre iours, si besoin est, & garde bien que ledit os ne se reiette hors de son lieu: soit ainsi tenu & enchapronné, iusques à ce qu'il soit guarý: ou prens poudre d'aloes, poix Grec, & myrrhe, mis en blanc d'œuf, emplastre ledit lieu: S'il a l'os de la cuisse ou iambe rompue, oste luy les ieüs, & le mets en chambre obscure, sur herbe, & soit pu de bon past, à petits morceaux, assez bonne gorge.

DES MALADIES ET MEDECINES.

qui sont dedans le corps des oiseaux, &
qu'on ne voit point.

Contre-foye de l'oiseau eschauffé, les signes, la cause, & le remede pour le refroidir.

C H A P. XXVI.

MAintenant venons à parler des maladies qui sont dedans le corps de l'oiseau. Les signes du foye eschauffé sont, quand l'oiseau gratte la dextre & haute partie du bec, & a la gorge eschauffée, & changeant en couleur, & blanchissant, & qu'il a les pieds eschauffez, & le dessous d'iceux est noir ou vert: que si la langue luy deuient noire, c'est signe de mort. La cause, est ord past qu'on luy a donné, ou qu'on ne l'a baigné quand on debuoit, ou par eschauffement de trop voller, ou par estre trop longuement sans paistre. Le remede de luy refroidir le foye est, purger l'oiseau par pillule du gras

SECONDE PARTIE

de lart, ordonnée au chapitre, pour purger l'oiseau en tout temps, & apres luy donner Limaçons, ainsi qu'il est escrit au chapitre, pour oiseau meigre mettre sus. Puis trempe rheubarbe vne nuit en eau, à la fraischeur le lendemain, & quatre ou cinq iours apres, laue son past de celle eau. Paists l'oiseau de gresse de porc, ou de cuisse de geline, & semblables chairs non chaudes trempées en lait.

Contre maladie de poulmon de l'oiseau, & le remede.

CHAP. XXVII.

S i tu veux remedier contre la maladie du poulmon de l'oiseau, paist-le de chair de Lieure, ou puluerise sucre & safran tant d'un que d'autre, & mets-en trois morceaux de chair fraiche de Chicure, desquels paistras l'oiseau. Quand l'oiseau aura digeré, donne luy le surplus de son past deu, & de bonne chair: ou trenche bien menu poils de porc, & les mets en sang de porc, & quand ledit sang sera coagulé & figé, paists en l'oiseau. Apres ce, prens quatre onces de pouldre de l'herbe nommee cost, & du sel gemme, puluerise & meslé avec miel, huyle d'oliue, & blanc d'œuf, & en trempe le past de l'oiseau quand l'oiseau respire fort, par la douleur du poulmon, cuits en eau rusche de miel, & la mets en la gorge de l'oiseau, & le lie iusques midy, puis le paists de geline.

Contre asme, autrement dit pantais, quand l'oiseau ne peut auoir son haleine, & à l'haleine grosse, les signes, la cause, les deux especes d'iceluy, & le remede.

CHAP. XXVIII.

L Es signes que l'oiseau a l'asme, autrement pantais, quand il ne peut auoir l'haleine, qu'il demeine la teste, & frappe sa poitrine, & quand la bouche ouuerte respire souuent, & du fons de la gorge, leue le ventre & luy debat, demeine la queue en la leuant: quand le mal engrege, il ronfle, par angoisse qu'il a d'auoir son haleine. La cause dudit pantais, sont fumees qu'il a dedans le corps, ou coups qu'il a prins au gibbier

gibbier, ou par eschauffement qu'il a prins par trop roidement voller, ou par se debatre sur la perche, s'est rompu aucunes petites veines du foye, & le sang d'icelles saillant, s'est endurcy & monté pres de la gorge. Il y a deux especes de pantais, l'un est en la gorge, l'autre és rains. Le remede au pantais en la gorge est, premierement soit purgé l'oiseau, comme dit est au chapitre, pour purger l'oiseau en tout temps. Apres mets-le sans gets & sonnettes dedans chambre nette & clere, les fenestres ouuertes & treillisees tellement qu'il n'en puisse sortir, & que le soleil ou grand air puisse entrer dedans, auquel lieu y ait perches, sur lesquelles il puisse voller, & l'eau deuant luy. Tu le paistras de bone chair taillee en morceaux, & arrousee d'huyle d'amendes doulces, ou de lait, & à demie gorge à la fois. Ou luy donne sur sa chair, limeure d'acier, meslee en miel ou en poudre de boliarmenic. Et s'il iecte moruats durs des narilles, est signe de guarison. La cause du pantais qui est és rains est, pource que l'oiseau a esté fort malade, puis guarý, puis recheut: parquoy s'engendre és rains vne maladie du gros d'une febue en maniere de chancre, laquelle eschauffe tellemēt l'oiseau, qu'il iecte son past. Les signes de ce pātais sont, que ce mal ne traueille point l'oiseau continuellemēt, comme l'autre qui est en la gorge, mais de huit iours en huit iours, ou de quinze iours en quinze iours, ou de mois en mois, & l'oiseau remue plus les rains que les espaulles. Le remede est, fais bouillir en eau & en pot neuf racines d'asparges, de fenoi, & de capres: puis d'icelles racines fais pouldre sur vne tuille vicille, laquelle y est meilleure que la neufue, & en icelle eau trempe de bonne chair, de laquelle paistras l'oiseau à demy gorge. Et au soir ne la trēperas point, mais mettras dessus de la pouldre desdites racines, & cōtinue ainsi par dix ou douze iours. Autres dōnēt à l'oiseau qui a grosse haleine & brute, de la poudre sur sa chair, qui est faite du poulmon bruslé d'un Regnard. Si l'oiseau a lōguement pantisté, & il est meigre, il est incurable.

Contre sang assemblé & figé au ventre de l'oiseau, le remede. CHAP. XXX.

S I l'oiseau a sang assemblé & figé au ventre, le remede est, mets sucre en eau de grenades, & en eau de soulfre, & y trempe vn morceau de chair, lequel donneras à l'oiseau, & quand il l'aura digéré, parfais son past. Ou mets en eau poudre d'Asia-fetida, & des racines de Capres, & quand l'eau sera reposée, trempe y morceaux de chair, desquels paistras l'oiseau.

X

S E C O N D E P A R T I E

Contre filandres dedans le corps de l'oiseau, les signes, la cause & le remede.

CHAP. XXX.

DEs Filandres qui sont en la gorge, & que c'est que Filandres, & des signes pour les cognoistre, est escrit au chapitre 13. & icy est escrit des Filandres qui sont dedans le corps de l'oiseau. Les signes pour les cognoistre quand elles y sont, quand l'oiseau se plaint de nuit, & crie crac crac, & quand tu le portes au matin, il estraint ton poing, ce qu'il ne faisoit parauant, & fait semblant de se coucher sur le poing, qui est le signe de grande vexation que luy font les Filandres, & est lors en danger de mort, il plume son ventre, & en sa cure apparoiſſent & se monstrent vers, ou chair rouge, qui est le ver. Et aussi vous le ſçaurez és mues, qui sont pleines d'une maniere de filets de chair longue, qui luy pendent quelquesfois au fondement. La cause des Filandres est, le debatre qu'il fait contre sa proie, ou autrement, & se rompt quelque veine dedans le corps, par laquelle le sang se respand par les entrailles, & se caille, & seche, duquel s'engendrent lesdites Filandres, lesquelles pour fuyr la puanteur dudit sang, cherchent lieu net par le corps, & montent aux entrailles & au cœur de l'oiseau. Le remede pour les faire mourir est, fais poudre des lètilles des plus rouſſes, & en icelle mesle moins de poudre de vers, & les lie en miel, & en fais emplastre, apres plume le ventre de l'oiseau, & y mets ledit emplastre. Puis fais ius d'herbe de rue, & de fucilles de pescher, avec lequel mesle poudre de vers, & en fais emplastro, & le mets sur les rains de l'oiseau, lesquels rains plumeras parauant, & renouuelleras l'emplastre par cinq ou six iours. Apres mets dedans vn boiau de geline, du thiriacle, poudre d'aloes, & poudre de vers, & lie le boiau aux deux bouts, & le fais aualler à l'oiseau, & trempe la chair de son paſt en ius fait d'herbe verte de froument. Ou bien prens vn franc Pimpenel, escorche-le, & le coupe au deſſous du nombril, & prens la partie vers la queue, & la mouille en vin blanc quand tu luy donneras en mangeant sa premiere viande, & ce par trois ou quatre fois.

Contre aiguilles, autrement nommees lumbriques, qui sont plus petits vers que filandres: & contre vers qui sont dedans le corps de l'oiseau, les signes, la cause, & le remede.

CHAP. XXXI.

N dit que les signes des aiguilles, autrement lumbriques, sont tels que ceux des filandres, ioinct que l'oïseau qui a aiguilles plume souuent son braycul, & s'escout dessus le leur-re. La cause est, celle mesme qui est des filandres. Le remede est, il faut que tu prennes poudre de Stafisagre, & poudre d'aloes cicotrin mellez ensemble, le gros d'une petite noisette, mis en cuir de geline, & le fais aualler à l'oïseau, puis luy donne le gros d'une febue de la chair de mouton ou de pouffin, apres mets l'oïseau au soleil ou aupres du feu, & ne soit pu iusques apres midy, & à demie gorge. Continue luy icelle poudre trois ou quatre iours, & garde que l'oïseau à qui tu donneras ceste medecine ne soit meigre, car il ne la pourroit endurer: ou fais pillules du gros d'une noisette, de poudre de corne de Cerf, & de poudre de vers, liee en thiriacle, desquelles donneras à l'oïseau cinq ou six iours vne enueloppee en peau de geline, ou en peau de bonne chair, & apres bien tost soit l'oïseau pu d'une gorge, ou le paists de chair de porc poudroyee de limeure de fer, ou de chair de pouffin trempee en ius de mente, avec vinaigre. On cognoist le Faucon auoir vers au corps, quand il fait tout vn iour esmut vert & iaune, & tremble trois ou quatre fois l'une apres l'autre, sans trop croller le corps, en regardant tousiours à terre. Pour le guarir, pren aussi gros d'aloes qu'un pois, broyé en vne escuelle, puis soit destrempé d'eau clere, tiede, pleine vne coquille de noix, & le verse dans la gorge de l'oïseau mallade, au matin à ieun. Et long temps apres donne luy vne cuisse de ieune geline trempee en eau & sucre: car le sucre oste l'amer de la gorge. L'autre iour apres, donne luy vne cuisse de poulle trempee en vin de pommes de grenades. Puis luy donne à manger, par trois iours, la chair de ieunes Coulombs, & il guarira.

Contre apostume dans le corps de l'oïseau, les signes, la cause, & remede.

CHAP. XXXII.

Ote que les signes que l'oïseau a apostume dedans le corps sont tels, quand ses narilles s'estouppent, & le cœur luy debat. La cause est, le debat qu'il fait à la perche fort & souuent, ou les coups qu'il prend à sa proye ou ailleurs & s'eschauffe, & apres se refroidist, & de ce s'engendre apostume. Le remede est, lasche fort le ventre de l'oïseau par past de chair de Vache, trempee en eau

X ij

S E C O N D E P A R T I E

emmiellée. Apres duits Absinçe en eau, en laquelle mette miel & cendre d'orge, & de ces choses assemblees faits Trociscques, qui sont comme morceaux plats, desquels paistras l'oiseau trois iours, & il iettera l'apostume. Ou prens ius de fueilles de choux, meslez avec le blanc d'un œuf, & mis en vn boyau de geline, lié aux deux bouts, & le donne au matin à l'oiseau. Et apres soit mis au soleil, ou aupres du feu, & ne soit pu iusques apres midy, & de poullaille ou mouton. Le lendemain, brusse à feu clair rosmarin, & en fais poudre, de laquelle mets sur le past de l'oiseau, & continue celà par quinze iours, puis d'un, puis d'autre, & le tiens chaudement, en luy baillant moyenne gorge, & de bon past vif.

*Contre le mal subtil, qui est quand l'oiseau est tousiours affamé,
les signes, la cause, & le remede.*

C H A P. XXIII.



Ote que les signes du mal subtil sont, quand l'oiseau est tousiours affamé, combien que tu luy donnes souuent à manger, toutesfois si est il tousiours affamé, & plus mange & plus veut manger, & esmutist souuent; & plus qu'il n'a accoustumé. La cause est, qu'il est fort meigre, & tu le veux mettre sus prestement, & le cuides faire gras par grosses gorges que luy donnes, par lesquelles il estaint la chaleur de la digestion. Le remede est, prens vn cœur de Mouton, mis en trois parties, & le trempe vne nuit en lait, duquel trois fois le iour, au matin, apres midy, & au vespre, paistras l'oiseau. Et continue cinq ou six iours, ou iusques à ce qu'il amande & esmutisse comme il doit. Apres soit pu quatre iours deux fois le iour, & de bon past, arrousé d'huyle d'amendes doulces.

*Contre chaleur grande dedans le corps de l'oiseau, pour icelle
refroidir, les signes, & le remede.*

C H A P. XXIIII.



POUR congnoistre les signes des grandes chaleurs qui sont dedans le corps de l'oiseau, faut regarder quand il a la bouche ouverte, & respire souuant, leue les ailes, & les ventile, & semble que ses yeux faillent dehors de la teste, ioinct ses plumes, & entre-ouure les pēnes qu'il herissonne, & met les plumes dessus la teste, le col luy ameigrift, & a le courage remis. Le remede est, mets l'oiseau en lieu frais, & mets sucre, & vn peu de canfore en eau rose, de laquelle tu luy arrouseras la teste, & souffle en ses narilles vn peu d'huile violat mise en eau fraische, & le paists de chair trempee en eau sucree.

Contre fiebure, le signe, & le remede CHAP. XXXV.

FAUT congnoistre que l'oiseau a la fiebure quand il a les pieds chauds. Le remede est, trempe en vin-aigre gresse de geline, & aloes, & luy fais aualler, & luy oingts les pieds de musc, melle avec gresse de geline.

Contre ventosité engendree au corps de l'oiseau, les signes & le remede. CHAP. XXXVI.



PLES signes de ventosité engédree au corps de l'oiseau sont, qu'il baïsse & espluche son dos, luy estant sur la perche, & quand il met au bec son past. Le remede est, purger l'oiseau, ainsi qu'il est escrit au chapitre, pour purger l'oiseau en tous temps. Apres prens vn poulmon d'aigneau, coupe-le en morceaux, & le cuis en beurre, iusques à ce que la saueur du poulmon soit incorporee avec le beurre, & d'iceluy beurre luy donneras au matin sur son past, autant qu'il enduira bien : à midi luy donneras pouldre de semence de Iusquiami, avec bonne chair, & luy presenteras l'eau pour boire, le lendemain le paistras d'entrailles, du poulmon & du sang de Coulomb ieune. Quand son ventre gargouille par ventosité, dōne luy past d'ail sauuage, & le mets à la perche.

Contre la pierre, autrement nommee craye, les signes la cause, & le remede.

X iij

CHAP. XXXVII.

E Aut que tu entendes que les signes de la pierre, autrement nommee craye, sont, que l'oiseau a les yeux & les pieds enflés, chœst l'œil, & le frotte du haut de son aile, & les deux veines qui sont entre les yeux luy poussent fort. Il a les narilles estouppees, & leue la queue deux ou trois fois deuant qu'il puisse esmutir. Quand il esmutit, il fait son comme petis pers, son esmont est mol, comme eau trouble, & aucunesfois visqueux comme chaux endurcie. Il a l'orifice du fondement constipé, & luy deult, à ceste cause il effriche avec le bec, tant qu'il en fait saillir sang, & l'escorche, & sort vn peu hors, & les plumes de son brayeul, & son esmont sont ords. La cause est, indigestion & ventosité. Le remede est, purger l'oiseau, comme il est escrit au chapitre: Pour purger l'oiseau en tous temps. Apres donne luy du blanc d'œuf dedans son past par trois iours, l'vn iour trempé en vin, & l'autre iour en miel, ou trempe son past en ius de racines d'horties griesches. Quand l'oiseau a le fondement constipé, oingts ledit lieu d'huile du dedans de noyaux de pesches: quand l'oiseau se force d'esmutir, & le bout du boyau luy sort dehors, alors prens avec deux doigts ledit boyau, & oingts le bout d'huile rosat. Apres paist-le de chair de porc, avec son sang, ou l'oingts d'huile de noix: ou luy dōne trois iours son past de cœur de porc, semé de soyas menues couppees dudit porc: ou bien prens fiel de petit porc, de trois semaines ou enuiron, & le fais aualler à l'oiseau, sans rompre, & garde qu'il n'en icter rien, apres donne luy aussi gros qu'vne febue de chair du cœur, & apres le laisse ieuner iusques au vespre, & puis le mets au Soleil, ou aupres du feu, & continue ceste medecine selon la force de l'oiseau, deux ou trois fois. Au soir soit pu de chair de mouton ou poullaille, & le lendemain soit trempé son past en lait sucré. Et ainsi soit pu trois iours, & à petite gorge,

Contre enflure de cuisse ou de iambe, la cause, & le remede.

CHAP. XXXVIII.

P Our sçauoir la cause de l'enflure de cuisse ou de iâbe en l'oiseau, la raison est, pour le travail qu'il a prins au gibbier, ou par frapper sa proye, par lequel l'oiseau s'est eschauffé, & apres refroidy & les humeurs luy sont descendues. Le remede est, purger l'oiseau par les pillules du gras de lard, ordonnees au chapitre, Pour purger l'oiseau en tous temps. Puis apres fais bien cuire dix ou douze œufs, avec l'escaille, & quand ils seront refroidis, oste les de l'es-

caille, & en prens les moyeux tant seulement, lesquels rompus dedans vne poisse, mettras deuant feu clair, & les remueras sans reposer, & quand ils deuiendront noirs, & cuideras qu'ils soient gastez, fais les bouillir avec vn peu d'huile d'oliue, & les assemble & presse tant que ils rendent l'huile, duquel huile, ce qu'en pourras auoir, mettras dans vn verre bien couuert. Quand tu vouldras vser dudit huile, prens en dix gouttes, & y mets trois gouttes d'eau rose, & autant de vin-aigre & premier oingts d'vn peu d'eau ladite enflure, apres vse d'icelle huile appareillee comme dit est. Et continue iusques à ce que l'oiseau soit guery. De rabiller os hors de son lieu, ou rompu, est escrit au tiltre du corps.

Contre filandres es cuisses, le signe, la cause, & le remede.

CHAP. XXXIX.

LE signe que l'oiseau a filandres es cuisses est, qu'il les plume louuent. La cause est, le debatre qu'il a fait à la perche, ou sur le poing, par lequel il s'est rompu quelque veine des cuisses, ainsi qu'il est escrit au chapitre des filandres dedas le corps. Le remede est, curer l'oiseau, comme est escrit audit chapitre. Et du ius de ruë, & des autres herbes là escrites, avecques pouldre de vers, lauer les cuisses de l'oiseau, & le mare d'icelles mettre dessus.

Contre enflure des pieds, la cause, & le remede.

CHAP. XL.

Volontiers les pieds s'enflent par froidure, parce que l'oiseau s'eschauffe à battre sa proye, puis se refroidist par faute de luy mettre drap sous les pieds, ou pource qu'il est ord dedans, & les humeurs descendent sur les pieds, & plus au Gerfaut qu'à autre oiseau, car il est pesant, & a les pieds gras. Le remede est, le purger, comme est dit au chapitre, Pour purger l'oiseau en tous temps. Apres prens pouldre de boliarmenic, & la moitié moins de pouldre de sang de dragō, meslees ensēble, & lices d'vn blac d'œuf, & de ce oingts deux fois le iour, 3. ou 4. iours ensuiuās ladite enflure, & mets dessous les pieds de l'oiseau drap pour les tenir chauds, apres fais oignement de graisse de geline, huile rosat, cire neufue, pouldre d'encens, & boliarmenic, duquel oignement feras comme dessus est dit. Si les pieds luy enflent, & ne se peut soustenir, par grand seiour &

faute d'exercitatio, oingts lesdits pieds de l'oiseau de beurre de vache, & mesle en iceluy vn peu de pouldre de Galbane, apres le lie vn iour & vne nuit. Et si les pieds & iambes luy enflent, & il y apparoisse quelque accroissement de chair, la cause est, les geets qui luy sont trop durs, & le serrent trop, ou c'est par cheoir trop roidemēt sur sa proie. Le remede est, fais pouldre d'encens masle, de litarge, de verre Alexandrin, & de Colcotar, qui est matiere minerale, autāt d'vn que d'autre, meslez en blanc d'œuf. Apres laue lesdits lieux de l'oiseau, & emplastre dessus ce que dit est, & mets sous les pieds dudit oiseau drap mouillé en eau froide, & tiens le ainsi iusques à ce qu'il soit guery.

Contre cloux és pieds de l'oiseau, le remede & de le guerir d'une fontaine qu'il aura au pied. CHAP. XLII.

LE remede contre cloux és pieds de l'oiseau est, oindre lesdits pieds & cloux dudit oiseau, comme est escrit au chapitre, contre vessie enflée en la plante de l'oiseau. Apres le lieras sur vne pierre de chaux, & deux fois le iour arrouseras d'eau ladite pierre. Et si il a vne fontaine au pied, prends du rosmarin, du plus viel, non pas de la fucille, & le fais ardoir, puis prends la cendre, & de l'oignement de blanc razis, huile rosat, & gresse de geline, meslez ensemble, & fais le tout bouillir en vn pot, & de ce laue le pied de ton oiseau, & il guérira.

Contre podagre, autrement nommee cloux ou galles, les signes, la cause, & le remede. CHAP. XLIII.

MAIS pour bien congnoistre les signes de podagre, ou autrement nommee cloux ou galles que les oiseaux ont és pieds. Tu les congnoistras facilement quand lesdits pieds enflent dessous, & ne se peuvent soutenir sur eux, mais s'appuyent sur leur poitrine. La cause est, l'enflure des iambes & des pieds, & humeurs du corps sur les pieds descendans. Le remede est, purger l'oiseau, comme il est escrit au chapitre, Pour purger l'oiseau en tous temps. Apres prends alun, mastic, encens, broyez ensemble: puis fonds miel, cire neuue, therebentine, sang de castor, gresse de geline, & y mets vin-aigre fort; de ces choses meslees, fondues & passees, fais oignement, lequel bien clos, durera en sa vertu deux ans: d'iceluy oingdras

oingdras les pieds, la perche, & le gand del'oiseau, & en mettras emplastre dessus la maladie. Tu passeras les doigts de l'oiseau dedans trous faits en l'emplastre, lequel apres lieras bien sur le pied de l'oiseau, tellement qu'il ne le puisse deslier: renouellant l'emplastre de trois iours en trois iours. Cest oignement luy fera sortir hors la podagre: & si le cuir des pieds estoit si dur qu'il ne peust creuer, perce-le tellement que l'ordure puisse sortir. Apres, pour rapaiser la douleur, mets dessus emplastre d'oignement, nommé diaculum, & s'il y a chair morte, mets dessus vn peu de verdegris.

Quand les ongles se descharnent, ou viennent droicts, & non crochus, le remede. CHAP. XLIII.



QUAND les ongles se decharnent, & sont en peril de cheoir, remets les doucement en leur lieu: apres puluerise les de bouë de fer, qui sont les esclats du fer quãd on le forge. Et lie l'oiseau sept ou huit iours, iusques à ce qu'autres ongles saillent. Ou prens arsenic, & mirrhe, tant d'vn que d'autre, meslez avec blanc d'œufs & vin-aigre, & oingts les pieds & ongles de l'oiseau, & le lie. Quand les ongles saillent droicts, & non crochus, mets en eau d'aloës, de la vessie sauuage, & grand polieu: & d'icelles oingts les pieds de l'oiseau. De rompure d'ongle, est escrit en la premiere partie de ce liure.

Quand l'oiseau ronge ou gaste ses pieds, la cause, & le remede.

CHAP. XLIIII.



QUAND l'oiseau gaste ou ronge ses pieds, la cause est vne maniere de fourmiere qui les gaste, & ceux des Esmerillons plus souuent que des autres. Le remede est, bats ensemble pouldre d'aloës, & fiel de bœuf, & de ce luy oingts les pieds deux ou trois fois le iour cinq ou six iours: ou fais secher au feu sur vne tuile, fiente de pourceau, & en fais pouldre: apres laue les pieds de l'oiseau de fort vin-aigre, puis mets dessus beaucoup de ladite pouldre, deux fois le iour, iusques à ce que l'oiseau soit guery. Et afin qu'il ne

Y

SECONDE PARTIE DE FAVCON.
puisse toucher de son bec à ses pieds, perce vne demie fueille de papier,
& la mets au col de l'oiseau en pendant deuant.

Contre vessie enflée en la plante de l'oiseau, le remede.

CHAP. XLV.

POUR mal de vessie enflée en la plante de l'oiseau, oste ses gets,
& le mets en spacieuse chambre, iusques à ce que ladite vessie
soit sechee : car si tu le portes au gibbier, elle croistra, cre-
uera, & seignera, & luy fera enfler les pieds.

Fin du liure de Fouconnerie.



L A

Fauconnerie de messire Arthelou-
che de Alagona , Seigneur
de Maraueques, Conseiller
& Chambellan du Roy
de Sicile.

11



Ombien que nul n'ignore que l'antiquité n'ayt eu cela de peculier pour la noblesse, que d'adresser les enfans des bonnes maisons à la chasse, tant pour leur donner cueur, & acoustumer aux dangers, comme aussi pour les renforcer, & rendre plus usitez au travail, & leur oster ceste delicateffe qui suyt les grans maisons: veu qu'à la suyte des bestes les ruses de guerre y sont obseruees: car on y dresse un escadron d'abbayeurs, les Chiens eourans sont aux flancs pour suyure l'ennemy, & l'homme à cheual sert de luy donner la chasse lors qu'il se prend à broffer, les trompes n'y manquant pour sonner le mot, & donner cueur aux chiens qui sont en deuoir: si bien qu'il semble que ce soit un camp de bataille dresse pour le plaisir de ceste ieunesse. Si est-ce que de la chasse sont procedez de grans malheurs. Meleager en perdit la vie, pour la victoire rapportee sur le Sanglier de Callidoine. Le bel Adonis fut tué par un Sanglier. Ateon fut deuoré de ses propres chiens. Cephale y tua sa chere Procris, & Acaste en fut interdit, ayant occis le filz du Roy qui luy auoit esté donné en charge, comme fut Brutus pour auoir tue son pere Syluis par mesgarde. Vn Empereur fut occis par la beste qu'il poursuioit. Vn Roy en courant à la chasse se cassa le col en tombant de cheual. Que qui craindra ces dangereux effectz qu'il s'addonne à la Vollerie, où il trouuerra sans doubte plus grand plaisir.

I iij

Table de la Fauconnerie de Messire Arthelouche d'Alagona.

E T P R E M I E R E M E N T.

D e l'election de l'Esperuier, Fueil. 88.a	Pour le mal de la pierre, 96.a
De l'election des Austours, mesme fueil. b	Des Vers, & des Filandres, mesf. fueil. b
De l'election du Fauco Pelerin, là mes- me.	De la Podagre, & sa medecine, 97.a
Du Faucon Saffir, & des autres, 89. a	De la goutte des rains, mesf. fueil. b
Pour faire essimer Esperuiers, Austours ou Fietceletz, mesme fueil. b	Des concussions de dedans le corps, mesme.
Pour faire vn oiseau a la guise de Lom- bardie, 90. a	Quand l'oiseau iette sa viande. 98.a
Pour essimer & faire Faucons. mesmes fueil.	Des ventositez, & la medecine, mesf. fueil. b
Pour oiseler toutes manieres d'oi- seaux. 92.a	Infirmitez du faye, & la medecine, là mesme,
pour tenir les oiseaux sains, & en bon estat, mesf. fueil. b	De la Tignolle, & sa medecine, 99. a
Pour cognoistre la santé de tous oi- seaux, 93. a	Des playes de l'oiseau, mesf. fueil.
Les signes des infirmittez, mesf. fueil.	De la complexion des Faucons, & comment ils se doiuent medeciner, là mesme b
Des nocumens de la vertu, là mesf. b	Des cauterres, 100. a
Des maladies de la superfluité. 94. a	Des chairs bonnes pour les oiseaux, mesme fueil. b
Pour cognoistre la maladie & la santé par l'esmur, & la cure, mesme fueil.	Des chairs restauratiues, & laxatiues, mesme fueil.
Pour les catterres medecine, 94. b	Chairs defendues, mesf. fueil.
Les signes d'Epilepsie, & la medecine, 95. a	Des choses qui font auoir faim, mesme fueil.
Du mal de la bouche, & de la mede- cine, mesme fueil. b	Des medecines laxatiues, & de leurs dozes, mesme fueil.
De l'asma ou Pantail, & la medecine, là mesme.	Des choses cordiales & confortatiues, 101. a
	Des choses qui font muer, mesf. fueil.
	Pour faire le lardon, là mesf. b
	Pour oster le poulx aux oiseaux. mesme fueil.

Fin de la Table.



FAVCONNERIE DE MES-
sire Arthelouche de Alagona.

De l'election de l'Esperuier.

L'ESPERVIER né en boys, en lieu sec, & le nid bas, est fort hardy, & doit auoir aucunes taches noires ou rousses pour son plumage: ceux qui sont nez en lieu de marcz, ou autre lieu fangeux & humide, tirant sur couleur fauve, sont plus forts & plus grans: mais que ce soyt en pays froid. Si c'est en pays chaüt, ils sont plus foibles & plus petis: combien que de toutes conditions s'en trouue de bons. Et selon Armodeus, les oiseaux noirs sont de plus forte complexion que les autres. Les Florentins disent que les Esperuiers qui ont la croix sur les doigtz, specialement sur la setre du milieu, en ceste forme X sont les meilleurs pour estre auantageux & bons.

L'Esperuier qui a treze pennes en la queue, & sur le iaune du bec a vne tache noire, comme vn grain de poiure, sont deux signes pour estre bons. L'Esperuier pesant est vn moult bon signe, selon Armodeus. Selon les Florentins, l'Esperuier qui a la couuerte noire, & pennage de trauers roux, & la maille noire & blanche entremeslee & brayer net, est des meilleurs qui se trouuent, & sont appelez blancs-noirs. Les Esperuiers roux sont bons apres les dessusdicts, selon Plinc. Les Esperuiers blancs, & fauves, sont bons apres les roux, & sont gracieux & paisibles. Les Esperuiers blancs-roux sont bös apres les bläcs-fauues, quelle que la couuerte soit: mais qu'ils aient la maille trauersee noire, & la teste noire, tirät sur le roux, & le brayer soit blanc & roux. Les Esperuiers roux-noirs söt apres ceux qui ont les signes du bläc-roux, excepté qu'ils ont le brayer obscur. Les Esperuiers avec deux plumages,

F A V C O N N E R I E

c'est assauoir, de deux couleurs, & nō de maille, sont les plus meschans. L'espreuier qui a le col long & estendu, est tenu pour lasche volleur, de quelque plumage qu'il soit. L'espreuier qui a le col court, & non trop, & a la teste platte, & bien proportionné de ses mēbres à l'aueuāt du corps, est tenu pour grand volleur.

Electiō des Autours.



A V T O U R S ou Tierceletz, nez en region chaude, ont peu de sang, & le peu de sang les fait estre couārs : car l'abōdānce du sang est ce qui leur donne hardiesse. Ceux qui naissent en region froide & humide, sont hardis. Ceux qui naissent en region attempee, sans estre trop chaude ne trop froide, par raison de la nature du lieu en quoy ils sont participans, sont attempez entre hardiesse & couārdise. Et pour les meilleurs Autours & tiercelets, ce sont ceux qui naissent en regions froides, dont les signes sont telz : ilz ont la langue & le bec communement noirastres, la teste longue & gresle en la sime du palais, le bec long & gros, le col long & gresle, les espaulles larges, la poictine rōde, & le siege large, la queūe moyenne, les iambes grosses & courtes, les piedz gros, & grandes serres, & bien onglees.

Electiō du Faucon Pelerin.



L E F A V C O N Pelerin esmeutist deffoubz le poing, & le Gentil faict le contraire. Le Pelerin se congnoist à la mue, car il se mue en Aoust, & le Gentil commence dès Mars, ou plustost. Le Pelerin est plus plain sur les espaulles, que les autres Faucons, de petites plumes bordees de rouffeur, ou de iaune, ou d'autre couleur selon sa couuerture : & a grās yeux & grands pieds, fort fendus & biens onglez. Le Pelerin a les yeux enfoncez, & le bec gros : & a le dedans des cuisses blanc, & les piedz & le bec de couleur verte plombée.

Du Faucon



Elon aucuns Fauconniers le Faucon Saffir se congnoist à ce qu'il a les couteaux plus longs que la queue, & a les signes semblans au Pelerin, sinon qu'il est plus petit, comme le Gentil, & est meilleur que le Pelerin. Il y a vne autre sorte de Faucons, beaux de corps, mais il sont petis: lesquels ont la teste plus grosse que les autres Faucons, & ont les signes de Gentils. Ce sont les plus nobles oiseaux du monde, & sont appelez Zechart. Entre le Gersaut & le Faucon n'a autre difference, fors que le Gersaut, monte plustost, pource qu'il monte par pointes. Les Lasniers qui ont la gerlande blanche en tour le col, sont les plus courtois oiseaux qui soient de leur generation. Et selon mon opiniõ, ils sont meilleurs pour Perdrix que les Sacres, pource qu'ils endurent plus de peine & de travail que nuls autres oiseaux. Et se peuuent reclaimer au poing, & arrester en toutes manieres & en tous lieux, soit la branche seche ou verde, mais contre-vent, les Sacres sont plus fors pour resister. Que si vn Villain, de quelque condition qu'il soit, se trouue bon, il est meilleur que les autres. Selon aucuns, les Sacres sont nommez oiseaux massés, pource qu'ils peuuent souffrir plus de peine & de travail que ne font les autres, & font meilleure digestion de grosses viandes. Ils sont moult excellans pour la Grue, Bistars, & prennent les Garfottes de leur propre nature. Ils sont bons pour les champs & pour riuere: & sont des plus nobles Faucons du monde en bonté, de quelque nation qu'ils soient & de meilleure disposition. Et si vous trouuez vn Sacre qui ayt les plumes souefues, & les doigts gros, tirans à couleur perse, la langue noire, & le col rouge, ou roux, ou soit iaune à couleur viue, ou gris, combien qu'il s'en treuve peu, il n'en est point de meilleurs. Les Faucons noirs sont tenuz pour les plus vaillans oiseaux qui soient, & les plus blancs sont les plus paisibles, & qui moins vont à l'arbre. Quant à la beauté des oiseaux, les Esperuiers, Autours, Tiercelets, & Faucons doiuent estre blancs tannez, tirans à rouffeur de poulaille: & doiuent estre grans & longs, & de gros plumage, bien net, & bien formé, la queue grosse & courte, gros bec, larges narilles, petite teste & platte, les yeux enfoncez, le col long & subtil, gros estomach, larges espaulles, & larges rains, courtes iambes, & longues serres, & bien fendues, les ongles deliez & aguz. Et si vous trouuez oiseau brun qui soit d'icelle forme, achaptez-le autant que le blanc. Neantmoins que de tous

Z

F A V C O N N E R I E

plumages s'en trouue de bons, si par deffaute de mal gouverner, ou de bon past, n'aduient, ou par non auoir bonne compaignie.

*Pour faire essimer Esperuiers, Autours, ou Tiercelets, sans
leur faire force.*

L faut prendre l'Esperuier, & luy mettre le chapelet, & à l'Autour & Tiercelet pareillement, avec le brayer, & ne les descouurez iusques à ce qu'ils se tiennent & paissent sur le poing, & qu'ils ne tiennent plus contre du chapelet. Et quand vous les mettrez sur la perche, liez les court, afin qu'ils ne se puissent descourrir, & puis les descouurez au soir à la chandelle, & les esbiouffez avec vin fort. Et quand vous les remettrez à la perche, laissez leur de la lumiere, afin qu'ils ne dormēt la nuit. Et au matin à l'aube du iour, prenez les sur le poing, & les portez entre gens, là où on face grand bruit, comme marelchaux, & autres semblables, pour l'asseurer, & ne leur leuez le chapelet iusques à ce qu'il soit temps de le paistre, & quād il seront pu, & oingts, remettez leur le chapelet iusques à midy, & apres luy presenterez l'eau, mais qu'ils ayent enduit, ou bien pres, & à heure de vespres les faites tirer entre les gens, & puis leur retourner le chapelet iusques à heure de le paistre. Et quād ils seront vn peu oingts, comme dit est, remettez leur le chapelet, & les tenez iusques à l'entree de la nuit, & incontinent qu'aurez la lumiere, leuez leur le chapelet entre gens, & le faites secourre & esmutir, & puis les remettez à la perche, comme dit est: & tous les soirs donnez cure de plume essuyee ou baignee. Et s'il estoit diuers, donnez luy la cure de cotton ou d'estoupes, on descoupez vne iambe de Lieure, selon qu'il sera diuers a essimer. Ne les reclamez point iusques à tant qu'ils soient assurez, car ils se rebouteroient du poing, & ne voudroient iamais arrester. Gardez que n'apprenez à l'oiseau de venir au gand, pource qu'apres il ne voudroit venir au poing. Et quand il sera assuré, commencez peu à peu de le reclamer, iusques à ce que le pourrez faire sans aucune filiere. Et notez que l'Esperuier se doit encharner bien assuré, & l'Autour demy sauuage, mais qu'il congnoisse la proye. Quand il sera fait, faites luy vn ou deux trains: & si vous voulez faire vn bon oiseau, mettez le tousiours sur le poing, iusques à ce qu'il soit encharné. Et soyez aduisé de ne restraindre trop l'oiseau avec past laxatif, ou avec peu past: car pour ceste cause plusieurs oiseaux meurent, mais avec bon

past le ferez meilleur, moyennant qu'il soit pu de bon past. L'Esperuier ou Autour doiuent estre tenus aux blocs depuis qu'ils sont faits, ou à terre: car ils ne se desrompent pas tant. Le Heron, le Bistard, le Corbeau, les Corneilles, & les Chouettes se volent de poing.

Pour faire un oiseau à la guise de Lombardie.



VAND l'Esperuier sera assure, faites luy neuf ou dix trains du moins. Et toutes les fois qu'il prendra, païssez-le tousiours, & faites que la Caille dôt vous ferez le train, ait tousiours quelque plume moins en l'aile, & luy iectez l'Esperuier de loing, par tant de fois qu'il la prenne bien loing, & puis luy iectez vne Caille qui ait les ailes entieres. Apres le pouuez faire voller à la sauuage: & toutes les fois qu'il prendra, païssez-le à sa volôte. Les Alemans treuvent les Tiercelets plus vaillans & plus legers que les Autours, pour Perdrix & Faisans. Si vous voulez faire vn Esperuier pour la Pie, desmembrez la Pie, & la luy iectez en terre, & le païssez dessus de past chaut, comme de Pinçon, ou chose semblable, par deux fois: & puis la luy pouuez iecter volâte & fillee, le paissant come dit est. Leuez à la Pie quelque penne de l'aile, & la iectez en vn arbre, & la luy faites prendre par aucunes fois, & luy faites le plus de plaisir que vous pourrez, & puis luy faites franchement voller la sauuage. Mais ayez en memoire quand luy faites lesdits trains, que la Pie ait le bec taillé ou lié, afin qu'e'le ne puisse gaster ledit Esperuier. Les Autours & Tiercelets sont meilleurs d'vne ou deux muës du bois & Agars, que ne sont les Sors: mais ils se doiuent nourrir avec past plus delicat que les Sors, car ils sont plus dâgereux, parce qu'ils ont accoustumé au bois d'eux paistre de viandes chaudes. Et si se perdent plus de leger que ne sont ceux qui sont prins hors, pour cause des airs: mais ils ne doiuent estre que de deux muës, sans plus.

Pour dresser & faire Faucons.



PRENZ le Faucon, & luy tenez la reigle de l'Autour, come deuant est dit, sinon qu'en le paissant, criez luy comme si l'appelliez au leurre, & tous les iours luy offrez l'eau, & luy donnez tous les soirs cure selon qu'il enduyra: & luy ostez souuent le chappelet entre gens. Et afin qu'il ne se batte, tenez tou-

Z ij

F A V C O N N E R I E

fiours quelquetiroüer en la main. Et le soir au iour failly, leuez luy le chappelet entre gens, à la chandelle, iusques à tant qu'il sestonne, & qu'il esmutisse, & lors le mettez à la perche & non pluſtoſt: & luy mettez la lumiere deuant luy. Et quand il ſera aſſeuré ſur le poing, commencez à l'aſſeurer ſur le leurre, & le luy faiçtes congnoiſtre & peu à peu le reclamez iusques à ce que vous le pourrez abandonner ſans filiere, & ſoyez aduiſé qu'incontinent que vous tiendrez le Faucon ſauuage, de luy oſter les poils, & ſ'il eſt mué de bois Agart, donnez luy le lardon. Tout Faucon a beſoin de compagnie pour luy monſtrer à arreſter, ſpecialement l'Agart, lequel ſe peut faire d'vne, de deux, ou de trois mues, & ſi eſt meilleur pour le Heron. Si le Faucon mué Agart ne ſe vouloit arreſter, taillez luy deux couteaux pour aïſle, le long, & le prochain de luy, & parce il arreſtera. Faiçtes luy le bec, & l'eſpincetez rationnablement. Les Alemans font tirer le Faucon ſoir & matin: mais les Fouconniers de terre d'Orienté ſont de contraire opinion & dient que ce leur gaſte les rains. Si vous voulez faire monter le Faucon apres qu'il ſera leurré & reclamé, & tout preſt: quād vous leurrerez, cachez le leurre, & le laiſſez paſſer. Et quand il ſera retourné deuers vous, ieçtez luy le leurre, & luy faiçtes grand feſte, & ce faiçtes par pluſieursfois, & puis commencez à le bouter en haut, en lieu plain ſans arbres. Et ſ'il prenoit quelque poinçte, donnez luy vn tour de gand, & quand il viendra haut, & qu'il vous ſera ſur la teſte, iettez luy le leurre où il y ait vn poulet ou vn pigeon, & le païſſez bien à ſa volonté, en luy faiſant le plus de plaïſir que vous pourrez. Et gardez vous que ne luy iettez le leurre en l'eau, afin qu'il ne l'apprehende, & quand il ſera haut, & que d'auanture il allaſt apres quelque autre oiſeau, & qu'il le print, leuez luy la proye lourdement, & luy en donnez par la teſte, & luy remettez le chappron ſans le païſtre, & par ce deſplaïſir il n'ira plus qu'à ſa proye. Quand le Faucon aura prins ou tué aucun oiſeau, leuez luy & le boutez haut, & quand il vous ſera ſur la teſte, iettez luy le leurre, & le païſſez à ſa volonté, & ce afin qu'il ayme mieux le leurre. Mais pour la premiere prinſe qu'il ſera, laiſſez le païſtre à ſa volonté, & cela le gardera d'aller au change. Quand il ſera bien encharné, faiçtes le voller en compagnie, iusques à tant que vous en ferez bien vn ſeur. Si vous voulez faire vn oiſeau pour Grue, faiçtes que le Faucon ſoit Gentil & niays, & quand vous le nourrirez, faiçtes luy tuer les plus grands oiſeaux que pourrez finer: ſon leurre doit eſtre vne grue ſainçte. Et quand vous le voudrez faire voller, faiçtes le vol-

ler du poing, & le secoüez tost, & faut qu'il ayt des leuriers pour luy ayder, lesquels le secourront plustost que les hômes, & que le leurier mange tousiours avec l'oiseau, pour cause de la cognoissance. Si voulez faire vn Faucon pour Lieure, son leurre doibt estre vne peau de Lieure plaine de paille. Et quand il sera bien leurré, & que le voulez encharner, liez ladicte peau d'une petite corde, laquelle soit attrachee à l'arçō de la celle, & quand vous courrez, il semblera que le Lieure courre: lors soit descouvert le Faucon en criant, arriere Leurier, arriere Leurier. Et quand il ioindra ladicte faincte, laissez la corde, & il la prédra, & lors le païssez tresbien dessus, & le festoyez le plus que pourrez. Et quand la secōde fois vous l'écharnerez, ne vous arrestez pas du premier coup, mais contraignez le vn peu, & puis vous arrestez, & ainsi peu à peu le laisserez battre le plus que vous pourrez: car ainsi le conuient faire au saunage, le paissant tousiours entre les Chiens. Et quand il sera bien encharné en ceste maniere, ayez vn lieure vif, & luy rompez vne iambe de derriere, & le laissez aller en vn beau plain entre les Chiens, & vostre Faucon le battra, & les Chiens le prendront: & incontinent soit leué aux Chiens, & ietté au Faucon, en criant, arriere, arriere. Si vous voulez que vostre oiseau volle le Faisant, ou la Perdrix, quand vostre Faucon sera fait & reclamé, toutes les fois que vous le leurrerez, iettez luy le leurre en quelque arbrēt ou petit buisson, afin qu'il aprenne de soy arrester, & de prendre la branche. Et s'il s'arreste sans veoir le leurre, laissez le vn peu musier, & puis tirez le leurre deuant luy, en criant, gare, valet, gare, & le païssez à son plaisir, & en ceste maniere il accoustumera de soy arrester, en le paissant tousiours en terre, & en fort lieu, pource qu'en tel lieu luy conuiendra faire la chasse. Et luy faictes voller au commencement Faisant ou Perdrix ieunes, pource qu'il aura grand aduantage sur elles, puis apres les vieilles. Si le Faucon ne vouloit arrester, & qu'il se voulust tenir sur aïlle, adonc luy conuiendra voler en lieu plain, afin que le puissiez veoir tousiours sur vous. Les Sacres & Lasniers arrestent en terre, & en arbres: & les Gentils arrestēt mieux en terre. Et quand vous tirez vn oiseau de la muē, ne le portez pas par temps chaut, pour cause du battre, car par chaleur luy vient l'asma. Mais si c'estoit par necessité, soit couuert du chapelet, en le contregardant le plus qu'on pourra. Si vn Faucon estoit superbe & orgueilleux, donnez luy avec son past sal. Inde ou sal-geme, drag. j. ou sal-albi pulverizati, & luy presentez l'eau, pource qu'il aura besoin de boire, & le faites dormir la nuit à la tourmente, & que soit en lieu humide, ou

froid, & ainfi veillera toute la nuit, & luy fera diftiller la graiffe. Les Sa-
 cres fe doyuent encharner incontinent qu'ils font faiçts, autrement ils
 font difficiles à encharner. Tirez vofre oifeau de la mue 20. iours auât
 que le effimer. Si vn Faucon lie, fi l'en voulez garder, efpincez luy
 les maiftreffes ferres. Iamais ne faites chere au Faucô de l'oifeau de ri-
 uiere, mais faites luy grâd chere du leurre, afin qu'il l'ayt en plus grâde
 amour. Le Soldan fait voler les grues, les Oyes, & les Biltars, avec
 deux, ou trois, ou quatre Faucons, ou plus du poing, & de toutes
 generations de Faucons, Sacres, cerfaulx, Villains, & Pelerins, & puis
 on les peut faire voler de montee. La grue fe doit voler deuant
 Soleil leuant, pource qu'elle est paresseuse: & pouuez bouter deffus
 deux ou trois Faucons, ou avec les Austours du poing, & fans Chien.
 Les Oyes se doyuent prendre par celle mefme maniere, & fi tant est
 qu'ayez des Chiens, faiçtes qu'ils foyent propres à cè faire, & doyuent
 estre Leuriers courtois & doux. Il ne fe doit voler qu'une Grue le
 iour, & faire à vofre oifeau le plus de plaifir que vous pourrez avec
 ladicte grue. Le Villain fe doit bouter le vent à la queue. Les Alemãs
 font voler la Pie avec trois ou quatre Faucons, & les font monter &
 battre comme pour riulere, en lieu plain & fans arbres: mais il y doit
 auoir de petis buiffons. Paistre ton oifeau par temps & matin, fait auoir
 fain aux oifeaux à heure de chaffer, fpeciallement aux Faucons qu'on
 veut faire monter, & qu'ils ne foyent trop hantains, lesquels fe doyuent
 paistre par neuf iours quatre heures auant Soleil leuant, & le foir à la
 frescheur, & avec celle fain on les doit bouter haut: & par ce ils irôt
 plus haut qu'ils ne fouloyent, mais le meilleur est de les faire voler en
 campagne. Les Faucons Gentils arreftent mieux muez que Sors. Le
 Faucon ne prent le Hairon par nature, s'il est Pelerin, & pource leur
 faut apprendre les trains. Vn Faucon peut voler dix oifeaux de riuiere
 le iour, & non plus felon raifon. Les Faucons qui vollent pour riuiere,
 fe doiuent tousiours porter fur le poing. Auant qu'un oifeau foit bien
 faiçt, doit auoir quarante cures. Les Faucons qui n'ont la cure tous
 les foirs, la superfluité des humeurs, qui leur abondent en l'estomac,
 leur charge la teſte, par maniere qu'ils ne vont point fi hault comme
 ils fouloyent. Et parce tout oifeau doit auoir la cure tous les foirs,
 felon nature, pour estre fain & affamé. Et est bon de les faire tirer au
 foir, principalement ceux qui vollent perdrix: & ceux qui vollent
 pour riuiere non, afin qu'on ne leur affoiblisse les rains. Et leur doit on
 presenter l'eau de deux ou de 3. iours en 3. iours, pour le plus loing. Ne

touchez iamais les pennes de vostre oyseau avec les mains, car il en vaudroit pis. Le Villain & le Lasneret se peuuent tenir sur la pierre incontinent qu'ils sont faitz. Quand vostre oyseau aura vllé ou trauaillé, ne le païssez iusques à tant qu'il sera hors de la grosse alaine. Et si vous faictes autrement, vostre oyseau sera en peril de deuenir asmatique. Si vn Faucon ou autre oyseau estoit fort rebouté, ce qui aduient bien souuent, faictes tant que le fassiez iouyr de quelque proye, & le laissez paistre à sa voulôté. Et que celle nuit il demeure dehors au serain à son plaisir. Et le lendemain le reprenez, & l'estimez en oyselliers, ne plus ne moins que si vous le tiriez hors de la mue. Si vn oiseau ne veult lier, mettez vn canon de plume d'Oye à la maistresse serre, & il ira le pied ouuert, & il liera. Et quand il commencera à lier, ostez luy ledit cano, & il liera tousiours. Si vous ne pouuez donner couuerte à vostre faucon ou Austour, faictes que vous luy mettez le Sourcil à la queuë. Tous oyseaux se peuuent faire voller de fault, & en toutes manieres que les ferez voller, faites que l'Austour aille le vent à la queue.

Pour oyseller toutes manieres d'Oyseaux.

RAIN des Perdrix, Chouettes, Corbeaux, & Corneilles, se doiuent faire sillez. Pour oyseler vostre oiseau: faictes vne petite fosse en terre, & y mettez vostre proye, & la couurez d'une planchette, la quelle soit attachee d'une filiere, que vous tiendrez en la main pour la descouvrir & laisser aller quand vous voudrez: puis ferez semblant de faire chercher voz Chiens, & tiendrez vostre oiseau tout descouvert: & quand il regardera celle part, faictes partir vostre proye, comme si les Chiens l'eussent fait partir, & si vostre oiseau la prent, laissez le paistre à sa volonté en terre, & ce faut faire plusieurs fois. Si vous voulez faire vn bon oiseau, encharnez le à ieune proye, car il s'efforce tousiours de peu à peu: & par temps il surmôté bien le faisant & la perdrix. Et quand il a prins, faictes le iouyr par plusieurs fois de la proye à sō plaisir, & à terre, & quand il sera bien encharné, ne le païssez iamais que du masle, afin qu'il se prenne en amour, & luy faictes seulement plumer la femelle, en luy donnant le cœur ou le cerueau. Encharner les oyseaux à ieune proye est beaucoup meilleur qu'à vieille: car la plus-part qu'on met à la vieille se rebouttent, si vous ne faictes comme dessus est dict. Si vous voulez enoyseler vn oyseau Agart, ne le charnez point de ieune proie,

pource qu'apres il ne voudroit voller les vieilles. Et pareillement l'oïseau que vous tirez de la muë, ne le faites point voler aux ieunes pour la mesme cause. Le train de l'Autour, & de tous oïseaux en general, cōme à Grues, Bistars, Hairons, Oyes, oïseaux de riuere, Cormorans, Corneilles, Choüettes, Milans, Cercelles, & tous autres oïseaux de eaux se fait comme s'ensuit. Mettez vn desdits oïseaux en l'eau, & qu'entre vous & l'eau y ait quelque motte ou buisson, en maniere que l'Autour puisse prendre la couuerte, puis haüſſez la main tant que l'Autour voye la proye, apres baïſſez la main, & le laissez aller. Et s'il la prent, laissez le paistre à sa volenté, à terre. Pour faire voler Autour en riuere, faites le voller selon le train dessusdict: mais quand l'Autour sera pres, touchez le tabourin de bonne heure, & auant que l'oïseau voye l'Autour, pource qu'il ne se leueroit. Les Autours qui volent le Lieure, doiuent voller avec les entraues, afin qu'ils ne s'ouurent trop. Les Esperuiers vollēt de saut aux oïseaux qu'ils peuuent prendre comme fait l'Autour. Si vn oïseau s'efforce, prenez luy deux pannes du meilleur de la queuë, & y mettez la quantité de deux grains de mil d'argent vif, en chacune, & les estoupez en maniere qu'ils n'en puissent yssir, ou luy couſez la queuë. Iacob de Mestrette plumoit l'Esperuier sur le cropion, & avec vn cautaire cuissoit ou destruisoit le petit grain qui est en celle part, & disoit que iamais ne s'escarteleroit.

Pour tenir les oïseaux sains, & en bon estat.

SI auez vn ieune Faucon, incontinent que vous le commanderez à le faire, donnez luy l'aloës cicotrin, pour ce que beaucoup meurent de vers, pour le changemēt du past: & de quinze en quinze iours, trois pieces de celidoine, ou vn peu d'aloës.

Ne leur donnez iamais medecine s'ils n'en ont besoin, pource qu'il leur conuiendroit faire par coustume. Qu'en Feurier ou en Mars soient donnees les medecines, pour rompre les œufs, mesmement aux Agars, & ceux qui sont muez au bois. Ne païssez iamais les Esperuiers sur le gand du Faucon Villain ou Gentil, car il en prendroit maladie. Ne le metez à perche où ayent esté Faucons. Ne tenez iamais oïseaux sains avec les malades, car leurs infirmités sont contagieuses.

Pour

Pour congnoistre la santé uniuerselle de tous oiseaux.

Les sages disent qu'il est impossible de cognoistre l'infirmité, si premierement on n'a la cognoissance de la santé, qui est telle. Quand vous verrez vostre oiseau le matin à l'aube du iour qui se remuë la queue, & la vantelle, & secouë la plume pour l'amour de l'aube, & apres leue les ailes, & avec le bec prent en quelque lieu de sa croupe aucune graisse, dequoy il se oingt à dextre & à senestre. Et ceste curée est appelée onction seable. Et sil le fait aux deux parts des aisles, c'est signe de santé: que sil ne le fait d'une part ne d'autre, sachez qu'il est contraint de forte & grande infirmité: & les signes de la santé du iour, sont que vous verrez vostre oiseau allegre, & qu'il se paist esgallement de quelque past que ce soit, & son esmut est continuellement digest, & non en partie, & fort blanc, & le noir est fort subtil, & l'oiseau est reluisant de plumage, comme sil fust oingt, & les deux os qui sont aupres des cuisses sont egaux, sans difference, & les deux veines qui sont en la raze des aisles battent toujours attrempeement entre fort & foible, & qu'il dorme bien la nuit, & qu'il enduisse bien sa viande raisonnablement: & nonobstant, sil enduit bien & il ne dort, il a aucun grief excez, si ce n'estoit pour les pouls qui l'engardent de dormir.

Les signes des infirmités uniuersellement.

Il y a de trois sortes d'infirmités es oiseaux: c'est assauoir en la disposition de l'egestion, au mouuement de la vertu, en la superfluité du corps. Premieremēt de la disposition de l'egestiō. Quand vous verrez l'oiseau clourre les yeux, & qu'il en ysse aucune larme ou humidité, adonc pouuez considerer que quelque chose estrange doit estre dedans. Et si l'oiseau ferme la deuxiesme ou troisiemesme partie de l'œil, ou vn pié, & reboute l'autre, & qu'il hausse son plumage, sachez qu'il est refroidi. Quand vous verrez que l'oiseau ouurira le bec, & qu'il alaine la langue, & la forame part des yeux engrosse à entour, & qu'il couche les pannes & les aisles, sachez qu'il souffre extreme chaleur. Quand vous verrez l'œil de l'oiseau clos, & qu'il le tienne au costé de son aile, & les veines qui sont entre les yeux battēt & pousset, sachez qu'il a frenaisie au chef, & estourdissēmēt. Quand vous verrez le palais blâchir, sachez qu'il a corrosion

A a

ou arsure. Si vous voyez que vostre oiseau ouure le bec , & remuë la teste , & se battë en la poiçtrine , & en ce faisant demene la queüe , & qu'il semble estre troublé, sachez qu'il est asmatique. Quand vous verrez vostre oiseau palpabier doublement, sachez qu'il a ventosité en la teste. Quand vous verrez l'oiseau esbahy sur la perche, sachez qu'il peut estre greué. La debilitation des aisles, signifie vétositez en celle partie. L'influence de la gorge sans past , signifie ventositez en ladite partie. Quand l'oiseau se tient mouillé sur la perche , ce signifie ventositez és rains. La rupture des pieds, ou la creuasse , & qu'il en sorte eau continüë, signifie emorroides. L'inflation des pennes signifie rouverte, ou distillation, ou ventosité. Quand l'oiseau est sur la perche , & qu'il se veut virer vers vous contre sa nature , & s'il trauaille & ne se peut soutenir, c'est signe qu'il est podagreux. La constriction du bec, & l'appuyer sur la poiçtrine, & l'abomination de la viande, augmente la podagre. L'inflation sur la cheuille du pié, & la despoliation du poil , signifient vers. L'herissement des plumes sur le col, & extreme debilitation de couteaux, signifient grande & outrageuse chaleur.

Des nocumens de la vertu.



Pres que vous verrés l'oiseau mussé tout en son plumage, & qu'il ne tourne la teste ne le col, sachez qu'il est malade du chef. Quand l'oiseau siffle ou crie , cela signifie grande chaleur, ou arsure. Quand il se paist, & il se gratte de l'ongle le palais iusques au sang, & qu'il ne se peut paistre, cela signifie chaleur audit lieu, & peril de châcre. Et s'il machote du bec l'un contre l'autre, cela signifie comme le precedant. Inégalité du paistre & debilitation d'oiseau, signifie chaleur. Le bec clos & sans alteration, signifie grand trauail, & grande infirmité. Si l'oiseau ne veut prendre la chair ou le past si tost qu'on luy presente, signifie indigestion. Et si vous le voulez sçauoir, faut odorier son aleine, que si elle put , signifie indigestion. Si l'oiseau iette la chair de son bec en la paissant , & la gorge qu'il prendra luy demeure sans enduire, signifie indigestion. Si l'oiseau gratte la dextre partie du bec, signifie douleur au faye . Quand l'oiseau vantelle à la perche, & qu'il fait grand ventosité quand il digere, signifie qu'il a ventosité dedans le ventre. S'il grippe la chair, & qu'il la face prendre, signifie qu'il a ventositez dedas les plumes, ou és iambes , ou és cuisses. Si vn oiseau trauaille quâd vous le portez sur le poing, signi-

fié qu'il a quelque cure dedans le corps. Retardement de la digestion, signifie restrinction de fondement, & la tardation de la cure signifie indigestion. Quand vous trouuerez le past aux intestins mol comme eau, & l'a en gorge dur, cela signifie engendrement de la pierre. Quand vn oiseau se bat à la perche, & qu'il tombe, & ne peut remonter dessus, celà signifie la mort: si ce ne prouient par la faute de ceux qui l'ont attaché.

Des maladies de la superfluité.

Mais parce qu'on dit qu'il y a cinq manieres de superfluité, il est bien necessaire de les scauoir: la premiere, sont larmes & eaux des nerfs: la seconde, ventosité: la tierce, vomissement: la quarte, la cheute des pennes hors de saison: la quinte, l'escail ou esmail. S'il iette eau des yeux, signifie que quelque chose est cheute dedans: & s'il iette humidité par les nazilles, cela signifie qu'il est malade de rheume. S'il se plume le ventre & les cuisses, cela signifie vers estre dedans le ventre.

Pour congnoistre la santé & la maladie, pour la cure & par l'esmut.

DEN est vray que la cure baignee ietee de bon matin, est signe de santé, & s'elle est essuyee, signifie superfluité & chaleur, & si elle est puante, signifie indigestion, & si la cure est molle & visqueuse, signifie abondance de flegme. Si l'esmut blanc ou tanné est visqueux, celà signifie bõne digestion. Quand vous verrez l'esmut mol, jaune & rouge entremeslé, & que la moleste multiplie, signifie indigestion. Et quand vous verrez l'esmut liquide, & qu'ad vous le tirez qu'il se sèche à coup, signifie engendrement de la pierre, secourez le hastiuement, car ceste infirmité est mortelle. Si l'esmut est gras, & qu'il file, c'est signe de restrinction du fondement. Si verueur d'esmut continue, & qu'il demene peu souuent la queue, & qu'il boiue eau, signifie que le fondement est retrainct. La blâcheur de l'esmut qui tire à citriniré, & la multiplication d'humidité, signifie indigestion. Et quand l'esmut est noirastre & entremeslé de blanc, & qu'il ait de petites bubettes parmy, signifie ventosité. Et notez que quand vous medecinez l'oiseau, faut continuer les medecines selon la qualité du mal.

A ij

Puis que ie vous ay parlé de la nature & gouuernement des oiseaux, ensemble des infirmités & maladies qui leur peuuent suruenir, ainsi comme est dit cy deuant: c'est raison que ie vous die des remedes necessaires à l'encontre d'icelles pour les guerir.

Et premierement pour les catarres des oiseaux.



POUR bien cognoistre aux oiseaux les signes du catarre, vous les congnoistrez quand la teste & les yeux luy enflent, les nazilles luy estoupent, & aucunesfois luy descéd par lesdites nazilles eau ou morue grosse, specialement quand il esternuë: & ouure la bouche souuent pour prendre son halcine, & tire la langue dehors, & ronfle, & les deux veines de dessus les yeux, par lesquelles les larmes luy descendent, luy bartent plus souuent & plus fort qu'elles n'ont accoustumé.

La Medecine.

Donnez luy aloes cicotrin, chacun soir avec du cotton, & luy dōnez des pillules de yera ex octo rebus, ou des pillules cochees, lesquelles se doiuent donner au matin: & les trouuez au liure de nicolas, & le faites tirer au matin quelque chose nerueuse. Et si par celà ne guerist, mettez tremper la pouldre de staphisagre en eau, enuolopee dans vn draplet, & avec iceluy baignez-le, & luy mettez dans les nazeaux. Et si pour cela ne guerist, prenez ladite pouldre & luy en mettez és deux parties du palais, & és deux parties des nazilles, & par la force de ceste pouldre il iettera bien. Et si l'oiseau ou Faucon auoit poër ce trop de peine, vous luy lauerez la bouche & les nazilles avec vin, iusques à ce qu'il ait mis hors ladite pouldre, & apres oignez le souuent avec miel, ou avec sirop de violettes, & ce luy fera passer iceluy trauail & peine. Et si pour cela n'est guery, luy soit dōné le feu au derriere de l'œil au milieu de la teste sagement: en maniere que ne luy ardez l'os de la teste, & luy soit donné feu aux deux parts: c'est assauoir, en chacune nazille, & qu'il aille vers la teste par dedans les nazilles contremōt, tant qu'il perce iusques au cartillage de la teste, lequel feu soit medeciné & oingt par neuf iours d'huile rousat & vitelli ouorum. Et ce ne se fait sinon quād il aura les nazilles tant estouppees. qu'on ne les peut desclorre par medecine. Et cōbien que vous luy ayez donné le feu, faites tousiours les medecines dessusdites iusques à la fin. Si l'oiseau a lavuë aucunmēt trou-

blee ou obscurcie par ledit mal, soit fait R. Aquæ plantaginis, feniculi, ruthæ, verbenæ, celidoniæ an. Dequoy vous luy lauerez les yeulx. Et s'il y auoit aucune concussion, en lieu de celidoine, ruthæ, bouttez y vn peu de canffre. Le chappelet doublé d'escarlare est mout profitable pour le catarre.

Les signes d'Epilepsie és Oiseaux.



YANT l'oiseau ceste maladie d'Epilepsie, il tient la teste haute tant qu'elle touche les ailes, & biē souuent les espaules, & subitement se laisse cheoir en arriere à terre, & à reuers: & là se tourné & vire, par la grand'angoisse qu'il sent, & aucunes-fois demeure comme mort. Laquelle infirmité les prent souuent le matin, & le soir apres qu'ils sont puz, & ont les palpebres des yeux enflees, comme s'ils eussent la pierre, ou qu'ils eussent le catarre: & quasi continuellement tiennent les yeux ferrés, & leur alaine put fort. Et quād ils esmutissent, ils s'espraignent fort, comme s'ils eussent la pierre, & ces signes sont plus ou moins, selon que les oiseaux sont passionnez, ne perdans point le manger par ceste maladie.

La Medecine.

Le premier iour, faictes vomir vostre oiseau, & l'autre apres faictes le esternuer. Et quand vous ne le ferez point esternuer ne vomir, donnez luy de aurea Alexandrina, enuiron la grosseur de deux poys chiches, à ieun, & quelque petit morceau de chair: & au soir donnez luy vne pillule de yera ex octo rebus, cum agarico, en la plume. Et ce deuez faire continuellement iusques à ce qu'il soit guery. Et quand il sera bien purgé par les purgations dessusdictes, donnez luy vn cautere au milieu de la teste, on derriere des yeux, qui profonde iusques à l'os. Et si par ce premier cautere ne guerist, donnez luy-en vn autre, vn peu plus arriere vers la nuque. Cassian guerist vne epilepsie, cum yera pigra, cum succo absintij, & de ce faictes pillules, & les dōne en la plume, vne fois de l'vn, & autres fois de l'autre, iusques en fin de guerison. Et Moymon fauconnier Arabique luy donnoit vn pillule faicte de gomma balsami, & castoreo, cum succo mentastri, & leur mettoit en la gorge vne pierre de castoreo, gros comme vne petite feue. Que s'il la reiette, luy soit retournée: & garde que la goutte de

Aa iij

la teste ne descende.

Du mal de la bouche.

B I E N souuent on cognoist ceste maladie de bouche par le voir, laquelle se veut secourir hastiement: car qui tarderoit à medeciner l'oiseau, elle tourneroit en chancre, & l'oiseau mourroit. Pour ce vous deuez nettoier le lieu de ces petits grains, & petites pustules qui viennent en la bouche, avec vn ganiuet bien tranchant, & apres l'oindre de miel rosat, ou sirop de moures, ou avec sirop d'ecorce de noix: & chascun soir luy donner avec la cure de l'aloës cicotrin, ou vne pillule de yera ex octo rebus. Et si la maladie estoit si grâde que pour ce ne peust guerir: apres que la teste sera purgee, luy soit donné le feu aux deux boutz du mal, d'un bout iusques à l'autre. Et si aucunement luy venoit au palais vne postume dure & grosse comme vne demie nouzille, laquelle le garde de manger, soit ostee toute celle apostume avec vn boutonnet de feu, qui aille iusques à la chair viue, & qu'il n'y demeure rien. Chose esprouuee à tout mal de bouche.

Oignez souuent le lieu malade, avec aceto squilitico. C'est vne façon de vin-aigre, qui est fait comme vin-aigre rosat: mais en lieu de roses on y met vn oignon sauage, qui croist pres de la Marine: ou le medecinez de l'aloës cicotrin, & miel rosat. Et le dernier remede est, que le lieu soit cauterisé, comme dit est, & au milieu des deux yeux sur le commencement du bec, luy soit donné vn bouton de feu, avec instrument d'argent, & soit gouuerné ledit feu cum oleo rosato, & vitellium simul mistis.

De l'asma, ou pantail.

P A R C E que ceste infirmité vient souuentefois aux oiseaux, on la congnoist quand ils ouurent le bec, & ne peuuent bonnement auoir leur alaine, & demeinent la teste, & ont les yeux larmoyans, en alenant le ventre leur bat, & remuent la queue, & tirent & mettent hors leur alaine souuent. Et quand le mal leur engrege, vous les ouïriez si fort ronfler qu'à grand peine peuuent auoir leur alaine.

La Medecine.

Donnez leurs des pillules de yera ex octo rebus, cum agarico & salis gemmæ. Et leur dōnez avec leur viande puluis pulmonis vulpis, ou leur baignez leurs viandes avec les eaues qui s'ensuyuent, ou avec vne toute seule: C'est assauoir, Aquæ scabiosæ, cappilli Veneris, prassi. celidoniæ, donnez leur avec leur viande, sang de bouc frais ou sec, préparé en vne desdictes eaux, & des penites, & de liquiritie en poudre: ou leur baignez leur viande en eau de vie, en quoy ayent trempé les herbes susdictes par xxiiij. heures, avec regalice. Ou R. ysopi yeros, prassi, liquiritiæ oleum ros. hieræ pigræ, puluis vulpis, gentianæ & scabiosæ, enulæ campanæ, omnia puluerizentur & cum modico butyro incorporentur, & luy soit administré. Bonnes pillules pour le mesme, R. ysopi, aloes 3. vj. agar. 3. iij. masticis, colloquintidæ, cercollæ an. 3. ij. sticados, assa foetid. scamoniæ. an. 3. j. s. fiant pillulæ admod. ciceris. Et avec lesdictes pillules, luy soyent donnees deux cauterres, vn au plus haut de la teste, & l'autre au fourchu de la poiëtrine. Selon Anthonel Spinello, mais que l'oiseau se puisse paistre, iuy soit donné avec la poiëtrine d'un pigeon chault, vn peu de miel despumato, cum limatura ferri, ad quantitatem vnus ciceris. Et disoit qu'en trois iours estoit guery l'oiseau, & specialemēt l'Esperuier. Et le dernier remede quand il est purgé, luy soit donné le feu, comme dit est. Et nonobstant ce, on luy doit apres donner aucunes des medecines dessusdictes, iusques en fin de guarison. Notez que quand l'oiseau est meigre, & le mal du pantal luy dure longuement, il est incurable, & ne le peut on guerir.

Pour le mal de la Pierre.

MAIS on dit que si l'oiseau a la pierre, que vous le pourrez cōgnoistre à ce qu'il aura les pieds enflés, & les nazilles estouppees, & leuera volontiers la queue deux ou trois fois auant qu'il puisse esmutir. Et ce qu'il esmutira, sera mol comme eau trouble, & aucunesfois quand la pierre sera endurcie, il se mordra le fondement, & esmutira long, vne fois cà, l'autre là. Et aucunesfois quand il esmutira, vous trouuez de grans blancs comme chaulx endurcie.

La Medecine.

Donnez luy avec la cure, ou sans la cure, des pillules de yera pigra Galeni, chacun iour, & luy faictes deux fois le iour vn suppositoire

d'un lardon puluerisé avec poudre d'Yera pigra de Galeni: & luy donnez avec sa viande, lard de porc salé fondu, & le fondant laissez le tumber en l'eau froide, & puis apres recueillez le avec vne cuillier, & de ce soit oingte sa viande, ou bien la luy baignez avec les eaux qui s'ensuyuent: C'est assauoir, de veruene, lymons, capilli veneris, alcacagé. Ou bien luy donnez avec sa viande, de la poudre qui s'ensuit. R. lapis sponcij, & sang de bouc préparé, ou frais, qui est plus fort, semen millefolij, & saxifragæ. Et si pour cela ne guerist, vous luy pourrez encores donner enfermé en vn boyau ce qui s'ensuyt. R. succi limonis, verbenæ, fistulæ, lapis spongiæ, lapis lincij, sang de bouc préparé, mille-folis, saxifragæ, oleum oliuæ antiquæ: & le tout soit bien incorporé ensemble, & soit mis apres dedans vn boyau, & luy faites prendre. Et aussi pareillement luy pourrez donner deux fois la semaine, le pastilaué en huile. Plusieurs sont d'opinion que ceste medecine suyuant luy est fort bonne. R. sanguis hirci, semen acedulæ, lactuca, portulacæ, spice nardi, galangæ, semen saxifragæ, millefolij, puluis pilorum leporis, & de sanguine eius, incorporentur cum succo limorum, & soit administree & baillée par bonne quantité. Et si pour tout cela l'oiseau ne guerissoit, apres qu'il sera purgé, avec les medecines dessusdites, luy faudra donner le feu sur la teste, & au milieu, comme pour le catarre, & luy en soit donné apres vn autre qui prenne depuis le bec, & ailles iusques à l'autre, tout ainsi comme vous verrez par l'enseignement des cauterres cy apres mis.

Des Vers, & des Filandres.



SI vous voulez cognoistre quand vn oiseau a les vers, filandres, ou aiguilles, vous le cognoistrez à ce qu'il baaille souuent, & estrainct les espaulles, comme si on le piquoit, & demene la queue ça & là, & tremble quand vous le mettez sur le poing, ou quand il se debat. Et quand vous l'aurez pu, il se plumera avec le bec, là où il se sentira auoir les vers, & digere la moytié de sa viande, & iette l'autre. Apres qu'il est pu, il se frotte volontiers l'œil à son aille, & est tout menlancolieux, & à la parfin se gratte les nazilles bien fort avec les ongles.

La Medecine.

Donnez luy vne pillule faite en ceste maniere. R. partes ii. Reubarbari, &

bari, & cum succo centaureæ & absintij, fiant pillulæ. Ou luy donnez thiriaca, avec semen contra, & luy faites suppositoire de fiel de bœuf, aloes, centaurea, & miel. Le diptamum tire les vers, & pareillement fait la pouldre du zeduari. Le meilleur remede pour vers qui sont dans les intestins, c'est le Reubarbarum. Vne autre pouldre bien profitable pour filandres & aiguilles. R. zeduarij. 3. j. rad. enulæ campanæ, aristologiæ rotundæ, semen caulij an. 3. j. cornu cerui combusti, aloes cicutrin, reubarbari, fileris montani, an. 3. v. succi rad. yereos, rad. cucumeris agrest. pulpæ colloquintidæ, semen cartami. an. 3. vj. de laquelle vous pouuez donner la grosseur d'une petite feue à chacune fois, enuelopee d'un petit boyau. On peut baigner sa viâde en eau de porcelaine, d'ozeille, d'absinçe, & de centaurea, & ce est pour Esperuiers. Plus vn emplastre qui s'applique sur les rains pour filandres & aiguilles, on luy en doit baigner les rains, & apres luy lier vne esponge dessus, & la tenir baignee incessamment de la composition qui l'ensuit. R. centaurea minor, ruthæ, absinthij, casti, mentæ, persicariæ, dymptami, farinæ lupinorum, aloë, galbani. Et toutes ces choses soient destrempees avec fiel de bœuf, & fort vin-aigre, par l'espace de vingt quatre heures, & soient appliquees.

De la podagre.



Vant à la podagre, ce n'est autre chose que chancre, & se cognoist par l'enfleure des pieds, dessus & dessous les doigts. Et aucunesfois l'enfleure est molle, & aucunesfois dure cōme pierre, & aucunesfois la veine de la iambe luy enfle, & la partie de dedans la iambe deuient rouge, & aucunesfois dure comme pierre, & aucunesfois luy vient en vne partie du pié.

La Medecine.

Faites luy ceste medecine. R. aquæ vitæ part. ii. aceti rosati part. iii. sulfuris, cendali rubei, aluminis, galangæ, salis armoniaci, an. part. i. Et ce mettez en motte en vn vaisseau de verre par vingt quatre heures, & puis l'appliquez en ceste maniere. Enuveloppez les pieds de l'oiseau d'estoupes, & les liez avec vn filet, afin qu'elles ne puissent tomber, & apres baignez les estoupes avecques la dessusdite cōionction, & luy laissez par vn iour naturel, & soient tousiours baignees. Aucuns luy baignent les pieds au commencement de l'infirmité, cum succo ebulo. &

Bb

aceti rosati, in quo temper. sanguis dra. boliar. terræ figillatæ, cum modico olei ros. Et aucuns font tremper armoniacum in aceto, & de ce font emplastre, & l'appliquent sur l'enflure, & se mollist & appetisse la chose dure & enflée. Aucunes fois quand l'oiseau a la dite infirmité, il a grand chaleur és pieds, lors il ne le faut medeciner iusques à ce que la chaleur luy soit toute passée. Et puis luy appliquez le dessusdit vnguent, comme dit est, laquelle chaleur vous devez corriger en ceste maniere. R. boliar. 3. s. thuris, masticis an. 3. i. aloes, 3. iiii. succi semper viuę 3. ii. albuminis ouorum quod sufficit, & fiat ad modum vnguenti. Et de ce oignez la podagre, iusques à ce que la chaleur luy soit passée, lors le pouuez panser, comme dit est, deuant. Aussi faites reposer l'oiseau continuellemēt sur vne perche de laurier, & si la perche estoit verde, il gueriroit en 15. iours des cloux qui viennent sur les pieds. En ces quinze iours devez muer de six perches, selon Antoine Spinello, afin qu'elles ayent plus grāde vertu: & devez oindre le clou de graisse de poullaille vieille: & si pour ce ne guerist, i'ay experimenté ceste medecine. On luy doit lacer la veine, & apres donner le feu au lieu qui est enflé, & ce doit faire quād l'enfleure est molle. Et quand l'enfleure est dure, on doit fendre le cuir & oster celle durezza, & apres doit on donner le feu sur la superfluité de la chaleur qui est dedans, & vous donnez bien de garde que le feu ne touche les nerfs, & puis gouuernez le feu diligemment, cum oleo ros. vitellouorum, cum modico butyro, sine sale.

De la goutte des rains.

LA goutte des rains se congnoist quād l'oiseau ne peut voler, lors luy soit purgee la tēte comme dit est au chapitre du catarre. Et cherchez au milieu des lombes & des rains, & vous trouuerez vne foussette en laquelle vous luy dōnerez vn bouton de feu, sur lequel soit appliqué pixis, semen synapis, cum butyro simul mistis ad mod. emplastri.

Des concussions de dedans le corps.

LIN firmité des concussions se congnoist à ce que l'oiseau iette sang par la gorge, ou par le fondement, ou par toutes les deux parties, & qu'il esmutist noir & pres du poing. Et quād il voudra esmutir, demenera la queue çà & là, & le corps & les ailles luy pousferont, balenera, & sera tout maté.

La Medecine.

Donnez luy chacun soir vne des pillules sequentes. R. sanguis dracon. boliarm. terrę sigillatę, mastიცis, momię, reubarbari an. conficiętur pillulę, cum succo consolidę, & detur vna pillula vt decet. Plus luy soit donnę avec sa viande les eaües qui sensuiuent. R. aquę consolidę maioris, & minoris, stella maris, & de la momie, rubea tinctoris, boliarm. sanguis dracon. terrę sigill. mastიცis, & semen nasturtij, & specialement quād il y aura sang. Selon Razis, R. thuris, sanguinis drae. an. 3. iij. mastიცis, 3. ij. terrę sigillatę 3. xv. aluminis 3. ij. balauftiæ 3. iij. opij, cinamo. an. 3. ij. omnia simul tercantur, & fiant tronçeti numero x. de laquelle chose pouuez administrer la grosseur d'vne bonne feue à chacune fois.

Quand l'oiseau iette sa viande.

S I l'oiseau iette sa viande, c'est pour deux occasions: C'est assauoir par corruption de l'estomach, ou par maladie: & fil la iette par accident, l'haleine ne la viande ne puent point: & fil la iette par corruption, l'haleine & la viande qu'il iette puent.

La Medecine.

Si l'oiseau iette le past par accident, donnez luy aloes eicotrin, & le laissez estre par six heures sans le paistre, & puis païssez-le vn peu, & de bonnes viandes. Et s'il iette par corruptiō, donnez luy des pillules qui sensuiuent, & puis le laissez par huit heures sans le paistre. R. aloes cicotrin. cum speciebus part. iij. mastიცis, part. ii. rubarbari part. f. conficiętur cum succo absintij, fiant pillulę. Et huit heures apres soit pu vostre oiseau de petit, & souuent de la poiŕtrine de petis oiseaux trempee en eau tiede, en laquelle ayent esté bouillies les choses qui sensuiuent: c'est assauoir, mastიცis, garofili, spicę nardi, nucis muscatę, cynamomi, galangę, & ambrę. Et qui mettroit leſdites choses dessusdites en eau de vie, & les laisser tremper par l'espace de vingt quatre heures, & apres que lon donnast d'icelle eau avec la viande, tant qu'il en pourroit en demie coquille de noisille, ce seroit souueraine chose. Ceste poudre qui sensuit est bien profitable pour faire retenir le past à vn oiseau, & pour le faire reuenir à soy. R. coralli rubei 3. iii. aloes 3. ii. cynamomi, rosarum rubrarum an. 3. ii. garofili, mastიცis, galangę an. 3. v. fiat puluis, & detur cum pasto, ou vne des choses dessus dictes par soy,

B b ij

specialement le girofle ou mastic. Vn peu de chair de bœuf trempée en eau ardent, fait tenir le past aux Faucons. Mais pour Esperuiers, Autours & Tiercelets, seroit trop fort. La reubarbe, & aloes accoustrent l'estomach, plus qu'autre medecine, en euacuant les mauuaises humeurs, & pour ce ie conseille qu'incontinent que l'oiseau aura ictté le past, qu'on luy donne pouldre d'aloes & reubarbe, avec vn peu de viande, & quād il aura enduit, luy soit donné eau cordiale, comme trouuerez au chapitre des choses cordiales cy apres. Et notez que la reubarbe conforte plus que l'aloes, & l'aloes lubrique plus l'estomach.

Des ventositez,

LE s. ventositez se peuuent congnoistre comme au chapitre vniuersel de la congnoissance des infirmittez est declaré.

La Medecine.

Donnez à l'oiseau avec son past, pouldre de semēce de mastic, & ce vaut contre indigestion, ou vn peu d'aloes, car il leur fait vomir & ietter hors celles humeurs superflues: parquoy l'estomach sera mis en bon estat, car l'infirmité leur vient d'indigestion, & par past engendrant vent, qui leur engendre colique. Et par ce incontinent que vous apperceurez qu'ils seront entachez d'icelle maladie, secourez les avec la medecine dessusdite, & avec past restauratif. Et quand l'oiseau sera retourné à naturelle matiere, luy soit donné avec le past, puluis boliarmeni, & cacabic.

Pour les infirmittez du faye & la medecine.

LInfirmittez du faye se cōgnoissent ainsi qu'a esté dit au chapitre cy deuant.

Pour guerir ceste maladie, le past gras & nerueux est fendu à l'oiseau, & son past doit estre trempé cum aqua solatri. Et puis soit seigné de la veine qui est sous l'aïsse, en maniere qu'il en faille quelque goutte de sang, & le païssez de petis poullets, & de chair fresche, qui soit trempée en lait d'ouaille ou en suc d'appio. Si par ceste maladie auoit soif, ce que ne peut estre autrement, donnez luy sirupus rosarum vel violarum, cum aqua clara, ou reubar. liquiritia, bethonica infusa in aqua per noctem.

OUT E ceste infirmité se cognoist par la cheutte des pē-
 nes hors de saison. Soit oingt le lieu avec baume, qui en
 pourra trouuer, car c'est chose qui y est grandement pro-
 fitable: ou bien on luy donne fellis bouini, limatura ferri,
 celidonia, saluia, absintij, mile foliorum, stercus anseris,
 corticis oliuę, salis nitri, aloes, centaurea. Et faut que toutes ces
 choses soyent bien incorporees avec fort vin-aigre, & en oingdre
 le lieu, & s'il ne treuve allegemēt, qu'on saigne la veine, ou sur les cuisses.
 Et si par ce ne guerist, saignez le avec vne aiguille d'or ou d'argent, au
 lieu où les pennes tombent, & là où il sera enflé & rouge: & frottez
 ledict lieu des medecines qui s'ensuyuent. R. aloes, piperis, myrrha,
 borat. album, pini cortieis, granatorum adustorum an. part. pulueri-
 sentur, & cum forti aceto incorporentur, & vngatur locus, vt dictum
 est.

Des playes qui sont en l'Oiseau.

QUAND vn oiseau a la gorge roste, cousez la le plus
 doucemēt que vous pourrez, & la cousture soit oingte
 cum oleo rosa. & terbenline, & le paisez petit & sou-
 uant. Oleum factum ex vitell. ouorum, est grandemēt
 profitable pour appliquer les playes. Oleum cum succot
 ruthę & omnium consolidarum, stella maris, & lau-
 reola, sont fort bonnes & profitables. Et vnguentum commune vaut
 à ce mesme, & generallyment à toutes playes: & si mestier est d'estre
 cousues, qu'on les couse. Si l'oiseau a la fistule en la teste, elle se con-
 gnoistra quand il iettera sang par les nazilles: alors plumez la teste au
 derriere, & luy cousez la veine qui passe au long de la teste, & oignez
 le lieu par l'espace de huit iours, avec oleum ros. & oleum ex vitell.
 ouorum. Il y a aucuns Fauconniers qui à telle infirmité passent les
 nazilles d'un costé iusques à l'autre avec vn subtil cautere. Mais le
 meilleur cautere est celuy du milieu de la teste, comme dit est. La
 fistule des nazilles soit cauterisee avec vn fer subtil, iusques au fonds
 de la nazille. Pour leuer la douleur d'une aisse ou d'une iambe. R. cor-
 tici soliuę, absintij, ruthę, foenugręci, decoquantur vsque ad tertiam.
 Et de ceste decoction estuue le membre par longue espace & par plu-

Bb. iij



sieursfois. Si vn Chien auoit donné poison à vn oiseau, donnez luy estouppees hachees bien menu, & trempées en huyle de noix, ou luy donnez huyle de noix par soy, & il guarira. La morsure du Serpent se cure en luy donnant poudre de diptamo, ou de dyagomera, ou serpentine, ou de Tormentille, & tyriacle, & iarser la morsure, & lier quelque animal vif dessus, fédu par l'eschine. Quand le bec de l'oiseau se creuace & fent, comme si le bec se voulsist separer de la teste, lors le deuez cerner tout à l'entour, & bien ouurir, & puis le cauteriser iusques au vif, & oindre le lieu avec oleü rosarum. Toute oingture doit estre continuee par neuf iours, cum oleo ros. & vill. ouorum, exceptez celles de la teste, laquelle doit auoit emplastre de pice nauali, seminis sinapis, & butyro. Il y a pour affayter & adoucir le pennage deux manieres de faire les pennes: l'une à l'aiguille, & l'autre au tuyau, & est le meilleur. Quand tu enteras à l'aiguille, fais que la penne en quoy tu mettras l'aiguille soit liee, afin qu'elle ne se fende, & puis taille le filet, si tu veux, & fais que l'aiguille soit trempée en eau salée, ou en vrine. Et pour enter en canon, soit taillé le tuyau de la penne, mais premierelement mettez dedans vn petit bastonnet, à fin qu'il ne fende, & entez vostre penne dedans. Et s'il y a des pennes ployees qui ne soyent du tout rompues, prenez le trou d'un chou, & le mettez en la braise tant qu'il soit bien chaud, & puis le fendez par vn bout, & avec celà dressez vostre penne. Ou autrement avec eau en quoy ait esté cuyt le trou de chou. Si vne penne ou deux tombent par coup, ou par huerter, soit incontinent prins oleum laurinum, & oleum morum an. & soit appliqué au lieu où la penne sera tombee, car c'est la chose du monde qui plustost la fera renaistre. L'esmut sanglant signifie rompure & froissement de corps. Les oiseaux malades ou blesez se doiuent garder de vent, poudre & rousée. Notez, que l'on peche plus de donner trop de medecines que peu, car elles ne se peuent donnees retirer.

*De la complexion des Faucons, & comme
ils se doiuent, medeciner.*



PARCE que les Faucons noirs sont melancoliques, ils doiuent estre medecinez avecques medecines chaudes & humides, pour cause de la complexion qui est froide & seche: come aloes, piper, chairs de coqs, & de coulons, passereaux, chieure ou cheureau. Les Faucons blancs sont flegmatiques, & se me-

decinent avec les medecines chaudes & seches pour cause du flegme qui est froid & humide: c'est assauior, avec cynamome, gorofili, sileris montani, cardamomi, chair de bouc & de corneilles. Les Faucons roux sont sanguins, coleriques, & se doiuent medeciner par medecines froides, & attrempees en humidité & secheresse, comme sont mirtile, amarici, cassia fistula, acetum, chairs de poules, & d'aigneaux.

Des cauterés.



QUANT aux cauterés, ils sont vtilés & derniers remedes, quand autrement par medecines ne se peut faire, selon tous ceux qui ont traité de la chirurgie. Premièrement, ce que vous cauterisez doit estre purgé, spécialement pour les cauterés de la teste, par esterneuer, & par vomir, & par cōuenables purgations. Et neantmoins quand vous luy donnez le cautere, vous deuez tousiours administrer les autres medecines appropriées au mal iusques à la fin de la cure. Et si par le premier cautere il ne guerist, laissez cheoir l'escarre de la teste, & luy en donnez vn autre vn peu plus arriere que le premier. Les cauterés de la teste veulent profondeur iusques à l'os, pour faire son escarre, & sur le lieu cauterisé soit appliqué cest emplastr. R. picis naualis. 3. ij pulueris sinapis. 3. j. butyri. 3. f. & fiat emplastr. Et luy faites tenir vn chappelet à bourse en la teste, afin qu'il ne puisse gratter le lieu. Les autres cauterés qui sont de la teste, se doiuent oingdre par neuf iours, cum oleo ros. & vitell. ouorum. Tous cauterés se doiuent dōner en Mars, si ce n'est par necessité, pour tenir les oiseaux sains. A chancre, & aux apostumes qui viennent en la bouche, & à la langue, & à fistule ou catarre, le dernier remede est le cautere. Le cautere du milieu de la teste derriere les yeux, est pour le catarre, pour l'epilepsie, pour l'asma, pour la pierre, & pour la goutte. Et sont des autres qui dōnent vn autre cautere, depuis le bec iusques à l'autre cautere derriere les yeux, tout du long de la teste. Les cauterés pour l'asma, sont ceux du milieu de la teste, & de la fourche de la poitrine, & celui du milieu de l'estomach. Ceux de podagre & des cloux, se doiuent faire au lieu que le mal se demonstre. Le Roy Daucus appliquoit le cautere au milieu des rains en la foussette qui est celle part. Le meilleur remede pour vne playe profonde, mais quelle soit fraische, est de donnet vn anneau de feu entour la playe, & puis apres l'oingdre avec huyle rasat, & terbentine chaude. Si la playe est en fistulee, donnez luy vne poincte de feu iusques au fons, & le pansez, comme dit est. Pillules pour conforter la teste

F A V C O N N E R I E

& l'estomach, & pour les mundifier des mauuaises humeurs. R. turbith. part. x. mastice iij. aloë. xxviij. cōficient, cum succo absintij in hyeme, in æstate cū succo liquiritiæ. Les cauterres presque de toutes infirmittez se doiuent donner les veines laccées, & cauteriser le lieu où les infirmittez s'ot soubçonnees. Le Roy d'Aucus, avec tous les autres cauterres leur perçoit les nazilles de part en part, avec vn cautere bien subtil. Et comme le cautere est le dernier remede, & le souuerain, aussi est il le plus dangereux, & le plus difficile à qui n'y regarde de bien pres.

Chairs vsables & bonnes.

Les chairs bonnes pour les oiseaux, sont Vache, Porc, Mouton, Lieure, & toute chair sauuage: excepté Cerf & Sanglier fort vieux, mais elles se doiuent lauer & nettoier du sang des veines & des nerfz avec eau chaude. Gardez vous de donner peaux ne graisse à vostre oiseau: car par ce leur pourroit suruenir mainte & diuerse infirmité, & si fait mal digerer, & perdre l'appetit.

Chairs restauratiues.

Pigeons de fuye, Passereaux, & tous petits oiseaux champ estres, Oyes & Canes priuees & sauuages, Poullaille, Tourterelles, Cailles, Francollins, Cheureaux, Cochons de lait, Chieure, Mouton, Souris, Faifans, & Perdrix.

Chairs laxatiues.

Tortues ieunes, Poulles, Ratelle, & faye de Cochons, & leur poulmon, laué & trempé, specialement qui mettroit sucre par dessus, Sucre candy est plus fort, chair de Veau ieune, chair de Bouc en superlatif degré, specialement au mois d'Aoust.

Chairs defendues.

Oysons, Cercelles, Cormorans, Corbeaux, Chouettes, Corneilles, pour ce qu'ils ont le sang amer & sallé: car i'ay veu oiseau de la surdicte chair subitement ietter sa gorge.

Des choses qui font auoir faim.

Les pillules communes font auoir faim, quand elles sont donnees en la cure, & purgent les humeurs superflues. Le past oingt avec la fleur de lart, fait fort affamer l'oiseau, & est vne chose moult saine.

Medecines laxatiues, & les doxes.

Turbit purge le flegme, & s'en peut donner la grosseur de deux pois eiches aux Lasniers, Sacres, & Gerfaux. Mais aux Faucons Gentils moins, & encores moins aux Autours, Tierceletz, Espreuiers. La reubarbe se peut donner gros comme la quantité d'une feue: & se donne

donne communément pour abondance d'humeur, & cōtre vers. Trois pieces de celidoine, statifagre, aloes, le lardon, poiure, toutes ces choses se peuuent donner quand l'oiseau iette rhume, ou quand vous le voulez faire ietter le flegme à la mue, ou le past, & suffist d'en donner d'une sorte à la fois.

Les choses cordiales, & confortatives.

Le meilleur past & nutriment, & le plus profitable aux oiseaux malades, & bien restauratif, selon Armodeus, spécialement à ceux qui ne peuuent enduire la chair. R. lactis recentis part. iij. vitell. ouorum. Et ce battez ensemble, & apres le faictes cuire iusques à ce qu'il deuienne espais, dequoy vous paistrez vostre oiseau, & s'il ne vouloit manger, mettez de quelque sang par dessus, & tel past luy donnez peu à peu, & souuent. Le iaune d'œuf cuit avec eau est bon past, par de faute de chair. Pillules confortatiues pour l'estomach secundū Io. Serapion. R. aloë part. iij. masticis par. j. conficietur cum succo solatri. Le past trempé en vin-aigre avec sucre, faict auoir faim merueilleusement. Mais il se doit donner vn soir auant qu'on aille voller. Le matin qu'on veut faire voller, trois petis lopins de chair trempee en vin-aigre sont fort bons. Pour faire ladicte fleur de lart, mettez tremper vostre lart par plusieurs iours en eau courante, tant qu'il soit bien dessalé, & puis le raclez. Ou autrement, fondez vostre lart, & puis le iettez en eau fraische, & ce faictes plusieurs fois, & c'est la fleur dessusdicte.

Des choses qui font muer.

Prenez vne Couleuvre, & luy taillez vn peu de la teste, & autant de la queuë, & du milieu païssez vostre oiseau: car cela fait bié muer, & tout entierement. Le grain du serpent noir, & en nourrir des poulles, desquelles païssez vostre oiseau, faict pareillement muer: lequel grain se fait en ceste maniere. Prenez vne Couleuvre noire, & la mettez bouillir en eau avec du froment, & en nourrissez voz poullailles & leur donnez à boire l'eau. Mais le bon past & les Souris font muer naturellement, & mieux que toutes les medecines du monde. Et aucunes fois leur donnez past la ratif pour les faire tenir lubriques. Vous devez mettre l'oiseau gras en la mue, & qu'il ait tousiours l'eau deuant luy, & le preau verd, & luy muer souuent le past, en luy donnant vne fois la semaine le past laxatif, & ceste regle devez tenir aux Nyez. Et le Hagart ne se doit mettre en la mue, mais se doit muer sur le poing, car il s'estrangeroit trop des gens, & s'il battoit par le chaut, bouttez luy le chapelot, ou l'esboussez d'eau froide, & il se tiendra en paix, & ceste peine

Cc

FAVONNERIE

de le tenir sur le poing durera iusques à tant qu'il commencera à ietter & alors le pouuez mettre sur vne pierre comme les autres. Et quand il vollera, tenez le sur vn billot de bois, que s'il estoit couuert de drap, il seroit meilleur. Austours, Tiercelets, & Espreuiers, se muent comme les Faucons, sinon qu'ils ne veulent point estre portez, mais doiuent estre en la muë, & nettement seruis. Les Esmerillons se muent avec les pieds dedans le mil iusques aux genoux, pource que s'ils voyoient leurs pieds, ils les mangeroient pour la grande chaleur qu'ils y ont: & la froideur du mil corrige icelle grand' chaleur, & celle humeur superflue. Auuant que tirer vostre oiseau de la muë quinze iours ou vingt iours faut le commencer à dessimer & restraindre son past, pour cause de la repletion: car il pourroit en prendre tant qu'il luy feroit mal.

Pour faire le lardon.

Le lardon se fait en ceste maniere. R. piperis par. ij. salis communis par. iij. cineris par. j. & ce soit incorporé ensemble, & en faictes trois petis morceaux de lart, lesquels soient bien saupoudrez des poudres dessusdictes, & luy donnez par force, & le laissez ieusner par treze heures, & le lendemain luy presentez l'eau, car il en aura mestier.

Pour leuer & oster les poulz.

R. piperis part. i. cineris part. ij. Et avec eau chaude soit lauë par tout le corps, & luy gardez bien les yeux. Les Alemans les orpimentent tout à sec, & ce est bon pour temps chaut. La decoction de la mente Romaine faict mourir les poulz, & pareillement l'estafisagre.

Quand vous aurez osté les poulz de vostre oiseau, faictes le dormir par deux ou par trois nuits sur vne peau de Lieure, car tous les poulz se boutteront dedans.

Dequoy on donne les cures.

Vous deuez entendre qu'on donne les cures de cotton, de queue de Lieure, estoupes tailles, ou pieds rompuz, ou de plume. Et est à sçavoir, que les cures baignees ne sont pas si fortes comme sont les essuytes, excepté qu'elles fussent baignees en choses laxatiues.

L'on doit donner tous les soirs cure, & tous les huit iours vne de cotton, & aux muez tous les quinze iours, & aux fors tous les vingts iours.

F I N.

Recueil de tous les oiseaux de proie
qui seruent à la vollerie & Fau-
connerie, par G. B.

Cc ij





C'est une chose asseurez de tous, que les Seigneurs Grecs & Romains, tant de l'Orient, de l'Asie, que de nostre Europe, n'auoient cognoissance de l'art de Fauconnerie, à plus forte raison, ne les personnes princees, n'ayans ne la puissance ny le vouloir de faire despence à une chose qui est sans profit. Puis donc que c'est une inuention moderne, il se trouue bien peu d'Autheurs qui en parlent: encores s'ils en parlent, c'est seulement en passant & conserant noz oiseaux de proye avec ceux des Anciens, accordans les noms Grecs ou Latins avec les noms François, & en passant disent quelque mot de leur nature & propriété. Ce que i'ay voulu n'estre ignoré des plus curieux & sçauans Fauconniers de nostre France, afin d'estre excusé d'un si petit Recueil: attendant que quelque autre plus docte & mieux entendu en l'art de Fauconnerie y mette la main.

Cc iij

*Table du recueil de tous les oiseaux de proye qui
seruent à la vollerie & Fauconnerie.
par G. B.*


E T P R E M I E R E M E N T.

D ES noms des oiseaux de proye. fueil. 104.a	Du Lanier femelle, & de son Laneret masle. 115. b
De combien d'especes il y a d'Aigles. là mesf.	Du Hobreau. 116. b
De l'Aigle faue, qu'on nôme Royal. mesf. fueil. b	Del'Esmerillon, ou Emerillon. 118. a
De l'Aigle noire. 106. a	Du Fau-perdrieux. mesf. fueil. b
Du grand Vautour cendré. mesf. fueil. b	De tous oiseaux de proye, qui seruent à la Fauconnerie. 119. a
Du moyen Vautour, brun ou blancha- stre. 107. a	De la diuersité des Faucons, & com- me on congnoist les meilleurs. 122. a
Des Faucons. mesf. fueil. b	Comme on doit mettre en arroy, & porter le Faucon. mesf. fueil. b
Du Gersaut. 108. a	Comme on doit affaiter vn Faucon, & mettre hors de saunageine. là mesf.
Du Sacté, & son Sactet. mesf. fueil. b	Comme on doit leurrer vn Faucon nouueau affaité. 124. a
De l'Autour femelle, & de son Tierce- let masle. 109. b	Comme on doit baigner, faire voler, & hayr le change, à vn Faucon nou- ueau. mesf. fueil. b
De l'Esperuier, ou Esparuier, femelle, & de son Mouchet masle. 111. a	Comme on fait prendre le Heron à son Faucon. 125. b
Des Faucons. 112. b	Comme on fera aimer à son Faucon les autres, quand il les hait. 126. a
Du Faucon Gentil. 113. b	Comme on doit essemmer, c'est à dire bailler la cure à vn Faucon. mesme fueil. b
Du Faucon Pelerin. là mesf.	
Du Faucon Tartaret, ou de Tartarie, ou Barbarie. 114. a	
Du Faucon Tunicien, ou Punicien. là mesme.	
Du Tiercelet de Faucon. mesf. fueil. b	
De la nourriture des Faucons, & com- me il les faut choisir. là mesme.	

Fin de la Table.



Des noms des oiseaux de proye.



Tous oiseaux de proye sont compris sous ces deux noms, *Ætos*, où *Hierax*, c'est à dire, *Aquila*, ou *Accipiter*: & de ces deux genres y en a qui seruent à la volerie, desquels seulement entendons parler. Car tous oiseaux de proye ou de rapine ne seruent à la Fauconnerie: mais seulement ceux qui sont hardis, & de franc courage, & qui peuuent voller l'oiseau tant par les riuieres que par les champs. Or comme les Grecs ont voulu que *Hierax*, & les Latins, que *Accipiter*, qui est le *Sacre*, nom special à vn oiseau de proye, donnast le nom vniuersel à tous autres oiseaux de rapine, comme par maniere d'excellence: aussi les François de nostre temps, ont fait que le *Faucon*, qui n'est que nom special d'un oiseau de proye, donneroit le nom vniuersel à tout le gère des oyseaux de proye: parce qu'il surpasse les autres en bonté, hardiesse, & priuauté: comme si lon vouloit dire, *Faucon Gentil*, *Faucon Pelerin*, *Faucon Sacre*, & ainsi des autres. D'auantage, comme le *Faucon*, qui n'est que le nom special d'un oiseau, a donné le nom à tous les autres oiseaux de proye, aussi a il donné le nom de *Fauconnier* à celuy duquel l'estat & office est d'appriuoiser tels oiseaux, & le nom de *Faucônerie* à l'art & science de leurrer & appriuoiser les oiseaux de proye ou de rapine, pour les faire voler aux autres oiseaux, tant aërez, terrestres, qu'aquatiques.

De combien d'especes il y a d'Aigles.



Mais puis que nous auons diuisé tous oiseaux de proye ou rapine, qui seruent à la Fauconnerie, en *Aigles* & *Faucons*: nous parlerons premierement de l'*Aigle*, & du *Vautour*, qu'aucuns ont pensé estre compris sous les especes de l'*Aigle*: puis des *Faucons*, qui sont oiseaux de Proye seruans à la volerie, qui ont prins leur nom de *Faucon*.

Selon *Aristote*, il se trouue six especes d'*Aigles*, qu'il a nommees de nom que les habitans de la Grece leur auoyent baillé. *Plin* en faiet mesme diuision, les nommant toutesfois autrement qu'*Ari-*

stote , à cause qu'ils estoient de diuers pays , & ont escrit en diuerses langues. Mais parce que n'entendons icy parler que des especes d'Aigles qui seruent à la Fauconnerie , nous parlerons seulement de deux especes d'Aigles : car aujourd'huy pour la Fauconnerie nous ne congnoissons que le fauue , qui est l'Aigle Royal , & le noir : estans les autres especes de si petit courage qu'on ne les scauroit leurrer pour la Fauconnerie.

De l'Aigle fauue, qu'on nomme Aigle Royal.

L'AIGLE fauue par Aristote est appellee en Grec Gnesion, qui signifie en François legitime & non bastard: parce que c'est la vraye & legitime entre toutes les autres especes d'Aigles, & aussi la nomme de dictiō Grecque Chrysaëtos, à cause de sa couleur fauue, & en Latin Stellaris & Herodius: c'est celle que nous nommons l'Aigle Royal, & Roy des oiseaux, & autresfois Aigle de Iupiter: & c'est celle qui se doit congnoistre pour la principale, estant de plus grande corpulence que les autres, aussi est plus rare à veoir: car elle se nourrist par les sommitez des hautes montagnes, & si prent & mange toutes sortes d'oiseaux, & Lieures, & Cheureux, & toutes autres bestes terrestres: combien qu'il soit solitaire, sinon quād il meine ses petis avec luy, & les conduit pour leur enseigner à prendre les oiseaux, & leur gibbier: mais aussi tost qu'il les a instruits & apprins, il les chassé hors de là en vne autre contree & pays, & ne leur permet se tenir en celle contree: afin que le pays, où les Aigles ont fait leur aire ne soit despeuplé & desgarny de gibbier, dont ils peussent auoir faute, sçachans que si les petis y demeuroient, ne laisseroient en brieft temps assez proye qui les peust fournir. Il la faut discerner d'avec les Vautours: parce que l'Aigle Royal de couleur fauue n'a le pied aucunement velu, & couuert de plumes, comme lon voit au Vautour. Il est bien vray que la iambe de l'Aigle est courte & iaune & a des tablettes pardeuant, mais les griffes sont larges, & le bec noir, long & crochu par le bout. Les queuës du grand Aigle Royal, & aussi du petit noir, sont courtes & robustes par le bout, quasi comme celles des Vautours. L'Aigle est tousiours de mesme corpulence, & n'y en a aucune qu'on puisse nommer moyenne, ou plus grande, qui ne luy dōne vn surnom de noir, fauue, ou autre tel nom propre. Et si ce n'estoit qu'elle est si lourde à porter



porter sur le poing (& de vray elle est mout grande) & aussi qu'elle est difficile à appriuoiser du sauuage, lon en verroit nourrir aux Fauconniers des Princes plus qu'on n'en fait. Mais parce qu'elle est audacieuse & puissante, pourroit faire violence, si elle se courrousoit contre le Fauconnier, au visage ou ailleurs. Parquoy qui la veut auoir bonne, il la faut prendre au nid, & l'appriuoiser avec les Chiens courans, afin qu'allans à la chasse, & la laissant voler suyuant les Chiens, lesquels ayans leué le Lieure, Renard, Cheureul, ou telle beste, l'Aigle descende dessus pour l'arrester. On la peut nourrir de toutes manieres de chairs, & principalement des bestes qu'elle aura prinse à la chasse. Rouge couleur en l'Aigle, & les yeux profonds, & principalement s'elle est nee és isles Occidentals, est signe de bonté: car l'Aigle

D d

rousse est trouuee bonne: aussi blancheur sur la teste, ou sur le dos, est
 signe de meilleure Aigle. L'Aigle partant du poing, qui vole au tour
 de celuy qui la porte, ou s'assied à terre, est signe qu'elle est fugitiue.
 Quand l'Aigle espanouist la queuë en volant, & tornoie en montant,
 c'est signe qu'elle est deliberee de fuir: le remede est, de luy ietter alors
 son past, & la rappeler bien fort. Et si elle ne descend à son past, ou
 pour auoir trop mangé, ou pour estre trop grasse, il faut luy
 coudre les plumes de sa queuë, afin qu'elle ne les puisse espa-
 nouyr, ne voler d'icelles: ou bien luy plumer le tour du fondement,
 en sorte qu'il apparaisse, & lors craignant la froidure de l'air, ne
 taschera à voler si haur. Mais ayant la queuë cousüe, faut doubter les
 autres Aigles, car alors elle ne les pourroit cuiten. Quand l'Aigle tour-
 noie sur son maistre en volant, sans s'esloigner, c'est signe qu'elle ne
 fuira point. On dit qu'une Aigle peut arrester vn Loup, & le prendre
 avec l'aide des chiens, & qu'on l'a veu. Ceste Aigle fait cōmunement
 son nid au costé de quelque roche precipiteuse, à la sommité d'une
 haute montagne, combien qu'elle le face aussi sur les hauts arbres des
 forests. L'on dit que les paisans qui scauent le nid d'une Aigle, voulans
 desnichier les petits, se font bien armer la teste, de peur quel'Aigle ne
 leur face mal: & s'ils luy en ostent vn de ses petits, & le tiennent lié à
 quelque arbre aupres du nid, iceluy appellera sa mere, laquelle l'ayant
 trouué, luy apportera tant à mager que celuy qui l'aura attachee trou-
 uera assez de gibbier tous les iours pour luy, & six autres: car la mere
 luy apporte Lieures, Connils, Oyes, & autres telles viandes. L'Aigle
 ne se paist cōmunemēt pres de son nid, ains s'en va pouruoir au loing.
 Et sil luy est resté de la chair du iour precedant, elle la reserue, afin que
 si le mauuais temps l'empeschoit de voller, elle ait assez de viande pour
 le iour ensuiuant. Vne Aigle ne change point son aire durant sa vie, ains
 retourne à vn mesme nid par chacun an. Et a lon obserué pour celà que
 l'Aigle est de longue vie, & deuenant vieille, son bec s'allonge, tant qu'il
 deuient si crochu, qu'il l'empesche de mager, tellement qu'elle en meurt,
 non pas de maladie, ou d'extremité de vieillesse, mais pour ne pouuoir
 plus vser de son bec, qui luy est si fort accru. L'Aigle mene guerre
 avec le petit Roitelet, mais ce qui en est, selon Aristote, est son seul
 nom: car à cause qu'on l'appelle Roy des oiseaux, lequel tiltre l'Aigle
 luy veut oster. Encore y a vn autre sorte de petit oiseau, qu'Aristote
 a nommé Sitra, & les François vn Grimpreau, qui luy fait de grands
 outrages, car lors qu'il sent l'Aigle absente, il luy casse ses œufs. Quand

nous auons dit cy dessus, que l'Aigle Royal est de couleur fauve, pour fauve couleur entendons comme est celle du poil de Cerf. Et combien qu'Aristote la nomme Chrysaëtos, qui est à dire Aigle doree, il ne faut pourtant entendre que sa couleur soit tant doree, mais est plus rousse que des autres especes. Les peintres & statuaires Romains la desguisent en leurs pourtraicts, mais chacun sçait qu'elle est autrement. Les Aigles, tant fauves que noires, sont escorchees comme les Vaultours, & enuoyees aux Peletiers de France, avec leurs ailles, testes, & pieds, de telles couleurs qu'auons dit.

De l'Aigle noire.



O v s auons dit qu'il y a seulement de deux sortes d'Aigles, qui seruent à la Fauconnerie, qui sont la fauve (de laquelle auons parlé) & la noire, qu'il nous faut descrire. Aristote nomme l'Aigle noire, Melauratus, & Lagophonos, par-ce qu'elle prend les Lieures, que les Latins ont nommee Pulla, Fulua, Leporaria, & aussi Valeria: qui ne se peut toutesfois bonnement distinguer, car ceste noire est plus petite que l'Aigle Royal, qui est la fauve & rousse, & ceste noire est autant differente à la rousse & fauve, que le Milan noir au Royal. Pline a mis ceste Aigle noire au premier ordre des Aigles, comme s'il l'eust voulu preferer à toutes autres especes. Aristote ne l'a mise qu'au tiers ordre: toutesfois en a dict de grandes louanges. Ceste noire, dit il, estant de moindre corpulence que les autres, est de plus grande vertu. D'auantage, il dit que les Aigles volent haut pour veoir de plus loing: & pour-ce qu'elles voyent si clair, les hommes ont dit qu'elles sont seules entre les oiseaux qui sont participans de diuinité. Et aussi pour la crainte que l'Aigle a des eschauguettes, elle deualle non tout à vn coup cōtre terre, mais petit à petit: & ayāt aduisé le Lieure courât, ne le prent incontinent à la montagne, mais sçait bien temporiser & attendre qu'il soit en belle pleine: & l'ayant pris, ne l'emporte incontinent, mais fait premierement experience de sa pesanteur, & de là l'ayāt enleué, elle l'emporte.

Dd ij



Du grand Vautour cendré.

IL y a de deux especes de Vautours : à sçavoir , de cendrez ou noirs, & de bruns ou blancheastres . Premièrement parlerons du cendré, qui est plus grâd que le brun, car le cendré est le plus grâd oiseau de rapine qu'on trouue; estans les femelles plus grandes que les males, comme quasi de tous les oiseaux de proye. Les Grecs appellent le Vautour Gyps, & les Latins Vultur. C'est vn oiseau passager en Egypte, congneu plustost par sa peau qu'autremét, parce que les pelletiers ont coutume d'en faire des pellisses pour mettre sur l'estomach. Les autres oiseaux de rapine sont differés aux Vautours, pource qu'ils ont le dessous

des aïles tout nud sans plumettes, mais les Vautours l'ont couuert de fin dumet. Leur peau est quasi aussi espoisse que celle d'un Cheureau: & mesmement lon trouue vn endroit au dessous de leur gorge, de la largeur d'une paume, où la plume est rougeastre, semblable au poil d'un Veau: car telle plume n'a point ses tuyaux formez, nō plus qu'aux deux costes du collet, & au dessus du ply. des aïles: auquel endroit le dumet est si blanc, qu'il en est luyfant, & delié comme soye. Les Vautours ont cela de particulier, que leurs iambes sont couuertes de poils, chose qui n'aduiet à aucune espece des Aigles, ne oiseaux de rapine.

Du moyen Vautour, brun ou blancheastre.

LE V A U T O U R brun ou blancheastre est different du noir ou cendré, à ce qu'il est quelque peu moindre que le noir: ayant le plumage de son col, du dos, le dessous du ventre, & tout le corps de couleur fauve ou brunc: mais les grosses plumes des aïles & de la queue sont de la mesme couleur du noir ou cendré: qui fait penser à aucuns qu'il n'y a difference entre eux que du mâle à la femelle: mais on les voit souuent chez les grans seigneurs, aussi communs les vns que les autres. Toutes deux ont la queue courte, au regard de la grandeur des aïles: qui n'est de la nature des autres oyseaux de rapine: mais de celle des Pic-verds, car on la leur trouue tousiours herissée par les bouts, qui est signe qu'ils la frottent contre les rochers, où ils demeurent. Toutesfois les bruns ou blancs sont plus rares à veoir que les noirs ou cendrez, aussi ont cela de particulier, que les plumes de dessus la teste sont assez courtes, au regard de celles des Aigles: qui a esté cause que quelques-vns les ont trouuez chauues, combien qu'ils ne le sont pas. Le Vautour, cendré ou noir, & le brun ou blanc, ont les iambes courtes, toutes couuertes de plumes iusques au dessus des doigts: qui est vne enseigne entre tous oyseaux de rapine, qui conuient à eux seuls, & qu'on ne trouue en nul autre oyseau ayant l'ongle crochu, hors mis aux oyseaux de nuit. Pour discerner le brun d'auec le cendré, il faut noter que le brun a les plumes du col fort estroites & longues (comme celles qui pendent au col des Cocs, & Estourneaux) au regard de celles de dessus le dos, des costez, & des coings du ply des aïles, qui sont petites & largettes en maniere d'escailles: mais celles qui sont dessous l'estomach, comme aussi celles de dessus le dos, & les autres qui couurent la racine de la queue, sont

Dd iij

rouffes, au roux: & au noir, noires: mais en tous deux sont larges. A cause de leur grosseur, ils ne peuuent voler de terre sans aduantage. On les voit rarement par les plaines d'Italie, Almaigne & France, sinon en yuer, qu'on les voit voler en tous lieux: car alors ils laissent les sommitez des hautes montaignes, euitans la grande froidure, & passent outre la mer és regions chaudes. Les Vautours ne sont communement que deux ou trois petis, mais il y a grande difficulté à les desnicher: car le plus souuent ils font leur nid au costé de quelque falaise, en lieu precipiteux, & de difficile accez. On les peut nourrir de tripailles, charongnes, & vuidanges de bestes: aussi lon dict à ceste cause, qu'ils suiuent les champs pour en manger les vuidanges des bestes qu'on y tuë, & les corps morts, dont aucuns ont dit qu'ils presageoient vn grand meurtre, & vne grande occision en vne armee.

Des Faucons.



Ous auez entendu que tout ainsi comme les anciens ont voulu que le Sacre, que les Grecs nommoient Hierax, & les Latins Accipiter, fust le terme principal, dessous lequel sont comprins toutes autres especes d'oiseaux de proye: semblablement les François de nostre temps, ont fait que le Faucon seroit le principal en son genre: voulans que le Sacre Gerfaut, Autour, & tels autres, tinssent aussi le surnom de Faucon: car nommés les vns Faucons de leurre, ils mettent le Faucon Gentil au premier lieu, & apres le Faucon Pelerin, le Faucon de Tartarie, le Faucon de Barbarie, le Faucon Gerfaut, le Faucon Sacre, le Faucon Lanier, le Faucon Tunicien, ou Punicien: qui sont huit especes d'oiseaux de proye congneus d'un chacun, & familiers en France. Dont en y a quatre qui volent de poing, & prennent de randon, qui sont l'Autour, l'Esperuier, le Gerfaut, & l'Emerillon: & quatre qui volent hault, qui sont le Faucon, le Lanier, le Sacre, & le Hobreau. Les vns sont retirez & rappelez de leur vol en leur presentant le poing: les autres en leur presentant le leurre, c'est à dire, vn instrument qui est en façon de deux ailes d'oiseau accouplees ensemble, pendu à vne lesse, & vn esteuf ou crochet de corne au bout: & les oiseaux sont attirez par ce leurre, qu'ils pensent estre vne poulle viue. Les vns ne commencent la chasse, mais commencent par les chasseurs, l'acheuent. Desquels nous traiterons l'un apres l'autre, & par ordre. Et ces oiseaux ne semblent estre differens ensem-

ble, sinon qu'ils ne volent indifferemment tous oiseaux, mais vn chacun d'eux s'attache à l'oiseau, à la chasse duquel il est adonné.

Du Gerfaut.



Le ne se trouue point de Gerfaut sinon es mains des Fauconniers des grands seigneurs, & est vn oiseau bien rare à veoir: il est de grande corpulence, de façon qu'aucuns ont pensé que ce fust vne espèce d'Aigle. Il est bon à tous oyseaux, car il est hardy, & ne refuse iamais rien: toutesfois il est plus difficile à apprivoiser & leurrer que nul autre oyseau de proye d'autât qu'il est tant hazart & bizarre, que s'il n'a la main douce, & le maître

RECVEIL DE

de bonnaire, qui le traicte amiablement, il ne s'appriuoifera iamais. Il est fort bel oyseau, & specialement quand il a mué: & apres l'Aigle c'est l'oiseau de plus grande vigueur que nul autre que nous ayons. Le Gerfaut se tient assis sur le poing, aussi est de longue corpulence, ayant le bec, les iambes & pieds de couleur bleüe, & les griffes moult ouuertes, & longs doigts. Il est si hardy qu'il se hazarde contre l'Aigle. Nous ne le verriôs point, s'il ne nous estoit apporté d'estrange pays: & dit on qu'il vient de la partie de Ruffie, où il fait son aire, & qu'il ne hante point ny Italie ny Frâce, & qu'il est oiseau passager en Allemagne, tant en la haulte qu'en la basse: où les habitans le prennent à la maniere des Faucons Pelerins, & delà le nous apportent en France, autrement nous n'en aurions aucun. Et si on en apporte quelqu'un de par deçà, il est communement vendu vingt ou trente escuz. Cest oiseau est bon à tous volz, car il ne refuse iamais rien, & si est ouurier de prendre les oiseaux de riuere: car il les lasse tant, qu'à la fin sont contraincts de se rendre, ne pouuans plus faire le plongeon. Aucuns tiennent que c'est Plangos & Morphnos des Grecs, & Anataria des auteurs Latins.

Du Sacre, & son Sacret.

LE S A C R E est de plus laid pennage qu'autre oiseau de Fonconnerie: car il est de la couleur con.me entre roux & enfumé, semblable au Milan. Il est court empieté, ayant les iambes & les doigtz bleux, ressemblant en ce quelque chose au Lanier. Il seroit quasi pareil au Faucon en grandeur, n'estoit qu'il est compassé plus rond. Il est oiseau de moult hardy courage, comparé en force au Faucon Pelerin: aussi est oyseau de passage, & est rare de trouuer homme qui se puisse vanter & dire d'auoir onc veu l'endroit où il faict ses petits.

Il y a quelques Fauconniers qui sont d'opinion qu'il vient de Tartarie, & Ruffie, & de deuers la mer Maieur, & que faisant son chemin pour aller viure certaine partie de l'an vers la partie du midy, est prins au passage par les Fauconniers, qui les aguerrtent en diuerses isles de la mer Egee, Rhodes, Carpento, Cypre, Candie. Le Sacre est oiseau propre pour le Milan: toutesfois on le peut aussi dresser pour le gibbier, & pour campagne, à prendre Oyes sauuaiges, Faisans, Perdrix & à toutes autres manieres de gibbier. Les grands seigneurs qui veulent



lent avoir le plaisir du vol du Milan, le font combatre au Sacre: & pour le faire descendre (parce qu'il est coustumier de se tenir l'Esté, & sur le Midy, au plus chaut du iour, fort haut en l'air, pour prendre la fraischeur qui est à la moyenne region de l'air) font tousiours porter un Duc sur le poing d'un Fauconnier, à qui ils pendent une queue de Renard au pied: & le laissant voler en quelque plaine, donne soudainement vouloir au Milan de descendre: car quand le Milan aise le Duc, incontinent il descent à terre, & se tient ioignant luy, ne luy demandant autre chose sinon de le regarder, esmerueillé de sa forme. Alors on lasche le Sacre sur luy, mais se sentant leger, espere le gaigner à vo-

Ec


ler: parquoy il monte soudainement contremont en tournoyant, le plus haut qu'il peut: & là le combat est plaisant à voir, principalement si c'est sur plaine sans arbres, & que le temps soit clair, & sans vent: car on les verra & Sacre & Milan monter si haut qu'on les perd tous deux de veüe. Mais rien ne sert au Milan, car le Sacre le rend vaincu, l'amenant contre terre à force de coups qu'il luy donne par dessus. Sans le vol du Milan on ne verroit aucun Duc, d'autant qu'ils hantēt tant seulement en pays de montagne, où ils font leur aire, quelques fois dans les rochers, & es pertuis des hautes tours. On fait voler au Sacre deux sortes de Milans, c'est à sçauoir, le Milan Royal, & le Milan noir, qui donne plus d'affaire aux oiseaux que le Royal: car il est plus agile, & de moindre corpulence. Aucuns tiennent qu'entre les oyseaux de proye que le Sacre est le plus vaillant, plus fort que l'Aigle, ayant les ongles plus fermes & forts, la teste grosse. & le bec fort long: toutes fois il n'est pas si pesant que l'Aigle, & n'a pas les aïles si grandes, & si le Sacre va toujours en haut, ayant seul entre les oyseaux de rapine la queue fort longue. Nous appellons le Tiercelet du Sacre, vn Sacret, qui est le mâle, & le Sacre la femelle: entre lesquels il n'y a autre difference sinō du grand au petit: car communément aux oiseaux de rapine les mâles sont plus petits que les femelles. Aucuns disent que le Sacre a esté nommé en Grec, Triorchis, pour ce qu'il a trois testicules, selon Aristote, & son Sacret, Hypotriorchis: en Latin Buteo, & son Sacret, Subateo.

De l'Autour femelle, & de son Tiercelet mâle.



AUCUNS ont pensé que l'Autour fust du genre des Vautours, à cause de l'affinité de ces deux noms. Les autres tiennent que l'Autour & l'Esperuier ne sont differents qu'en grandeur: mais nous dirons de l'Autour à part, laissant disputer les sçauans Fauconniers.

L'Autour est plus prisé q̄ son Tiercelet: car les mâles des oiseaux de rapine monstrēt à l'œil en plusieurs especes euidente distinction de leur femelle: aussi cognoist-on l'Autour pour femelle, qui est beaucoup plus grande que son Tiercelet. Les Fauconniers en mettent encores vne autre espece, qu'ils nomment demy-Autour, comme moyen entre l'Autour & son Tiercelet. Tous deux sont plus hauts en iambez que les Gerfauts & Faucons. Ils sont oiseaux de poing, au contraire des dessusdicts, qui sont de leurre. La femelle rapporte moult à la couleur de



l'Aigle. Et faisant comparaison du grand au petit, ils ont le col plus long que l'Aigle, & sont encores plus madrez de rouffes taches, aians principalement le champ de la madrure roux. Ceux qu'on nous apporte d'Armenie, au recit des Fauconniers, & de Perse, sont les meilleurs, apres ceux de Grece, & en dernier lieu sont ceux d'Affrique. Celuy d'Armenie a les yeux verds: fort different des autres autours, & a les pieds blancs comme aucuns Faucons Pelerins, bon pour les grands oyseaux. Celuy de Perse est gros, bié emplumé, les yeux clairs, cōcaues & enfoncez, sourcils pendans. Les autres qui sont de Sclavonie, sont bons à toute vollerie, grands, hardis, & beaux de penes: ils ont la lague noire, & les narines grandes. Celuy de Grece a grâde teste,

Ec ij

grôs col, & beaucoup de plumes. Il y a des Autours que les Italiens appellent *Alpifani*, desquels ils vîent fort en Lombardie, & en la Tuscanne, & en la Pouille, qui sont plus gros que longs, fiers & hardis. Celuy d'Afrique a les yeux, & le dos noir, quand il est ieune: & quand il mue, les yeux luy deuïennent rouges. Ceux de Sardaigne ne semblent point aussi les autres: ils ont les pennes brunes, fort petits, les pieds velus, couards, & peu hardis. Mais les nostres que noz Fauconniers ont pour le iourd'huy, sont principalement venuz d'Alemaigne, ayant le tour des yeux, & celle partie du bec qui touche la teste, comme aussi les pieds, & les iambes, de couleur iaune, au contraire du Gerfaut qui les a blenës. Leur queue est bien fort madree de taches larges & obliques, partie noires, partie grises: comme aussi les plumes de dessus le col, & de la teste, sont plus roussettes, & bien marquetees de noir: mais celles des cuisses, & de dessous le ventre, sont autrement tachees: car n'estans si fauues, ont les taches rondes, telles qu'on voit à l'extremité de la queue d'un Paon. Les Autours d'Alemaigne ne sôt gueres beaux, combien qu'ils soient grans, de pennes rousses, peu hardis. Il s'en trouue aucuns qui sont bons auant la mue, qui apres auoir mué ne valent plus rien. L'on en prent moult grande quantité en la forest d'Ardenne, & en plusieurs lieux d'Alemaigne. La bonne forme d'Autour, est d'auoir la teste petite, face longue, & estroïcte comme le Vautour, & le gosier large, & qu'il ressemble à l'Aigle, les yeux grans, profonds, & en iceux vne rondeur noire: narilles, oreilles, crouppe, & pieds larges, col long, grosse poiétrine, chair dure, cuisses longues, charnues, & distantes. Les os des iambes & des genoux doiuent estre forts, les ongles gros & longs. Et dès le fondement iusques à la poiétrine doit estre cōme en vne rondeur de croissant. Les plumes des cuisses, vers la queue, doiuent estre larges, & peu rousses, & molles. La couleur de dessous la queue doit estre comme celle qui est à la poiétrine: La couleur de l'extremité des plumes de la queue, doit estre noire en la partie des lignes. Des couleurs la meilleure est rouge, tendant au noir, ou au gris clair. La mauuaise forme d'Autour, tant en petis qu'en grands, & est quand ils ont la teste grande, le col court, les plumes du col meslees, fort emplumez, charnuz & mols: cuisses courtes & gresles, iambes lōgues, doigts courts, couleur tannée, tendant à noir, alpre sous les pieds. Combien qu'ayans obserué les Vautours, & autres oyseaux de proye, leur auoient trouué les iambes, pieds, & bec blefmes: és autres, bleuz, & és autres, d'autre couleur, selon leur aage & mue. Les Grecs ont appelé l'Autour, *Asterias Hierax*, les Latins, *Accipiter Stellaris*, les Italiens *Astures*.



De l'Espèruiier, ou Esparuiier, femelle, & de son Mouchet masle.

PArce que, selon aucuns, l'Esperuier & l'Autour ne different qu'en grandeur, ie mets icy l'Esperuier apres l'Autour. Il y a de deux sortes d'Esperuiers, de niais & de ramages: qu'on appruiuise, les tenant bien longuement & souuent sur la main, & principalement à l'aube du iour. On leur donne à manger deux fois le iour, ou vne fois, principalement quand le lendemain on les veut faire voller: car alors l'Esperuier doit estre bien affamé, afin qu'il volle plustost apres sa proye. Sa nourriture doit estre de bonnes chairs, spécialement d'oiseaux, & de mouton, afin qu'il soit bien gras. L'Esperuier est facile à laisser son maistre: & pour obuier à ce, faut que le maistre gar-

Ee iij,

de de le blesser, & ne luy contredire, car il est desdaigneux. Quand il ira voller, il ne le doit point laisser aller trop loing: d'autant que quand il ne peut attraper l'oiseau qu'il volle, il s'en va par indignation, & monte sur vn arbre, sans vouloir retourner à son maistre: qui ne le doit travailler outre mesure, mais se doit contenter de ce qu'il pourra prendre, & luy donner de sa proye à manger, afin qu'il sente ce que la proye luy a valu, & qu'il soit excité de volontiers voler. Les oiseaux que l'Esperuier prend, sont Perdrix, Cailles, Estourneaux, Merles, & autres semblables. Quelque part qu'il y ait des Pinssons, & que l'Esperuier passe, on les oïra crier à haute voix, & se le signifier de l'un à l'autre: car entre les petits oiseaux, les Esperuiers aiment à manger les Pinssons. Mais c'est que les Pinssons descendent l'huyver es plaines, & volans à grandes troupes, se donnent pour pasture aux Esperuiers: lesquels il nous semble qu'ils ne partent aucunement de noz contrees.

Les Fauconniers nomment diuersement les Esperuiers, selon diuers accidens: car ceux qui sont muez de bois, & ne tiennent point du fort, sont nommez ramages: les autres qui ne sont muez, & qui sont nouvellement sortis du nid, & ont esté quelque peu à eux, sont nommez Niais. De telle sorte fait bon choisir pour apprendre: car se sont ceux qu'il fait le mieux apprestre pour s'en seruir, comme aussi est de ceux qu'on surnomme Branchers: sçauoir est qui ne sont encores muez, & qui n'ont point fait d'aire, & n'ont iamais nourry de petis.

Les Esperuiers, comme aussi tous oiseaux de rapine, sont couuers de diuerses pennes selon leurs aages, & aussi sont differents selon leurs tailles. Il y en a qui sont couuers de menues plumes blanches trauersaines: les autres sont couuers de grosses plumes, les Fauconniers les appellent mauuaises. L'Esperuier meilleur pour la Fauconnerie est celuy qui a la teste rondette par le dessus, & le bec assez gros, les yeux vn peu cauez, & les cercles d'entour la prunelle de l'œil, de couleur entre vert & blanc, le col long & grosset, grosses espauls, & vn peu bossues. Doit aussi estre vn peu ouuert à l'endroit des reins, & affilé par deuers la queue. Ses ailes soient assises en auallant le long du corps, si que le bout s'appuye sur la queue, laquelle il doit auoir non trop longue, garnie de bonnes pennes & larges. Aussi faut que ses iambes soient plattes & courtes, & les pieds longs & deliez, la couleur entre verte & blanche, les ongles poignans, bien noirs & deliez. Quand les plumes trauersaines d'un Esperuier sont grosses, vetmeilles, & bien colorees, & les

nouees grasses, & que celles de la poitrine ensuiuent bon ordre, & que le brueil soit meslé de mesme traucrsaine, ainsi que le corps, & les sourcils soient blancs, vn peu meslez de vermeil, qui prennent le tour iusques derriere la teste, & ayant les pennes larges, & soit tousiours familieux, sera entre tous autres de bonne eslite.

Il y a des Esperuiers appelez en Italien di Ventimiglia, fort grans, ayans treze pennes en la queue. Il en y a de Sclauonie, qui ont les pennes de la poitrine noires. D'autres sont appelez Calabriens, qui sont moyens & fort hardis. Autres sont qui viennent de Corse, ayans les pennes brunes. Ceux qui demeurent en Allemagne, sont petis, & non trop bons. A Veronne & à Vincence s'en trouuent de moyens en grandeur. Ceux que les Italiens appellent di Sabbia, ont les pennes rouffes, & les taches dorees comme vne Tourtre.

Les Esperuiers ne tiennent leurs perches si constamment comme font les Faucons: parquoy on ne les prend si souuent aux lacets. On les trouue volotiers perchez en temps d'hyuer aux bois de haute fustaye, sur vn arbre gresse, en lieu où il y a abry, le long de quelque haye, plus tost qu'en vn bien gros arbre en vne haute forest. Et vient à la perche enuiron Soleil couchant, volant principalement contre le vent. L'esperuier est de moyenne corpulence entre les oiseaux de proye, mais son masse est de moindre stature. Il y a si peu de difference entre l'Esperuier & son masse, qu'on n'y congnoist que la grandeur qui les puisse distinguer. Son masse de nom propre François est appelé vn Mouchet. Et pource qu'il n'est hardy, & de franc courage, lon n'a pas souuent accoustumé de le nourrir pour s'en seruir à la Fauconnerie. La description des couleurs du Mouchet conuiemt à celle de l'esperuier à ceste cause les auons mis ensemble. L'esperuier comme aussi le Monchet, ont le dessus de la teste couuert de plumes brunes, mais la racine est blanche. Quelques plumes de celle partie des ailes, qui touchent le dos, sont marquées de taches rondes & blanches. Les plumes qui couurent le dos, & les ailles, ne luy apparoissent madreces, sinon qu'on les regarde par le dedans, qui sont principalement merquées par le trauers. Les petites plumes qui sont entour les plis des ailles, & au costé de l'estomach, sont rouffettes, comme aussi sont celles qui sont dessous le ventre, qui luy apparoissent fort mouchetees par le trauers, ayant celà de particulier, que les costez en sont noirs. Aucuns disent que nostre esperuier est le mesme

RECUEIL DES

oiseau de proye que les Grecs appelloient Percus Spizias, parce qu'il mange les Pinçons, & en Latin, Fringillarius, & en Italien, Sparuiero.



Des Faucons.

Vous pouvez entendre que la Fauconnerie est dedice pour le plaisir des grands Seigneurs, & principalement de nostre France: les estrangers estans aduertis de leur profit, s'estudioient de prendre diuerses sortes de Faucons, & nous les apporter: qui a esté cause que nous en auons rencontré que les Grecs, ny les Latins n'auoyent point veu, & ainsi ne leur ont donné aucun nom, parce qu'ils n'auoient l'usage de les aduire au leurre, & par conséquent n'estoient point maniez des hommes de ville. Et à cause que le Faucon, sur

sur tous les oiseaux de proye, est le meilleur pour la vollerie, tous les autres oiseaux de proye ont esté appelez Faucons, comme dessus a esté dit: car le Sacre, Gerfaut, Autout, & tels autres, tiennent le nom de Faucon. Or maintenant nous entendons parler du Faucon en particulier, c'est à dire de celuy qui a baillé le nom à tous les oiseaux de proie. Les Faucons sont bien d'autre genre que les Aigles, car les Aigles à grâd peine, encores qu'on mette long temps à les leurrer, se peuuent accoustumer à la vollerie. Mais les Faucons encores qu'ils soient sauvages, n'ayans iamais esté leurrez, de nature ils gibboyent: car voyâs, des hommes & des chiens de chasse, ils se mettent avec eux pour leur ayder, frappans aucunes fois les oiseaux qu'on vouloit prédre, l'autrefois les espouventans: s'associans avec les hommes & les chiens pour avoir part au butin. Les Faucons qui sont de mesme genre & espeece, prenēt grande difference entre eux, & sont appelez par diuers noms, selon le temps qu'on les commence à nourrir, selon les lieux où ils hantent, & selon les pays dont ils viennent. Nous les distinguōs en muez, de bois, en fors, en niards, ou nieds, en grans, moyens, & petis, qui sont tous de diuerses tailles, & ont diuerses pēnes, selon diuers pays, aussi sont de diuers pris, selon diuerses louanges de bonté. Le Faucon niard, ou nieds, est celuy qu'on prend au nid: & ceux cy, le plus souuent, sont grands criards, & fâcheux à nourrir & entretenir. Le Faucon fort, est celuy qui est pris depuis Septembre, iusques en Novembre: ceux cy sont les meilleurs de ce genre, car estans petis, ils sont aisez à s'appriuoiser, & estant desia forts, & la saison en laquelle ils sont prins temperee, apprenent plus facilement: ceux qui sont prins és quatre mois subsequens, combien qu'ils soient fort beaux, si sont ils maladifs, & fâcheux à entretenir. Et ceux qui sont prins apres ce temps, combien qu'ils soient forts, sont toutesfois trōpeurs & cauts: parce qu'ils sont deuenus grâds en liberté, qui est la cause qu'en ayant encore memoire, facilement ils se destournent de ce qu'on leur a appris & enseigné. Les Faucons sauvages, qu'on a congneu hanter és lieux marescageux, & se paistre d'oiseaux de riuere, sont surnommez Riueroux: les autres qui se nourrissent de Merles, Estourneaux, Corneilles, & Mauuis, sont nommez Champestres. Il en y a aussi qu'on nomme Faucons appris de repaire. Il en y a d'autres qui sont appelez passants. Les autres sont nommez estrangers, par-ce qu'ils viennent de loingtain pays. Puis encore on appelle les Faucons par ces appellations, selon la bonté & le pays dont ils viennent, où ils sont prins: car il y a le Faucon Gentil, le Pelerin,


RECUEIL DES
le Tartarot de Barbarie, & le Tunicien ou Punicien.

Du Faucon Gentil.



L faut entendre qu'entre les Faucons, les Fauconniers louent celuy qu'on nomme le Gentil, pour estre bon heronnier, & à toutes manieres d'oiseaux de riuere, tant dessus que dessous, comme à Rouppeaux, qui ressemblent à vn Heron, aux Esplugebans, aux Poches, & aux Garfortes: & aussi que c'est le plus hardy & vaillant de tous les Faucons. Si ce Gentil est prins niais, on le peut mettre à la Gruë: car fil n'y estoit fait de niais, il n'en seroit si hardy: pource que n'ayant iamais rien congneu, le laissant premierement sur la Gruë, il en sera trouué plus vaillant.

Du Faucon Pelerin.



LE Faucon Pelerin est ainsi appellé parce qu'il fait de longs chemins & voyages, & passe de pays en autre, qui est en la saison d'automne, en laquelle saison il est prins. Les autres disent qu'ils sont prins depuis Iuing iusques en Aoust: & qu'à cause de la chaleur ils sont difficiles à auier & à leurrer. Les signes pour congnoistre le vray Pelerin, sont qu'il a le bec gros & azuré, & depuis le bec iusques à l'oreille roux & noir, & la teste pigeassée de blanc ou roux, les pennes grandes, & semblables à la Tourtre, ayant la poitrine large, les pieds grans & azurez ou blancs, les iambes courtes & grosses. C'est oiseau Pelerin est de sa propre nature franc à tout faire, & n'y en a point entre tous les oiseaux de proye de plus commun. On le leurre pour la Grue, pour l'oiseau de Paradis, qui est plus petit que la Grue, pour les Rouppeaux, pour les Poches, Garfortes, Ostardes, Oliues, Faisans, Perdrix, Oyes sauuages, & toute autre maniere de gibbier. Le Faucon Pelerin est plus petit que tous les autres Faucons, ayant les aîsles & les cuisses, longues, les iambes & la queue petite, la teste fort grosse: les meilleurs sont ceux qui ont le bec de couleur bleüe. Les Faucons Pelerins qu'on apporte de Cypre, qu'on cognoist à ce qu'ils sont de petite corpulence, ayans leurs plumes rouffes, sont plus hardis que les autres. Lon pense que ceux de Sardaigne sont moult semblables aux Cypriés, & que tels

Faucons sont fort bons Gruyers, & Heronniers, & assaillent hardimēt les Cignes.

Du Faucon Tartarot, ou de Tartarie, ou Barbarie.

Nous nommons le faucon Tartarot Faucon de Tartarie, & aussi Faucon de Barbarie: car on le prend lors qu'il passe de Tartarie en Barbarie: estant passager comme le Pelerin, toutes fois de plus grande corpulence, roux dessus les ailes, & moult bien empieté de longs doigts. Quelques-vns ont opinion que tels Faucons sont espee de Pelerins, & où il y a peu de difference. Quoy qu'il en soit, c'est vn oiseau bien volant, & qui assaut hardiment toutes manieres d'oiseaux de riuere. Aussi le peut on mettre à voler tous ceux que nous auons nommez du Pelerin. De tous deux peut on voler pour tout le mois de May, & de Iuing, car ils sont tardifs à leur muer: mais quand ils ont commencé à despouiller leurs plumes, ils n'arrestent à estre muez. Les nobles qui habitent es Isles de Cypre, Rhodes & Candie, vsent desdits Faucons Tartares ou Barbares, plus volontiers que de ceux qui se trouuent niais en leur pays.

Du Faucon Tunicien, ou Punicien.

LE Faucon Tunicien pourroit estre aussi appelé Punicien: car ce que nous lisons de la guerre Punique contre les Carthaginois, estoit contre les habitans, où est maintenant située Tunis. Ce Faucon Tunicien est moult grand, approchant de la nature du Lanier, aussi est-il de tel pennage, & de tels pieds, mais est plus petit, & de plus long vol, mieux croisé, & a grosse teste & ronde. Il est appelé tunicien, pource qu'on l'apporte du pays de Barbarie, car il fait son aire ne plus ne moins que le Lanier en Frâce. Aussi est apporté par ceux de Tunis, qui est la maistresse ville du pays. Il est fort bon pour riuere, & bien montant sur aile, & aussi bon pour les champs, à la maniere du Lanier: mais il est rarement apporté de par deça. Il ya vn Faucon qu'on appelle Montain, ou montagner qui a cela de propre, qu'il regarde souuent ses pieds: & si est fort despit, comme sont communement tous les oiseaux de proye: car à peine le Fauconnier le peut rauoir, & ne veut reuenir à luy s'il a perdu sa proye.

Ff ij

Nous disons que le Tiercelet est prononcé suivant l'Ety-
mologie d'un tiers: & possible que le Tiercelet a gagné ceste
appellation François de sa petitesse. Aucuns disent que les
Latins, à ceste cause, l'ont nommé Pomilio. Les Tiercelets
des autres oiseaux de proye sont autrement nommez: car celui de l'Es-
peruier est nommé Mouchet, celui du Lanier, Laneret, & du Sacre,
Saceret. Le Tiercelet de Faucon est donc le mâle du Faucon, étant de
moindre corsage que le Faucon (comme sont quasi tous les mâles des
oiseaux de proye) & luy est si semblable, qu'il ne diffère qu'en grandeur,
ayant les plumes beaucoup madrees, duquel la teste est fort noire: aus-
si il a les yeux noirs, & est cendré par le dos, & dessus la queue. qui tou-
tesfois est madree, comme aussi sont les plumes des ailes, desquelles le
bout est noir. Il en y a six entieres, qui luy sortent dehors, comme au
Faucon: car la septiesme, qui est la dernière, est petite, & se cache des-
sous les autres. Il est oiseau de leurre, comme est le Faucon, & non de
poing. Ses iambes & pieds sont jaunes, & a communement la poitrine
palle. Il porte deux taches bien noires sur les plumes, es costez
des yeux.

De la nourriture des Faucons, & comme il les faut choisir.

VN auteur Grec, nommé Suidas, dit que Falco est nom
general à tout oiseau de proye & de rapine, comme a esté
Accipiter en Latin, & en Grec, Hierax, Festus pense qu'on
le nommoit Falco, à cause de ses ongles tourne en faux.
Il semble qu'Aristote n'a point usé de telle diction, mais semble que
pour nostre Faucon il ait entendu nommer Accipiter Palumbarius. Et
de fait, les oiseleurs n'ont meilleur moyen pour prendre les Faucons,
que des Ramiers. Quoy qu'il en soit, le Faucon est le Prince des oiseaux
de rapine (j'entens quant au vol) pour sa hardiesse, & grand courage.
Les Faucons ne doiuent estre desnichés & mis hors de leur nid qu'ils
ne soient ja grandets, & en leur perfection. Que si plustost on les oste,
il ne faut point les manier, mais faut les mettre en un nid le plus sem-
blable au leur qu'on pourra, & là les nourrir de chair d'Ours, & de
Poulets: autrement les ailes ne leur croissent point, & les iâbes & tous
leurs autres membres facilement se quassent & desnoient. L'esle-

ction des Faucons pour les meilleurs, & ceux qui sont de plus grand pris, sont ceux qui ont la teste ronde, & le sommet de la teste plein, le bec court & gros, les espauls amples, les pennes des ailles subtiles, les cuisses longues, & les iambes courtes & grosses, les pieds noirs, grands & estendus. On cognoist les meilleurs & plus vaillâs Faucons à ce qu'ils ont le col court, la teste grosse & ronde, l'os de la poictrine fort aigu & poinctu, les ailles longues, la queue petire, les iâbes courtes, & bien amassées & nerueuses, rondes par le haut, par le bas fermes & seches: & ont la face de couleur tachée de noir, & la peau de dessus & dessous les yeux qui les couure, toute noire, mais aupres des yeux y a des taches blanches & cendrees, & les yeux fort iaunes, avec la pupille noire. Faut aussi, pour choisir les meilleurs Faucons, eslire les moyens, qui ne sont ne grans ne petis, comme sont ceux qu'on nomme Pele-rins qui ont esté prins sur la falaise de la Mer, qui n'ont gueres sejour-né au pays pour se nourrir, & qui n'ont entendu sinon à venir. Le Fau-con aussi qui a longues espauls, longues ailles, gifants au bout de la queue, & que celles de la queue monstrent grosses plumes, bien mou-lues, & la queue moult longue, & qui se termine en filant, comme cel-le d'un Esperuier, & que les pennes soient bien rondes, & que le bout de la queue ne soit blanc de plain pousse, ayant les nerfs vermeils, sera loué entre tous les autres. Aussi doit avoir les pieds de la couleur de ceux d'un Butord, & bien fendus, & verds, les ongles noirs, bien poin-ctus & trencheants, & ne doit estre ne trop haut assis, ne trop bas, mais que la couleur des pieds, & chiere du bec soit toute vne. Cuisses gros-ses, iambes courtes, plante large molle, & verte, plumés legieres. Aussi doit avoir le bec brosse, & grossier, grandes narines & ouuertes, & doit avoir les sourcils vn peu hauts & gros, les yeux grands & cappes, & la teste vn peu vouldiffée & rondette par le dessus. Et quand il est seur, qu'il face vn peu de barbette dessus le bec avec sa plume. Aussi doit avoir le col long, & haute poictrine, & vn peu rondette sur les es-pauls à l'assembler du col, & se doit seoir large sur le poing, peu reuers, mordant & familieux. Ses plumes blanches & colorees de vermeil, & les nouees grosses & bien vermeilles. Les sourcils, & ioües blanches, colorees de plumes vermeilles, la teste grise, le dos de bize couleur, comme celuy d'une Oye, les plumes larges & rondes: & sur tout ne doit point estre grand, mais se doit entresuir de plumes, de pied, & de bec, & doit aussi avoir l'ouure grande, & dedans l'ouure ne doit point avoir vn bout de l'escofraye.

Les Faucons se perchent en diuerſes manieres, dont y en a qui tiennent leurs perches longuement, & n'ont gueres accouſtumé de les prendre dedans la foreſt, mais à l'orec du bois, deſſus les branches des hauts arbres, à l'endroit où il y a meilleur abry, & où il ne vente point: ou bien ſ'affeioient ſur les guignons de roches és hautes ſalaiſes.

Pour les appriouifer, les faut ſouuent tenir ſur la main, les nourrir d'aiſles & cuiſſes de poulles mouillees en l'eau, & mettre en lieu obſcur, & ſouuent leur preſenter vn baſſin plein d'eau, où ils ſe puiſſent baigner, puis apres le bain les ſecher au feu. On les accouſtume à chaſſer premierement petis oiſeaux, puis moiens, par apres des grans: & ne faut faillir à leur dōner curee de oyſeaux qu'ils aurōt prins. Ils vollent merueilleuſement toſt, & mōtent en haut en roüant & regardāt en bas: & où ils voient la Cāne, l'Oyſon, la Gruē, le Hairō, ils deſcendent cōme vne ſagette, les aiſles cloſes, droit à l'oiſeau, pour le deſrōpre à l'ongle de derriere, & ſils faillent à le toucher, & qu'il fuye, volēt ſoudainemēt apres, & ſils ne le peuuent attraper, perdent leur maĩſtre. Le Faucō ſur tous eſt propre pour voller le Hairon, & tous autres oyſeaux de riuere.

Du Lanier femelle, & de ſon Laneret maſle.



Arœ que le Lanier approche de la nature du Faucon, principalement du Tunicien, & auſſi eſt de tel pennage, & de tels pieds, & que le Lanier entre les oyſeaux de Fauconnerie prēd auſſi le ſurnom de Faucon, car ils dient communément Faucō Lanier, nous l'auons mis apres les eſpeces des Faucons.

Monſieur du Fouilloux, Gentil-homme, autant accord & accompli, qu'il ſen trouue en noſtre France, (auquel toute la poſteritē ſeroit re-deuable, ſil nous vouloit mettre en lumiere ſa Fauconnerie, comme il a faiēt heureuſement ſa Venerie) diēt par vn petit fragment que i'en ay veu, qui ſeruira d'eſchantillon pour le reſte, que les Faucons Laniers & autres oiſeaux qui hantent les coſtes de France, & principalement noſtre Guyenne, viennent de deux pays: les vns des pays froids, comme de la Ruſſie, de la Pruſſe, de Norouargue, & autres pays circonuoifins qui ſe cognoiſſent aux pannaches, aux pieds, & à la teſte. Et telle ſorte d'oiſeaux ſuiuent en ces pays de deçà, les Pluiiers, & Vaneaux. Ils viennent de ces pays-là, à cauſe des grādes froidures, & des borts des Mers, qui ſont gelez, & par ce veullēt approcher du Soleil, & meſmes paſſent outre noſtre region, pour aller en la coſte d'Eſpagne & d'Aſſrique. Et quand ils retournent de leur paſſage, qui eſt en Mars, les Grues retournent auſſi pour aller aux aires. Nous cognoiſſons ces oiſeaux aux pennages, qu'ils ont fort gaſtez, à cauſe de la ſalſitude de l'air marin, qu'ils



ont passé, qui leur a mangé le pennage, & on les appelle à ce retour Lâtenaires. Les autres Faucons qui viennent d'un autre pays, comme du pays chaud devers les monts Pyrenees, du costé d'Afrique, & des montagnes de Suysse, sont aisez à cognoistre par les signes, que Dieu aydant, quelque iour il nous monstrera. Le faucon Lanier est ordinairement trouué faisant son aire en nostre France: & pour ce qu'il s'y trouue, & qu'il est de mœurs faciles, lon s'en sert communément à tous propos. Il fait tous les ans son aire, tant és hauts arbres de fustaye, comme és hauts rochers, selon le pays ou il se trouue. Il est de plus petite corpulence que le Faucon Gentil, aussi est de plus beau pennage que le Sacre, & principalement apres la muë, & plus court empieté que nul des autres Faucons. Les Fanconniers choisissent le Lanier ayant grosse teste, les pieds bleuz & orez. Le Lanier vole tant pour

riuiere, que pour les champs. Et pource qu'il n'est dangereux pour son viure, il supporte mieux grosse viande, que les autres Faucons de gentes pennes. Les marques sont infallibles pour recognoistre le Lanier: c'est qu'il a le bec & les pieds bleuz, & les plumes de deuant meslees de noir avec le blanc, non pas trauersees comme au Faucon, mais de taches droictes le long des plumes. Le plumage du Lanier de dessus le dos, ne luy semble estre madré, non plus que par dessus les ailles & la queue. Et si d'auenture il y a des madrures, elles sont petites, rondes & blancheastres: mais quand il estend ses ailles, & qu'on le regarde par le dessous, ses taches apparoissent contraires à celles des autres oyseaux de proye: car elles sont rondes & semees par dessus, comme petits deniers: nonobstant, comme nous auons dict, les pennes de deuant & de dessous la poitrine, ont les biragarrures estendues en long sur les costez de la penne. Son col est court & grossier, & aussi son bec. Les Fauconniers voulans faire le Lanier gruyer, le mettent en vne chambre basse si obscure qu'il ne puisse voir aucune lumiere, sinon lors qu'ils luy baillent à manger, & aussi ne le tiennent sur le poing que de nuit. Et alors qu'ils sont prests de le faire voler, font feu en la chambre pour l'eschauffer, afin de le baigner en pur vin: puis l'ayant essuyé, le font repaistre de ceruelle de geline: & le portant deuant le iour, celle part où est le gibbier, le iettent de loin à la Grue, deslors qu'il commence à estre iour: & s'il ne prent ce iour, il ne laissera estre bon par apres, principalement depuis la my-Iuillet, iusqu'à la fin d'Octobre. Le Lanier est femelle, son mascle est nommé Laneret. Il n'est aucun oiseau qui tienne mieux sa perche: & parce qu'il ne s'en part l'hyuer, aucuns ont dict que c'est l'Ascalon de Plin, & aussi des Grecs.

Du Hobreau.



N ne cognoist de tous oyseaux de Fauconnerie, aucun de moindre corpulence que le Hobreau apres l'Emerillon. Le Hobreau est oiseau de leurre, & non de poing: aussi est-il du nombre de ceux qui volent haut, comme le Faucon, le Lanier, & le Sacre. Quand auons voulu descrire du Hobreau, le voyant conferé à vn Sacre, n'auons trouué gueres de difference, sinon en la grandeur. Il n'y a contree où les Hobreaux ne suiuent les chasseurs: car le vray mestier du Hobreau, est de prendre sa proye de petits oyseaux en volant. Parquoy il n'y a aucun Payfant



paissant, ou homme de basse condition, qui ne le cognoisse. La comparaison des petits poissons en l'eau, pour chasser des plus grands, est conforme à celle des petits oiseaux en l'air pour chasser du Hobreau: car tout ainsi comme les poissons chassés par les Daulphins, ne se sentans estre en seureté dedans leur element, ont recours à se sauuer en l'air, & aiment mieux estre à la mercy des Canards, & autres oiseaux de marine, qui volent au dessus de l'eau, que de se donner en proye à leur enemy: tout ainsi les Hobreaux, aduisans les chasseurs aux champs, allans chasser le Lieure, ou la Perdrix, accompagnent les chasseurs en volant par dessus leurs testés, esperans trouuer rencontre de quelque petit oyseau; que les Chiens feront leuer. Mais comme aduient que les Farlouses, Proyers, Cōcheuis, & Alouettes ne se branchent en

Gg

arbre, se trouuans sur terre à la gueule des Chiens, sont contraincts de s'esleuer en l'air, par ainsi se trouuans combatus des chasseurs, & des Hobreaux, ayment mieux se donner en proye aux Chiens, ou chercher moyen de trouuer mercy entre les iambes des Cheuaux, & se laisser prendre en vie, plustost que de tomber à leur mercy. Vn Hobreau est si leger qu'il se hazarde contre vn Corbeau, & luy ose donner des coups en l'air. Il a celà de particulier, qu'ayant trouué les chasseurs, il ne les suit que certaine espace de temps, quasi comme s'il auoit ses bornes limitees: car se departant, va trouuer l'oree de son bois de haute fustaye, où il se tient & perche ordinairement. Le Hobreau a le bec bleu: mais ses pieds & iambes sont iaulnes. Les plumes qui sont au dessouz de ses yeux, sont fort noires, tellement que communément depuis le bec elles continuent de chasque costé des temples, & vont iusques derriere la teste, dont sort vne autre courte ligne noire en chasque costé du bec, qui luy descend vers les orees de la gorge. Quant au sommet de la teste, il est entre noir & fauve: mais a deux taches blanches par dessus le col. Le dessouz de la gorge, & les deux costez des temples sont roux sans madrures. Les plumes de dessouz le ventre ont la madrure de telle façon, qu'estans brunes par le milieu, ont quelque petite partie des bords blanchastre. Les ailles sont bien mouichetees par dessouz, mais cela est que les plumes ont lestaches sur les costez par interualles, ne touchant point au milieu. Tout le dos, la queue, & les ailles apparoiſſent noires par le dessus. Il ne porte aucunes larges tablettes sur les iambes, sinon que commençant depuis les trois doigts, lesquels il a longs, au regard des iambes qui sont courtes. Sa queue est fort bigarree par dessouz, de taches rousſes treſſees, en trauers entre les noires. Les plumes (qu'on nomme les iambieres) qui couurent les cuisses, sont plus colorees d'enſumé qu'en nul autre endroit. Le voyant voller en l'air, l'on apperçoit le dessouz de la queue, & l'entre-deux des iambieres rougeastre.

Il y a vn oiseau qu'on appelle Jan le blanc, ou l'oiseau ſainct Martin, & vn autre de meſme eſpece, qui s'appelle Blanche-queue, que volans par la campagne chassent aux Alouettes: & ſils en aduient aucune, ils ſont couſtumiers de ſe ietter deſſus: mais elles ont recours à ſe garantir en l'air, & gaigner le deſſus. Mais ſi le Hobreau s'y trouue, c'eſt choſe plaiſante à veoir: car le Hobreau, qui eſt beaucoup plus agile, n'arrete gueres à l'auoir deuancee. Et ſ'il la prend, lors ce Jan le blanc, ou l'oiseau S. Martin, l'entreprend contre le Hobreau, combien qu'il ſoit

plus viste, & les auons veu tomber tous deux attachez ensemble. Aucuns ont voulu dire que nostre Hobreau, est ce que les Grecs appelloient Hypotriorchis, & les Latins, Subuteo.



De l'Esmerillon, ou Emerillon.

L'Esmerillon est le plus petit oiseau de proye dont les Fauconniers se seruent. Il est de poing, & non de leurre, combien qu'à vn besoin on le puisse aussi aduire au leurre. Il est fort hardy de courage: car combien qu'il ne soit pas gueres plus gros qu'un Merle, ou Pigeon, toutesfois il se hazarde contre la Perdrix, la Caille, & tels autres plus grands oiseaux que luy, de tel courage, qu'il les suyt souuentefois iusques aux villes &

Gg ij

villages. Il represente si naïfvement le Faulcon, qu'il ne semble differer, sinon en grandeur, car il a mesmes gestes, mesme plumage, & de mesmes mœurs, & en son endroi&t a mesme courage: parquoy il le faut maintenir estre aussi noble que le Faucon. Il est seul entre tous les autres oiseaux de proye, qui n'a distinction de son male à la femelle: car l'on ne trouue point de Tiercelet à l'Esmerillon. Aucuns pensent que Lyers Hierax en Grec, & Leuis Accipiter en Latin, soit nostre Emorillon: & les oiseaux de proye, qu'Aristote nomme Leues, nous semblent estre les Esmerillons.

Du Fau-perdrieux.



Nous mettons les Fau-perdrieux au nombre des oiseaux de rapine: lesquels n'auons gueres accoustumé de nourrir pour nous seruir à prendre les oiseaux sauvages, car ils sont moins gentils que les autres: ioin&t qu'ils ne volent trop hastiument. Si est-ce qu'en auons veu de leurrez pour la Perdis, pour la Caille, & pour le Connin. Ils volent encôres mieux que le Milan, mais moins que le Faucon, Sacre, & son Tiercelet: qui nous est assez notoire, apres les auoir veuz au vol des Sacres & Faucons, au lieu de Milan. Ils descendent au Duc côme le Milan: mais soudain qu'ils voyent qu'on lâche les Sacres pour les prendre, ils s'essayent à fuyr au loing, & non pas en haut, comme faict le Milan: parquoy leur vol est penible. Aussi le Fau perdrieux, qui est aussi de grande force, se defend vaillamment, car il est beaucoup plus fort qu'un Milan. Cela est cause qu'il faut pour le moins, lâcher quatre oiseaux pour le prendre. Il n'est pas amy du Hobreau, ne de la Creferelle, comme il appert quand lon va à la chasse de la Caille avec les chiens que le Hobreau a accoustumé luyure, car si le Fau-perdrieux y arriue, le Hobreau est contraint de s'en fuyr, pour euiter sa passee: car le Fau-perdrieux est oiseau qui volle assez roide pres de terre, sans gueres battre pres des ailles. Mais afin que faions mieux entendre de quelle espee d'oiseau de proye & rapine pretendons parler, nous dirons la figure & couleur. Le Fau-perdrieux est quelque peu de moindre corpulence qu'un Milan, toutesfois plus haut en iambé, ayant le bec & les ongles moins crochus que tous autres oiseaux de rapine. Aussi il boit quand il se trouue à quelque mare: sa iambe est bien delice,

& iaune, couuerte de tablettes: la queue est noire, comme aussi le bout des ailles, mais les plumes sont rammees obscures: le dessus de la teste, & dessous la gorge est blancheâtre, tirant sur le rouge; comme aussi est le dessous du ply des ailles aux deux costez de l'estomach: les plumes qui luy couurent les ouyes sont noires: son bec ioignant la teste est de couleur plombée, mais le bout est comme noir. Ce n'est pas un oiseau passager au pays de France, car on le trouue faisant son nid sur les fumitez des hauts arbres separez par les plaines d'Auuergne le long des elapiers, où il fait moult grands dommages sur les Connills. Il a le col bien court, au contraire de l'Autour, qui l'a long. Aucuns tiennent que le Fau-perdrtieux estoit nommé par les Grecs & Latins, *Circos* & *Circus*.

De tous oiseaux de proye, qui seruent à la Fauconnerie.

VN grande partie des oiseaux de rapine, excepté les Vautours, & aussi le Coqu, ont communement les plumes de la queue & des ailles beaucoup madrees. Tous ont l'ongle & le bec crochu, & sont presque semblables les vns aux autres: car ils ne semblent estre differends qu'en grandeur, veu mesme-ment que leur couleur se change diuersement selon leur mue, qui fait qu'ils en sont appelez Hagars, ou Sors, tout ainsi qu'on fait des Haras enfumez, surnommez Sorets.

Il y a grande partie des oiseaux de proye qui sont passagers, que nous ne sçauons bonnement dont ils viennent, ne où ils s'en reuont: mais d'autant que les estrangers sçauent y auoir profit, font diligence de les prendre, & les nous apporter, qui est cause de nous les faire congnoistre: car sans cela nous n'en pourrions auoir aucune espeece estrange- re. Et pour ce qu'on les prend le plus souvent avec de la gluz, qui est cause de leur froisser les penes, à qui ne la sçait oster, nous en dirons la maniere. Il faut auoir du sablon menu & sec, & cendre nette, meslez ensemble: & de cela saupoudrer le lieu, & plumes engluées, & le laisser ainsi vne nuit. Le lendemain ayant battu des moietix d'œufs, faudra oindre le lieu englué avec vne plume, & le laisser là deux iours: de rechef prendre du gras de lard, & beurre frais fondus ensemble, & oindre les places engluées, & les laisser ainsi vne nuit. Le lendemain ayant fait riedir de l'eau, faut laver l'oiseau, puis res- fuyer avec du linge net, & dessecher l'oiseau. On ne les doit oster du

nid qu'ils ne soient forts, & se sachent tenir sur leurs pieds, puis les tenir sur vn bloc ou perche, pour mieux demener leur pennage, sans le gratter en terre. Les oiseaux de Fauconnerie sont communemēt prins niais, branchers, ou fors. Il faut les paistre de chair viue le plus souuent qu'on pourra, car elle leur fera bon pennage. Si on les prend trop petits, & qu'on les garde en lieu si oïd, il en pourront auoir mal aux reins, en sorte qu'ils ne se pourrōt soutenir. Ceux qu'on prend fors, est quād ils ont mûé. Le past & chair bōne outre l'ordinaire des oiseaux de Fauconnerie est, leur donner des cuisses, ou du col de Poules. Les chairs froides leurs sont bien mauuaises. Les chairs de beuf, de porc, & autres leur sont de forte digestion: mais particulièrement celle des bestes de nuit les pourroient faire mourir, sans qu'on s'apperceust de la cause. Et afin de s'en donner de garde, ie te mettray icy des bestes de nuit: c'est à dire, qui volent la nuit, & ne bougent gueres de iour, parce que si les oiseaux de Fauconnerie en mangeoient, ils en mourroyent. I'en trouue dix. Le grand Duc, le moyen Duc, ou Hibou cornu, Hibou sans cornes ou Chahuant, Cheueche, Huette, l'Effraye, ou Fresaye, Corbeau de nuit, Faucon de nuit, ou Chalcis, & Souris-chauue. La chair de Poule estant donnee & delectable, trouble le ventre de l'oiseau, si la mange froide: parquoy, l'oiseau affriandé de telle chair, pourroit laisser sa proye en volant, & se ruer sur les Poules si en voyoit aucunes. A tel inconuenient, faut paistre l'oiseau de peris Pigeons, ou petites Ironnelles. Chair de Pic, & vieils Coloms est amere & mauuaise aux oiseaux. La chair de Vache leur est mauuaise, pour estre laxatiue, qui aduiuent par sa pesanteur, qui leur cause indigestion. Et si il est necessité de paistre l'oiseau de grosse chair, par faute de meilleure, soit trempée & luee en eau tiede, si c'est en hyuer, & il la faudra espraindre: en esté, il ne la faut lauer qu'en de l'eau froide. Il faut entretenir l'oiseau de quel que bon past vis & chaud, car autrement on le pourroit mettre trop au bas. La chair qu'on doit donner aux oiseaux, soit sans gresse, nerfs, ne veines: & ne les faut laisser manger leur saoul tout à la fois, mais par poses, en les laissant reposer en mangeāt, & par fois leur mussier la chair deuant qu'ils soyent saouls, puis la leur rendre: mais qu'ils ne voient la chair de peur de les faire debatre. Aussi est bon leur faire plumer peris oiseaux comme ils faisoient au bois.

Si vostre oiseau de proye est trop gras, il le faut ameigrir par médicament laxatif, comme d'aloës mellee avec la chair qu'on leur donne à manger: mais ce pendant il les faudra nourrir de quelque bon past vis

& chaud, autrement on les mettroit trop bas. Apresqu'ils auront esté purgez, les faudra preparer à la proye; & mesme quand on les vouldra faire chasser, il ne sera mauvais de leur mettre en la gueulle des estoupes couuertes de chair, en forme de pillule, & leur faire aualler au soir, afin qu'au matin ils rejettent celle pillule, avecq plusieurs excremens pituiteux, par ce moyen seront rendus plus sains, plus appetissez, plus auides, plus legers, & plus prompts à la proye. La chair de porc, donnee chaudement avecq vn peu de pouldre d'aloës, fait esmutir l'oiseau: mais il faut obseruer, qu'apres qu'il aura esté purgé, qu'on le mette en lieu chaud, & le tenant sur le poing, le paistré de quelque oiseau en vie: car alors il a les entrailles destrempées. Les oiseaux peuent faire des ceufs sans la compagnie du male: aussi font les oiseaux femelles de proye, qui en engendrent souuent en leurs ventres, tant en la mûe, comme ailleurs: & alors elles en deuenient malades iusques à estre en peril de mourir. Les Fauconiers nous ont laissé par quels signes on le congnoistra: car alors le fondement leur enfle, & deuiet roux, les narilles aussi, & les yeux.

On dresse vn vol pour le Heron avec les oiseaux de proye. Et le Heron se sentant assailly, essaye à le gagner en volant contremont, & non pas au loing en fuyant, comme quelques autres oiseaux de riuere: & luy se sentant pressé, met son bec contremont, & par deffoubs l'aïsse, sachans que les oiseaux l'assomment de coups, dont aduient bien souuent qu'il en meurt plusieurs qui se le sont fiché en la poictrine.

Si vostre oiseau a la fieure apres long trauail, ou autres accidens, le faut mettre en lieu frais sur perches enuolopees de drappeaux mouillez, & le nourrir peu & souuent de chair de petits poullets trempez premierement en eau où aura trépe semence de courges, ou de cōcōbres. S'il est refroidy, le faut tenir chaudement, & le nourrir de chair de poulet masle, ou de pigeons trempez en vin, ou en decoction de sauge, mariolaine, ou autre semblable. S'il a des pouls, faut oingdre sa perche avec ius de morelle, ou d'aluine. S'il a des vers dedans le corps, faut mettre sur sa viande feuilles de perschers. S'il a les gouttes à l'aïsse ou à la cuisse, faut luy tirer quelque goutte de sang de la veine qui est sous l'aïsse, ou deffoubs la cuisse. S'il est podagre, faut oingdre ses pieds avec ius de l'herbe nommee laïcterolle, mesme la perche où il fera. L'oiseau de proye proprement, est celuy qui prend l'oiseau & luy coupe la gorge. L'Aigle frappe l'oiseau de ses ongles, puis le prent & le mange. Il y a vne espeece d'Aigles qui tuent en vn iour plus de cent oiseaux, com-

bien qu'en cas deux leur fust pour leur viure.

Les meilleurs oiseaux de proye, sont ceux qui poisent dix ou onze onces: à grande peine en trouue lon qui en poisent douze. Il en y a beaucoup qui ne poisent que sept ou huit onces: & ceux cy sont fort legers. Tous oiseaux de proye ont le bec & les ongles crochus.

L'estomach des oiseaux de proye est fort poinctü & aigu, afin que plus facilement ils soient portez par l'air: ayans les ailles & queue fort ample & grande. Ils se paissent principalement du cerueau des oiseaux & aussi de la chair. La proye la plus commune des oiseaux, sont les Coulombs, ou Pigeons, & oiseaux de riuere: pource qu'il en y a grande quantité, tant pour fecundité, que pour l'affluence de la nourriture. Aucuns oiseaux de proye prennent le gibbier au plus haut; les autres volans en bas: aucuns ne se fians en leurs ailles, prennent les oiseaux à terre. Ce que congnoissant les pigeons, & voyant vn oiseau de proye de ceux qui prennent en haut, ils se tienent en terre, ou pres de terre: & si c'est de ceux qui prennent en bas, les pigeons, contre leur naturel, montent tant qu'ils peuuent. Entre les oiseaux de proye, on met le Saeré pour le plus fort & vaillant, & est le meilleur: apres luy, on met eeluy qui a de costume de voler en rond, & tout autour de quelque chose, comme font les Aigles, ne prenant ne chassant aux petits oiseaux. Le tiers lieu tient l'oiseau de proye qu'on appelle Montain, qui a eclat de propre, qu'il regarde souuent ses pieds: & si est fort despit, cōme sont cōmunement les oiseaux de proye, car à peine veut reuenir quand il a perdu sa proie. Apres y a le Pelerin, ainsi nommé parce que il fait de grands chemins: le meilleur est celuy qui a le bec de couleur bleüe, & est le plus commun de tous. On ne fait de tous les autres oiseaux de proye cas pour la Fauconnerie. Les meilleurs oiseaux pour la Fauconnerie, sont ceux qui ont les pieds blanchissans sur le iaune, & ceux qui ont, quand ils commencent à crier, leur voix delice, gresse, & haute, se finissant en vne voix plus grosse & basse: car les grands criards ne sont pas bons pour la volerie, parce qu'ils font peur aux oiseaux, & les chassent. Le propre des oiseaux de proye est, avec grande vehemence seruer sur la proye. Albert escrit, qu'une Aigle ayant osté vne Perdrix à vn Faucon, que le Faucon fat si cōtageux, qu'en montant il frappa l'Aigle par la teste de telle force que luy & l'Aigle en moururent.

Les oiseaux de proye ont le bec, les ongles, & leur haleine veneneuse, infecte & dangereuse: combien que celle de l'oiseau que les Latins appellent

appellent Accipiter, soit légère, & de facile digestion & concoction, & bonne au goust: & si est fort bonne pour la douleur des boyaux, & du ventricule, & de l'estomach, & si profite au cœur. Ceux que les Latins appellent Astures, aiment fort la chair d'Escreuiffe, à ceste cause, on leur en baille quand ils ont bien voillé, pour les recompenser & inciter mieux à leur devoir: combien que d'eux-mêmes ils n'y chassent. Je m'esbahy de ce que dit Aristote, que les oiseaux de proye, qu'on appelle Accipitres en Latin, ne mangent point le cœur des oiseaux qu'ils prennent, ou qu'on leur donne, veu qu'ils en sont sur tout friands. Mais possible qu'il y avoit de son tēps autres genres d'oiseaux de proye, que les nostres: ou que la diuersité des regions cause cela. Tout oiseau qui mange chair peut estre apprins & enseigné pour la vollerie, & pour la chasse des oiseaux: parquoy on peut leurrer & affaçonner pour la vollerie, & la Pie, qui mange les Passereaux, & le Corbin, qui mange les Alouettes: car si ces deux bestes sont apprises, elles prennent les Perdrix. Entre les grans oiseaux de proye y a difference en bonté, selon les pays dont ils viennent, & se prennent: car ceux qui viennent d'Armenie sont fort bons, ayans les pieds blancs, & beaux: apres ceux cy les meilleurs sont ceux d'Ilirie, qui sont grands de pieds & de corps: apres sont ceux de Sarmatie, fort grās aussi de corps: & ces trois genres excédēt tous les autres en bonté. Et ce du genre des grāds: car du genre des petits, les meilleurs sont ceux qui ont les pieds jaunes, ou noirs, & qui sont d'Italie. Aux oiseaux de proye deux choses sont grandement requises pour estre bons: c'est assauoir, qu'ils soient bien appriuoisez, & non farousches, & qu'ils soient vaillants, hardis, & courageux. Mais parce que l'audace & hardiesse, le plus souuent est ioincte avec orgueil, fierté, & rebellion, peu souuent on les trouue vaillans & dociles ensemble, car ceux qui croient facilement, sont bien priuez. On ne voit donc gueres de Faucons hardis & vaillās, estre aysez à leurrer: & gueres d'Aigles bien appriuoisees, estre hardies & vaillantes, car la hardiesse les rend rebelles & farousches. En nourrissant l'oiseau de proye, faut bien se donner de garde de leur bailler à vn mesme past de deux sortes de chair, ne de la chair qui soit de vieille beste ou maladiue. La chair de Lieure, de Connils, de Chiens, de Rats, de Renards, de Perdrix, de Poulllets, & generalement de toute chair qui vit de grain, leur est bonne: comme aussi celle des petitsoiselets. La chair de Chats, de Loups, & des oiseaux de rapine, ne leur vaut rien à manger. La ceruelle, le poil, & les os des bestes à quatre pieds leur sont dangereux

H h

à leur past à manger. La chair des oiseaux de riuere est indifferente, ne trop bonne ne trop mauuaise. Toutesfois la plus nuisante est celle des grands oiseaux de riuere, comme des Oyes, & des Cignes, & ceux là qui sont de nature seche, comme les Cigongnes, & les Grues. La chair des Ours leur est saine, & aussi celle de Porc non trop gras. Les oiseaux de proye endurent des maladies & de l'esprit & du corps. Les maladies du corps sont congneues par leur esmutissement, & quand ils ont leur plume toute rebonschee, ou qu'ils tiennent les yeux fermez, avec difficulté de leur voix, & s'ils sont long temps sans manger ne boire. C'est signe de santé quand leur esmutissement est blanc, & d'une seule couleur, qui n'est ne trop liquide & clair, ne trop espois & dur. On guerist les oiseaux de proye comme les hommes. On les guerist par dicte : & alors on leur baille, apres auoir esté long temps sans mâger, de la chair trempee en vin-aigre. On les guerist aussi par vomissement, qu'on prouoque par cotton ou chanure meslez avec la chair qu'on leur donne, & si on laisse de petis os en leur chair : car entre les bestes qui mangent chair, elles reiettent seules la viande par la bouche. Ce qui leur fait aualler la chanure, ou cotton, & les osselets, c'est leur gourmandise & voracité. On guerist aussi les oiseaux de proye par purgation, qui se fait ou avec aloes, ou rheubarbe, ou erithodanan, poiure, mastic, fucilles de laurier, & avec mirrhe. Qui plus est, ils endurent bien les plus forts medicaments, aussi bien qu'ils font la seignee & le cautere. Les oiseaux de proye ayment sur toutes les herbes, la mente & la sauge : & sur tous les arbres, le saule & le sapin. S'ils boient souuent du sang d'oiseau estant tout chaud, ils en deuient plus forts & puissants. Ils aiment & se trouuent bien d'estre mis au Soleil, & d'auoir l'eau à commandement, & de faire exercice, comme font tous autres oiseaux. Le poumon avec le fiel d'un Porc leur est bon, donné souuent en past, car cela les purge. Si tu veux qu'ils changent de plume & de poil, baille leur à manger des rats ou souris saupoudrez de pouldre de petits poissons : ou leur donne de la chair de gelines nourries de serpens. Les oiseaux de proye different fort en grandeur, ayans tous leur plumage madré & diuersifié cōme de taches : ils fond leurs nids és lieux hauts & pierreux, & couuent vingt iours. Pline en met de seize sortes d'especes. On dict aussi que les Pigeons connoissent bien le naturel de tous ces oiseaux : car quand ils aduisent ceux qui prennent leur proye en volant, qu'ils farrestent tout coy : mais si c'est de ceux qui prennent leur proye à terre, ils s'en volent incontinent en haut contre leur naturel.

En vne partie de Thrace, les habitans & les oiseaux de proye giboyent & chassent és oiseaux ensemble & comme en communauté: car les habitans de ce pays là, font leuer les oiseaux des buissons & des bois, & ces oiseaux de proye sont si faits à celà, que les voyans voller, ils volent & prennent le dessus, les faisant deprimer en terre, lesquels sont prins par ces oiseleurs qui les departent à ces oiseaux de proye qui les rabattent.

De la diuersité des Faucons, & comme on congnoist les meilleurs.

IE vous declaireray seulement comme il faut gouverner les Faucons: car le sçachant, facilement on sçaura gouverner tous les autres. Il y a de plusieurs sortes de Faucons: aucuns sont muez de bois, les autres sont sorts, & les autres sont muez, & tiennent du sort, les autres sont appelez niais, qui ont esté prins au nid. Et si y a de grands Faucons, de moyens, & de petits, qui sont differents en plumes, pays, & nature. Les vns se païsēt d'oiseaux marins & de marais, lesquels sont appelez Faucons riuereux: il en y a qui se paissent d'oiseaux champestres, comme de Corneilles, Estourneaux, Merles, Mauuis. Il y a vne maniere de Faucons, qu'on appelle apprins de repaire: autres qui sont appelez passants: autres qui passent par dessus la Mer, & viennēt de loingtain pays en autre region, qui sont appelez Faucons Pelerins d'outre-mer. Les plus hardis Faucons de tous, sont ceux du Royaume de Chipre, qui sont fort petits, & de rousse plume, comme sont ceux de Sardaigne: & prennent le Cigne, la Grue, & le HIRON. Toutesfois les plus à priser, sont ceux qui ne sont ne trop grans ne trop petits, qu'on appelle Faucons morans, lesquels on prend sur la falaise de la Mer, que nous auons nommé Pelerins: parce qu'ils n'ont gueres esté ne seiourné en leurs pays. Le Faucon Pelerin a grosses espaulles, & les ailles longues, & en filant comme la queue d'un Esperuier, les pennes rōdes: que la queue soit de plain ponce, que le bout ne soit blanc, & que les nerfs de la queue soiēt bien vermeils. Pour estre bon, il doit auoir les pieds semblables à ceux d'un Butor, bien fendus & vers, les ongles noirs, bien poinctus & tranchans. Que la couleur du bec, qu'il doibt auoir grossier, & pieds, soit tout vne: ayants les narines grandes & ouuertes. Il doit auoir les sourcils vn peu hauts & gros, & les yeux grands & cauez, & la teste vn peu voultee, & rondette par dessus. Et quand il est seur, qu'il face vn peu de barbette sous le bec, de sa plume. Il doit auoir le collong,

H h ij

& haute poitrine, & vn peu rondette sur les espaules, à l'assembler du col. Il doit seoir large sur le poing, peu reuers, mordant & familleux. Ses plumes doiuent estre blâches & coulourees de vermeil, bié nouées & grosses: les sourcils blancs, la teste grise, & les iques blanches, coulourees de vermeilles plumes, & le dos de couleur bise, comme le dos d'une Oye, & les plumes larges & rondes, enuironné de blanc bien couloure: & ne doit point estre gouet, & se doit entresuir de plumes, de pied & de bec. Faucon de telle sorte, sera bon sur tous, s'il est bien gouuerné.

Comme on doit mettre en arroy & porter le Faucon.

VN Faucon nouveau prins, doit estre chillé en telle maniere, que quand la chilleure laschera, que le Faucon voye deuant, pour veoir la chair deuant luy: car il souffre moins quand il la veoit à plain deuant soy, que s'il la veoit par derriere: & ne doit point estre chillé trop estroit, ny ne doit estre le fil de quoy il est chillé trop delié, ne noué sur la teste, mais doit estre retors. Vn Faucon nouveau doit auoir nouveau arroy, comme vn grand blanc, & nouveaux gects, le tout de cuir de Cerf, avec la lesse de cuir attachee au gant: puis faut auoir vne petite brochette pendue à vne petite corde, de laquelle soit manié souuent le Faucon, car plus est manié & touché, & plus s'en assure, & aussi que la main le salist d'auantage, & qu'il se pourroit blesser de son bec en le maniant. Il luy faut deux sonnettes, afin qu'on le puisse mieux trouuer, ouyr remuer, & gratter. Il doit auoir vn chapperon de bon cuir, bien fait, & bien en forme, fort esleuee & bossue endroit les yeux, bien profond, assez estroit par dessoubz, afin qu'il tienne bien à sa teste, mais qu'il ne le blesse. On luy doit aussi vn peu espointer les ongles, & le bec, non pas tant qu'ils saignent.

Comme on doit affaier vn Faucon, & mettre hors de sauuagine.

QUAND que le Faucon sor, qui a esté prins bien à heure sur la salaise, & estoit passé la mer, est celuy où y a plus d'affaier, aussi est il le meilleur. Faut d'oc apres l'auoir mis en tel ordre que dessus, paistre cest oiseau de bonne chair, & chaude, de Couloms & autres oiseaux vifs à pleine gorge, deux fois le iour, iuf-

ques à trois iours : car ne luy faut oster tout à vn coup la vie dequoy il vsoit : & estant nouveau, il mange plus volontiers la chair chaude, que autre. En luy baillant à manger, on le doit hucher, afin qu'il cognoisse quand on luy voudra donner à manger, en luy ostant le chapperon en paix : puis on luy doit donner deux beques de chair ou trois, & apres luy auoir remis son chapperon, baille luy en encore autant : mais prends garde qu'il soit tellement chillé qu'il n'y voye goutte. Les trois iours passez, si tu le vois friant à la chair, & qu'il mange volontiers, restrains luy sa viande, c'est à dire, que tu luy donnes moins & souuér, qu'il n'aye en gorge qu'un bien peu vers les vespres : en le tenant longuement la nuit auant que tu le couches, le mettant coucher sur vn treteau bien seant, afin qu'on le puisse la nuit reueiller. Puis se doit leuer deuant le iour sur le poing, avec la chair d'oiselet vif. Quand on luy aura tenu ceste reigle deux ou trois nuits, & qu'on voye que le Faucon soit plus mat qu'il ne souloit, & qu'il face signe de seureté, & soit aigre de la bonne chair, si luy muë sa viande, en luy donnant petit & souuent chair de cœur de Porc, ou de Mouton. Sur le soir quand il sera nuit, sans le prendre, l'œil luy soit vn peu lasché du fil dequoy il est chillé, en luy iettant de l'eau au visage quand on le mettra coucher, afin qu'il ait moins de sommeil, & le veillant toute la nuit, en le tenant sur le poing le chapperon hors la teste. Que s'il auoit trop veu, & qu'il fist signe d'estre vn peu effroïé, soit porté en lieu obscur, fors qu'on voye mettre le chapperon : puis soit abeché de bonne chair, & soit veille par plusieurs nuits, tant qu'il soit mat, & qu'il dorme sur le poing par iour : combien que le laisser vn peu dormir seurement, est vne chose qui bien l'assure. Au matin au point du iour, qu'il trouue la chair chaude dequoy il sera abeché. Or par ce qu'il y a des Faucons de diuerſes sortes, car l'un est mué de bois, l'autre est prins de repaire, & a esté à luy longuement, l'autre est sor, duquel auons parlé, encores qu'ils soient ou sortz, ou muez, ou niais, si sont ils de diuerſe nature, parce les faut gouuerner diuerſement : qui est la cause qu'on n'en peut bailler regles propres : car ceux qu'on trouue amiables, de doux affayement, & de bonne fin, doiuent estre affaytez sans leur donner grand peine. Et quand l'auras mis en tel estat, tant pour le voller, comme de luy faire auoir faim, si tu vois signe de seureté, tu luy pourras oster son chapperon de iour, loing de gens, en luy donnant vne bequee de bonne chair, puis luy remets tout en paix, en luy en donnant encores vn peu. Sur tout, faut se garder de luy oster son chapperon ou remettre, en

Hh iij

lieu où il puisse auoir effroy, car cela perdroit ton oiseau. Quand il aura apprins à veoir les gens, si tu veois qu'il eust faim, oste luy le chaperon, & luy donne vne bequee de chair, luy monstrant droit à ton visage, car par celà il n'aura peur des personnes. Et quand il sera nuict, luy soit couppé le fil de quoy il sera chillé, & ne soit veillé, si tu le voy assez asseuré entre les gens, mais soit mis sur vn treteau aupres de toy, afin d'estre reueillé la nuict deux ou trois fois, & le mets sur le poing deuant iour: car trop veiller son Faucon n'est pas bon, qui asseurer le peut par autre voye. Que si par le bon gouuernement & pour luy auoir esté courtois, & gardé d'effroy, & veillé, ton oiseau se trouue seur, & qu'il mange & se batte à la chair deuant les gens, donne luy lors de la chair lauee en l'abechant au matin, si qu'il ait la fosse de la gorge pleine: laquelle mettras tremper en eau claire, vn demy iour, & luy feras battre deuant les gens, en luy baillant au matin à Soleil leuant l'aïlle d'une Poule. Et au soir en luy remettant le chapperon, prens le pied d'un Connin, ou d'un Lieure, qui soit couppé au dessus des orteils, & escorché, en ostant les ongles, le faisant tremper en bonne eau, & vn peu espraint, que tu luy donneras avec vne ioincte du gros de l'aïlle d'une gelinc. Se faut bien donner de garde de bailler plumes à ton oiseau s'il n'est bien seur, autrement il ne s'oseroit ietter sur ton poing, car il faut qu'il soit tenu: & alors qu'il fera signe de ietter, oste luy le chapperon tout en paix, par la tirouere, en luy donnât par deux fois de la chair lauee, & l'autre iour de la plume, selon que ton oiseau sera net dedans le corps: quand il aura ietté sa plume, si luy remets le chapperon, sans luy donner à manger, afin qu'il iette sa glette. Estant curé de plume & de glette, soit abeché de chair chaude, deuant les gens, deux ou trois bechees à la fois, & au soir fais luy tirer l'aïlle d'une gelinc, aussi deuant les gens. Si tu le trouues bien seur, & de bonne fin & aigre, adonc est temps de le faire manger sur le leurre. Il faut regarder, si les plumes que ton Faucon iette sont ordes & gletteuses, & si l'ordure est de couleur iaune, car alors faut mettre peine de le rendre net par dedans, avec plumes, & chair lauee. Que s'il est net, ne luy donnes si fortes plumes, qui sont pieds de Lieures & de Connins, mais luy faut donner plume qui est prinse sur la ioincte de l'aïlle d'une vieille gelinc, ou la ioincte mesme de l'aïlle, ou celle du col, decoupee par entre les ioinctures, quatre ou cinq fois, lauee & trempee en eau froide. Pour la fin de ce chapitre, il est asseuré qu'il faut plus long temps à afayter & veiller vn Faucon mué de bois, qu'il ne fait vn sor, qui a esté prins en passant: & aussi qu'il y a plus d'affaire à vn Faucon prins de

repaire, & qui a esté bien longuement à luy, qu'il n'y avn qui a esté acuré.

Comme on doit leurrer un Faucon nouveau affayté.



AVANT que monstrier leurre à vn Faucon nouveau, faut considerer trois choses. La premiere, qu'il soit bien seur de gens, de chiens, & de cheuaux. La seconde, qu'il ait grand faim, en regardant l'heure du matin & du soir. La tierce, qu'il soit net dedans. Il faut que le leurre soit bien encharné d'un costé & d'autre, & estre en lieu secret, quand tu voudras allonger la leste à ton Faucon & le deschapperonner, en l'abbechant sur le leurre sur ton poing, puis luy faut oster, & le cacher qu'il ne le voye. Et quand ton Faucon sera descharné, iette ton leurre si pres de toy qu'il le puisse prendre, de la longueur de la leste: & s'il le prend seurement, on doit crier, hac, hac, & le paistre sur le leurre cōtre terre, en luy donnant dessus, la cuisse d'une poulette toute chaude, & le cœur. Si tu l'as ainsi leurré au vespre, ne luy donne qu'un peu à manger: & soit leurré si à heure, que quand il aura esté accoustumé, tu luy puisses donner de la plume, & un offet d'une ioincte, & le lendemain soit mis sur le poing, au point du iour: & lors qu'il aura iecté sa plume, & sa glette, soit abeché d'un peu de bone chair chaude. Le lendemain quād il sera grand iour, & temps de le paistre, prens une corde, & l'attache à sa leste, & t'en va en un pré bien net & bien vny, & l'abeche sur le leurre, comme deuant est dit, puis le descharne: & si tu voy qu'il ait bonne faim, & ait prins le leurre roidemēt, si le baille à tenir à quelqu'un qui bien le lasche au leurre. Adonc tu dois desployer la corde, & le traire arriere quatre ou cinq fois: & celui qui le tiēt doit tenir à la main dextre, le chapperō dudit Faucon. Que si le Faucon viēt bien au leurre, & qu'il le prenne incontinent, & roidemēt, laisse le manger deux ou trois beques, puis le descharne, & l'oste de dessus le leurre, & luy mets le chapperon: & puis le rebaille à celui qui le tenoit, & l'eslongne, & le leurre ainsi de plus loing, & le paiz contre terre sur le leurre, en huant & criant hac, hac, & ainsi le leurreras chacun iour de plus loing en plus loing, tāt qu'il soit bien duit de venir au leurre, & de le prendre seurement: apres soit leurré entre les gēs, en se gardant qu'il ne vienne Chiens ou autre chose dequoy il ait effroy. Et en l'ostant de dessus le leurre, mets luy le chapperon sur le leurre. Et estant bien leurré à pied, faut le leurrer à cheual: ce qui se fera plus aisément, si quand tu le leurre

à pied, tu fais venir des cheuaux aupres de ton Faucon, afin qu'il les voye, en les approchant de luy quand il mangera sur le leurre, en les faisant tourner autour de luy: mais que les Cheuaux soient paisibles, afin qu'ils ne luy fassent peur. D'auantage, pour mieux l'accoustumer avec les cheuaux, & qu'il les cognoisse, porte le Faucon sur le leurre, quand il mangera, en haut pres du cheual: ou le porte à cheual, & le fais manger entre les cheuaux. Et quand il les aura bien accoustumez, & qu'il ne fera nul semblant de les craindre, tu le pourras bien leurrer à cheual, en ceste maniere. Faut que celuy qui tiendra le Faucon pour le laisser aller au leurre soit à pied, & celuy qui aura le leurre serra à cheual: & quand il branlera son leurre, celuy qui tient le Faucon luy osterà le chapperon par la tirouere, & celuy qui tient le leurre doit huer & crier, hac, hac: que s'il prent le leurre roidement par dessus, & ne doute ny gens ny cheuaux, oste luy la obecanne, & soit leurré de plus loing, & en plus longue tirée. Et pour faire venir le Faucon nouveau, & l'accompagner en la compagnie des autres, faut que deux tiennent les Faucons, & deux qui les leurrent: mais celuy qui tiendra le Faucon nouveau, ne laissera pas si tost aller le sien au leurre comme fera l'autre. Adonc sera ietté au Faucon nouveau le leurre, & quand il sera cheut sur le leurre, son maistre le doit porter sur son leurre, manger avec les autres Faucons. Cclà faisant trois ou quatre fois, il les suyura & aimera. Et si voulez qu'il ayme les Chiens, ce qui est necessaire, les faut appeller autour de luy, quand on fera tirer, plumer, ou manger son Faucon.

*Comme on doit baigner, faire voller, & hayr le change,
à vn Faucon nouveau.*


QVAND ton Faucon aura bien esté leurré à pied & à cheual, & qu'il sera prest d'estre ietté à mont, & il aura mangé de bonne chair sur le leurre, & sera tout hors de sauuagine, & sera vn peu recourré & efforcé de la peine qu'on luy aura donnée, & aura les cuisses plus pleines de chair, offre luy de l'eau pour se baigner. Regarde quand le temps sera beau, clair & temperé: puis prens vn bassin si profond que l'oiseau soit en l'eau iusques aux cuisses, soit emply d'eau, & mis en lieu secret: puis ayant donné chair chaude à ton Faucon, & leurré au matin, apporte le en lieu haut, & là le tiés au Soleil iusques à ce qu'il ait enduir sa gorge, luy ayant osté son chapperon,

peron, afin qu'il se manie : celà fait, remets luy le chapperon, & le mets bien pres du bassin. S'il veut faillir sur l'herbe ou dedans l'eau, si le laisses aller : & afin qu'il sente l'eau, frappe d'une vergette dedans, & le laisse là baigner tant comme il voudra. Quand il fera semblant de s'en aller, mets de la chair en ton poing, & luy tends : & te garde qu'il ne saille hors, sans faillir sur ton poing, afin de luy donner vne bechee. Puis leue-le, & le tiens au Soleil, & il se maniera & pourrondra sur ton poing, ou sur ton genouil. S'il ne se veut baigner au bassin, essaye de le baigner en eau de riuere. Le bain donne à l'oiseau grande leurté, apre faim, & bon courage. Le iour qu'il sera baigné, ne luy donne chair lauee. Pour bien ietter en haut & faire voller ton Faucon nouveau, le lendemain qu'il se sera baigné, monte à cheual le matin, ou au vespre, alors qu'il a grand faim, & choisis les champs, & le pays où n'y ait ne Coulons ne Corneilles : puis prens ton leurre bien encharné d'un costé & d'autre, & ayant osté le chapperon, abeche-le sur leurre, l'ayant osté de dessus, remets luy le chapperon : puis t'en allant tout bellemét contre le vent, oste luy le chapperon. Mais auant qu'il choisisse aucune chose, ne qu'il s'esbate, mets le hors de dessus ton poing tout en paix, & comme il tournoiera, en allant le trot du Cheual, iette luy le leurre, & ne le laisses gueres tournoier. Et continue celà tous les iours, tant au soir qu'au matin. Que si tu vois que ton Faucon ne soit bien duit de tournoier enuiron toy, & de cheoir au leurre, & ne fait semblant d'aimer les autres Faucons, faut le faire voller avec vn qui ayme les autres, & qui ne se bouge de nul change, premierement aux Perdrix, car les Faucons ne les chassent gueres loing. Et si ton Faucon a chassé, & il reuient, vne, deux, ou trois fois, iette luy le leurre, & le paiz sur le destren de ton cheual, & puis le paiz sur le leurre contre terre, de bonne chair chaude, pour le resoudre en volant, afin qu'il reuiene plus legierement de sa chasse. Et si l'oiseau à quoy tu voles est prins, fais luy en manger avec l'autre Faucon : & quand il en aura vn peu mangé, oste-le, & le paiz sur le leurre.

Si tu voles de ton Faucon aux oiseaux de riuere, & qu'il en soit vn bien prenable : demeure, & le mets souz le vent, & oste à ton Faucon le chapperon, & le laisse aller avec les autres. Quand tu veux faire ton Faucon haultain, & qu'il prenne son hault, il faut faire voler avec le tien vn Faucon bien haultain : mais que le tien soit bien duit de retourner ses chasses, & qu'il ayme bien les Faucons qu'il treuve. Que si

les oiseaux de riuere sont dedans vn estang, qui ne soit pas grand, ou en vne belle fraiche, on doit laisser aller le Faucon hautain, & celuy qui tient le nouueau, doit estre bien arriere au dessus du vent: & quand verra son bon, il le doit deschapperonner, que s'il se bat, c'est pour aller à l'autre: lors le doit aller, si tirera contre le vent droict à l'autre au contremont. Et auant qu'il s'amatisse d'aller apres l'autre, qu'on luy fourde les oiseaux, quand le Faucon hautain sera à poinct, & luy face soudre sur la queue. S'il prend l'oiseau, donne luy à manger le cœur & la poitrine avec l'autre. Si ton Faucon va au change, & il prend Coulon ou Corneille, ou autre oiseau de change, qu'il mange, ou l'a mangé ne le rudoie, mais reprens-le au leurre, en luy donnant vne bequee de chair, & luy mets le chapperon, & apres n'en volle de deux iours: & quand tu en volleras, n'en volle à faute, si tu peux: Que si par aucune maniere tu ne le pouuois garder d'aller au change, fais pour le dernier remede ce qui s'ensuit. Si ton Faucon a prins oiseau de change, & arriues auant qu'il l'ait mangé, aye du fiel de Geline, & en oings la poitrine de l'oiseau qu'il aura prins, qui sera escorchée & descouuerte, & luy en baille à manger peu, afin qu'il ne soit greué, car il la iettera, & s'il ne la iette, si n'aura-il courage de voller tel oiseau, & en haira la chair. Ou bien mets dessus quelque autre chose amere, comme pouldre de mirrhe, ou ieunes vers menus detràchez, mais que l'amertume ne soit trop forte. Que si l'amertume auoit dehaité ton oiseau, mouille luy sa chair en eau succree. Aucuns leur mettent deux sonnettes à chacun pied, ou leur cousent les grosses pennes des ailes. Et est bon, encores qu'il vienne du change, luy ietter le leurre, ou faire soudre vn oiseau de riuere blessé, afin qu'il le prenne.

Comme on fait prendre le Heron à son Faucon.


 FAIRE son Faucon bon haironnier, faut que tu l'y mettes en aspre faim, & auoir vn Heron vif, duquel tu feras vne tome à ton Faucon, ainsi. Au matin, quand il sera heure de paistre ton oiseau si tu vois qu'il ait faim, va à vn pré, & laisse aller le Heron apres luy auoir brisé les pieds & le bec, & te cache derriere vn buisson: & lors celuy qui tiendra le Faucon luy otera son chapperon, lequel sera au dessouz du vent: & s'il ne veut prendre le Heron, iette luy le leurre que tu auras tout prest: s'il le prend, fais luy la cure, en luy donnant premierement le cœur, & quand il

aura mangé, baille le HIRON à celuy qui a laissé aller le Faucon, lequel en se tirant vn peu loing, le tournoiera par l'aïlle. Lors oste le chapperon à ton Faucon, & le laisse aller au branle: & que celuy qui branle le HIRON ne le iette, mais qu'il attende à le laisser cheoir iusques à ce que le Faucon le prenne au branle, puis descouure la poitrine au HIRON, & la fais manger à ton Faucon, & aussi la mouëlle qui sortira de l'os de son aïlle couppee par le bout, que nous appellons la garde. Celà fait, iette luy le HIRON, en continuant deux ou trois iours, tu l'acharneras à prendre le HIRON, & à l'aimer: ce qui se fera encores mieux si au commencement il est accompagné d'un bon Faucon hironnier. Lors aiât trouué le HIRON seant, faut que tu le mettes avec ton Faucon nouveau, en haut lieu, au dessus du vent, & que celuy qui a le Faucon hironnier face charier le HIRON: & quand il aura laissé aller son Faucon au HIRON, qu'il regarde si le HIRON qui vollera prendra la monstre, car alors ne laisse pas aller ton Faucon apres, & ne luy oste pas le chapperon: mais s'il se desconfit, & qu'il fonde en l'eau, & que le Faucon hironnier le debate, adonc oste le chapperon à ton nouveau Faucon, & le leue, & s'il se bat, laisse le aller au debatis.

Comme on fera aymer à son Faucon les autres, quand il les hayt.

IL y a aucuns faucons qui ne veulent voler avec les autres, se tirent arriere, & ne bougent: les autres les vont prendre en volant au haucloonnier. Vn faucon hayt à seoir & voller avec les autres, ou pour doute qu'il a d'eux, ou qu'il ne les ayme: celuy qui les hayt, les prent, qui les craint, s'enfuit. Pour remede, faut auoir vn Lanier amiable, qui soit mis sur la perche avec celuy qui hayt les autres, assez loing, & de iour, en leur baillant à tous deux vne bequee de chair en passant, les approchant peu à peu: & estans pres l'un de l'autre, mettre de la chair entr'eux, afin que l'un & l'autre la bequêt: puis quand il ne fera nul semblant de courir sus au Lanier, faut au soir le paistre de bonne chair, & le mettre gesir hors à la gelee, sur vne perche, s'il est gras & fort, & le laisser là trois ou quatre heures, ce pendant tenez vostre Lanier pres du feu: puis mettez le sur le poing, ce pendât faictes apporter le faucon, & luy mettez le chapperon, & le mettez entre le Lanier & vostre costé: & lors le faucon qui sentira la chair du Lanier, se tirera contre luy, & s'approchera pour la chaleur. Et soient ainsi laissez sans dormir l'un & l'autre, iusques à ce que vous voyez que le Faucon ait grand faim de dormir, puis luy ostez tout bellement le chapperon, & soit en lieu qu'il ne voye tout ainsi toute la nuit sur vostre

Ii ij

poing. Et quand il sera iour, faut les remettre à la perche l'un auprès de l'autre, toutesfois qu'ils ne puissent aduenir l'un à l'autre. Cela faict par deux nuits, mettez l'un & l'autre gisir hors à la gelee, la troiesme nuit, pres l'un de l'autre qu'ils se puissent ioindre sur la perche. Et quand vous verrez qu'ils se seront approchez l'un auprès de l'autre pour auoir chaleur, ostez leur les chapperons: puis faictes les manger, gisir & leurrer ensemble, & mettez peine de luy querir son aduantage.

Comme on doit effemer, c'est à dire, bailler la cure à un Faucon.

LE S Faucons sont plus forts à effemer les vns que les autres: car tant plus vn Faucon a esté à maistre, il est plus fort à effemer: & vn Faucon vieil mué de bois, qui n'a qu'une muë par main d'homme, est de plus léger effement, que n'est vn Faucon moins vieil, qui a esté plus longuement à main d'homme: la raison est, qu'un Faucon estant à luy, se nourrit plus nettement & mieux selon sa nature, & de meilleures chairs, qu'il ne faict par le gouvernement d'homme. Ce n'est donc de merueille s'il n'est si ord dedans, quand luy mesmes se paist, que quand on le paist: car le Faucon qui est à toy, mange gloutement plume & cuir, & n'est repeu en la muë de si nettes viandes, & ne digere si bien, & n'a l'air en ses necessitez, comme celuy qui est à soy-mesmes. Quand tu mets ton Faucon hors la muë, s'il est gras (ce que cognoistras s'il a les cuisses grasses & pleines de chair, & que la chair de la poitrine soit aussi haute comme en est l'os) & s'il est bien mué, & a ses penes fermes, donne luy à manger quand il vandra mordre en la chair, au matin, vne bequee ou deux de chair chaude, ne luy en donnant au vespre que bien peu, s'il ne faisoit trop froid. S'il mange bien sans qu'on l'efforce, baille luy la chair lauce, ainsi preparee: Prés les ailles d'une Poulette pour le matin, & laue en deux eaux, si c'est chair de Lieure ou de Beuf en trois. Le lendemain matin, donne luy vne cuisse de Geline bien chaude, & à Midy chair trempee, bonne grosse gorge, le laissant ieusner iusques au vespre bien tard: & s'il a mis sa viande aual, & qu'il ne soit rien demeuré en la gorge, donne luy vn peu de chair chaude, comme tu as faict au matin: & ainsi soit gouverné iusques à ce qu'il soit temps de luy donner plume: ce que sçauras par trois signes. Le premier, quand trouueras au bout de l'aile du Faucon vne chair plus ieune & molle qu'auparauant qu'il mangeast chair lauce. Le ij. si les

esmuts sont clairs & blancs, & que le noir qui est parmy soit bien noir, sans autre ordure meslee parmy. Le tiers, s'il a grand faim & aspre, & qu'il plume volontiers. On baille plume faite, ou de pieds de Lieure, ou de Connin, ou du cotton de la plume qui est sur la ioincte de l'aile d'une vieille geline. Pren donc le pied de devant d'un Lieure, & soit escorché du dos d'un cousteau, tant que les os & les ongles en tombent: afin de moudre les os des ottelez, qu'il faut couper & mettre en belle eau froide & claire, puis l'esprains, & luy en donne deux beques. Et quand tu le mettras à la perche, nettoye le dessous, afin de veoir si l'esmeut est enueloppé de taves, & plein de glete & d'ordure: que s'il est ainsi, cōtinue ceste plume iusques à trois nuits ou quatre, & de la chair lauee, comme dessus est dit. Et si tu voy les plumes digerees & mouliées, & qu'il y ait grande cure & ordure, pren le col d'une vieille geline, & le coupe tout au long par entre-deux ioinctes, & mets les ioinctes en eau froide, & les donne à manger à ton Faucon, sans autre chose: & on luy donne ces ioinctures, parce qu'il met aual en la meule la chair qui est sur les ioinctes, & la confit, & les os demeurent, qui sont aiguz & cornus, qui desrompent les taves, & l'ordure, & portent avec eux: & luy en donnez par trois nuits, en luy baillant sur iour chair lauee, comme il est dit. Et puis retourne à luy donner plume selon la force & necessité de ton Faucon. Et ne t'esbahy si le Faucon qu'on essemé est aucunes fois quinze iours avant qu'il veille manger plume: aussi qu'aucuns Faucons prennent en un mois plustost essemé que d'autres en cinq semaines, selon qu'ils sont de plus forte nature, ou nourriz de plus nettes viâdes, où qu'ils ont esté plus longuement en main d'homme. Quand tu auras traict le Faucon de la muë, & il a ses grosses pennes sommees, ou il en a encores au tuyau, ne luy donne chair lauee, mais chair d'oiseaux vifs à bonne gorge, & le tiens en l'air, autrement ses plumes se pourroyent affaier & ancantir.

I i iij

F I N.



TABLE GENERALE CON- TENANT LES CHOSES PRINCI- PALES TRAICTEES EN CE PRE- sent volume de la Fauconnerie.

Le chiffre signifie le feuillet , & la lettre la page.

A.



AIGLE, de ses especes, de sa couleur & forme. 54. b
de l'Aigle fauve, qu'on nomme Aigle Royal. 104. b
de l'Aigle noire. 106. a
de combien d'especes il y a d'Aigles. 104. a

Aiguilles especes de filandres, pires que routes les autres. 27. b

Aiguilles qui sont dedans le corps de l'oiseau. 81. b

Aisle de l'oiseau rompuë, comment est remise. 38. b

Aisle de l'oiseau alentie & pendente, le moyen d'y remedier. 39. a. 49. b

Aisle disloquee, comment est guerie. ibid. b

quand l'oiseau ne soustient bien ses Aisles la cause & le remede. 70. a

Aisleron rompu, quels remedes sont propres pour le racoustrer. 39. b

Aleine bonne de l'oiseau comme doit estre conseruee. 14. b

Aleine puante de l'oiseau, quelle en est la cause, & remede. 51. a

Aloes comment doit estre donne aux oiseaux volans. 47. b. 77. b

l'Appetit de manger comment reuient à l'oiseau. 35. a. 39. a. 69. a

Apostumes qui s'engendrent aucunes fois dedas le corps des oiseaux. 28. b.

82. a

Asme autrement dit pantalais, la cause & le remede. 80. b. 95. b

Aureilles malades des oiseaux à cause de rheume ou froidure. 16. b

Autour oiseau propre à la vollerie. 4. b

Autour, de ses especes, bonne forme & condition. 59. b

de l'Autour femelle. 109. b

election des Autours. 88. b

B.

Baigner l'oiseau de proye quand luy est sain. 67. b

quand l'oiseau est enuenimé par se baigner en eau enuenimee. ibid.

Baigner vn nouueau Faucon. 125. a

Barbillons, maladie, qui vient dedans le bec des oiseaux, & de ses remedes. 19. b

Bec de l'oiseau malade, comme prouient & se guerist. 22. a

pour renoueler le bec rompu, ou reserrer le Bec desioinct. 65. b

Blesseure d'oiseau par coup, comment se guerist. 40. a

Du mal de la Bouche des oiseaux. 95. b

Brancher oiseau. 63. b

C.

Catharres des oiseaux. 94. b.
100. a

Causes & signes du mal de teste des oiseaux. 13.b
 Chaleur grãde dedans le corps de l'oiseau, les signes & le remede. 82.b
 Chairs vřables & bonnes. 100.b
 Chairs restauratiues. ibid.
 Chairs laxatiues. ibid.
 Chairs defendues. ibid.
 Chancre, mal des oiseaux, ses causes & signes, & comment se guerist. 20.a
 Chancre, qui vient aux oiseaux de chaleur de foye. 29.b. 76.b
 Change. Aller au change, hayr le change. 125.a.b
 Clouds ou galles aux pieds des oiseaux, les causes & remedes. 42.b. 84.b
 Complexion des Faucons, & comme ils se doiuent medeciner. 99.b
 des Concussions dedans le corps. 97.b
 des choses Cordiales & confortatiues 101.a
 Corbeau, oiseau de proye. 4.b
 Coup en l'œil de l'oiseau cōme se guerist. 17.b. 79.a
 Couronne du bec, maladie des oiseaux, de ses causes & signes, & des remedes propres pour la guerir. 19.a
 mal de Croye, de ses causes & remedes. 33.b. 83.b
 Cuisses ou iambes enflees des oiseaux, qu'elles en sont les causes & remedes. 42.a
 Cure de l'oiseau qu'elle doit estre. 66.a. 126.b
 dequoy on donne les Cures. 101.b

D

Desgluer oiseau. 64.a
 Difference des Faucons. 1.a. 7.b
 Difference qu'il y a entre le Faucon Pelerin, & le Faucon Gentil. 8.b
 Digestion mauuaise de l'oiseau, la cause & le remede. 68.a

quand l'oiseau Dort souuent pour l'esveiller. 75.b

E

Emerillon oiseau propre à la vollerie 4.b. 113.a
 Emerillon, de sa forme, de son vol & proye. 57.a
 quand l'oiseau ne peut Emutir, les signes, & le remede. 65.b
 quand l'oiseau n'Enduit bien sa gorge, la cause & le remede. 68.b
 quand l'oiseau Enduit bien sa gorge, mais apres il la rend, la cause & le remede. ibid.
 Enfleure des pieds, cuisses & iambes des oiseaux, les causes & remedes. 41.b. 42.a. 76.a. 84.a
 Enfleure & viscosité des paupieres de l'oiseau. 76.a
 Enfleure des yeux de l'oiseau, & le remede. ibid.
 Enseignemens pour cōseruer tous oiseaux de proye en santé. 10.b
 Epilepsie des oiseaux, la cause, signes & remede. 22.b. 75.b. 95.a
 Eschauffement de foye des oiseaux. 29.a
 quād l'oiseau est Esgaré, ou on ne peut ouir les sonnettes, ce qu'il faut faire. 71.b
 Espèces diuerſes de Faucons. 1.a. 54.a
 Esperuier, oiseau propre à la volerie. 4.b
 Esperuier & de se nature. 69.b
 de l'Esperuier, de sa bonne forme & bonté. 61.a
 comme il faut chiller l'Esperuier nouveau, & mettre en ordonnance. 61.b
 comme on doit affaiter vn Esperuier & comme il doit estre mis en arroy 62.
 la maniere de faire voler son Esperuier nouveau

T A B L E.

nouveau. 63.a
de l'election de l'Esperuier. 88.a
de l'Esperuier femelle. 111.a
pour faire essemmer Esperuiers, Autours
ou Tiercelets, sans leur faire force.
89. b
pour Essemmer & faire les Faucons.
90. a
Essemmer vn Faucon, c'est luy bailler
la cure. 126.b
Essement de Faucon comme se doit
faire. la mesme.

F

pour faire auoir Fa... à l'oiseau qui
est trop pu, quand on le veut faire
voler. 71.a.100.b
Faucon est vn nom general compre-
nant tout oiseau du leurre & de
proye. 1.a
Faucon dit Gerfaut & de sa nature.
3. a
Faucon dit Sacre, & de sa nature.
3. b
Faucon Lanier & de son naturel. ibid.
Faucon Tunisien, & de sa nature.
4. a
Faucon Heronnier. 5. b. 125. b.
Faucon dict Gentil, & de sa nature.
1. b.
Faucon dict Pelerin, & de sa nature.
2. a
Faucon dict Tartaret, & de sa nature.
2. a
Faucon quand doit estre prins, sa
bonne forme, qualite & condition.
35. b
Faucon hayant les autres oiseaux de
proye. 126. b
diuersité des Faucons, & comment

on cognoist qui sont les meilleurs.
122. a
comme on doit mettre en arroy, &
porter le Faucon. ibid. b
comme on doit affaier vn Faucon,
& mettre hors de sauuagine.
ibid.
comme on doit leurrer vn Fau-
con nouveau affaité. 124. a
des Faucons. 107. b. 112. b
Faucons Gentils differens des autres.
7. b.
Faucons comment se doiuent per-
dre en l'aire ou au nid. 48. b
du Fau-perdrieux. 118. b
du feu qui se donne aux narilles
des oiseaux pour les embellir.
19. b
sieurs des oiseaux, le signe & le re-
mede. 83. a
filandres de la gorge, leurs causes &
remedes. 26. a
Filandres des estraines & des reins,
leurs signes, leurs causes & remedes.
27. a
Filandres des cuisses, leurs causes &
remedes. 27. b. 81. b
Filandres vulgairement appelees ai-
guilles. 27. b
Filandres, les especes d'icelles, les si-
gnes, leur cause & le remede.
77. a
Filandes dedans le corps de l'oiseau,
la cause, les signes & le remede.
81. b
Flegme engendré au gosier de l'oiseau,
le signe, la cause & le remede.
76. b
Fontaine qui est au pied de l'oiseau,
cōment est medicamentee & guerie.
84. b
Foye de l'oiseau eschauffé, la cau-
se, le signe & le remede. 29. a

K k

80. a
pour les infirmités de Foye, & la me-
decine. 98. b

G

Galles & cloues aux pieds des oiseaux,
les causes, signes & remedes. 42. b.

85. a

Gentil Faucon, & de sa nature. 1. b.
113. b

Gentil en quoy different au Pelerin.
8. b

Gentils Faucons en quoy differens des
autres 7. b

Gerfaut Faucon, & de sa nature. 3. a.
108. a

Gerfaut, de sa naissance, forme, con-
dition & proye. 59. a

de la Goutte des reins. 97. b

Gratelle & demangeaison des pieds
des oiseaux. 43. b

H

Hair le change à vn nouveau Faucon.
72. a. 25. b

pour faire l'oiseau Hardy à la proye,
& voler grands oiseaux. 71. b

du Haut mal, dont les oiseaux tom-
bent par fois. 22. b. 75. b

Herissonnement de l'oiseau, les cau-
ses, signes & le remede. 79. a

Heron à prendre par le Faucon. 126. a

du Hobreau. 116. b

Hobier, oiseau propre à la volerie.
4. b

I

Iambe ou cuisse rompuë de l'oiseau,

quels moyens faut tenir pour la gue-
rir. 39. b

pour rompre la jambe à l'oiseau, quels
moyens doit-on tenir. 45. a

quand l'oiseau lette sa viande. 98. a

Instruction pour apprivoiser oiseaux.
6. b

L

Lanier Faucon, & de son naturel.
3. b

Lanier, de sa naissance, forme, past &
proye. 57. b

pour faire Lanier gruyer. 71. b

du Lanier femelle, & de son Laneret
masle. 115. b

pour faire le Lardon. 101. b

pour bien faire l'oiseau au Leurre, &
pour le bien faire volerau gibbier.
70. a

pour faire vn oiseau à la guise de Lom-
bardie. 90. a

Lumbriques, qui sont petits vers de
dans le corps de l'oiseau. 81. b

M

oiseau Maigre comme doit estre mis
sus, & le signe de meigreur ou de
maladie. 69. a. 35. b

Maladies & medecines qui sont de-
dans le corps des oiseaux. 80. a

Mal des oreilles venu aux oiseaux de
rheume. 16. b

Mal des yeux des oiseaux, à cause de
rheume ou distillation de cerueau.
14. b

Mal de l'ongle qui vient en l'œil des
Faucons. 17. b

Mal des machouères, ses causes, si-

T A B L E.

- gnes & remedes. 22.a
 Mal du bec, de ses causes, signes & remedes. 22.a
 Mal subtil, de ses causes, signes & remedes. 32.b.82.b
 Mal de la pierre, où de la croye qui aduient aux boyaux des oiseaux. 23.b
 Mal de foye aduenant aux oiseaux, ses causes, signes & remedes. 29.a
 des Maladies de la superfluité. 94.a
 Manger hatif de l'oiseau luy cause quelquefois maladie. 65.a
 Malchoïeres, maladie qui vient dedans le bec des oiseaux. 22.a
 Medecine se doit donner aux oiseaux, apres auoir considéré la disposition d'iceux & la qualité du temps pour les bailler. 74.b
 Medecines laxatiues, & les doctes. 100.b
 Medin, est vne piece d'argent monnoyé, & de quel prix. 9.h
 Milan, oiseau de proye. 4.b
 Morfondure, qui aduient aux oiseaux par quelque accident. 32.b
 du Mouchet masse. 111.a
 Mousches comment se peuuent oster aux Faucons, ou faire mourir. 49.a
 Moyen aisé & propre pour conseruer l'oiseau en santé, & en bonne haleine. 14.b
 Moyens pour bien instruire & gouverner Faucons & autres oiseaux. 6.b
 Muë. La façon de mettre les oiseaux en muë. 45.b
 quels moyens sont propres pour auancer vn oiseau de Muë. 46.a
 quels moyens sont bons à garder pour faire que tous oiseaux se portét bien en la Muë. ibid.b
 comment on doit traicter Faucons apres qu'on les a leuez hors de la Muë. ibid.
 pour oiseau sortant de la Muë, gras, & orgueilleux rendre familier. 73.a
 quand l'oiseau perd le manger apres la Muë, remede pour luy donner appetit. ibid.b
 pour Muer le pennage de l'oiseau en blanc. 73.b
 pour muer l'oiseau, en quel temps, &c. 72.a
 les choses qui font Muer. 101.a

N

- Narilles & le bec des oiseaux malades, par quels remedes se guerissent. 19.a
 Nature diuerse des Faucons. 1.a.7.b
 Nature du masle & de la femelle des oiseaux de proye. 54.a
 Naturel des Faucons & oiseaux de proye est different. 7.b
 Niais oiseau. 63.b
 des Nocumens de la vertu. 93.b. & 94.a
 des Noms des oiseaux de proye. 114.a
 Nourriture des Faucons, & comme il les faut choisir. 114.b

Ocufs estans faicts par les Faucons, en deuiennent malades & en danger de mourir. 48. a. 73. a
 Oiseau degousté, remedes pour luy faire venir l'appetit. 35. a
 Oiseau trop maigre comme doit estre remis sus. 35. b
 Oiseau alenty & paresseux, ce qu'il luy faut faire. ibid.
 Oiseau qui a esté blessé de coup, quels remedes sont propres pour le guerir. 40. a
 Oiseau se grattant & demangeant les pieds, les moyens pour y obuier. 43. b
 Oiseau autres que Faucons de leurre & de poing, & de leur nature. 4. b
 Oiseaux de riuere. 5. a
 pour tenir les Oiseaux sains & en bon estat. 92. b
 de tous Oiseaux de proye, qui seruent à la Fauconnerie. 119. a
 pour Oiseller toutes manieres d'oiseaux. 92. a
 l'Ongle, mal qui vient en l'œil des Faucons. 17. b
 pour Ongle rompu renoueller. 70. b
 les Ongles des oiseaux estans rompus quels remedes sont propres pour les guerir. 48. a
 quand les Ongles se descharnent, ou viennent droicts & non crochus; le signe, de ce, la cause, & le remede. 85. a
 Oppilation, le signe, la cause & le remede. 76. a
 Os rompu, ou hors de son lieu, pour le faire reprendre. 80. a

Palais qui enfle aux oiseaux par froidure & rheume de teste. 21. a
 Pantais de la gorge, les causes & remedes. 30. a
 Pantais venant de froidure, les causes & remedes. 30. b
 Pantais, qui tient aux reins & rongnons, les signes, causes & remedes. 31. b
 Pantais, les signes, cause & remedes. 80. b
 Paupieres de l'oiseau, voyez Poupieres cy dessouz. 76. a
 Past & chair bonne & mauuaise pour paistre oiseau. 64. b
 Pelerin Faucon, & de sa nature. 2. a
 Pelerin Faucon en quoy different au Faucon Gentil. 8. b
 election du Faucon Pelerin. 88. b
 du Faucon Pelerin. 113. b
 pour muer le Pennage de l'oiseau en blanc. 73. b
 pour Penne froissée redresser, ou rompue enter, ou desioincte reserrer, ou perdue renoueller. 64. a
 pour Penne rompue d'un costé, & qui tient de l'autre. ibid.
 Penne arrachée par force, ou tirée en saing, le moyen de la faire reuenir. 50. b
 Pennes des ailles, rompues, par quels moyens les doit on racoustrer. 49. b
 Pepie, maladie des oiseaux, de ses causes, signes, & remedes. 20. b. 76. b
 pour desaccoustumer oiseau de soy Percher en arbre. 71. a
 quand l'oiseau se bat trop à la Perche. 73. b
 Pieds enflés de l'oiseau, quelles en sont les causes & remedes. 41. b

T A B L E.

Pierre, maladie des oiseaux, ses especes, causes & signes. 23. b. 83. b. 96. a
 Playe receuë par l'oiseau en heurtant. 79. b
 des Playes qui sont en l'oiseau. 99. a
 Podagre autrement nommee clouds & galles, la cause & le remede. 84. b. 97. a
 aux Podagres oiseaux comment faut rompre la iambe. 45. a
 Porter & contregarder l'oiseau, & luy accoustumer les chiens. 69. b
 maladie de Poulmon de l'oiseau, & le remede. 80. b
 Pouls comment se peuuent oster aux Faucons, ou faire mourir. 49. a. 78. a. 101. b
 Poupieres d'oiseaux malades par froidure de rheume. 17. a
 Poupieres de l'oiseau enflées, & le remede. 76. a
 Purger l'oiseau en tout temps, luy faire bon appetit & bon ventre. 67. a

R

Ramage oiseau. 63. b
 Raucité seiche de l'oiseau. 77. b
 Recepte pour garder les oiseaux en santé. 13. a
 Remede pour le mal de rheume enraciné de long temps. 15. a
 autre Remede pour la maladie dessusdicté. 16. a
 Remede pour descharger l'oiseau du rheume de la teste. 16. a
 Remede pour oster rheumes & eaux de la teste en lieu de tirer. 12. b
 Remede contre le mal qui aduient à l'oiseau par trop hastiement manger. 65. a

Remede pour faire aimer à son faucon les autres. 126. a
 Remedes propres pour guerir le mal de teste des oiseaux. 13. b
 Remedes pour guerir les oiseaux qui ont mal aux yeux. 14. b
 Remedes pour le mal de rheume enraciné de long temps. 15. a
 Remedes pour le mal des aureilles qui vient aux oiseaux. 16. b
 Remedes pour mal de paupieres. 17. a
 Remedes propres pour guerir le mal d'ongle. 17. b
 Remedes pour guerir l'oiseau qui a coup en l'œil. 17. b
 Remedes pour le mal de la taye en l'œil des oiseaux. 18. a
 Remedes pour le mal des narilles & du bec. 19. a
 Remedes propres pour l'oiseau qui ne enduit & passe sa gorge. 33. b
 Remedes pour guerir l'oiseau qui remet sa chair, & ne peut enduire. 34. b
 Remedes pour remettre l'oiseau desgousté. 35. a
 Remedes pour vn oiseau alenty & paresseux. 35. b
 Remedes pour remettre sus vn oiseau, quand il est trop maigre. 35. b
 Remettre sa chair, & ne pouuoir enduire. 34. b
 pour bien faire Reuenir l'oiseau, quand il a volé, & la cause pourquoy ne reuiuent. 70. b
 Rheumes, auxquels sont subiects les oiseaux, & le remede. 12. b. 15. a. b. 16. a
 Rheume enraciné de long temps, & qui procede de froidure. 15. a
 Rheume de la teste comme doit estre deschargé de l'oiseau. 16. a
 Rheume au cerueau de l'oiseau, la cause & le remede. 74. b

K k iij

T A B L E.

Rheume sec au cerueau de l'oiseau, les
signes, causes & remedes. 75.a
Rheume engendré au cerueau de l'oi-
seau par fumee, le signe & le remede.
75.a

S

Sacre faucon, & de sa nature. 3.b
Sacre, & de ses especes, condition &
proye. 58.a
du Sacre, & son Sacret. 108.b
Saffir faucon, & des autres faucons.
89.a
Sang assemblé & figé au ventre de l'oi-
seau, & le remede. 81.a
Sangues qui entrent dedans la gorge
des oiseaux, ou narilles. 21.b. 77.a
Santé de l'oiseau, comment doit estre
conseruee. 10.b. 14.b
les signes communs de Santé en l'oiseau
de proye. 68.a
pour entretenir l'oiseau en Santé, & le
preseruer de maladie. 66.a
pour cognoistre le Santé de tous oi-
seaux. 93.a
pour cognoistre la Santé & la maladie,
par la cure & par l'esmut. 94.a
Signes communs de la maladie en oi-
seau de proye. 74.b
les signes des infirmittez vniuerselles. 93.a
Soif de l'oiseau, la cause & le remede.
65.b
Sor oiseau. 63.b
Surdité des oreilles signe, la cause & le
remede. 76.a

T.

Taigne, qui vient aux ailles & queues

des oiseaux, & de ses especes. 36.b.
78.b
Taigne des oiseaux, premiere espee.
37.a
Taigne des oiseaux, seconde espee.
ibid. b
Taigne des oiseaux, troisieme espee.
38.a
du faucon Tartaror, ou de Tartarie, ou
Barbarie. 2.a. 114.a
Taye en l'œil des oiseaux, qu'acuuensap-
pellent verole. 18.a
Thraciens & les oiseaux de proye, gib-
boient ensemble aux oiseaux. 122.a
du Tiercelet masle. 109.b. 114.b
de la Tignolle, & de sa medecine. 99.a
Tremblement de l'oiseau, & le remede.
79.a
du faucon Tunicien, ou Punicien. 4.a.
114.a

V

du grand Vautour cendré. 106.b
du moyen Vautour, brun & blancha-
stre. 107.a
Venes des iambes de l'oiseau estou-
pees, pour le garentir des enflures.
44.a
pour estancher les Venes de l'oiseau, le
remede. 79.b
pour eslargir le Ventre & le boyau de
l'oiseau. 67.b
Ventosité engendree au corps de l'oi-
seau, les signes & le remede. 83.a.
98.b
Verole des oiseaux comment se guerist.
13.a
Vers ou filandres maladies des oiseaux,
de quatre especes. 26. 27. 28. &
96.b

T A B L E.

Vessie enflée en la plante de l'oiseau, & le remede.	85.b	Y	Yeux malades des oiseaux, à cause de rheume, ou distillation de cerueau.
Vol pour le gros.	5.b		14. b
Volerie des champs.	5.b		Yeux de l'oiseau enflés, & le remede.
Quand l'oiseau n'a volonté de Voler, le remede.	71.a		76.a
Prendre vn nouveau faucon.	125.a		contre le mal des Yeux de l'oiseau. 76.b

Fin de la Table de la Fauconnerie.

